

俞仲蔚集

十冊  
嘉靖刊本



俞仲蔚先生集序

友人弇州山叟王世貞撰

余以嘉靖癸丑有淮揚讞而投俞先生與定交後三歲丙辰而有三輔讞為稍梓俞先生詩以行而叙之其又二十有四歲而為

今上之庚辰俞先生老病死而余以此悲哀之已又志其葬又明年而



郡丞劉君謀盡梓其詩文未授鏹  
焉歛郡程于行者悉橐繼之而屬  
余叙夫余所揚隲俞先生雖後先  
殊大致謂詩五言古能趨建安以  
下迨齊梁錯而不諄格七言歌辭  
翩二自肆或深或淺不名一家獨近  
體為小瀛而絕句時自會心文主  
東京小語間入晉宗旨不必雋而

骨在緯不必麗而質勝其於泉石  
家諧本色毋亦布衣之赤幟乎哉  
自余之語出而俞先生論稍定獨  
其於隱雖天下之人慕說之而未  
能名其格者夫上隱生而剗聲茹  
勤攻苦自放於鹿麕之外樵父牧豎  
能狎而不能敬賢達之士可意想而  
不可跡之乃俞先生故縉紳子少亦嘗



事博士經數竒而後棄之筋力柔  
懶善頭風耕不能為鹿門德公傭  
不能為臯橋伯鸞游不能為禽息  
向子平而累馬寄一廛於十室之  
邑居恒自謂吾不徇人亦不避人吾不  
厭世亦不侮世吾不以名就名亦不以  
匿名釣名如是而已夫俞先生以善  
病故其足不能出百里外雖然縱不

能游五岳不賢於游五侯乎哉且夫  
隱至俞先生亦足矣何至必欲併跡  
而滅之然後稱上隱或謂俞先生集  
所酬贈多宦路頭者此事獨余識之  
蓋余以詩定俞先生交而所善吳興  
徐子與來子與於游道廣天下自  
是慕說俞先生爭欲得俞先生言  
俞先生無所拒然亦無所援納俞先



俞允文先生集卷八  
生少貧所食恒半菘至或併日炊然  
一介無所取晚節聲轉重人或以誼  
餉者亦不為飾辭然大不能至東帛  
小或弄器食而已昔許玄度臥永興  
南幽穴而致四方諸侯之遺人或以箕  
山人謂之碩謂筐篚苞苴輕於天下  
之寶為解傳奇者亦毋用是而廢  
其拙逸此何足軒輕俞先生哉蓋

俞先生去諸生即為贊高士如干人  
以寓其微指而所操論獨不喜郭  
林宗以捨己而就天下之好布衣而  
侵司徒之秉正當要之俞先生雖不  
竟自晦於隱道庶幾能持衡者故  
因程氏請及之以俟傳文苑隱逸者  
折衷焉





俞仲蔚集序

吾所與布衣遊者三人俞允文仲蔚謝榛茂秦盧柟次榎謝盧故河北人任俠往來燕趙間燕趙書生習稱之而仲蔚好里居又善病病輒不出應客家人數米而炊旦夕不辨治飯即且治糜耳終不能有所干謁凡仲蔚所為行桑樞





唯藜藿不馱死而已而其自托  
古文辭特甚吳中少年習聞其鄉  
有名者則日益事相貴推竊不休  
篩嫫母揚其直而隳之乃仲蔚弗  
顧也謂余曰而來前而為黃初之  
際乎哉蓋洋々如也即不遂方軌  
而執鞭者忻然矣仲蔚又稍馱唐  
以後書雖不能盡屏蒐獵一二計

以共埽除之後非素所做慕也以  
故益曰與諸少年倍仲蔚之文與  
轂不能走闐闐而南北雖然海內  
更二三君子亡鄙余者與仲蔚相  
驩足老也即不可而使仲蔚率棄  
其故而臣諸少年婆娑漫涵白首  
途遠豈其能遂重洛陽帟而以是  
戮哉然又胡竟寡々乎仲蔚也五



蔡先生集卷八  
父人積壽夢之鼎者齋而後出視  
客客曰嘻主豈教余於無鼎哉默  
其窾聚金而液之以意加新焉出  
鬻而賈者蠅集也過五父睨而弗  
視曰烏用是文閣習而泯之者此  
非其體貴賤殊也則所由辨難矣  
仲蔚投余集十卷不佞得寓目焉  
更之為四卷賦及詩雜文若干篇  
夫賦余不知其所自也其楚人哉  
五言古志而沉深潘陸之儔盱歟  
知其毋齊梁靡也七言古之麗以  
則也五言律之思也長篇之莊也  
五七言之悠然而雋也文之為贊  
也銘也赤牘也七子所懼然而辟  
易也夫

嘉靖丙辰秋王世貞書





俞仲蔚先生遺像



俞仲蔚先生遺像



俞仲蔚先生像贊

編、先生毓自華族厥毓伊何扶輿清、粹夷瀕麋朗郁譬彼崑岡壁甫辭璞高風穆如見者體肅云何七尺千古攸屬厥屬伊何縱以穎資組為文章韻則聲詩竭履隆始盡沃時私賈其餘工以逮臨池少而學成晚則名歸其名之歸集若麇追其言之行不經自馳穆、先生澹焉若無室宇蔽風蓬蒿不誅孺子可狎薄號足驅黜聰養飶動靜天俱如何一疾精靈永閱其貌猶生問言不對是耶非耶令我長喟病而登牀迴眸爛然何必三毛益爾頰妍千秋視之非真則仁 王世貞撰

仲蔚先生集目錄

卷之一

賦

離愍賦

九日賦

玉屏山居賦

午山賦

送朱氏女

來雁賦

蟋蟀賦

菊賦

黃墻薇賦

護草賦

悼往賦

會芳園賦



卷之二

四言古詩

贈王元美

公入覲

離合體

送郡太守西蜀王

雜言

贈邵孟堅

卷之三

五言古詩

感遇十首

讀貨殖傳七首

遊仙十首

黃鵠吟

桃源行

入塞

秋懷二首

雜詩二首

園居

感懷六首

詠史七首

擬古二首

秋蘭吟

出塞

閒居二首

秋懷一首

夏日園居三首

雜詠



甲子正月元日作

題程汝義西野林園 七日大雪作

感秋作 春晴行園

晚晴溪上 苦旱

晚晴 早涼池上作

幽居即事 閒情

雪中有懷貽文太史徽仲

新秋東郊遊眺 山中玩月

秋日江上 己未中秋月食作

養疾 初夏雨中三十韻

結客少年場

王元美兄弟遊惠山次唐人韻三首以余

嘗至此山要與同賦遂有此作

登銅井最高頂望太湖

自京口渡揚子至瓜州還登金山瞻眺

題黃鶴樓詩寄長興徐子與

秋日與周公瑕張師文兄弟登馬鞍山作

遊聖像寺作 玉女潭



登毗盧閣

楞伽山中訪殷秀才讀書處

贈荆溪老人

贈太雲英上人

送陸山人之上都謁汪中丞

送內兄梁石仲之任平陽將遊天台

送郡太守王公權常鎮兵備副使

送海虞熊學諭歸將樂

送郡太守西蜀王公廷入覲分得辟疆園

送葉伯寅會試上都

送梁伯龍遊楚并寄周水部有序

送顧子韶以部歸上都 二首

送張伯起兄弟遊南都

送陸水部子傳北上

送周天球應辟赴嘉定教授

送梁石仲遊金陵 送王明善

送丁道卿赴辟 贈穆禮部太公

劉光祿 董中丞

積雪凝寒 送王太僕



俞允恭先生集  
目錄  
四  
文休承臨趙子昂水村圖

吳郡太守永康徐公祠堂

荅邑丞何侯遺碎蘭花一首

貽周夢山

贈南禪集雲寺性公 画草虫

登馬鞍山次孟東野張丞吉韻

荅王郎中元美三首

陳公儲画龍水圖

少林僧徒一百二十人赴義討賊軍次海

上不屬諸道帥聞而壯之遂賦此作

贈龔温州

送如顛上人南遊將謁龔太守

荅周水部胤昌 陸光祿卜居

送曹巽學赴上都 飲周鳳來園亭

貽徐道潛 挽歌

贈劉生 贈陳山人

顧方伯西園宴集一首

送內兄梁叅軍南仲 荅王郎中元美



寄上劉尚書

題伏生授書圖

書李唐画采薇圖後

貽元美

送許明府之蕭山

送周水部胤昌還上都

送吳山人志道往閩中謁汪中丞

贈休寧程汝玉

贈林上人

送汪禹乂還新安

太原太守於侯德政詩

河陽溫侍御不冠詩  
有懷徐汝寧

贛州康處士草亭

王元美離蕢園

阻雨夜宿盤門石橋西

葉姬篇

雜詩二首

說劍送周孺允

吳江普濟寺古柏

寄李攀龍二首

與王元美三首  
序

贈林居士

寄題蘄州高別駕園林

贈莫雲卿

送葉伯宣遊永嘉

寄吳明卿

寄徐子與



俞允恭先生集  
送周芝孫北遊

送徐按察叔明之湖廣

送王少叅敬美之江州

送王儀部敬美赴上都

秋日四首

九日

秋懷

丁巳七月九日大風拔木偃稼一首

漁父

秋夜

登圖山

贈虞山老人

贈竹洲館溇道士

送顧舜祥授四川鹽課提舉之任二首

送王元甫

送句容周明府遷南京大理評事

送梁伯龍游天台將往武夷

卷之四

七言古詩

金陵篇

楊花落



桃源行

胡笳曲

寶劍篇

巫山高

塞上曲

銅雀妓

虎丘行

鬪鷄篇

春思曲

明月引

大風歌

絕纓曲

學仙

画山水歌

蘭州花

羅蒙茶歌

姑蘇驛樓

妾薄命

綉枕歌

周方伯遺鎮南小劍歌

松雲歌贈邑明府大梁王公

折楊柳送周別駕胤昌之武岡

燕臺歌送張師周入京

征馬嘶送歸有光

范公柏歌贈三晉王公

雲峯歌贈廬陵朱學諭

小松歌贈朱山人

寄王憲使元美



送顧禹祥計偕赴京師

送太僕丞周于霄赴遼陽

送梁石仲計偕赴京師

送納言張公遊武當山

寄贈吳興范脩撰

長歌行送徐子與赴上都

送楊別駕之大名

侯建寧人文敏公榮之後

巨鰲歌送王子敬子欽兄弟會試北上

贈歛方同祚

送蔣生歸鄖陽

送善奕劉山人歸由拳

郭將軍歌

贈善相郁居士

贈性公

貽王元美

送慈溪吳志道再往邵武謁吳使君

文內翰所藏趙魏公畫馬歌

王尚書古松幃子歌

王公名以旂

金翅鳥食龍歌

獅子搏虎歌

龍水圖

畫竹歌贈彭明府

周使君丹臺五松圖歌



孫少府蒲萄園歌

與沈隱君換馬鞍山石歌

險竿行

贈詹生龍澗

送太倉宋學官遷國子助教

秋夜長

送吳純甫會試之京師

老将行

送徐桴明觀察之武昌

卽官柏歌贈許給事

送姚知道北遊

楊花舞歌

竹枝舞歌

幽蘭舞歌

梅花舞歌

方壺圖歌

夜猿啼

五色牡丹歌

贈戴卽

晚山庭

讀管晏傳有感

龍劍出匣歌

天馬歌

寒鴉吟

虎丘茶歌訓周仲子

清明得出字前平後仄



送徐郎中子與遷汀州太守

送鄔駙馬獻壽還京師

訓王敬文推官寄建溪秋蘭兼要將武吏

山

安樂謠贈南陽太守徐子言

送梁伯龍游大山西登嵩少遂入秦中望

塞垣詩一首

龍別駕黔中八景圖歌

葉氏紫竹草堂歌

歲晏逢二子行

二子徐使君子  
與王憲副元美

送周孺允計偕赴上都

徐汝寧被播後經吳門周公瑕王元美兄

弟載酒邀泛石湖分韻得客字

南山虎皮歌訓曹昭服

屈初画古松

憫匏尊并序

送紫都事虞叙之越中楊將軍歌

卷之五

五言律詩



塞下

聞南征

閒居二首

朱氏園林二首

周氏園亭

贈常熟張居士

舟次罨畫溪

豔曲

夜過周夢山宅月下留酌登板橋作

哭集雲寺明性上人二首

贈孫守社

閒居

獨坐

章皇帝畫馬圖詩

周征西將軍祠

邊城秋思

入玉陽山

岳山人岱許龍禽見寄貽詩趨之

鋒

秋日感懷

出塞二首

張通政丈餉新茶賦此奉謝

寇亂意朱氏長女

夜望城上燈同諸公作

春日雪中

吞周鳳起林園獨居一首



蛺蝶圖

日

月

星

雲

風

霧

雪

珠

玉

閒居

南禪寺晚眺

題雜画送龍共温州

贈高煉師三首

送童子鳴歸太末分韻得銷夏灣

贈方士

贈黎學官令子

贈郭將軍

隆慶改元詔免天下田租之半尋復停羅

吏治益促百姓缺望時值燬蒸有感一

首

九龍山居

送周燕生應試南都

王氏湖上園林

送嚴汝和赴烏程

送徐按察林明之汀贛

殷無美掩關詩

苦熱



送陳鄭州服竟之上都

將去舊宅玉蘭花開有感一首

哭大司寇顧公

四首

送王觀察元美之晉陽

三首

桂檝泛河中

名都一何綺

為我彈鳴琴

羽觴飛上苑

謁帝承明廬

處處春雲生

往往孤山暎

巖穴無結搆

寄周胤昌

二首

吳興道中

二首

留別徐子與

二首

顧山人元慶大石山居

送王大參明輔赴陝西

送梁之隆之崇府

送徐副使焯明赴鄖陽

二首

辛酉秋日苦雨

贈醫士

爆竹得無字

春帖得平字

卧疾

和顧禹祥

峇徐道潛惠舊端石圓硯



俞何蔚先生集  
玉蘭花

閒居戲效回文體

詠草

元日日食有感

鏡

九日讀陶彭澤詩有感 二首

春岸望江

獨往一首

送周廉使赴西川

贈張師周讀書鄧尉山居

贈周道士

贈劉將軍

丹陽孫氏園亭

夜

虱

蚊

筆

送梁伯龍

秋海棠

贈春上人

題畫寄龔使君秉德 七首

清真觀訪李明舛不遇

閒居

登焦山

月下見負薪者

咏劍

威鳳棲梧桐

詠刀

詠馬



董子元移居次韻 二首

靈隱寺

入呼猿洞作

行經岳鄂王墓

早登寶琳山寺望湖中作

送秦君敷明府之德化 二首

問舍不得有感一首 寄徐少叅子與 五首

送王比部改北部之上都 二首

賦得涿令行春反 程惟元秀才

贈玄妙觀朱煉師 題文待詔畫

瀟湘夜雨 烟寺晚鐘

漁村夕照 陳氏紫薇山房

何太學伯謙山居 贈從弟肇甫

卜居 送顧太學之選部

抽思 七首 并序 送徐按察子與 四首

薄帷鑑明月 長笛吐清氣

風生翠竹裏 采藥遊名山

俠客控絕影

初春病起有懷元美伯仲



早梅得天字

深夜 二首

雪後登山樓

宿南禪山房

卧疾

送王敬美 二首

送周叅政子純赴四川

三首

送周秀才

送鄔駙馬

周渭陽生子

送王儀部敬美

寄武岡王

別徐太守子與

送從子伯良迎婚雲中

答陽山顧願

答徐子與 二首

玉蘭

周金華

送周使君赴金華

二首

芳樹贈別駕

汪民部遊吳中諸山

靈樨

橄欖

龔秀才處乞榛榘栽

贈劉道士

山谿

九日遣興

賦得鷺鷥贈朱黃門

蘭

除夕

元日

送羽士

夏日懷吳德重

自潤州城南往虎踞山招隱寺訪戴顯故



宅行經黃鶴磨笄菊花諸山瞻眺一首

詠筆

詠墨

與子與登呂山一首 吳興道中

棲賢笄出湖州棲賢寺其色如玉甘脆特

異箬微薰嗅之如蘭花云

西湖泛舟

風木

倚梧

贈秋山上人采藥

虎立慈上人

徐父果九霞山亭

王比部昂齋見訪遂還上都賦以奉贈首二

喜得徐少叅子與滇中書二首

贈張煉師

蓮花朵田叟

附六言律一首

朝爽樓即事

卷之六

七言律詩

送顧子韶副使遊武林

王大史宅碧牡丹次韻王元美一首

漂母墓

愛妾換馬

奉荅輔國將軍豫章朱用晦次韻一首



賦得龍石贈休寧程于行

有懷金陵舊遊作

送馮山人遊廬山

冬夜同王副使元美進士敬美許給事伯  
雲晏陸舛原林亭送徐使君子與分得  
花字

春寒有懷

除夕陸光祿丈遺新曆烏薪作此奉謝

聞張尚書軍至蘇州 毛女

安石榴擬應制

早梅擬應制

江梅感事和朱察卿 二首

王百谷半偈菴新成一首

落日浮舟過虎山橋望洞庭諸山

潘侍御巡按嶺表有甘露降于庭樹同諸

公之作

送邵叅將赴惠潮

送廣西計教諭遷國子博士

元日次王元美韻

紅牡丹得雲字

送王元美敬美赴 闕上書

寄李于鱗

昭許明府乞画眉



顧懋儉白雁

白鷺

題葉伯寅安石榴圖

寄陝西王大叅明輔一首并送玉環一枝  
李于鱗訪王元美兄弟夜經崑山不遂披  
靚寄詩存慰次韻奉答

送談太常詣闕上疏乞營先中丞墓田

二首

早朝

贈周煉師

棲居自述

立秋日同陳庫部徐文學王比部宴集王

使君池亭觀荷比部首為長句二首見  
示使君復貽示相和之什仍促和詞遂

次韻二首

楊將軍牡丹圖

訓南昌余按察德甫次韻

送王鴻臚

送顧太叅赴任貴州兼督湖廣四川三省

糧儲

訓王中丞元美兼要寫武當之作



雙鳳周文學庭前玉蘭次韻一首

卷之七

五言排律

擬元日侍宴應制

擬人日侍宴應制

擬十五夜燃燈繼以輔宴應制

擬五日望拾採應制

擬冬至應制

從軍行

奉贈楚王

張明府秋日登寶山望海同諸公之作

八月十八日觀濤作

送溫侍御還京師

贈王郎元美二首

贈任別駕遷太倉兵備副使

送葛理卿比部奉使減江右刑獄

送李別駕賀聖誕赴上都

贈詹處士從柳將軍破山獠一首

奉贈瑞昌王

送張明府赴京師

贈鄔駙馬還京師

送顧符卿奉使冊封晉王還朝



送王別駕遷工部員外郎

秋日園居二首

題周氏園亭

葉伯寅新亭

同曹進士遊虎丘山

王明佐游天池山次韻一首

孔子廟杏壇

夾綃屏風

吳山人病瘳

贈常熟顧太醫

送顧副使子韶赴辰沅

送栗別駕遷陝西副使

送歸開甫之信都

送董侍御還上都二十韻代

贈梁石仲二十韻

送范太守擢雲南兵備副使四十韻

送王大叅赴陝西三十韻

嘉靖辛酉夏苦雨三十韻

黔蠻次周太僕四十韻

聞海賊自嘉定至太倉南門焚掠殆盡數

日兵不得進復留屯上海諸道更不發



兵因賦此作二首

玉蘭花

詠芝草

鸚鵡

早梅

送大倉孫候遷本郡別駕

周鎮平將軍旌孝詩十六韻

寄吳中書

奉陪大中丞西蜀張公宴王觀察元美西園

園二首

端午日奉陪張中丞宴王觀察元美西園

送王觀察元美之武昌

詠仙女

送顧子韶觀察之嶺表

送葛運使之杭州

卷之八

五言絕句

柳塘

秋江

雪

松



竹

朝日

月出

水仙

龍磯

臨江館

仙臺

古閣

蘭蕙畹

松篁徑

麒麟山

鴻渚

茶改

鴛渚

庭中橘樹

嵐霏

松筠徑

蘭蕙階

儼臺

鴻渚

楚嶠

戲傲純陽

擬古

送謝教授致仕歸襄陽二首

紫薇

桂

水芙蓉

淡竹

柘卷

雜詠八首

卷之九



七言絕句

塞上曲 十首

宮詞 六首

贈法貞上人

寒食

有感

無題

搗衣 二首

泉

園居

送吳處士中才

夏日園居

鶯

鷄

雁

雜詩 八首

送休寧汪禹東之武林

牡丹

荷花

黃葵

雞冠

瑞香

山茶

芙蓉

玉樓春

葉伯寅中歲生子以王明佐所作玉蘭圖

見示因大快寫高松芝草并詩奉賀

題画

魚景

寒食得春字



奉酬徐使君子與以詩相邀撰汝寧志兼

遊嵩山四首

題画 二首

春思 九首

宮詞

有懷金陵

湘妃

清泉寺川上人

上人自歛而來孟中貯墨徧施擅越乃開

募疏

川上人西還附訓王仲房

贈川上人

有懷元美兄弟

二首

晏坐

画白鷹

題画

宿鸞脰湖

雜咏

聽歌

題白頭鳥

題文待詔玄墓四遊小幅 四首

雜詠 三首

秋江晚照圖

白鸚鵡

謝金園南餉二泉天池茶



卷之十

序

送王郎中元美還京師序

送趙廬夫遊武夷序

送顧舜祥授四川鹽課提舉赴治所詩序

送狄博士之國子序

送周若蒙良醫之任序

侍御史八閩陳公德政圖頌序

送歸開甫赴長興序

送大中丞觀所周公赴江右治所序

濱州別駕金公五子字序

送邑博厚菴計君遷國子博士之任序

賀太學君魏濬甫五十序

送董山人歸將樂序

送蘄州守滁州石侯入覲序

送浮梁吳先生之任海寧序

送朱憲曹赴閩臬序

贈大雲菴雲上人序 水東日記序



徐相公少湖榮壽詩序

平黎詩序

平夷倡和詩序

周憲王所模蘭亭序

居庸詩序

荆溪唱和詩序

題梁伯龍遊越中詩後序

贈王按察伯和序

華陽館集序

青蘿館詩序

贈邵武太守江右古華賴公滿秩留任序

薄䟽書序

汪禹乂暨元配程夫人六十偕壽序

卷之十一

記

遊馬鞍山記

冷然亭記

九龍山居記

西野書屋記

卷之十二

傳



何公傳

周公傳

石虛中傳

卷之十三

墓誌銘

亡友周子舜墓誌銘 亡女塘埭誌銘

明故鄉貢士梁府君孺人狄氏墓誌銘

張母鈕孺人墓誌銘 沈孝叔權厝誌

故處士程汝義妻汪孺人墓誌銘

吳孺人權厝誌 亡兄階甫埋石志

三弟季通墓誌

卷之十四

墓表

故處士朱君墓表

卷之十五

碑

嘉定重建啓公祠碑

吳江縣脩城碑銘代



卷之十六

行狀

先妣夫人黃氏行狀

卷之十七

頌

文德頌并序代

武功頌并序代

保障江南頌并序

邑侯宋公榮名頌并序

耆英頌并序

吳郡太守太原王公宣風頌

卷之十八

韻

高士贊并序

榮啓期周五人

林類

原憲

列禦寇



莊周

四皓

東園公  
綺里季

角里先生  
夏黃公

秦二

顏濁

摯峻

西漢三人

嚴君平

鄭樸

韓順

東漢十八人

甲屠蟠

向長

龐公

矯慎

法真

高鳳

戴良

嚴子陵

王霸

郭泰

梁鴻

周燮

黃憲

徐穉

焦先

侯瑾

姜肱

董魚

宋纖

孫登

陶淡  
陶淵明

循吏贊

并序十八人

呂純陽贊

魯仲連先生贊

并序

齊王田橫贊

并序



命竹齋先生集  
目錄  
漢壽亭侯關公贊

孫臏

金先生閒居圖贊 并序

陸翁閒居圖贊 并序

貞孝讚 并序

金胤甫像贊

卷之十九

銘

座右銘 并序

四銘 并序

歌器

挈壺

玄鑑

靈鐘

龍尾石硯銘

井銘 并序

卷之二十

誄

東海徐公誄

明故刑部尚書誄

故學士華公誄 并序

卷之二十一



祭文

祭内兄梁貞仲文

祭朱侍郎文

祭周虞琳文

祭文内翰文

祭張通進文

哀張處士文 并序

劾漢楊孫羸葬文 并序

卷之二十二

雜著

原怪

漢印說

重脩大雲菴半野堂乞緣疏

字義

平倭事宜狀代

治水述

卷之二十三

書啟

上王侍郎啟

謝大中丞銅梁張公啟

上張中丞所著詩啟



答王元美書

答陽曲王布政明輔

與王建寧敬文書

答王元美

答張中丞書

上郡太守范公書

與王元美書

答吳明卿書

答陸光祿書

上郡學教授向先生書

答歸有光書

與李于麟書

與吳給事明可書

答王元美書

答吳明卿書 二首

與李于麟 二首

答汪中丞

與周太叅乞除名書

答徐子與 三首

謝王太守

答王元美

謝徐子與

答張推官

與王元美

答沈克俞

與周維辰

答程于行 六首

卷之二十四



跋

題翁氏宗譜

題職貢獅子圖後

題沈周鷄鵝圖後

題麻姑仙壇刻

題松雪書

題大叅永嘉王公所藏趙子昂大洞經後

題海天落照圖

題趙伯駒畫陶靖節歸去來辭圖趙承旨

書詞真蹟

題文待詔玄墓四游圖

題褚摹蘭亭

題元人臨聖教序

書王青州元美白蓮圖社後

題王右軍草書要領

附錄

明高士俞仲蔚先生行狀 顧章志

明高士俞仲蔚先生墓志 王世貞

明高士俞仲蔚先生墓表 汪道昆

明高士俞仲蔚先生傳 王世懋



俞仲蔚元配梁碩人墓誌

王世懋

仲蔚先生集卷之一

吳郡俞允文著

徽郡程善定校

賦

離愍賦

恍朱夏之煩醒兮喜脩陽之已闌  
忽廩廩以侵急兮矜締紘之夕單  
天廩廩以高暘兮勁颼激而涌湍  
素月汎濫而鑑體兮皓霜雪之溥溥  
宵耿耿其增永兮若重處乎深山  
穠膚慘慘以就



實兮慕矜計之早完夫何著意而不可化兮愁  
曩曩其何時殫惟貧士之失職兮諒當春而寡  
歡氣燥疾而內注兮反滛溢而在顏玉色晦  
以先暮兮四序替化而不還身懦懦而易傾兮  
矧此世之逢艱終軍建祚于童牙兮尚父善悞  
而始振通鼓鑄而鞠死兮非信辨而就棺人各  
受天地之正命兮寧改度而橫干收予情而抗  
夫廉貞兮超永踈而離羣羗孰察其所主正兮  
中自達于旻乾世情情皆皮相兮慨何世而無

賢眇長饑之無時兮何樂斯之自殘固萬變之  
不可蓋兮予將專壹志而不刊咨溺馮之媒禍  
兮重爽惑之盪盪衆愈信信其日得兮曾不可  
與晤言聞至人之無累兮委精蘼而上搏精杳  
杳邈不可彷彿兮猶恐斯言之未然直狂狂其  
無成兮方駑駿而一貫厲孤響而誰讚兮輟雅  
意干挫歎抱竒行而譽作兮亦湏臾而成蹇好  
同己而嫉異兮雖萬世其猶未遠馳跬步而九  
折兮思展足之甚難塊形骸而獨處兮神相羊



而絕端盡反監夫黃心兮求古人之所安亂曰  
陰陽設機不可計極兮九區蓊蓊又孰可距兮  
反志遙興乃永自得兮首陽歲崔曾莫之隘兮  
叢薄外蔽其內通博兮去彼昏昏就昭晰兮高  
邁無物永以為服兮

九日賦

肇九旻之令節肅淒辰之始霜悴百卉于綠林  
歛萬實于白藏于時律中無射日躔在房山檄  
凝丹禽華吐黃感靈鍾于豐頰收帝籍于神倉

惟日月之並應數邁九而皆陽懿嘉名之宜久  
故高會而薦觴或助術于彭祖或弭禍于長房  
或羞實以效新或食服以致康若乃駕言龍山  
于茲颺館登戲馬之楚臺弋翔鴻于沙苑咸宴  
凱而稱詩悉鈎竒而摛揆至如紫塞草白胡山  
氣高雲物無擾上屬澄霄觴竿精堅弓勁鷹豪  
狐兔鮮肥人馬並驕攷千緡之赤羽勒萬騎之  
黑貂或翔畋于廣虛之野或校獵于莽蒼之郊  
彌岡巒而掩格被川谷而橫捎莫不致竒獲以



耀武聊割鮮而騁豪及夫蘭閨少婦榆關疲客  
結離思之幽遐念佳期之永隔睇來雁而增歎  
學裁鴛而掩泣寒聲壯兮悽心脾夜被空兮月  
入室徒有地兮限南北欲授服兮無由得愴無  
由兮思彌深鍼縷列趾兮抽余心心之抽兮魂  
四溢魂四溢兮夢難集雖有刀尺兮忘疇昔或  
有放臣去國感千分以測景志士思名薄迅商  
而孤騫怵憚兮迤邐淹留兮蹇連繁陰積兮鬱  
素川雲簪簪兮救窮天悅踟躕而延佇眇去楚  
而辭燕于是僕本畸人棲遲止樊于焉邁遙聊  
以盤桓驚四序之改節悲倏忽之徂年想前蹤  
之攸邁覽窮達之異源超遐迴以暢志鈔衆慮  
而為言憂歡軋其相承兮心與蹟猶未泯世固  
智寡而艱多兮孰云喻其萌祗之所先齊萬族  
乃無累兮求周賈之冥筮庶憑化以無吝兮還  
吾反乎自然

玉屏山居賦

夫何瑰嶷歸巖而寡麗兮挺孤秀于平臯璠玕



琪之燦炳以遺照兮聳脩屏而建標面文頰之

嶂屹兮帶二谿之淪坳二谿文森翳蒼之菁葱

兮掩霞芬而上交託荆豫以曜質兮應斗極以

示允固缺紀于常篇兮亦抗竒于近郊伊濬哲

之攸止兮肆編茨而搴茅葺芳槿于扶掖兮羅

穹岷于軒棹豈取路于華閭兮每収聽于林巢

陋區中之委曲兮獨延覽以逍遙山盤盪以錯

峙兮象瀆淪之涌濤候氛颯之變黓兮羗近失

乎岑藪泉濛濛其飄灑兮鬱翠霧于曾霄烏譱

鳴而啁枝兮猿淒吟而擁條送流月于秋渚兮

覲升陽于春翹乍容與而休精兮佇惠風以自

陶頤冲志于典墳兮滌煩想于喧囂漱乳竇之

積液兮咀瓊芝以為膏循四序以為則兮混萬

族而不恠固忘已而自適兮匪違人而后高臣

臣智貞觀中至廬山遇異人曰此陰別谷而遙

興兮度盧度隱居偃蹇于巖樹應真唐武德間

錫結菴于潮飛錫而泠泠兮瑤晉永嘉中有王

山通天巖滅景于康廖苟涉無而反經兮固徇有者之



所嘲諒伊人之濬哲兮遵中和之所操求昔士  
之所迷兮咸永逝于重幽泯心跡而齊同兮遷  
自然之至要聊援翰而宣詞兮庶揚蕤而靡彫

午山賦 并叙

少宰蘄州馮公嘗行營先冢於安陽之山忽  
得竒穴石理膩潤有文成午宛若刺畫卜者  
咸共驚嘆以為元禎公由是遂為起壑奠域  
奉先妥靈以永休祚因名其山曰午山志元  
禎焉仍以自號雖造次有不忘墟墓之思以

敦終慕之孝曩者公兩奉殊旨督學南畿而  
某因緣幸會謬蒙采拔濫以駑猥之材方之  
駿珍之駕兼辱垂示斯禎教使為賦竊惟公  
資忠履信抱義含仁至孝然天神闡靈既誠  
宜昭宣述作軼休前載時輒受命不量狹聞  
緣情遣言牽綴斯作其詞曰

繫二儀之初載兮混協氣而陶蒸紛融結而流  
峙兮挽五土而肇形川澔泔而灌注兮山逶迤  
而相經肆磅礴而萃止兮亘八紘之奧冥既巨



麗之難紀兮孰遐恠而可稱惟荆巫之歸截兮  
跨七澤之澹澹緣大江以裾勢兮應翼軫而儲  
精奄隆崇而峯萃兮又螺廓而岑崟日与月其  
蔽虧兮鞠崕岫而干青雲道媯墟之塊圮兮崦  
紛錯而無垠安陽崛其獨出兮異造化之制作  
雲陰閉而陽開兮乃通靈而礎礪別重巒之結  
奏兮帶江夏之脩垌吐清風於巖窾兮納歸雲  
於岭嶮甘泉灑液以潛浸兮琪榭翦蔓而吐英  
觀豐蔚之所盛兮乃迤靡乎沃瀛歷衆山以周

流兮眇茲山之與京於黃祗之得一兮不貴德  
而藏珍逋哲人之玄覽兮指西東以行營亦載  
輿而載步兮愴夕降而朝升趨東阨以瞰窅窅  
兮仍取路乎峻嶒精誠檄而上究兮欽逆釐于  
皇穹諒無德而弗祐兮遂啓秘而示形簡良辰  
而爰度兮鑽介龜而觀禎刊叢林之腫暖兮隳  
魏山之嶢崢石嶙峋以分劃兮縈支脉而起文  
文昭回而成午兮象衡陽之上征燁朱明之屆  
律兮阜萬物之滋榮端逢占之休讖兮若預合



于舍弘隘芙蓉之始燁兮佃休牛之帝堪泰連  
理而開祥兮柳谷崩而發朕彼閔誕而非徵兮  
奚表仙而蓄聖相厥兆之既美兮豈它山之為  
品蘊冲和之全氣兮峻天標而竒挺搆大槩而  
系隧兮浚蒲瀆而旁引嶸雙表之巖巖兮列行  
楸之軫軫玄堂粥粥其盡規兮心京京而祗懍  
奉厥考以奠靈兮神洋洋而永存地德翕其上  
載兮天光發而下新鬱佳城之雍雍兮羅魁封  
之塏垣伊孝思之搏搏兮尋響像於丘墳言有

觸而必感兮時當媮而寡歡申嘉號以寄款兮  
悲欲報之無因精搖搖以增思兮思孝莫大乎  
顯親頓雲網而振臨兮遂羽儀於大庭炳繡衣  
之絳繒兮抱鳴玉之將將譬芬菲於屈草兮凜  
威噏乎秋霜典乘驄以懾奸兮網埋輪而挫強  
謬義形於二子兮起席視而鷹揚帝命赫而載  
降兮握文樞於南邦洪陶化於多士兮攬道德  
之芬芳連麗詞於春藻兮析雄辨於毫芒咸礪  
金而琢玉兮隨從風而飄揚茂垂範而章程兮



馳長譽之煌煌陟司理而明慎之務哀蠲而若  
傷懲繁辜之顛酷予謂淫刑之不臧監澗石以  
自準予侔臯陶之翊唐遭休明之優渥予讚庶  
績於銓衡行貞固而清簡予循名實而不爽允  
領袖而作哲兮昭選賢而舉良不抑搢以渝化  
予正規矩之員方何蕭艾之不捐予何蘭蕙之  
不芳冠峨峨以轟轟予儼玉貌之肅肅巖丹柱  
之榮題予比昔稱於往錄儷黼袞而增華予配  
台岳而齊躅邈純懿之全德予摠九流而共輻

覃顯親而揚名予惟終慕之悠蕩曰余小子之  
顛蒙予獨竄竄而介立遵典謨之遺訓予尚先  
聖之貞則承惠渥之荐加予退求己而無匹忖  
劣才之踰涯予竊蒙霧而願澤胡日月之過萬  
兮荷欵眷之逾昵魂續紛以正營予累知人之  
厚德偉元符之絕世予嗟孝道之無窮實天地  
之經義予為萬善之所宗聊揆翰而頌言予媿  
斯言之未工願景福之駢蕃予貫千祀而彌崇

送朱氏女

并序



昔王文公介甫文章節行著一世而又獲重  
睽於其主且時屬承平於情事宜復藹藹至  
送蔡氏女之作殊以雅麗之詞寓憂思之旨  
而朱子以其詞近於楚信乎情之所鍾疇復  
能已况余窮居奄邁世難而女以弱齡奔竄  
靡所則雖重簡累牘又能摠此情結乎因其  
歸書此與之

秋為氣兮怨恨多木葉落兮水增波登高送遠  
兮音信踈盜賊縱橫兮柰汝何我生不辰兮離  
干戈生汝實多兮重枝疊柯辭家事人兮惟古  
初念當復離兮涕滂沱

望極浦兮又遠出迴汀兮已連山澹澹兮欲沒  
舟遙遙兮造天蘭芷馨兮有華菰蒲綠兮無烟  
額容与夫安流兮無有震愆曠若處此堂階兮  
度陌越阡念過往兮復來還魂渝快而若有一  
兮豈他人之盡然遲汝歸兮冬首慰余心之未  
平

來雁賦 并序



明府大梁王公以廉平惠愛為邑而尤以文  
學緣飾之百姓又寧彬彬有單父之理隆慶  
二年冬十有一月公在廳事忽有翔雁降於  
公庭依遲宛頸留止不去公乃異而畜之不  
以籠檻益用柔馴咸謂公之理行不唯孚於  
民而且暨於翔泳矣昔禰衡為黃射賦鸚鵡  
韋誕為曹公賦山雞然皆獲自林虞曰以致  
獻猶欲侈之於辭矧夫茲雁靡靡實有來儀  
之徵由是士之及公門者並為賦以獻允文  
裒蹇伏跡蓬樞公尤禮之齊以古人之度目  
睹弘美其可缺而無述乎敢輒畢其愚悰用  
嗣斯作其辭曰

有寒門之逸禽稟壹性之純貞絕大漠以安集  
介二嶺之崢嶸才識機而遠害性知時以通靈  
故其族類雖繁飛翔有序啜食相名鳴號同趣  
勁翮躒且黃喙玄羽泛素壑而並游矯春清而  
軒翥伊茲禽之特殊何鷲雀之足比爰取象以  
明義之表德於嘉禮若乃蓐收戒節月壯霜凝



裊草共黃雲一色飄沙與紫塞俱平萬里蕭條  
天高氣清乃違寒而就燠咸嘯侶而鳴羣度關  
山之無極翩嘹嘹以南征望烟路而中憩遵枉  
渚以自營忽蒼茫以頽落趨單父之諍庭且其  
容止柔馴徘徊延佇無籠檻以羈縻甘輯翼而  
自弭豈闇霧之相失將疾風之乍驚懼擊擊之  
過迫怯虞機之見櫻抑毛羽之摧瘁竟偏特而  
伶俜顧日暮而塗遠悵中心之有懲遂歸仁於  
君子偶來儀之瑞徵於是飼以稻粱豐其肌體  
諒俎味之至珍終周防以休處及夫洞庭水綠  
吳苑苔繁青春麗于燕已還望故鄉于渺關山  
嗟儔侶之偕逝獨棲遲而莫從遭此世之嶮巖  
罹慘毒之切躬幸微軀之見托荷盛德之能容  
輯風雲之遐想狎階墀之近踪庶承君之惠渥  
長保已而永終

蟋蟀賦并序

蟋蟀秋蟲也猛性嗜鬪志在必勝其鳴聲又  
特悲壯庶幾感靈激神固蟲豸之可貴然余



覽國風月令及歷世才士所為詩歌咸非專  
賦郭雀之博物多識又絕無定名率皆相襲  
而未盡其理因綴叙其所產化聊以備數焉  
其辭曰

伊蟋蟀之微眇兮惟蠶虫之獨靈含春華之昭  
質兮吸玉液之清冷性耿介以毅武兮才盡節  
以標輕挺天姿而無因兮相應覽其脩能不程  
才以知類兮豈瓌異而見珍爾其為類也則有  
嚙喻滂安叫嘯魁圻崩榛灌莽之原溇泔淺草

之區綠房紫莖之圃黃苔白蘋之陂堀堞澗燠  
漆澌沮如埃藹菸菀夕勁朝晞溼溼濕底壅  
腐餘芴焉是產為蠅為蛆別有複閣成臺離榭  
幽堂玄䟽黑礪之室曲瓊樹塗之房蘭金藻玉  
之宮璇題縹壁之廬清馨轉蕙之館晏溫流香  
之渠爰有麗人紗妓姣女妖姬姘態柔情妖蠱  
媾窳盪衍其中者忘日夜而冥迷嬉綠烟燼朱  
輝或乃淪精降魄含形儲軀詭色非純正氣廢  
違由斯言之未足稱奇余固可得而畧也至若



月窳風丘蒸巒霧谷炎厓錡翫以岷嶼露窟崔  
嶺以岷岷崩苑卷路屹岷隈隩蹊絕往蹤數斷  
來牧若乃眎豹孽狐尅魍猶狙鞅牟格磔乎其  
側王虺已虵毒螭巨蝮歛尼陵卵乎其傍雄鷄  
猛鷲雕鷹俊鶻咆嗥亶翔乎其巔赤螳玄蜂射  
蟻蠹蝮噬嗜剖殛乎其陽山魃木魅陰鬼厲神  
熊熊焉魂兔焉鏤窟宅而踞陸梁復有千年積  
死之樹孤軍隕戢之阮蕭蕭古堦藪藪蕪城什  
雷之幹屹雲之損構兮檄兮若陀若崩豐衆坵

攢百靈吐瑰偉之所積卒成氣乎竒之其為狀  
也則有敦朕紫苗平膚銀液斷斲霜葩股管徂  
戟翅鑠流金翼凝點漆頂渥丹砂項墜青護鋸  
牙辟灌以羶齷巨頰硯礪而簡積馮馮兮駉駉  
駘駘兮鬣鬣何竒形而異模差可仿象而變醜  
亦將有公子王孫倖豎權戚驃將豪商游俠燕  
飾三川五都之雄六郡三輔之客厭百戲之已  
疲歎黃金之無益聆烈音之礫墜羨節鄂之岩  
嶺命林穴以彌秋兮彈曜靈使西沉揮赫燁以



列炬兮戒富媪以見琛爾乃頽玄顏所浮林闢  
衝湖躡隣修沾嶄巖剗岑峯飛聰磴濛沉明突  
冥巧網四匝狡穴三門雲布呈羅下無軼奔闌  
葺墮魁梧臻畢獻所獲犒其最勤納以琦璜之  
富飴以珠璣之榮沐以華清之潔晞以赫戲之  
晶攬翠葭之纒縱擒青蠅之騰腥信襲養之既  
和率應機而莫櫻於是命儔集好駢駕連纓相  
與狠觀夫戰鬪之變態廉度其勝負之殊形各  
施綵以代幟均約結以定盟設誘囋聒用壯敵

情其始也則跋跋躍躍躡躡躡躡或峙若植鐵  
或蹶如陷石或鬪哈而彪休或趨捷以狼戾或  
深沉似保介或狂攘象赴勢或恇怩伺抽憑或  
桓桓包慷慨乍渾奔以相嚙儵急對而分躡擇  
肉而剗嗽拉折扼吭而扳翻批批聲砰礚以先  
鳴騁後凱而彌厲或逐北而隨旋或受誑以凌  
遽固三接而三捷六再角而再礪循性情之自  
然陋孫吳之韜秘然後衆變殫單伎虺怯負者  
愁賄助勝者榮立價傾兩都射溢千鎰功以虺



武見貴名以將軍是榮豈獨衛鶴乘軒秦松受  
職此固媮樂之方信足以極一時之偉竒也若  
乃燕地飛霜楚水增瀾天峭嶮而短景風颼颼  
而薄寒木已盡而見放形枯槁而摧殘聲酷醜  
而不舒夜漫漫其未闌感唐風之覽化興楚客  
之永歎亦有芻士失職馱婦棲山久客登樓愛  
子戍關畸人鞠而無偶壯士去而不還臨年被  
戮之孤垂老欲別之鰥忽傾耳以頽思何愁戚  
之多頽心有懲而彌亂涕無從而獨潛奚哀音  
之中人兮誰能破涕而為歡蓋亦聲音之至妙  
也豈若簫琴之比律於夔襄昆蚘之嘒嘒蜿蜿  
云爾哉亂曰素節玉貞類介士兮雲翼振振發  
皓商兮馮化摠體靡有方兮窮陰彌割陽精降  
兮雖有竒心怡替爽兮俾協歌詩闡靈藏兮

菊賦

伊茲菊之貞麗挺庶類而擅竒含內美之醇精  
敷藻蒨之清儀翠葉掩以葳茂紫莖翕其褰襜  
迎上春而解作凌九陽而振蕤越流芳於秋坂



託纖根於幽岵糝五色而相宣鬱彪炳其陸離  
狎鳳子來毛姬繡兮苔迳錦匝烟區影亂蕊河  
之燭光搖兔苑之芝足使華林掩綈琪樹韜安  
晃雕霞之驚絕藹繁星以紛菲矧夫爽籟凝陰  
涼飈送燠日短晷以向南雁違寒而度北露冷  
吳宮之草波增漢臯之曲人有愁而必盡物無  
微而不爾天泐寥兮彌高木蕭撼兮就剝彼晚  
榮於此時曾靡渝於茲菊匪負霜而淪操每參  
靈而逾馥值女兒而蕃滋出甘津於澹台纂嘉

名於流記閱上藥於丹籙若夫英穎考槃仙徒  
邁俗或餐英以充虛或擷葉以佩服或咀實以  
引年或傳葩以代祝或咽液以療痾或沉醪以  
媚獨故其為性也可以以德而延期其為芳也  
可以揚娥而表泚粵有南國大台中朝元輔覽  
鳳圖以脩文摠虎賁而勵武道無謝於佐殷日  
有臨於生甫玩玄月之改律又朱明之徂暑欣  
年志之樂康省勛庸之豐偉而乃闢華堂涉芳  
圃登上客召真侶烝蘭肴沃歡醕懿珍卉之能



靈叶令辰而燁燁莫不散賞以娛衷仰希曩哲  
之遺軌於是復有南園逸叟東海遐賓恭聆勝  
事緬想清塵慨服義之既闊慚酬德之無因遂  
命圖於縑縞聊稱歌而遣言歌曰

金商戾兮被勁楚月華白兮蟋蟀入戶清氣乘  
兮輕桂舉神怡愉兮美無度陽芳絢兮彌終古  
宜永御兮壽黃耆願申頌兮承靈祐

黃薔薇賦 并序

周于舜得斯卉一莖植于園亭迄今七載矣

顧見西峯始驗其異意甚玩之遂作斯賦

有中園之嘉卉兮體天質之純清陋衆芳之穠  
豔兮昭粹色之奇英羗移根而永託兮遂挺裁  
乎前庭含內美以俟時兮越七禩而始榮解輕  
黃于綠苞兮乃夭矯乎朱明潤瓊膏于夕露兮  
漱金牙于朝陽綴雨絲之霏微兮澹浮靄而委  
傾送遙芬于柔飈兮歛綽態于弱莖枝裊長而  
施散兮葉鱗次而繁興乍纒縱以鈎帶兮忽飄  
遠其若驚合厚陰于階墀兮育翠景于軒櫺匹



芳籬而慚烈兮比崇蘭而匪馨彼美人之採掇  
兮奚遠涉乎江濱顧斯種之獨珍兮宜象德而  
肖形豈絕處而遵晦兮關故記于幽經肆予情  
而流詠予庶蘄顯夫脩名

諷草賦

惟玄靈之肇和播黃祇而亶植猗衆芳之薄遽  
咸效竒而獻質若夫葉秀萬年之柯枝聯千歲  
之實標建木丁扶汜飄竒芬于桂域言有誕而  
匪經賞每遐而叵測豈如貞卉之紛菲依北堂

之輿側蘊天地之純休體恬愉之粹德系嘉名  
兮永彰挺上春兮耀色摠脩莖兮綽若翠羽騰  
綠波舒叢葩兮灼若雕霞晃朝日引崇蘭而汎  
景轉芳蕙而凝碧香搖少女之風露湛仙人之  
液羣賦為之聲淪殊祥為之彩沒懿君子之好  
和興詩人之詠什是以平章烟館中散雲室子  
建弘詞玉郎麗筆咸權辭而托思殊未究其旨  
的于是爰有汝南貴胄吳郡英賢仰循陔之峻  
躅遂回心而致虔躊躇顧暮容與周旋顧斯卉



之罕匹著前聞而有甄處堂階以滋茂諒媿美  
于慈顏爾乃模妙儀于象外移瑞色于毫端不  
順時而屢變長閱歲而凌寒豈徒勤比興之義  
工藻繪之妍而已謔曰芬華煌煌振都房乘嬉  
陽和悅流光邁種厥德信慈良齊微太如嬉社  
昌宣胤發祥歷壽垂無疆

悼往賦

商橫之歲少司馬王公靈柩經於敕廬公嘗  
有大勲勞於國家而卒以讒被禍余與公之

子元美敬美友善知其事之委折遂往哭焉  
昔賈誼赴長沙至沅湘回為文以吊屈原誠  
有感於曠世今余忝公同鄉託末契於其子  
其能默乎遂撰悼往賦一篇弔之庶將證於  
來哲云爾

粵惟商橫之歲兮月旅次乎玄辜陰風懣懣以  
迴景兮嚴霜落而悴柯望歸艎之營營兮悲編  
素之纍纍乃獨往而敬弔兮重愁苦而哭之魂  
焉所麗而汨徂兮孰下招紹古而敷辭吁嗟乎



夫子之耿介兮，包瓌行以自奇。承洪族之嬋媯兮，纂前脩而應茲。納弓旌之嘉招兮，蹇直道以佐時。被繡衣之絳綵兮，冠豸角之巍巍。謂芳蘭之峻茂兮，謂蕢菜其必萎。苟中情之信備兮，何異道而使余以狐疑。彼純粹之既遠兮，喟皇途之多違。美政壅闕而不宣兮，相昏極而成私。獯虜剽狡以虞青兮，遂屯逼此上都。肆嚴殺而流毒兮，士女化而為俘。聲虺闕而震惶兮，又孰可深謀而與以。為獨巡禦以而立，謹兮敢願懷而後時。時料敵而厥難兮，焱桓桓整六師。使長轂雷奔兮，挫鋒奮威。更始黎蒸兮，誠安厝其阽危。日被君之褒渥兮，芳菲菲其靡亢。羨方虎之翼周兮，竒李牧之鎮北。疆存營平之作武兮，天聲發而外彰。既董戎而顯秩兮，求古人之所匹。爰受命以南征兮，建雍狐之雄戟。恩與懷其並濟兮，震日出之東域。民慕思之專專兮，喜窮城之載色。心忼忼而不懌兮，永置像以為貞則。又申命而整駕兮，將以防夫盛秋。終專寵而謂君之



可恃兮願竭忠而自思羗信直之不羣兮人之  
心固不可與要願若處此異域兮衆婪婪以相  
呶嗟又逢天之懟兮旄頭夜高餓糧乏絕兮營  
壘蕭條何忠壯而數竒兮志抑抑而不自聊唯  
夫人之好嫉兮豈惟噤閉而害賢直回回而內  
証兮蒙以不忠之大愆撼閭闔莫余應兮欲自  
申而無由緣皇天固徧照下土兮蔽浮雲之曠  
藹然零曠而日厚兮卒顛隕而逢殆夫固知路  
之險隘兮迷不知轍之當改川塗洶洶而壯闊

兮臨當濟而舸敗希積風而顛翔兮鑿羽又豈  
足賴辟蔚羅而彌布兮縱橫奔之何益功深罪  
淺兮曾不覺寤而省實十世之宥能兮痛冤頌  
之摧抑反施快于讒心兮門戶閉而自塞世滔  
滔皆蒙貨兮重昏暮而靡極胡不照覽而鏡微  
兮淹棲遲夫叢棘神龍襲乎湫洶兮焉靈而而  
尊食昫豹之匿其文章兮蒙霧露而自澤考往  
事以權槩兮竊有得隱寐之所為葺蓬茨而考  
室兮啓幽藪之陰扉編管茅以為牀兮綴敗絮



以為衣抗嶢峽之曾巖兮遵絕澗之荒蹊青蒿  
彌路兮蟻蟻翺飛蛇虺糾結兮虎豹鬚鬚忘年  
歲之道迫兮抱玄景而與居藜藿跽嗑猶弗克  
兮嘆頽頽而長飢與世物如煩毒兮超塵冥以  
自外邈三五之不同世兮悲夫人之恒否而已  
泰吾固知其遠禍而永滅兮不願為世之常態  
又胡不偕靜默以自踈兮簡世局之羈鞅生天  
地之廣而罔迤兮哀時命之促危善與惡之紛  
糾兮不同厥施又孰不各然其所然兮非其所  
非雖既盡而弗寤兮亮無暮而弗歸亘終古而  
一軌兮夫豈憂歡之足持竊抒情於來哲兮昭  
毀譽而證斯

會芳園賦

并序

中書舍人胡頤尚書忠安公之孫也遺榮寰  
中逸志世表度山相土肇置茲園探隱究奇  
飭朴而逝雖事殊巖穴而道在棲監爰延詞  
英竝述歌詠伊予不敏輒撰斯章其詞曰  
有逸世之公子仰通人之遠規追仲長之願言



求應璩之所書靡希榮于魏關協清曠于止墟

爾乃發精誠于宵寐遂解組而巖棲君在京師賞夢竹補

亭于家遂解組而歸補亭曰夢徵聚石為巖曰隱君控郊垌之傾阻究川

阜之靈竒換爽塏之緬邈剪榛莽之踈蕪或遠

襟而近帶或前背而後趨邈自然之妙有爰結

捕而為娛延隱淪之高躅勒藻麗之英辭堂曰延逸

屏曰萃玉勒名研陰陽之變化悟損益之所歸

賢題詠于上窩曰今田飼鶴飴露鶴于潭臯狎晴鷗于水區款鶴築

悟易隨虹梁于烟境遺天地之廣虛曰款鶴築魚

有玉洞春暖碧榭雲寒澗芳芬敷翠竹檀欒蕉

兮窻而蔭綠花覆塢而流丹或濯塵纓于清瀨

或睇素娥于澄湍有歲春洞留雲榭流香澗簞

影娥池復有泉通古甃湛明月之虛朗芝秀菟園

象宮闢之崔魏泉曰古竇凌仙閣兮霞杪閣名樓霞

祀仙人張三峙層樓兮山隈既援蘿兮側徑亦

更履兮重階有山外樓捫咸托勝以標名竝靈

峰而起臺峰成適會昌侯孫公至因名其亭曰

事因築臺峰此皆殊製而異所同饒樂之所必

側曰未拜臺



詠匪尤物以興累鑿幽情而自裁彼面城而近  
市六理隔而情乖至如憔悴窮嵐之曲棲遲荒  
翳之坳又篳路而藍縷聊鑿坏而處巢殉福兮  
以獨徃徒危形而自彫願茲園之信美惟飭朴  
之而逝豈侈觀而後情高滅跡事為殊世順所  
便以宴息撫鴻運而肆志或興歌而容與或懷  
往以悠齋每在物而必懽奚脩名之足懼諒婆  
娑以永年誠不知其所至竊權慮乎末簡庶以

緝夫幽記



仲蔚先生集卷之二



吳郡俞允文著

徽郡程善定校

四言古詩

贈王元美

顯允王子實維國楨爰逮嘉招旅蹟王庭緝熙  
帝載時隆德聲如何秦往人悔斯形日虜肆逆  
阻衆憑陵軼我邊鄙王室震驚惟公司馬篤其  
忠貞乃奮其竒以挫脩鯨公崇其勛則莫與京



胡邁斯嫉愆釁乃成舊勛莫紀以陷大刑誰云  
為善而不近名眷念之子祇攬余情衝風晨激  
淒露宵零孰是斯值承此弱莖進則無補退則  
曷營快恢紘網雖踈易嬰子之慎之母或于行  
人之相知靡軀不傾式瞻在昔我之未能躊躇  
中夜弗遑是寧亦既契闊百罹是并山川阻脩  
發言莫應義淪志沮尚忽良朋我思大化疇測  
其冥福為禡基禡為福萌管氏釋囚齊政以興  
范睢拉脇卒相於羸億變相禪憂喜並根將子  
何期示我好音好音伊何實慰我心安得與子  
携手喬林慨其弗獲引領長吟

送郡太守西蜀王公入覲

奕奕梁岷國自中葉乾象昭儲坤維掀拔苞絡  
資裊鈎綿麗絕於赫唯公炳靈作哲嘉舉華世  
羽儀朝列譬彼環琨雖秘猶徹明明我后乃眷  
東鄙誕命於吳俾民是紀公既戾止是疆是理  
鎮俗以約倡物思軌廉而不劇溫而無滓丕式  
屬城實簡髦士吹萬如春飲汗如雨羣黎吮吮



豈曰饕餮道峻暉偕罔收民譽蠟蠅之懸象美  
自附藐余顛蒙恭承弘誘愛至求詳分隨契懋  
察侔貴賢恩充四耐玉卮無當徒慚虛覲量違  
時幹反質居常養痾丘園寄識古英委心所欽  
秉志精芳維公三朝乃覲于京最爾攷圖介爾  
珪璋遐我民瘼哀職是章曷不我留適遘其行  
朔塗幽緬天門高翔睇彼遵渚瞻遲歸艎顯允  
惟公實惠我毗詠懷贊詞延佇泰康

雜言

滌滌穉宇極望蕩心與命同志越邁平林臨觴  
高臺流睇重深郎鄴新姬美氣蘭音清芬隨風  
當之難禁申酌無次狎坐遞侵玉體隨弛其樂  
沉沉

離合體

巖居全真

嶭彼巢父業遐而僻磽确伊處堯弗能即屈之  
以位出而遠匿苦節彌貞草萊終輯以水洗耳  
口惟緘默阨哉枯槁兀焉若失息茂無營心蹟  
雙窳冥契為徒宜匪恒匹



贈邵孟堅

睽念之子生不逢辰形辱志沮遠竄孤征朝辭  
茂苑暮徂廣陵仇壘實多不逞自營瞻彼宛洛  
日惟帝京爰有君子國之幹楨子之旼之乃趨  
其庭亦既覲止出其險陞亦既三年言旋舊壘  
載馳載驅時靡有寧梁鴻變姓臣游匿名亮方  
避地矯慎迤形身卑義高固墜厥聲睽念之子  
如何勿懲子之勗之慎尔攸行

仲蔚先生集卷之三

吳郡俞允文著

徽郡程善定校

五言古詩

感遇十首

昔聞柱下史超躋日室岨追隨五星精抱一握  
玄樞乘化閱衆甫出入窺有無寶書垂千齡光  
耀誕八區玉管貯丹藥青泥秘金壺飢渴至靈  
實于道若為拘苟非至人存誰為閔羣愚



朝飢固清真檀氣閱金室空色滋霧露松柏映  
虛帟若橘垂青苞翠帶桂鷓鴣須居日沉静披  
覽終九術卓茲臺佟子乃得至精實

崆峒有靈瓜晏衍千歲期食之可長生棄捐豈  
所宜餘姿惜霜雪焉能久留茲婉孌驕榮子輶  
轅桃李蹊

北望北郭里松柏蔽川坻極目千里原駘蕩春  
雲滋困獸多窘步離禽多毀姿倚靡丘中賢慷  
慨內傷悲

西北地踔遠僕急兵馬富少年多永懷出入帶  
雙鞬俠客馳千騎城闐起烟霧萬里入黃雲落  
日悵多趣廣廡忽騰虎深陔時見聚豈伊持重  
極轉使桀黠固懷戎李將軍空山射兔兔

高天何悠悠萬古何清清清復何有誰為萬  
古情日月经其中寒暑盪其精氣盡物亦化焉  
能固鴻名仰觀太始初嘆息此羣生

古有林類者寂寞守靈宅青春標荒穉寡居年  
已百千載稱其人豈不感至德悠悠清天中擾



擾各有適

朝凌太清中遙願望三梁飛魚不可餌超世發  
竒方飄飄丹城關遊戲白玉房石渠滿青華碧  
藕越千常採服玄元氣養德奉神皇壽命安可  
極但恐彫三光

朝馳漳河間暮次勃碣陰結交非一兩鞍馬忽  
相臨剗客彌廣坐藏活復多門妖姬美清夜跼  
履揆鳴琴狹室延月光英音激霜鐔中多寡游  
士涕下不可禁

灌園秣畝首日夕延遠飈秩秩品物繁欣欣共  
榮凋搢搢漢陰老喀喀仲子操適已不在取乃  
不見吾勞暇豫事多愜沉冥理忽超臨觀波池  
靜彌悟星月高道真固如此曠然不可招

感懷六首

涼氣凜中夜華月散清藹遙遙睇脩旻惕焉感  
前誨智拙勸時紛力瘁矜已急涉樂無恒豫在  
戚有餘慨遺念千載下身名豈相逮此已非吾  
有歲月焉足賴



倚歟上世士養空究當年曠視遺耳目虛遊萬  
物間高操無與儔誰為尚其賢是非還相蘊舉  
世咸共然伊人久云亡斯名竟誰傳

伯僑與陵陽念彼誠有之脩齡彌萬代恍惚還  
復來誰云非疇匹為是余所希一形會有盡胡  
事空獨馳百年豈云遼安能與我期一逝俄景  
滅緹悔將焉施

生命固有常于世鮮能由天道諒微昧禰福不  
相讐運促無脩齡吾行將安休高行令世踈寵  
耀逢厚尤何不永自持飄飄升九州橫厲越飛  
泉與彼列仙儔豈放榮華子跬步相譏求  
燁燁三秀芝煌煌冒九莖慶雲耀靈和日月垂  
光精韜景玉山阿舍采麗曾城芬芳彌六合誰  
能掇其英思從沅湘游曠世垂令名  
絕壑萬餘仞重陰翳曾岑仰視玄雲披俯聆神  
龍吟潛光不見已誰能證其音截竹為吹之與  
之相合并恨無知音賞空有越世心



皓皓空宇中草木無餘榮  
淒淒屢空顛寒氣坐  
自盈念當老會至徒沒非  
所經古來言治生乃  
有蓋世稱如何不深察  
終歲寡所營持此良自  
忽清晨擁遙情

喧然古名都連亘彌八荒  
營營各異俗用竒取  
富強壹志唯專誠馳逐萬  
死塲高門羅鼎食驂  
服若飛翔意氣還相矜  
流目自生光豈知丘中  
士纏縷鬱蘭芳起遙遺  
榮利詎以身自傷

秦王滅六國六復誅雄才  
牟利彈錙銖遂起懷  
清臺數世擅丹穴一朝名  
譽開尊顯隆萬乘熙  
熙競相猜豈不在立德  
貞姜徒草萊

刁間任奴虜車騎何洋洋  
結交盡權貴起富傾  
侯王掘塚事至姦曲封名  
六章成業各有基彼  
獨處不減苟能懷仁義  
胡為厥糟糠茲事良已  
久今日復何傷

程卓起遭虜鼓鑄稱善籌  
驕侈擬人君射獵恣  
盤游孔氏在南陽交通徧  
諸侯靡容名公子權  
利靡不收豪華傾當年營  
欲殊未休但恐委朝



露身名翳榛丘

春鳩鳴原圃清剛肅冷風渚蒲抽新節園杏滋  
舊叢及時事東作聊以希歲功四體亦已勤衣  
食恒弗克念此誠拙業秦陽遂稱雄人力苟可  
希庶幾殉薄躬

白日垂光景臨照開八區五民驚古智千里互  
相踰汎濫萬貨情俛仰若可趣勤思彌日夜計  
此非良圖宣尼有遺言貨殖焉足模不如守窮  
巷偃蹇滿壑軀

詠史七首

廣野何軒軒節高計亦精一說拒強楚再說下  
齊城曲周為漢相隆貴由哲兄奈何淮陰譎禍  
發身見烹時芟苟不會他人傷我情

伯陽適西關魯連蹈東海汎然寡歡愛萬物莫  
能采清芬盈天壤旦暮若相待馳念空至今顏  
色日衰改長恐年命但隨時韜光彩

梁王昔好士天下所慕馳鄒生乃繫獄悟主多  
悽詞宮女三千人一一妬蛾眉高木自媿賊斯



言良足悲

善賈能釣國千金委沙塵邯鄲獻名姬功立身  
亦尊福過不掩禍夷滅竟荒淫唯有懸金書乃  
獨留至今

煌煌褒衣子相然立端誠罄折趨利樞仇怨一  
朝生豈若上世士不為濡忍情慷慨無外交片  
言成死生至行侔大義竟死還藏名

賈生二十餘六籍頗所通少年遵勢路抗議凌  
諸公咄嗟令讒疏嚶嚶自傷冲白日迫顏景一

往豈再融冀願熙令名身沒垂無窮

壯士不避死勢凌萬乘若婉婉屈廉公曾不有  
其勲卑體存大計英聲被無垠哀哉食杞士斯  
言安足聞

遊仙十首

獨玩縱闊步度世越九州東行按蓬萊西嬉歛  
浮丘雲氣入無間虹蜺丹青流日月奄忽馳俯  
仰成千秋直指帝者居樂哉清都遊通仙參差  
來相與為匹儔要我絕冥外不可以久留



俞仁康先生集卷之三  
天地何長久人道一何迫超踰域中戀八表恣  
所適輕舉登青雲倏忽行萬億乘蹻信絕徃安  
用生羽翼九陽為我燭六炁為我食空同為我  
廬太無為我宅與天長相保何懼歲月積  
總轡金庭側改轍登閭風丹闕象三辰躩踞青  
天中中有太虛士精意與天通摩弄日月珠乘  
飈汎瑤空羽蓋紛上屬烟駕靄溶溶嘯咏大曆  
篇妙說授韓眾一與若人遇年命不可窮  
玄流吐飛瀨玉梁秀千尋五芝成宮闈絳樹為

黃金璇室清霞氣上道無外侵紫微與九華偃  
息玉山岑瓊蕊麗神阜琳腴暢靈襟精影儼雙  
桀高唱飛鸞音聆音眇難酬感我冥中心

秦世有盧敖尋仙昔未逢銳意造玄關自謂莫  
與同忽與若士遇冥真異姿容軒軒迎風儼靈  
變不可蹤一與盧敖言聳身入雲中汗漫九垓  
外遐怪願莫從教心竊自鄙撫已猶蛆蟲

矚眇八紘表振趾青崖巔厭食事聖師通德妙  
三元道真非一宗冥轍無拘纏甯生食石腦但



儻紫烟間年光剪韭翁託體清冷澗抱一攝天  
真委化致靈仙一躍太空顛道要不可言

遠游崑崙山崑崙一何高崑崙排霄起會見百  
神朝肅肅上清駕真儀儼玄標五烟翼高蓋八  
風扇飛輶香嬰妙玉嬪蘭音吐金蕭備從各異  
色揚靈上招搖我願偕此侶謁帝同逍遙

吾愛王子喬不貴儲宮居吹笙作鳳鳴好道遠  
從師仙人浮丘公接上嵩高崖學之三十年忽  
欲還家辭相期緱山嶺七月七日時翩翩御雲

鶴舉世願慕之儲宮豈不貴難以百年期

冥真有高踪一往不復還心期妙玄素曠然絕  
鴛煩采藥歷三山尋仙度九門受傳餐霞秘蘊  
妙不得言含道存精微專氣固靈根金膏粲虛  
質乘光上飛翻神峙太清杪悠悠可處尊

眇眇赤松子飄飄隨風雨少女徃追之冷然乃  
雙舉簫史發精吹羸氏相容與超遊登鳳臺一  
朝遂參翯神感非有待冥期妙真侶蟬蛻遺垢  
紛飈輪誰能沮徨徨世上士卓哉此二女



擬古二首

和璧天下寶傷哉獨淪誤秦趙何紛紛相如建  
功祚呂尚老嚴屠一朝曜天步傳叟何為者神  
感發宵寤苟其當遇時奚在殉馳騫如何繁華  
子悅巧從狹路蛾蚋赴蘭膏身死永不悟寥寥  
宇宙內萬代可齊度安得附六翮逍遙排氛霧  
俯仰窮四海豈肯戀細故

都邑聲利樞赫赫飛炎烜能鄙還相籠傾側不  
及旋吹噓成薰灼玉石要俱捐迤邐操難固短  
弱情易纏擬足無通途舉措懼厥愆飢寒迫窮  
暮盡室事高暝殉義寧顧身為生誠獨艱事往  
真偽顯清埃播來賢

黃鵠吟

黃鵠翔赤霄傲睨將焉如形大反為累舉翮觸  
四隅鷦鷯又何微終歲守一區營營乃異任咸  
各肖其軀萬化相陶蒸種繁顛六殊安能遺形  
骸逍遙以遊娛

秋蘭吟



蘭蘭被峻谷獨產含英奇采采自芬芳舉世無人知  
豈伊蕭菌雜曾不為此移與世既殊倫奈何久懷悲  
終然謝先伐虛名竟何為

桃源行

昔有武陵人捕魚谿水湄谿暖桃春溪沿洄遂忘疲  
所歷既已遠忽復值山崖初行路繞通谿然就平夷  
雲屋儼千家桑竹蔭陂池隨山起阡陌覽化測天時  
而事多古法歡歌自相追驚問所向從競引還其私  
云先避秦亂窮奔躋險巖始得此絕境與世遂長辭  
具詔興亡理所聞皆悅悲各復饋酒食數日方語離  
既出思故路念言當復來安知峰巒轉竒蹤竟參差  
寥寥此中人千載空自知

出塞

擊胡無生還此已非不知謂當棄一人所活十萬  
餘中原有父母奮身靡敢私悠悠河陽橋生死從此  
辭

入塞



落日射丘甸照國西南門窮冬還鄉邑較瘵須  
眉髡下馬潛更衣駁犖箭鏃文妻孥盡下泣貫  
酒叙涼溫勞苦但盡歡即恐亂日生

閒居二首

玄陰謝凋嚴青陽繁結縟依依野田淨靄靄遠  
山複川禽無留響澤蘭有餘馥朝雨鬱蒸霞精  
氣團叢竹閒居窮物變廣隰竟春日恬然愜真  
賞順道無營欲

疊疊運環周戚戚抱素心隨時感衆卉開芳及  
陽林盛年之歡娛奄忽互頽侵豈無爵服玩固  
窮竊所任遙情絳高翔道勝微在今

秋懷二首

商飈扇天宇激志驚序換嚶嚶寒蛩鳴而無蟻  
蠓亂珍簟蔭浮涼薄雲鑑幽幔淒清戒露鶴唳  
暖候霜雁朗月翳高隅重昏詎能旦蘊結易云  
久拙薄嬰世患秉此耿介懷無徒取妖玩

窮陰歲功徂羣生各歸成化蚺無遺耀浩浩玄  
露零靜蹕固殊智萬途還復并大道廣且夷誰



能揭其行適物自無可任意為令名彷彿至人  
心翱翔恣太清人事多委曲安用常苦辛

秋懷一首

涼風金石勁悲氣吐隆烈晶宇蕩暄濁輕脆兢  
摧折松柏有殊性遂與衆卉別是時陽鳥至叫  
嘯霜中月力盡羽翼單欲奮不得發何以表天  
骨沉吟猶未快

雜詩二首

霜蕪落秋鶻平澤游氣少鞭馬萬里原意輕千  
金犒弓擗霹靂鳴箭作餓鴟斃虎毛春草短牛  
乳馬酒燥山溪伏獸吐地拔天勢峭椽粟清臧  
臧人徒磨精妙土銼野火燒布坐盟喙倒羗氏  
鳥獸散輜重絕古道桓桓英雄人獵獵昏長鬣

其二

冬至羣物晦裊颯互相尋雨露為霜雪而乃見  
真心豪鷹搏空翔寒日抱隴沉蕭蕭長天色盡  
入西北陰烈士負奇骨多為時所侵曾不悟銷  
毀千載希知音



夏日園居三首

抱疾條已久彌厭人跡誼中夏稍歆蒸聊復棲  
林園赤鳥鳴始旦雨氣冑中田綠池散葭莢鮮  
颺潤微涓游日盡華滋茲事已適然佳辰信為  
美偃仰有餘閒

夏木盛繁陰時鳥哢晨景兀傲青林中整與紛  
紛屏古人雖云遠其事差若近慰心良在茲靜  
言莫余領悠悠一世內余駕將焉整

步游循舊基宿昔改平常周垣已就窄流潦溢  
中堂扶踈喬林樹况此復摧傷孟夏無脩陰棲  
鳥失其方天運既遐漠何為獨彷徨

園居

窮居寡儔匹園廬有餘清落葉覆荒池踈林暎  
高城野田刈穫盡霜畦蔬復登寒月無密影中  
夜露氣凝是時鶯煩息沉思方入冥沉冥乃道  
真一悟還自驚

雜詠

滅跡事冥棲悄脰送遠目原隰搗茸紫峰巒秀



命命集卷之三十四  
驚綠淙流受後谿急澗傾前瀆泉清彩虹見巖  
高白雲宿遇物聊獨歡胡為自結束澹乎虛舟  
意寧辭鄭生谷

甲子正月元日作

余年五十忽又過二天運邁邁不勝慨然  
與世相淡泊五十倏再益初陽肇妍景藹藹欣  
始覲朽株行當新余衰不復昔殷憂損志慮胡  
能自湔滌託慕向千載所媿道不克悠悠世上  
士常恐非余匹逝將離俗宜屏居在蓬室鄭生  
何為者清芬播巖石

題程汝義西野林園

程君家山中猶復厭囂喧西行始百步彌覺野  
性存薙草壅階基列屋開林園複嶺相窳窳灌  
木自滋蕃疏石出清池記時溉花根徑紆初若  
絕谷轉恍及門即此唯一區居然棲隱淪松烟  
寫綠字貝葉謄玄言助幽或鳴鳥感遠疑聞猿  
晴氣成白雲皎潔蕩明軒事勝忽懷往千里難  
并奔聊用托柔翰遙情何由敦



俞允恭先生集卷之三  
十一  
七日大雪作

開歲多寒陰中夜轉淒冽遙遙澄曙輝空庭舞  
飛雪氣滋地尚黑薄質易淪滅積久乃始成  
矚然見竒潔長林開芳耀羣鳥相啁哳緬懷袁生  
廬徑深行蹟絕茲事留餘賞當年詎非拙諒哉  
松柏操豈為衆人設

感秋作

秋日氣候佳水木俱澄鮮長天開遠曙高樹吟  
哀蟬半頰度落日雲收衆峰偏天時觸情端一  
形乃萬纏椿鵲難久恃况此塵中年悠悠感微  
躬終與徂化遷

春晴行園

朝館絕衆紛延瞰極歎嶇嶇娟娟遠色淨杳杳人  
羣舒餘霽聚溪竹寒塘戲春魚柔荑始含景芳  
氣滿園廬聊將文墨間得遂冲想初息心謝時  
哲寧辭止壑居

晚晴谿上

暑雨池上歇衍漾菰蒲清涼陰滿庭戶新雲依



命仙宗先生集卷之三  
樹生天風冷然來飄飄欣體輕始悟幽事愜彌  
令茲意平

苦旱

昊天赫洪曜六合騰朱氣屯雲蘊隆崇湯風扇  
焦塵乘春及徂暑炎亢彌十旬萬物涸濡潤光  
采鬱已陳翕翕星氣繁夕虫恒及晨徒懷夸父  
渴焉念沮溺勤陰陽失精和此理將誰論抱歎  
中夜起託答難為因

晚晴

微雨洗炎熱廓然霽秋旻高雲輪囷來卷卷  
葉新映空寫素壁萬仞無纖塵澹澹安夕流鮮  
颺度輕蘋秀月復半頰碧樹澄餘津陰處色尚  
翳韶光猶逐人幽興在林杪遠近歸清真以言  
獨往者茲意良已伸

早涼池上作

初日尚隱樹宿藹猶未踈夏雲曉來清韶涼看  
聚魚不異摩天游宛如鏡中虛澹澹竹陰遠稍  
稍荷氣舒偶此恬遠度終念形跡拘如何上世



命何處先生集卷之三十一  
士素抱恒晏如

幽居即事

盛夏寡所適反與草木宜喬陰永日閒紅蕖平  
岬披金房始含碧欣此雨露奇湛然絕塵氛清  
氣升夕池于焉暢靈府寧知曛日馳

閒情

青春倏已謝賴此晝刻長雜草摠新翠幽花分  
異香繡螺列遐跡竒石間殊方林檎文木几蘭  
帟澄素光古研渟黛色弱翰意所將久幽白雲  
氣流悅透芬芳曾是覲世塵偃仰以樂康

雪中有懷貽文太史徵仲

玄冥啓殺節暮雪暗平蕪氣嚴汁液堅縈積彌  
八區天地成純光浩蕩麤穢除心目驟開遠寄  
身若空虛雖知凜冽侵志得豈願餘皎皎千載  
士寂寂在高廬

新秋東郊遊眺

高齋散涼氣秋郊欣遐矚曠類赴遙波清雲響  
疎木日入會田作荒蹊鉏鈎斲孤村生夕烟新



命仙齋先生集卷之三  
苔入鳴犢歸來無餘物山月亂簡牘

山中翫月

秋月多新光矧此含露潔炯然出長漢氣淒芳  
英絕離離晚葉翻攢幽不成結偶逢道林侶與  
言多可悅背頰陰六開遙疑雪山雪徘徊向空  
景意盡言復滅還思市朝內偏側尚羈紲

秋日江上

風緊涼意多氣腥歛膏澤洞庭增新瀾淮南到  
秋色衆峰尚含翠獨樹自翻赤盡日無雲來江

水湛千尺

己未中秋月食作

仲秋天宇峻氣歛涼籟歇萬里澄浮埃金樞運  
圓月耿耿曙星沉淡淡長河沒凝暉含白水露  
皓霜華發徘徊通曲房蘭膏坐揮忽誰言淪薄  
食腫臃桂枝缺踟躕掩餘照翳翳陰氛蔽秀質  
雖復湍即事將何悅以茲願見心曠若音塵關  
佇立增永慕何時還可掇

養疾



命仙齋先生集卷之三十一  
懷痾淹時序晨夕昧寢興寶書委素篋朱霞冕  
踈櫺翠蘭日已抽綠葉滿階庭扶踈蔭涼滋久  
視青苔生神慮怯消散沉思杳冥冥賴茲金膏  
術庶以駐頽齡

初夏雨中三十韻

溟溟積氣潤澹澹浮景戢泅泅騁高翔蜿蜿起  
溪蟄河魚跳復沒礎龍蹲相泣仰窺天瓢傾俯  
聆地籟翕絲散紮誰治矢下勁何急映昏沃洩  
恐注暗潛淅漑縱瀉直繩懸斜透橫戈入陳枳  
頗灌溉冗葉恣菸芭增澆江湖寬高洗宇宙濕  
烏號新膠解青蛇古鋒澀雲片草莽蒸水衣腥  
臆緝壅渠時覘決頽垣日思葺魏敦虞人期漢  
罷陞郎立卜鱣雲臺伏揆神灌壇邑嚙酒或聞  
已彌天遂稱習南隴臥桔槔東菑聚臺笠蹂滑  
支撐怯濡溽芒刺集投足值涸澆牽懷到舟楫  
屈蠖方屢伸涸鮒期再吸葍茸弱篠密鬱煥初  
螢熠沉龜無然灰漂麥有餘粒瓊簾諒難貯桂  
燼豈易拾頽頽添悽悽悵感滋悒悒邀歡盪幽



俞仁齋先生集 卷之三 十一  
默放言課齊給軋軋劬宮抽惕惕戒輕襲晶熒  
走珠函虛無叩瑤笈願竦義和轡願使屏翳紮  
川容捷清夷山貌覲遙岌開廓燼竒光倏忽燦  
脩隄庶幾頌多稔無俾昏墊及

結客少年場

春風大道傍車馬自飛揚白首借意氣馳逐少  
年場散金平臺下美酒多芬芳赤土磨劍卷陰  
燄如雪霜竒功何時建撫膺坐自傷

王元美兄弟遊惠山次唐人韻三首以余

嘗至此山要与同賦輒有此作

氣暄嵐藹多連巒鬱青蒼幽壑應人語霽鍾降  
曉堂靜寂天無風升雲自回翔遙遙帶長薄丹  
舟延踈光空塘綠笋肥未摘舍茶香冷然得新  
賞都令機事忘

停艫陟雲嶠逕迴想幽人鑿石出古池乳竇涓  
滴新輕盈烟霞色日夕青磷磷汲引惠羣有消  
此空中塵因之整雲裝矯趾凌蒼昊始知常世  
外迴曠無比鄰



谿路到山盡山行隨溪樾始及青蓮宮香與人  
世絕春燈畫烟烟綠焰猶未滅緬懷杉松夜烟  
際浮海月寥寥鳴鐘初萬籟沉不發冀同息心  
侶聊以謝歸轍

登銅井最高頂望太湖

五月辭人喧浮舟信沿洄連雨忽澄霽千崖洗  
蒼苔遂登銅井巔曠望無氛埃川豁波浩浩雲  
卷天地開飛流灑空中長飈游驚雷却願西落  
日松聲瞑猿哀於此若可憇撫景相徘徊

自京口渡揚子至瓜州還登金山瞻眺一首

歛轡京峴首榮景浮玉阿俯瞰維揚津遙瞻洞  
庭波洄洄帶長川漩深起嵯峨烟開鴻濛秀雲  
吐嶙峋華瓊竇閔靈泉潭壑潛鼃鼉仙臺象天  
捕旁眺洞九遐海氣蒸神光青焦鬱駢羅戕風  
嬉水怪飛艦乘空過因得空中觀混萬齊一科  
願昭丘垤內蒿穢棲塵涯短計苦自信近情良  
易多悔不早從山縱身躡清霞



題黃鶴樓詩寄長興徐按察子與

昔聞茲樓峻飛甍麗城閣仙事久蕪絕江流空  
自紆旁矚俯漢沔周覽辨荆巫浩汗積氣中恍  
若淪虛無想像臨眺美唯應人境殊徐侯卓才  
傑訟平多歎譽於焉葺頽圯百榭矜扶疏欲暢  
萬古歡邀我以游娛逶迤踞脩迴恨無雙飛鳧  
矯首白雲外遙心落天隅

隴日與周公瑕張師文兄弟登馬鞍山作

凜秋欣良邁尋山陟曾巔置酒展遐覽周壤藪

窮天列巘棲暝色黯黯趨平田初月遽隱見清  
謐岕石娟光迴露始繁皓氣匝長烟俯視衆形  
泯昏夢猶術阡念當須吏還與彼相周旋始知  
上世士果得謝所牽持此感蓬心庶以神理詮

遊聖像寺作

野寺始獨到新晴欣麥涼芳篠青叢叢竹陰覆  
房廊寒棕剪高翠過雨桐花香川梁通煥景林  
殿疏夕陽耳目暫清暇都將塵垢忘何時來永  
棲放跡無何鄉



俞仁壽先生集卷之三  
七三  
玉女潭

昔聞有神女于此駐精魄神女去已久誰辨烟  
霧跡蒼然兩崖豁下削瞰岩峿際頂松蘿高陰  
竇注寒液潛流澹若定萬古澄黛色竒氣入襟  
懷遂與人事隔飄飄塵中想乃假外見釋始知  
神人居不獨在幽蹟

登毗盧閣

古閣秋氣清千里滅烟霧連山開雲秀頽城斷  
行路殘僧成荒齋寒鳥落高樹中多故人情停

杯日空暮

楞伽山中訪殷秀才讀書處

昔游楞伽山山殿樓白雲平湖霽松頂波浪相  
氤氳竹陰晝更寂五月無炎氛殷君信英雋  
然離人羣讀書此中隱遂能奏竒文始知勝氣  
集他人安足云余時同游彥恒忌西日曛登艦  
泛迴川孤賞徒慙慙矧茲日蕪穢不能自鋤耘  
焉得復携手矯跡遺世紛

贈荆谿老人一首



荆谿之山鉤綿連連西南馳越道不絕水有  
九谿東浸太湖臨谿之山又猥積重複晝夜  
與雲嵐浮沉巖壑倏自為變山亦臨谿水始  
盡夾谿樹影落谿水中水皆黛色如画即所  
謂畫谿者也谿上平處亦與絕散居數百  
家宜隱淪者之所居孫君頃為荆谿之游止  
谿上邂逅老人禮君甚厚老人有二子盡淳  
樸無世俗氣抑亦隱淪者之儔耶今累歲寇  
亂數郡震惶而荆谿獨僻處湖山之隈尚復  
晏然信宜隱淪者之所居昔蘇子瞻常欲買  
田陽羨以為嘉遯之所良有以哉孫君請余  
為詩以貽老人遂喜而述之

荆谿山水溪路絕多不通主人荆谿老野性無  
塵容山田自耕作結廬並雙峰引泉常幾山入  
雲每千重茶氣嵐靄新酒香松乳濃子孫盡淳  
樸似違世上踪孫君有逸興遂得諧心曾累日  
始得歸勝事欣自逢我欲偕此侶願言而莫從  
何時移家去相邀乘白龍



贈大雲英上人

開士道林秀敏妙通惠性精廬住平壤宛如山  
林靜迴谿將百盤始得入幽徑龍鱗松龕古石  
塔蓮花並渺然滄浪天寂照有虛暎動搖參羣  
象重影森萬鏡自愛臨汎美日見心慮淨道成  
向何年吾其學禪定

送陸山人之上都謁王中丞

志士懷惺惚容髮苦見侵敕裘日蕪穢抱劍中  
夜吟古劍無文章精氣惟寒陰慷慨攬長轡結  
託將遠尋張儀猶有舌范睢豈無心君家橐中  
裝嘗賣千黃金得勢在倉卒昔賤今所欽王公  
命代豪長榮制妖祲親承 聖主顧幕下無陸  
沉珠玉誠所希何懼山澤深諒蒙知音賞開此  
平生襟

送內兄梁石仲之任平陽將遊天台

昔時梁伯鸞避世兼避名如何天地間其名至  
今稱夫子實繼作超然千古情皓首一微官家  
事都不營玄談等窠廓每為人所驚盧敖方自



鄙章亥所未經况乃向天台鶴駕隨烟升銀流  
果翠巘金霞標赤城落落松蓋高嫋嫋雲蘿輕  
淹留餌芝朶想與神人并天路儻相邀庶足慰  
平生

送郟太守王公擢常鎮兵備副使

自昔漢西京厯載二百餘六臣最稱良並為後  
代模文翁治蜀郟衆中功獨殊蜀人初陋辟在  
土惟外區翁能好文雅化為郟魯居公來艱難  
際盜賊縱橫驅霖潦浩鴻流黔首胥為魚公有

理亂思煦嫗春陽舒矧復楸芳蘭吹壺使紛敷  
願此殘悴質違方日疏蕪幸會侍光塵遠叨清  
讌娛酌言浮芳醕廓若開昏愚何意重陰澤普  
洽盈彫枯德心諒弘濟與古能同符永期仁化  
濡忽焉戒征車高蹤邈難企繾綣情彌紆俯身  
戀所欽致感非一途慷慨中夜起盡言豈在書  
真願齊羣龍凌厲升天衢

送海虞熊學諭歸將樂

疲繭無希世幽期藉巖穴委懷受天損永希古



人節舊畦云燕何獨觀時哲言經闡國華敷  
教隆海澨唯然開大分遂迴長者轍清義遺淳  
沉靜對塵絲閑舍情方在茲恒若飢與渴側聞  
嘉遜賢抽簪謝羈紲孤願良未展忽此媿將別  
晤言復何期遙懷徒悵結

送郝太守西蜀王公廷入覲分得辟疆園  
辟疆古名園恠石紛嘉木還同金谷賞朱輪蔭  
綠竹寂寞已千載舊踪緬遐矚長烟隱棲豹荒  
塗駭奔鹿復此得幽尋賞廢鑿前品睠彼行春

侶遲茲高世躅

送葉伯宣會試上都

歲晏恒霜雪白日醫曾氛陰臯慘停寒凝耀曠  
彌旬野無繁枝葉蕭條見行人馬肥鬃鬣齊壯  
士俠氣新念子日行邁騫飛候陽春朝蹈堅冰  
以暮宿無昵親豈不懷告享厚願良已伸傾耳  
日延佇無為關音塵

送梁伯龍遊楚并寄周水部一首并序

伯龍素有奇分千里之遊若在足下明日告



俞允恭先生集 卷之三 七  
我汎鄂渚下漢沔訪懷襄于高唐平屈宋于  
澧浦以為異于古之左遷豈不快哉然楚人  
多哀復此秋晏君其奈何歸必挾膝語以廣  
我異聞坐我于崇蘭芳杜間也

浮舟入楚色浩蕩千里豁况值清纜時逸興不  
可遏雲來巫峽長木裏洞庭濶故人渺何許引  
領向天末

送顧子韶比部歸上都二首

南國日滔蕩川梁浩無津常恐地勢傾于何托  
斯民水盛陰氣壯慄慄傷我神處身一何危擬  
足不獲伸用懷我良友婉戀平生親誰知非儔  
匹去我若飈塵

良友實慰心于今尠儔倫灑然靜恬漠門無翟  
公賓時蒙枉空廬雙情馥芳蓀晤言六纒綉亮  
此非虛親別從古所歎奚獨在茲晨但願熙弘  
業嘉譽隆日新

送張伯起兄弟游南都

黃駁必千里致用豈待飾神俊各異姿俱無風



塵色君家芳棣華美譽耀翕艷連翩富文藻高  
翔任風力藹藹都邑游冠蓋相追逼餘光灼徑  
路遠近企清則伊余方愔勞歎睇寄遙昵徘徊  
竚芳訊無使居情抑

送陸水部子傳北上

玄冬固重陰雪色猶月色風吹長河靜天寒夜  
光黑困獸伏川梁壯士奮皇國文采泠沃若美  
酒逾千石送子萬里客日暮憂思積願睇臨曾  
阿連翩馳西北

送周天球應辟赴嘉定教授

和澤周四野萬物因時資春翹舒陽彩雕鵠翔  
雲嬉我獨抱淪沒戢翼不得施周君盛才彥藻  
思含英竒欣承柏臺寵以誨遵海沂茂宰隆虛  
已羣公仰令儀及此深情貯信宿次河湄久念  
良已傾且復敦前期與君既綢繆不知心所違  
願言體貞素流俗將見移

送王明善

王明善屢試不合嘗鬱鬱不樂遂以乙卯六



命不廢先生集卷之三  
月北轅朔都以展所畜積且將復觀塞垣求  
古興衰之所由余謂以彼其才而偃蹇若此  
則雖若山放逐亭伯流離殊未足增其憤懣  
也因寓于詞以述乖離之思云爾

威鳳集珍條積風限高翔巨鯤志江海尺澤焉  
足量懿茲中林士敷文聊頡頏塊然寡徒偶舉  
足蹈峻防伸眉竟何階念之鬱中腸抑我同心  
歡乖離越他鄉他鄉三千里道狹草木長白露  
浩已盈但恐霑衣裳慷慨睇遐軌尺牘安能詳

送梁石仲遊金陵

廩秋多竒思清雲颺層颺高樹蔭浮涼蟋蟀鳴  
前除撫壯聊竄端稚節念已移愠愉慕同趨仇  
別忽在斯寶駿飲靈潮塵駕弭郊岐南遊頓雙  
關北顧瞻太儀遇蒙賞心會玄冕生妍姿積久  
亮愈宣邛握豈獨私願言篤情素申章代五絲  
行矣茂芳馥遠蒸潛山綦

送丁道卿赴辟

大火澄金氣皓魄吐芳枝宵蟲篤時吟札札恒



若悲使我不能寐徘徊以增思力田希逢年終  
歲敲苦飢羣愚塞衢路獨悟焉所施對觴成睽  
索言出而志違壯盛失歡娛老去難逐追諒自  
用身拙此復當語誰思念我友生風駕事驅馳  
秋蘭委眾草芳蕤絕世奇此珎可比玉珠恐非  
時姿遠遠涉千里中夜永念之千里豈云遠所  
貴心相知冀願將其英佩服揚芳蕤願言無終  
極用各勉令規

贈穆禮部太公

太公魏人以子文  
熙貴封禮部郎中

蹇蹇石給事雅志存大計昌言忤詔瑞天刑劇  
危斃平生交情盡莫敢迫相睜穆侯一曹郎挺  
身艱難際扶創赴血肉節槩折羣勢藥餌隨所  
止分金重周衛太公曹郎親時來吐深契義聲  
兼慰藉如天掃氛翳命子竟投紱共輸東臯稅  
惟時東宮息方覃馳封例公心弥感激密達曾  
不泥脫厄詎辭禰求仁匪管利父子同風期似  
若有根柢王君述公賢謂世莫能繼要余共張  
引胡能復停綴盛德天所祐頌聲日迢遞願享



無疆休終南北年歲

劉光祿

浩沂極楚望嵇天浹坤維豈惟壯險介實以鍾  
英竒耕教厲清則屈平導瓌詞元侯暢神謨龐  
公甘隱棲高軌各異轍斯人邈難追光祿千載  
後采風振芳蕤燦燦隆國華結綬升皇闈令德  
既以劬庶績亦弘施長譽被京邑玄冕生妍姿  
蘄營非所慕鑒替在良時遠蹟要路津味道存  
精微盛藻煥辭條撫化究心期安知囂埃內靜

已還自怡猥余迫窮節蹇步局故蹊永懷欽賢  
性怵惕中獨馳慨彼憔悴顏終然阻光儀援翰  
忽蕪累情素何由披庶同握蘭者聊以遺所思

董中丞

大廈構殊材珎裘革豐腋濟川須巨艦搏風必  
脩翮曠代成茂業光贊在鴻碩董公實 皇佐  
河岳孕明德榮之清憲臺謇諤刺竒憲埋輪庸  
吳甸凜凜冰霜質白簡書不渝朱絲繩自直放  
崇蒼珮班飛聲動 宸極揚旌弭江微坐使萑



符息蔗蒸既已施蒸穢焉能植將偕伊衡輔遂  
齊山甫跡卓犖邦國楨配古作良弼緬惟藜藿  
賤荒塗棲叢棘豈不企高踪出處各有適流目  
瞰沉鱗矯首晞翔翼跼蹐懷顧慕抱影中自惕  
年志倏已闌何由蕩幽默款誠眇不達想像空  
佇立

積雪凝寒

大雪覆萬物天地始皓潔荒荒三光韜壯氣固  
窮節山寒困獸窘野曠人跡滅獨有幽棲士抗  
志在巖穴不知黃竹苦但覺丹爐熱孤鶴出竒  
標無復自分別逸情與野性于此尤更絕却嘲  
東郭生市中呈履缺

送王太僕

初陽吐和景曾輝開夕陰倏禽哢新條感我慕  
類心伊人江南美翹跼冠人林觀書獵餘絢振  
藻散竒音芳聲既氛氲妙理亦深湛寄賞雲霄  
外清風澄素襟于焉翔上都判袂方在今良談  
戀遙夕蘭卮時共斟余方迫頽暮離思悵難任



綠樹鬱瓊藹白雲隔瑤岑音塵自茲逐幽徑誰  
相尋後令戶庭內懷廟憶所欽

文休承臨趙子昂水村圖

連村蒼藹中緬邈迷行蹊葭汀出長浦柳岍澄  
迴谿遙岑若浮空孤舟來向西此中事田作時  
當及春犁彷彿蒼雲間咫尺無端倪還思避世  
者於此宜溪棲

吳郡太守永康徐公祠堂詩

文公化蜀郡名父蒞九江遺烈播清謠顯顯垂

令章惟公茂俊德曠代齊紛芳朱軒耀黃扉英  
風自遐揚武王昔南狩行行至吳疆公尤攄顯  
畫翠華竟回翔既施拯溺仁兼使國步康盛德  
著明祀貽則用無忘竭來有聞孫昭軌遵舊邦  
寬和浹民譽衆美咸昭光永言表遺愛抽毫頌  
甘棠

谷色丞何侯遺碎蘭花一首

色丞贛州何侯有孟蘭自其地移置廨舍扶  
疏如樹四五月開花其花細瓣黃色名曰碎



蘭芬馥郁烈即一花置懷袖間能經日不歇  
余聞而異之錢伯昭輒以言候候欣然遣書  
致予而不惜其千里提携之煩侯固良吏而  
有竒懷者也予喜甚因牽率數韻奉謝兼簡

伯昭

何侯古良吏好文兼好竒孟蘭得異種千里遠  
致之日對藍田廳溉使生榮滋片言遂相合欣  
然狂相遺田田綴綠葉葉垂青枝叢芽漸抽  
心似與地氣宜云當四五月即是花開時一花  
自成芳十步無乏姿楚賦竟誰辨漢篇曾莫窺  
雖余未有覲中心良已怡還將紉雜佩從風泛  
輕帷常恐委微霜終歲自保持申命同懷友共  
結後年期

貽周夢山一首

炎月煩翳蒼卑棲喧短翮流日暢恟想締墨倏  
已積芳茶鬱春華清言吐蘭澤屢蒙故人書庶  
用娛晨夕冲漠余所希同心曠來覲淪落非世  
患放神以自適劉公日沉飲深衷豈外惜



贈集雲寺性公

吾師南宗秀，禪慧森寶相。  
棲心滅板緣，開流納瓊藏。  
跣趺祇園內，通照空王上。  
靈芽餽霜雪，精心裂熏蕩。  
華鉢窺野鶴，香臺伏狂象。  
長廊松杉靜，天宮鬱相望。  
伊予滯迷方，有覩投雲狀。  
服倫世諦苦，纏縛魔心壯。  
標割資勝日，恭承指疑謗。  
更禮耆婆天，永拔示超曠。

画草蟲

沉沉夏溪陰，玲瓏秀瑕石。  
平荷圓溜滿，弱藻含風側。  
暖蝶熏竒芬，晴蛙泳清溢。  
幽閒自得性，妙象于此得。  
方知猜疑盡，靜對皆玄默。

登馬鞍山次孟東野張丞吉韻

古寺畫陰寂，綠蘿覆繩床。  
天影下清靄，松音落空香。  
遠樹多暮色，幽泉有深光。  
持此積喧意，來訪逍遙場。  
日出照元氣，決瀉湖海吞。  
濛濛松蘿頂，杳杳烟霧根。  
獨鳥鳴絕壁，霹靂鍾延遠。  
村遠迤青蓮宮，白雲初出門。

答王郎中元美三首



良時邁明哲能令羣望傾矣世躡高位九牧咸  
見稱喜招及韶年駿足隨雲升方駕趣虞龍藉  
藉揚雋聲言論汰流議詞賦鄙朝榮貽我以鈔  
詩燁若挾天庭何況薦高義慷慨有遺情瑤璫  
久乃宣和氏徒營營倉卒良未展蓄寶光彌呈  
冀願在一時安知後世名

涼風忽然至爽籟中夜作仰視明河翻皓月吐  
崕岬徘徊澹虛景鴻雁翔窠廓念子若故歡良  
晤欣有託寫心出誠素腆贈非所惜要我以遊  
居中更增睽索况復伸別詞遵塗驚玄朔歡願  
未易畢長夜誰云博聚散成哀榮由来誰能度  
茫茫大鈞化何從有厚薄子其知爾續余歸翳  
負廓

崇蘭生幽澗擁潔自推藏玉樹竦千尋傾枝媚  
朝陽萬物貴得性託体各有常奚必同根株然  
後揚芬芳藜藿非世珍何子反見臧大道無拘  
留貴賤寧易方形骸苟可遺于心定誰將當令  
千載上與子相翱翔



陳公儲畫龍水圖

古來畫龍者誰能得其真吳懷與僧繇下筆最  
有神徃徃合變化超騰奮無垠噫嘻至神物瑰  
異詎可親如何筆蹟間直與真龍均始知画師  
妙不在甲與鱗公儲心獨精此圖世所珍出沒  
蕩雲海伏矯隨屈伸反從意匠外倏使烟霧新  
披圖六月寒洶洶勢欲振劉董胡誕妄終日纏  
其身請君看此圖其性終難馴

少林僧徒一百二十人赴義討賊軍次海  
上不屬諸道帥聞而壯之遂賦此作

吾觀頭陀行髡髮窮山岬還以骨肉愛薰染熊  
羆牙奈何懷憤激嘯叱騰洪波生犀金覆腦長  
矛左右又鳴弓開寶月雄劍生蓮花據鞍大道  
傍四面咸咨嗟秘開九地法義盡五天魔寧隨  
霍嫖姚未遂李輕車功成不足多等世恒河沙  
由來俠烈肝可以棲楞伽

贈龔溫州

龔侯有奇度耿介絕鷺塵躋身清憲堂謹言實



敷陳及茲鎮南服理化在還淳政成日豐豫高  
情憇山雲興文若春華曄曄皆抽新雋聲散前  
胤遠韻隨風振伊昔家豫章桑柘藹千春竭來  
事薄游遵處濮陽津歲月邈已邁欲歸悵無日  
永言戀故都徙倚不及申緬惟登樓作信美豈  
虛親願言寄斯章聊用慰殷勤

送如顛上人南遊將謁龔太守

遠公住廬山持律稱最精至今千餘載能令衆  
心傾要非自矜潔庶照淪重冥如顛信本辨及  
茲方妙齡反欲長毛髮食肉希華纓南遊于諸  
侯合掌趣逢迎永違清涼區以與煩穢并豈伊  
示權化靜躁無殊形願子極抖擻無生未來情  
嗟余昧止泊方思啓真乘何由除偽寶食微契  
無生

卷周水部胤昌

廓落無與歡忽忽日云至勁飈捎空林積雪在  
平地漫漫大霄集淒淒失羣媚曠野多巖氣高  
原起豪鷲馳思日千里思我同懷士出處理既



睽契闊思彌熾貽詩六殊調臨組若黯劓善宦  
諒所敦違方能無躋豈不貴深識臨風有餘慨  
伊餘淪浚谷年志互摧悴感子惟良知精誠貫  
宵寐恨無凌霄羽終然莫余致徽音尚不嗣徘徊將焉遲

陸光祿卜居

卜居依人境默默中自操竒心絕近情披文竟  
清朝時無劉壑賞虛室恒寥寥逍遙有餘閒薄  
言遊近郊荒楚翳岑頰槁葉擁寒條冉冉雲景  
除天空氣澄高適已非外獎晤言寄清謠所尚  
諒莫儔獨往何必招

送曹琴學赴上都

威鳳昔來儀和樂光君臨何其久不至攬涕傷  
顏侵仲秋鴻雁賓草木發哀音我友邁朔都整  
駕越河陰日夕望京闕四蹄逝駸駸遭時在斯  
須良遇值來今簡珪辭垢土譽重千金愧我  
蓬室賤同枝乃異尋伸眉謝知己援筆為長吟  
飲周鳳來園亭



嘉辰愜同志邀我于中園塵慮欣暫道清言忘  
景淪高風落庭槐寒鳥池上喧遙遙晚色靜淒  
淒荒藹繁氣變寧自持歡來不重臻况迺逢世  
難禍患恒在顧復此戀佳賞既歸意弥敦

貽徐道潛

并序

自頃寇亂徐道潛避居秣陵徐氏園亭貽書  
要余云其居出長于數里得方山山有洞名  
金明相傳與華陽相通頗饒靈異可以棲隱  
又謂余不能全身遠害如管幼安者余嘉其  
言甚有高蹈之旨而恨不能從焉因賦此作

答之

伊昔逢世難念子實周旋息心追達生竄身復  
棲山要我以偕隱藻蔚攄妙言金明與華陽玉  
洞相鈎連中多金琅玕服之可長年其烏有殊  
響泠泠韻幽泉懷此信靈異庶足事潛盤恨無  
管生操重稅遼東田與子當睽索瞻塗邈雲烟

挽歌

生時貴玉體靡靡籍蘭芳姿容為肥澤雄志結



中腸一旦精氣盡筋骨反堅強飄飄吹我靈無  
復御案糧處我于高冢猛獸同穴藏土脉浮不  
實膏液清嚴霜豈在歲月多然後歎淪忘

贈劉生

蕭蕭古夷門膏聞抱關隱于今幾千載能使風  
義振劉生後來秀襟期忽相準結託釋榮吝高  
談藉芳醞良為賞心客疏縱何由近

贈陳山人

吾聞潁陽高嘯歌放巖石遙蹤澹虛景斯名何  
由得遺之彌宇宙譏訕隨以積君獨訪五藥韓  
康與比蹟荷插人參香腰鎌苔蘚色枕中貯精  
方發論辨經脉君真有妙理為余駐衰夕

顧方伯西園宴集一首

玄象忽改律萬物浸徂遷林廬捷清曠崇臺俯  
芊眠窮遠睇曾嶺近矚趨下田時菊尚餘絢肅  
肅晨飈鮮哲人解其感遠託絕世牽招要命同  
志為歡究當年陳醴發醲芬逸爵竟長筵綿綿  
暢其真悟對皆款然飲德良已極薄暮方言旋



俞允文先生集 卷之三 四三  
季月媚初景登艫沉迴川顧循慚菲質及茲荷  
采甄何以酬嘉會含詞諒難宣

送內兄梁參軍南仲

吾兄實名胄結髮攻雕詞吐齒有餘絢璀璨無  
瑕底每于叢人處獨見清廟姿才情無乏源雋  
譽紛四馳計日收甲科赤霄共逶迤柰何人間  
事跬步生叅差奇文隔衆目襍穢秘難窺掉抑  
不獲伸天路成多岐補官落南徼絰塗歷浮危  
淪漂饒水宿羈棲多野炊貫穿白雲嶠劇刺玄

猿枝入谷霧黯黯出樹花披披氣喧不潛蟄臘  
盡無流漸其民少文章反着烏獸皮豈不在沃  
產當時蓋羈縻君多幕中才僚吏咸見裨好古  
懷馬伏尋幽陟難祠薄宦非左遷抱能久未施  
又使職貢獻萬里辛嶮巖高馱千黃金逡逡走  
京師支離日月荒仡仡勩骨罷天子不見省歸  
來翳蓬茨厚謗消蕙苾輕裝謝朱提高懷滅城  
府大觀齊偶奇向平身既輕充腸易為資恬然  
恣真賞心蹟不復疑奚必玄圃遊神界方在茲



始知乾坤內靈藥非外規不知帝臺探何如金  
屈卮

荅王郎中元美

浩浩金氣肅稍覺喧繁收瞻彼窠廓間茫茫焉  
所投茲實兼上腹奔鯨駭洪流虧血無完士僵  
死翳榛止亂離既云瘼日見戈矛稠微命諒如  
絲旦夕鮮克謀疇能不傷冲而以攄百憂緬維  
上世士高翔邈雲浮竒蹤秘莫窺一往不暫留  
念此豈不偉舉巨空夷猶鬢變良以早劬刷還  
相讐惻惻含酸悽中情詎能抽願言寄深識來  
章儻相詡

寄上劉尚書

璿玉經天步本自岳瀆珎炯然無氛雜七政咸  
相循公實濟代賢豈不與之均卓犖大庭議翕  
赫臯夔鄰復睹風雅作清機妙無因浮雲為舒  
卷峻節靡緇磷白首臥松雪丹心映麒麟巨海  
擁百川四面來英賓宛轉生人表向下看埃塵  
澗唇龍氣竒崕口虎蹟新燁燁齋房芝三秀彌



冬春安知台國賞反在潁水濱真德既已殊匪  
伊常情親于焉佇芬芳握蘭徒自勤

題伏生授書圖 并序

余按班固書始皇帝燔燒詩書六學缺然求  
能治尚書者天下亡有獨有濟南伏生乃詔  
掌故鼂錯往受之時生年已九十餘不能正  
言至使其女傳言教錯今觀此圖皓首踞坐  
者即生也懸書杖端侍側者其女也勤禮而  
面坐者錯也斯善畫者可謂能盡其態矣然

生壁中藏書已數十篇僅得二十九篇而齊  
人語多與潁川異錯所不知者凡十二三而  
歐陽永叔又言徐福入海時尚未焚書日本  
至宋時猶有遺書百篇禁令不得傳至中國  
嗟乎先王之大典放失殘缺事蹟委曲若此  
而夷貊乃能獨存而不廢為之慨然遂題其  
圖之首

始皇燔書後六學咸缺然獨有濟南生藏書三  
十篇當其孝文世詔錯往受焉生老言亦訛至



令其女傳渾渾與噩噩吁嗟一何艱婉變展新  
圖若見千載前善画苟如此奚在丹青妍

書李唐画采薇圖後

惟昔夷與齊畢命隆義聲長嘯孤頰頭飛芳振  
蘭蘅傾筐停瓊霤慙默薇蕨情冥游超玄跡卉  
木有餘清李唐稱善画溪心寄廉貞豈惟粉墨  
殊真使頑懦懲炯然珎圖上空林肅遺形灑筆  
佇遐軌千載希令名

貽元美

玄冬多枯林遼索山澤居終風相回薄慘慘意  
不舒裒痂日相侵戰慄還復癯常恐形神沮曠  
然歸空無用懷我良友翱翔于上都清義著來  
今羣士所慕趨自我同携手已復三載餘亂象  
已迫終懼不克俱悠悠良辰往念之增鬱紆  
何以寫遙懷辭殫意未敷

送許明府之蕭山

芳辰展良覲暄景麗晴臯綠莢結遠藹河柳散  
榮條送子遵路衢遲侯睇征塵肅肅戒晨旅理



棹泛流潮迂湍既紆餘連頰復岿嶢雲烟信緬  
邈蹟通心實遠豈必樹繁英足使令名劬俗化  
由純約政成在不佞何以慰寤寐竦踊佇清謠  
送周水部胤昌還上都并序

蜀漢江陵之山多竹木之饒其民每歲剽伐  
候水潦出之菽江而下者以億萬計故行賈  
編郡國贏得多至什倍國家置關荊州權之  
周水部胤昌往蒞其事踰年甚有聲稱卒使  
豪戚斂跡事竣還都道經于家適阻寇亂戒  
車未發復得小展談讌念今寇亂益熾後期  
難要因贈詩一篇送之

懿子實鴻軒雋聲惟高揭竭來返南服虛舟信  
超越折麻言湘纍九陽徒晞髮浩浩極楚望撫  
化無厭歌河山自神營日月互興沒賞心亮已  
遇外物誠可忽况乃遺沉浮淑貺仍所闕時屯  
無夷軌戒車未能發復得展談讌暫阻河陽別  
猥余日裏痾寧能謝先伐無茲儻存故庶幾慰  
寐茂



送吳山人志道往閩中謁汪中丞

閩山插天起谿聲額猿長萬里度雲壑兩岬迴  
清光山胡啼綠烟春風薰蘭香五月荔枝熟丹  
房苞玉椽人家嵐靄中瑯盪薦檳榔此地昔稱  
美化為荆棘場汪公擁貔虎揮戈掃天狼俗美  
還舊觀英聲震遐方開幕納羣士世人比孟嘗  
君行託大賢頌德揚芬芳况復入佳境所志無  
不當還期香雞尋延領聊相望誰憐張仲蔚蒿  
蓬獨推藏

贈休寧程汝玉

程君性恬快所至能緯居邑里多英賢撰次遂  
成書頗復購奇石巖嵒列庭除石根九節蒲冬  
春自扶疏可翫復可食翠色新雨餘何能訪君  
家與此相躊躕

贈林上人

上人天機秀諸法了自別雖行黃塵中素心皎  
白月空林響秋籟淒寂忘言說聊因啓真采求  
入無生滅



送汪禹乂還新安

良友千里至高誼超平常持我篋中賦一一為  
平章新詩又何佳可以奪蘭芳各言惜晚值談  
晤傾曦陽八月尚炎蒸垢汗如泥採披襟散冲  
想竟日皆清涼始信蓬蒿棲意得自徜徉春然  
候言別斯史仍異方同懷難久淹後期未渠央  
臨流撫烟景引領睇歸艎

太原太守於戾德政詩

太原古晉墟河山信隈隩險塞自天戕襟帶窮  
要服實唯地所固伯蹟相薰逐矧復連歲飢萬  
姓空杼軸雀苻曠游侶商賈無停轂渤海方亂  
繩所期在良牧於戾人倫俊茲焉剖苻竹仁聲  
翔首塗聰麗通遠矚亂繩日以理招徠及流族  
閭閻稀夜柝疇壑多春犢奚藉里端訓能以澆  
還樸民俗既安瀾倉困有遺畜至哉中和化千  
載幸見復雖野感祥雉扶輪擾馴鹿愧乏資中  
木承風播餘馥

河陽溫侍御平寇詩



層氣升喬空吳嶠獨不開溟漲既泛濫妖鯁六  
曝鯁時無幄中画樓船屢徘徊伊昔荷休命神  
畧擣上才赫赫整精銳揮戈役風雷素甲耀雲  
日列校奉成規鼓楫凌遠山維綃屆荒坵虎賁  
屯七萃魚麗盡六奇天網諒宏已梟孽焉足綏  
生俘遠近遞皇道日清夷弭箴息徒旅飲至延  
偏裨昔往傷采薇今來樂時熙昌業倏以建雄  
名安可追揆予愧薄劣牽率敷斯辭

有懷徐汝寧

汝寧為郡治行甚高而大度不閑於時竟為  
抑翫嘗邀我以二室之遊亦遂中阻計旬日  
可至吳門久遲不至悵然有作

君昔負奇氣高聲馳建安賦詩特先賞四海交

清權

汝寧與濟南李攀龍廣陵宗臣荆楚吳國  
倫吳郡王世貞初同官京師並為詩詞以

佐更事汝寧于時最先為刑部尚書願  
公應祥所賞名重海內王嘗為余言之願予雖

淪躋投分踰芳蘭開懷結綢繆直置瞻與肝密  
念屬千里要以相游盤豈徒寒暄問方當振摧  
殘如何中睽阻倏忽興悲端知音諒已稀寶瑟



漸空彈日夕佇光景彷徨使我嘆

贛州康處士草亭

高居出事外孤亭朝藹中  
細草蔚佳色厖亂隨  
春風映階連古苔盡日青  
叢叢此中饒幽意冲  
賞莫與同懸知蔣生徑獨有求羊踪

王元美離蕢園

芳園蔭通衢落落無停轂  
雖非巖穴奧緬烏在  
後谷綠竹帶清川標雲秀  
珎木蕙畝藻神霧蘭  
林泛鮮旭無風自芬芳  
茂彼蕢與葦達人有遐  
度所尚惟浚穉稱心何必多  
即事遺飭朴良辰  
欣時往聊以舒煩促引領  
日東鷺何由託余足

阻雨夜宿盤門石橋西

我行值春暮遙山多綠苔  
濛濛日氣蒸亭午雲  
不開夾河柳色暗白雨  
湖上來暝投石橋宿疾  
心忽如摧故人屢相期  
悵望空悠哉

蘼姬篇

美人綠窓裏啞啞含春風  
春風忽飄至但聞妍  
笑正紗芬泛裙裾嬌靨開  
芙蓉年纔十五六未



與世人通可憐少年子珠勒桃花驄意羞黃金  
賤第言心性同婉孌有餘情密得常相從相從  
高樓夜度曲入雲中曲終應若為乍疑天上逢  
詎知宵漏歇日映象林東

雜詩二首

暮序迫窮晏疾飈嚮巖巖空林伏晦色散漫愁  
雲寒層冰隨陰結氣勁浮景單淒淒苦心薦颯  
颯華志殘廣隰有屯靄涸澗無縈瀾常恐霏霏  
集無以足朝食既秉遺物情邈然竟誰干

初秋氣候佳懷新赴脩薄遑迴自俄頃參錯變  
巖嶠飛流灑青天穹窅映丹壑竦樹既迷密韜  
景乍焜燿境殊雲霧多心魂慄微弱緬彼上世  
士升嶠均遠託儻若果幽期豈意淪躄鑠

說劍送周孺允

孺允有雄劍藏之二十年上鑄七星字文章皆  
自然戚戚鱗甲青黯黯有竒烟日夜自拂拭行  
行至幽燕累干苦未售出之聖人前一朝聲譽  
開遂登黃金臺浮雲為之決龍光天際來物久



精氣多豈同塵與灰託意每不淺弟今世上猜  
安知三千士服斃俱蒿萊

吳江普濟寺古柏

古柏觔骨竒磔裂半生死年多葉逾細疊腐如  
馬齒陰坳滋綠苔燥節流素髓胡為長偃蹇獨  
抱止壑美寧隨共銷落與物齊一軌

寄李攀龍二首

烈風飄中野惻惻將焉之世務多委曲龍性非  
俗宜君子存遠鑒端操方獨持息心都邑游長

嘯歸東菑遺榮棄鄙議一往不復疑逍遙極懽  
情散髮臨川坻達人貴止足斯義誠不虧引領  
佇所欽安能与我偕

日夕思君子邁會何由期山澤阻且脩念隔難  
克偕未見致款誠亮由心相知相知不相見悠  
悠使我悲曠若懷古人千載與我睽古人雖云  
遠詎令歡愛携顏言結蘭芳平歲永御之來章  
倘不乏庶慰長渴飢

與王元美

并序



元美歸自京師即以家難復馳赴焉舟次城隅予為負痾出祖於時天垂厚陰烈風隆寒音旨哀憤心誠痛之因復累嘆長夜舊痾增劇信分乖之致感年命之不固遂作詩三篇用申薦好且念嘉會之無期耳

北風何烈烈日暮玄雲征浮舟泝大江遊子不得停念當卒歡好奄忽禍患嬰臨流申別言言叢泮自零判若參辰隔何時復來并願保金石軀傾耳聆休聲

季冬嚴霜月去我之朔方萬里戀辰昏憶中自傷寒氣侵襟袖河宿正縱橫徒有盈觴酒與子不能將念茲雖云乖終當返舊疆  
良時邁歡友嘉會難可常始出燁春華今來慘嚴霜斯須臨路側離別在一觴古人可喻心豈不惜蘭芳安得常嫵婉與子相隨翔

贈林居士

林公好竒書日夕自研披蕭然遺世慮六十仍卑棲與語皆隱淪固窮不復疑此理邈難匹所



保諒非違事事如古人于今竟誰知素心苟如此奚用空名為

寄題蘄州高別駕園林

昔公遊梁罷不喜平壤居尋幽極遐情茲山信縈紆疏峰別巖薈選勝開林閭松篁蔭後園蘭蕙滋前除泯泯江漢流俯映皆空虛龍磯莓苔古千年蟄寒淤却顧麒麟山蒼然嵐靄初

贈莫雲卿

莫子才不羈逢人即相知朗然澈丹素便要千古期若無深沉思又為璀璨詞衆意所未決出之了不疑投壺應衆林談笑傾一時飄飄滄洲趣清輝凌紫霓交驩瑯琊君啣杯共揚眉不愁白日暮但賞知音稀願我還索漠披文每淹移閒花落空庭獨有香風吹攬之不堪贈窸窣空尔為

送葉伯寅遊永嘉

昔聞謝康樂高情屬霄漢符守烏足羈滅蹟類幽竄風疏人倫外尋雲常苦晏所託良未淺賞



心寄繁翰曩哲既殊調今子亦同貫理棹及秋  
晨逸志期汗漫沿洄巖子瀨奔峭赤亭岼樹隨  
猩鼯溪峰與烟霞亂清江千仞激寧假濯衣玩  
觀竒諒心契旅遊豈情歎願我懷閭室咫尺曾  
未半傾想遲歸舟舒情共欣讚

寄吳明卿

余本蓬室士疾疾况窮年落落衡門內日夕戎  
寒烟雖無原生期曠若相周旋何子特見賞令  
我顏色妍片言結心曲挾纊未為暄悠悠阻音  
徽契闊何由宣恨非排風質與子賓窠天

寄徐子與

惟昔常與子歡情覩芳荃終晏臨華池合坐忘  
景遷澄月揚素彩蒼蒼出中園清管應妍唱遺  
響徹雲天車子安足誇由來有自然媿非繁休  
伯奮藻析長戕念子含餘歡秋期復未還何獨  
成駢服遂令孤願言還期暮春時慰我飢渴顏

送周芝孫北游

周郎有逸興染翰六鮮儔結交名公子遠託千



里遊揮袂辭親知，金鱸出芳洲。行行越舊壘，北望燕與幽。才賢萬里會，鬱鬱都邑稠。走馬黃金臺，知音儻可投。願余老巖石，矯足空夷猶。

送徐按察紉明之湖廣

今日看征蓋，春風喜去旌。桃花漢江水，楊柳武昌城。詩得窮時趣，人歸謗後名。也田成布錦，推監作和羹。木大無淹秩，時來不用營。朝廷新氣象，霄漢待君行。

送王少叅敬美之江州

王君弘美度，觀書恣披搦。牋麻每盈箱，翰墨間揮霍。籍籍收衆譽，芳風播蘭若。頗戢承明廬，祇投出漳洛。旋登太華巔，六復資遠託。金繩引絕巘，玉梁亘幽壑。磨甃捫懸崖，側足履半嶠。路東逢骨刺，天峭斷翔雀。惟君嗜竒游，儻身出廓廓。又聞廬山秀，巖岫必天鑿。磅礴浸三江，氣變莫可度。其內多異蹟，古仙所棲泊。移菴方在茲，歡情從中作。延領睇高軌，怡然去羈縛。何當盛明世，終以縻人爵。



送王儀部歆美赴上都

蔚蔚雙瓊樹，枝葉何葳蕤。芳華參差發，一一春  
風吹。與子方晤言，分昵由良知。如何限官守，整  
駕促前綏。行者日以踈，居者將復離。世路有殊  
軌，日月無淹期。立德豈藉貴，盡意非在辭。勗以  
慎所履，永用慰幽棲。

秋日四首

秋日臨高城，曠然氛霧收。穰穰晴山出色淨，寒  
塘流淒清。菰苳稀羣影，居下頭積痾。無時豫是

日欣久留，長恐行徑黑。餘興猶未酬。

窮居唯自知，垂老坐幽石。白髮不可緝，了無周  
身榮。海氣生早寒，颼颼櫺庭夕。商歌乏偶響，敢  
謂天地窄。獨有千古心，躊躇桂枝白。

雨氣久厭苦，開晴喜至暝。精明月更出，空闊天  
無星。地濕發寒彩，餘影澄逢汀。竒懷忘深夜，耳  
靜無所聽。不知霜華落，曙色青冥冥。

新晴雲氣鮮，月色高更潔。幽庭宿涼雨，照耀如  
積雪。思鳥但聞響，遙影空中滅。久靜機思清，整



與人羣別曰知雲煙內事事皆可悅

九日

閒居愛重九晨色晃初晴澹澹氛霧開草木含  
光精岡巒厲嵯嶮石瀨滋冽清極望藹垌牧豕  
黍被脩塍高雲矯輕羽迅飈隕浮榮隨時覽物  
化冉冉焉得停將老思近年淹留餌秋英豈不  
昧服理聊以摅吾情

秋懷

季秋積氣盛大野屯隆陰萬物忽改色淒淒多

楚音摧藏失志義長嘯高山岑獨行無匹儔浩  
蕩愁余心冥數苟如此且復俟來今

丁巳七月九日大風拔木偃稼一首

去歲地維裂遂欲開西北秦華忽播搖河流互  
傾覆富媪曷自處萬姓遭顛仆及來怒狂飈偃  
拔恣雄力眩眩象雷聲迴穴無停刺大塊苟噫  
氣何由有戕賊班生書五行妖祥詎為極天心  
疇能忖感悟恒在德吁嗟托人憂方此諒非惑  
我欲緘此詞遺之於滌識



漁父

昔有漁父者輕舟若乘風心恬濤瀾事澹蕩空  
虛中夕依落月開晨汎初日逢釣竿揭日月蜿  
蜿驚潛龍運思沉九淵所得豈在豐惜哉行吟  
客願言而莫從鼓枻滄浪流聲與天壤終

秋夜

孟秋逢餘閏陽景奄西歸清雲蔭蓬茨皦月揚  
素暉涼露承輕葉澹澹河宿稀中夜結遙念攬  
衣起徘徊遵塗豈不疾顧瞻獨有違苦心將焉

寫抱影私自悲

登圖山

晨發候翔陽暮投乘夕曛籠茸入烟灌迷密鷺  
荒菁標峰天外竒發地茲江濱峯岑類奔兕嶰  
嶰象驚積深洞韜恠章華嶧被綺文黑霧鬱海  
色丹霞隱日氛攀鴻升八齋宿巖憇千雲伏化  
賊靈族宣遊必仙羣敷文絕徃篇竒紀昧前聞  
幽期自茲協秉願辭世紛無為樹松擯惻惻懷  
頽緼



贈虞山老人

迢迢虞仲山回環四十里其下澄湖陰半在山  
色裏湖陰與山色蕩漾蒼翠新時時白雲來往  
往如鎔銀可以洗心耳使我無埃塵君年六十  
餘久與湖山鄰日玩易厭歌茲意恐未申余有  
隱淪交扁舟去無因往篇有深意為君再三陳

贈竹洲館陸道士

竹館多涼氣白日自森閑  
疎響落鳴瓊稠陰委  
繁翠寶書時復開青鳥還  
能使聊欣山巵舉超  
然有冥寄

送顧舜祥授四川鹽課提舉之任二首

繁林雖翳薈擢幹衆乃形  
顧君茂前基奕奕隆  
雋聲酌言汰浮說立行表  
冲情殊方眷明德祇  
役出郊坰嶠峽睇梁岷迨  
還越荆衡叱馭馳九  
阪竦體入青冥心與日月  
懸迤隨烟霧并皇猷  
亮已著義峻身始輕豈恡  
遐怪極焉睹耳目驚  
遠績苟辭勞何以希令名

梁岷西南秀巖嶮一何尊已極天地險鬱為五



其根谷神鎮相公鳥道雲孤翻三回巴江盡七  
盤勢彌屯始悟去人遠反喜城市喧地偏氣益  
奇四賢復高騫四賢漢嚴遵司馬相如楊雄均  
王褒梁鮑照有蜀四賢詩  
託盛羽軻遺烈炳璵璠矧茲割據跡興衰互明  
昏其事雖已往當時劇崩奔倘協訪古情冀聆  
他日言

送王元甫

閒居懷長戚寢瘵彌十旬與子猶比屋蓄念曾  
未申念隔長依依曠言及茲春往駕過不留談  
慰邀無因悠悠越大河去我提颺塵曠然增遼  
索思德彌以新世務無期度歡邁將何辰盡意  
豈在言聊用叙慇懃

送向容周明府遷南京大理評事

周侯蘊美度不隨俗浮沉翩翩垂天翼乃棲枳  
棘林屈已遂弘化衆知惠愛淡飛鳧憩華陽清  
機開道心鳴絃致精賞山水諧奇音行高不終  
躡夷路微在今願言茂遠績芳風播謠吟

送梁伯龍天台將往武夷



嘗觀興公賦冥搜恣返躅天開赤城標灑然豁  
心目瓊臺望朱闌相連入雲族松聲湧波濤遙  
瞻但空濛石屏莓苔滑此中勢莫窮改轍復南  
行名山當武夷碧嶂爭峭崿秀色明廻谿丹宮  
仙人古却紆武帝祠子有超世情興言懼髮變  
諛身事冥搜逍遙釋常戀余亦秉微尚每懷巖  
壑竒守見苦未弘棲遲遂淹時何時拂衣去與  
子諧幽期



仲蔚先生集卷之四



吳郡俞允文著

七言古詩

金陵篇

江南佳麗地金陵帝王州嘗聞謝朓為此曲我  
欲竟此令人愁憶昔秦皇恣驕侈千古爭雄鏖  
淮水朱衣辛苦三千人不及蓬萊身已死當時  
望氣復占季六代興亡事可憐一旦雄圖若沃  
水五城蕪沒埋荒烟烟卷三月流鶯啞撲地香



林盡天苑結紉臨春空復情景陽鐘鼓臺城晚  
傷心鉛粉共灰塵百斛流脂瀉水銀碧館金臺  
歌舞地季季草色倍傷神詞臣舊住清谿側江  
沈風流難再得謝家春草今何如令人却憶平  
原宅孫楚城西酒樓客桓伊好吹柯亭笛山中  
宰相松間風謝安自有東山奕長蔬隱士北山  
中鶴書一赴蕙帷空只今惟有移文在清猿哀  
怨何時窮文采豪華不復存自是昏庸曆數屯  
由來虎踞龍蟠地今日承乾有 聖人聖人神

武一朝征定鼎山河萬國寧全憑寶勢開天邑  
鬱作金城遠帝京天邑帝京連帝里丹宮璧殿  
天中起宮餘百數殿千重異色參差望成綺七  
萃連營禁衛尊列侯甲第俯朱門虹旗錦簇齊  
天伏玉道香留碾繡輪徽道周廬迴地軸提封  
百萬分侯服重譯遙通百蠻貢千品來朝九州  
牧聲名文物盛陽春寶契無為德澤新廣樂鈞  
天貽景祚謳歌率土奉還淳端拱垂旒御區宇  
共識承恩有真主加聞厭代忽登遐鼎湖一去



成千古千古登遐事已仙時時佳氣遶龍阡  
冠蓋如雲奉陵邑長瞻法座仰堯天憶昔家君薄  
游此余亦童年纔一紀朝看尊騎滿長安暮聞  
擊柝傳之市長安三市控繁華戚里權門意氣  
奢鐘鳴鼎食金張館饌玉炊金許史家公子王  
孫驩不足還向娼樓夜中宿琥珀杯深脫紫絨  
芙蓉帳暖銷銀燭玉局彈棋不論錢花塲蹴鞠  
闌芳年鳳凰臺下千金騎瑪瑙山前七寶鞭俱  
邀少娥芳草偏笑比紅顏拾花片更憐月色滿

長干橫引簫聲促高宴秦淮五月天氣清楚俗  
相傳弔屈平共泛龍舟乘浪轉競移蘭棹向潮  
迎疊鼓華翰望標入夾水新妝相對出須臾  
蜃氣結婆城髻鬢犀光照鮫室增竒特紗在茲辰  
迴雪行雲詎可論驩娛未盡欲歸去更待明年  
淮水濱春去秋來不相待富貴驩娛有遷改黃  
金散盡顏色衰桑田屢變成滄海鄭莊門館日  
飄零翟尉交情見死生蔡澤還傾應侯相魏其  
不及武安榮以茲感歎傷懷抱梁父長吟對秋



草氣凌五岳三十春身披短褐非有道遠屋扶  
踈仲蔚居貧病長辭友賜車袖裏曾無賣金賦  
枕中惟有煉丹書世道由來多倚伏天骨自然  
甘寂寞何時移向鹿門山松迳烟扉任棲託

楊花落

春風吹人氣妍和楊花落水生綠波少年幾時  
逐事淺白日易晚傷蹉跎袖中有書不肯上五  
侯門前曾未過燕丹市裡堪擊筑酒酣樂極哀  
情多哀情多可柰何昔日豪華勢莫敵朱樓綺

食揚清歌東方欲曙宴仍起薦地一一紫錦羅  
博山鑪中灰亦寒纍纍冢上生蓬科衰亦不可  
盡樂亦不可常蓬萊之山路渺茫此中空有長  
生方何人不死至今在我欲共看天地長君不  
見人生萬事劇流水莊周至此齊彭殤

桃源行

武陵溪深谿谷斜人家避秦多種花桃杏無數  
映春叢片片還落秦人家地沒反無猿狖生但  
有雞犬連桑麻白雲飛來復飛去山裏人家幾



家住當時捕魚何處歸歸去還尋復何處始知  
人在淡山裏世人遙望空雲樹

胡笳曲

長風吹高海底月半落沱河色如雪胡笳寫出  
隴頭聲千聲萬聲吹不歇此時都尉兵初盡此  
夕單于陣方結涕地黃沙凍欲牢連天白草燒  
難熟玉筋啼還徧紅顏坐相訣楊柳曲中離別  
久梅花管裏音書絕胡笳本是從胡起曲曲緣  
雲咽流水飛入重城怨已淡聽臨遙塞愁應死  
誰知沙畔捲寒蘆一曲能消膽氣麤更使胡維  
雙淚落萬羣嘶月過飛狐

寶劍篇

吾聞龍泉太阿之寶劍此物往往鍾神英人間  
得名千百載國內惟有徵求兵昆吾之穎茨山  
精銀花繡出霜雪明星氣朝朝鸛鶴紫龍光夜  
夜芙蓉生文章已足清朝貴勛業還為猛將驚  
七雄五烈雖已矣報讐報恩心未已非但飄淪  
古獄邊二曾提携楚城裏崢嶸磊落世兩見斷



蛟刺兕竊所配天下常令萬事平匣中不惜千  
年死朝馳咸陽暮雲中此間未必皆成功但看  
古來功名士殺身濺血俱英雄嗟哉神物會遇  
之有以至今升騰變化為飛龍

巫山高

楚國古巫山上有陽雲臺傳有神女何時來楚  
王昔日多荒淫神女為之久徘徊徘徊易闌寢  
淫衾亦已開千年夢冷雲不起只今唯有空山  
夜月清猿哀

塞上曲

高城秋落黃雲飛胡人弓箭能射肥黑鷹突過  
百丈餘白馬萬匹皆新羈錦袍長袷綺繡襦玉  
帳貂狐指漢衣日暮蒼茫共百圍李廣已死關  
兵稀漢代誰當窮朔漠何人第一搦勛歸

銅雀妓

朝登銅雀臺暮望西陵樹西陵樹斷高烟平歌  
吹淒涼襟風雨雨後秋風吹月晴紅顏難持淚  
易傾武帝遺靈復安在向帳空餘千載情



虎丘行

吳王墓前雙石壁翠水沉沉  
劍花赤香榆氤氳  
遠綠烟玉潭閱謚浮青蓮生  
公說法聞金偈猶  
自繁華昔遊地今人繁華異  
昔時古人行樂今  
人悲古人今人不相識  
徒使流鶯淚霑臆

鬪雞篇

春風吹花百草香  
宮鶯曙轉銅龍光  
雒陽清明賜新火  
天子出入驪山傍  
驪山三月春茫茫  
平明初入鬪雞坊  
鬪雞隆隆翠塵滿  
錦肉鱗鱗繡毛短  
狸膏氣濕紫葳蕤  
紅雲膩血腥羅暖  
天子傳呼賜賈昌  
五侯七貴爭雄長  
武騎才官為惆悵  
青駃金距莫相當  
貴里繁華矜是日  
六軍小兒俱赫奕  
九衢雙闌夾飛龍  
萬戶千門動行色  
千門萬戶無生涯  
日日承恩不到家  
憶昔開元全盛日  
空令識者久咨嗟

春思曲

江南花時二三月  
少婦乘春逐芳節  
心性穩愜含清真  
弄影晴川自流悅  
青絲刺帶錦作裳  
寶



扇輕搖翡翠光芒房露冷春窓火蘭迳烟開粉  
膩香七彩明璫九華佩紫縠文羅掩秋翠繡額  
花叢千萬色玉腕竒姿散春媚含思絨情不相  
識步步遺芳去無跡迴簪轉黛飛參差纔過東  
城又南陌南陌東城春事淡離思杳杳花陰陰  
坐對流鶯啼歇處閒窺清鏡理瑤琴晨鷓鴣清  
不可聞恨斷吳烟怨楚雲自是禁心批不得還  
同孤月向黃昏

明月引

明月入我懷又照青樓上青樓十年音信疏自  
憐憔悴芙蓉帳芙蓉帳冷夢難通珠簾的的照  
還空漢宮思婦調砧切梁苑詞臣屬句工已看  
落葉驚秋早影落銀牀淨如掃溥溥玉露夜河  
殘幾處啼鶻怨特曉君不見關山萬里度應難  
萬里隨人去不還只公織得鴛鴦綺定寄關山  
第幾山

大風歌

隆慶三年閏六月大風五日海水沸溢海壖



之民被漂溺者殆以萬計作此紀之

胡天積氣盛鬱勃不得吐怒號長風倒海射飛  
雨扶桑摧若木傾似將吹隨五岳与地平日月  
不照耀萬竅以哀鳴天本無心當復何施或云  
厭炎虐焦灼流膏脂唱白帝驅祝融清凉八區  
欲使體寧而意充又胡不細察一齊人窮漂溺  
萬姓害稼穡寒暑變俄頃邪氣還攻我獨抱疾  
常色色天地至廣如不容顏得塞土囊剝箕舌  
微令飄冷以脩通然後披冲襟上蘭宮頌說聖

時高賦陳雌雄

絕纓曲

春風遲遲催早鶯啼花宛轉音最輕坐中俠客  
語半醒穠魂豔魄蕩春情春情復何有度曲送  
春聲春聲易醉月未起華燭滅來心已死芙蓉  
紫袖多斷纓謂是楚王能好士

學仙

昔人學道常山中兄弟積習九十年勤求素書  
元七卷三人誦讀俱精堅青崖宛宛見白鹿一



試不過心茫然唐公雞犬盡輕舉茅家兄弟皆  
得仙由來至誠合天道霞門寂絕無板綠世人  
仰望不可見唯餘壇館禮蒼烟

画山水歌

連山波浪隨嶮嶮朝朝出雲多作陰復有飛泉  
出雲上迷巒幕岫增重溪人家近住路還絕家  
家種田飯香雪果熟頻將猿狖爭酒釀不綠賓  
客設漢陰抱甕如芎間處處疏泉灌石田每歲  
桃花春水漲時看天際下漁舡

蘭草花

中園百草俱作花不及蘭花柰若何紫莖綠葉  
搖素波回風蕩日氣妍和開幃捲幕芬藹多繁  
絃急管送春歌結禱紉佩遺湘娥獨念孤芳与  
衆異徃徃零落委江沱

囉螺茶歌

陽崖陰林草性靈囉螺二月茶芽生紫芽連卷  
青未吐處處報春山鳥鳴高雲行空露華碧新  
雷已過衆壑晴筠籠芳鮮採摘成錫口焙來誇



至精壑源陽羨空有名自餘諸焙皆可輕豈知  
天產合幽寂最後始出人更驚得之不減玉與  
瓊開緘試新手自烹冽泉甘澄腴飴露綠烟旖  
旒啼春鶯小鼎初看火候勻精氣漠漠紛蘭英  
素瓷吹香淨肌骨徃徃似與真意并高齋晝眠  
還獨醒靜待松月流孤清王濛好飲不解飲陸  
羽毀茶空有經枉使千峰待逋客無復雲霞淡  
處行

姑蘇驛樓

高城如烟起長洲千山亂入青滿樓吳王歌舞  
猶未休美人如花笑吳鉤西風吹急寒鳥落日  
暮黃雲人正愁

妾薄命

隆慶二年春有訛言詔採江南女子充奉掖  
庭一時民間聞之惶怖若狂雖紳冕之族徃  
徃不待媒妁造次結褵莫能禁制遂使年齒  
失倫門素非偶薰蕕淪雜追悔無由竊以政  
教不失其御則國無妖訛婚姻不失其時則



命何處先生卷之四十一  
民無怨曠厥所由來誠非一日因紹古詞撰  
妾薄命一篇以憫其生不逢時而亦不敢專  
有所刺也

江南初月上春時忽訛丹詔採蛾眉自是潘揚  
非舊匹由來河漢不言期喧喧簫鼓東西去寶  
馬香車塞路垂家家共灑長門泣處處俱嫌隔  
蒼遲不用黃金連理監須臾便結同心蘭塞脩  
寧藉禮花燭自成歡紛紛桃李競空取路傍觀  
紛紛桃李競繁華飛來飛去落誰家一生誤嫁  
嗟何及祇是妝成怨曉鴉

繡枕歌

太康何氏女嫁同縣劉氏七年而夫死輒出  
嫁時所繡枕焚之其光中灼爍焰如蓮花比  
夜半遂自經死人皆以為精誠所感余高其  
行為詩歌以著其義烈云

劉家高行世所稱明心直與古烈并良人早殞  
腸斷絕一朝身死鴻毛輕自憐嫁時雙繡枕百  
絲纏綿情更甚願得終始當千齡願得千齡同



俞允崇先生集卷之四  
一情鴛央機中不成匹枕上之淚何時晴  
雙枕燒作灰婉婉蓮花焰裏開焰裡蓮花燒不  
滅蓮卷堪公明心潔皇天自是感精誠當時一  
哭梁山傾天長地遠恨難沒誰為飛章上帝京

周方伯遺滇南小劔歌

我公歸來覲軒轅滇南萬里無停軒遺我小劔  
不盈尺魚皮貼鞘珠蹲蹲寶鐔照人如照水精  
光黯與元氣存凜然相顧出寒液雄心未死口  
不言始知蛟龍變化豈在大斯須勢與滄溟會  
願得置之懷袖間益壽延年辟災害安用耿耿  
倚天外

松雲歌贈邑明府大梁王公

吾聞嵩山之天門上有萬接之古松千年莓苔  
積翠洗不落龍鱗夭矯搖青葱有時峰移岫轉  
晦暖勢莫分片片飛出蒼梧雲縈枝透葉斷復  
續山光雨氣相氤氳松鬱鬱雲陰陰其材可以  
棟大廈其潤可以濡甘霖神君為政本同調對  
此徃徃開雄心君不見王喬之鳥處子槩形骸



之外安可尋由來君子貴遠託未許常情知淺  
深

折楊柳送周別駕胤昌之武岡

江南折楊柳都逐上春來楊柳初發時衆花俱  
未開可憐芳菲色直自閩江梅依依夾官渡連  
連到章臺短條未堪折長條已染苔長條短條  
千萬條一一盡向春風嬌交垂翠織鴛鴦帶合  
吹象棍鳳凰簫共道青絲勝馬尾縈烟卷雪紛  
絲起長條折盡短條長相別相思那可忘思君

一別渡湘水巫峽巫山幾千里巫山巫峽盡啼  
猿朝朝暮暮猿聲裏芳蘿已抽綠蘭翹又含紫  
賈誼仍懷吊屈平長沙非復淹才子君行定得  
幾年歸莫厭傷心楊柳枝與君為作楊柳曲曲  
中併是係相思

燕臺歌送張師周入京

昭王昔日思雄才一言便築黃金臺黃金可輕  
士可貴往往至今賢譽來何況天子坐明堂  
宵衣旰食攬八荒榮光休氣徧巖谷志士豈合



空摧藏君有雄心世罕比  
兩世一家拖青紫時  
人注意皆向君莫言別後無知己  
乘乾南玉河北燕臺秋高磧雲黑  
料君此時才轉雄臺上黃金是君得

征馬嘶送歸有光

白楊花飛江水黑江頭行人頭盡白  
青山日出烟塵昏馬上誰為都門客  
都門豪客長安兒葡萄百斛柳千絲  
戎裝玉駿邯鄲姬虎旗繡簇紅鷄啼  
長安三月春未暮城中不見遊人歸  
遊人歸醉滿堤青草長征馬嘶

范公柏歌贈三晉王公

范公種柏講堂前種時不知今幾年  
年多岨強鱗甲拆上株擘裂下株連  
一株倒生欲垂地此豈有意皆天然  
目燥心開脂髓良沉沉古色破新光  
氣竒已壓將軍坐節勁還凌御史霜  
世人見之皆愛惜不獨此樹傳芬芳  
更聞靈實尤堪餌餌得長生赤松子  
此日王喬飛鳥來來從至此心徘徊  
自是丹青寫殊狀願追松子蓬山上



雲峰歌贈廬陵朱學諭

武華之峰稱最雄一峰獨秀當空中中舍秀色不可盡白雲萬古長濛濛忽然雲去峰亦開崿嶢積翠如莓苔平林曉日動高影半壁落月浮清埃廣文先生峰下居時看峰際雲飛來白首明經不得意薄游至此衆莫猜心開妙論發未行絳帷深坐陶羣才余亦沉淪無所得十年閉門仍屏跡擬懷為贈雲峰歌為勒先生峰下石

小松歌贈朱山人

康河之精徂徠骨帶露凝烟纔數尺天與一氣表貞幹蒼然已有千歲色嘗聞百抱龍鱗身青牛伏龜最有神秀頂高盤宿鸞鳳蕭蕭獨出辭風塵豈知異物同精氣此種應看不殊異朱君年少如小松百抱已是松隣翁文采風流並稱妙伎巧徃徃非人工我但聞之不相識題詩寄君遙相憶

寄王憲使元美

王君才傑人共推秀眉白面玉不如鸞龍文章



世稀有二十謁 帝承明廬天開雲雨賜顏色  
皆道君乘司馬車承恩久拜舍香署起草還成  
拂衣去竭來歷使無停輪錄囚八郡多民譽矧  
君嚴君勢益尊致身早建非常勲黃龍戍頭破  
殘賊紫燕驕嘶沁水雲上林葡萄新結募頌功  
屢著先零文君亦揚旌青海濱雕戈畫戟日紛  
紛英風坐變齊兒俗對酒投壺遙想君君今別  
來歲月深感君於我情更親緘詞千里若咫尺  
使我醉舞當青春春風浩蕩還相待吹我遙情  
度青海青海何當一遇君拂君玉帳登君壘玉  
帳軒軒錦作堆帳前解鞍歌落梅此時雁去燕  
還來馬色拖蒼相映開雁去燕來堪別恨花開  
花落還相催相催還復催恨別那能別梅福尚  
為南昌尉劉根未受韓衆訣何時見就玉山岑  
翠釜丹鑪卧松雪

送顧禹祥計偕赴京師

江南二月陽春半無朝無暮香風吹院裏梅花  
皆布玉堤邊楊柳盡成絲滿堂送客催夜酒為



問幾人能抗手曉色偏將別思牽別君與君情  
更厚君有天骨世所稀世人皮相那得知醅酌  
時時見宏量文章往往奪人奇手註道經十萬  
言興來欲倒金壺泥丹砂為金古來少縱使安  
期亦應老自料青雲已有期濟時不合長枯槁  
東辭蓬萊向金闕寂寂千門鎖秋月月月中花氣  
皆天香看君騎龍上天折

送太僕丞周子霄赴遼陽

漢家天子重開邊三十六苑相鉤連官奴養馬  
三十萬往往蕃息盈街阡爾來日苦用不足胡  
騎憑陵恣馳逐都邑喧傳市駿馬萬里蕭條空  
枵軸君今考牧向遼陽到日懸知春草長庠涼  
棧溫須惠養佇令蕃息皆調良千羣個儻筋骨  
強矯首一一思騰驤老將見之應嘆息壯心却  
復歆侯王羨君子此勲業奇不日承恩趨紫微  
稱詩待駕柏梁宴回指金鞭肯落暉

送梁石仲計偕赴京師

漢家宣帝稱中興能將儒術重明經白首計偕



謁明主看君即是梁丘生  
綠尊三月送君行遠  
樹連天烟霧青處處落花啼百舌  
家家搖蕩春風情況復臨期  
無白壁此心不惜向君傾

送納言張公遊武當山

丈人浪跡不可羈云是漢時張子房  
口內已辭珪組事袖中唯有烟霞香  
爾來年已七十五鬢髮未白筋力強  
昔遊廬山意不足今復南遊登武當  
武當武當之高拔地數千仞勢凌五岳  
掩八荒回巒皆嶂春茫茫羣仙嬉遊吹鳳凰  
燒金煉玉與世絕別使天路通奇光  
獨有丈人能獨往問以長生不死之藥方  
呼龍馭鶴紫霄上白日丹宮朝玉皇  
何時歸來為我起沉痾授以雲笈分霞漿

寄贈吳興范脩撰

長安三月尚飛雪層冰萬里生  
闌干胡雛弓強挽不開輿綸帳薄  
狐裘單范戾蹭蹬一朝叢壯心豈暇愁  
春寒文章有神亦有時此時射策人莫知  
一當明主長高價聲馳四海無風吹朝



朱謁主開九重瓊筵綺食羅雲宮仗出金宮驕  
駿馬風光去處搖香駿衆驚秘訣疑可傳郢斤  
未必人皆通古來效顰徒自醜我今骯髒隨冥  
鴻張君遠來邀我歌自愧飛沉荼爾何詞卑意  
但不可盡蒼茫却掩商山阿

長歌行送子與北上

子與書云今刑部尚書黃公名光昇初令長  
興甚有惠政子與為童子時立見識拔恩禮  
絕異公去後吏民見思為立祠五峰山中歲

久隱翳子與屬王元美為祠記又欲得余書  
勒石以新公之德其不能辭遂往至山中由  
是益知黃公於子與有國士之遇今子與舉  
進士名能文章為守汝寧則麟生于郊有中  
和樂職之應是公誠能知人不特治行然也  
夫子與之賢必當為世所慕悅而妬者卒莫  
能容復以讒沮方當補官總轡言別余亦阻  
風湖口聊撰長歌行一篇以見鄙志

黃公昔彈單父琴長興萬姓思至今就中徐君



特秀出提携拂拭恩最深每憶公祠在五峰年  
多隱翳難稱心願書新碑頌公德相邀共生蒼  
山吟書罷驚看颯風雨脫贈珎裘傾百金豐狐  
爛日生早霞連錢霧豹黃金花天成文章不彫  
飾粉圖五雲安足誇相如落魄好飲酒鵬鷖但  
佳楊昌家知君結交有終始世情恥學東流水  
懷恩欲報無所惜今日君心復如此嘗為汝寧  
大有聲麒麟出郊賀政成誰謂才多用翻拙青  
蠅一點憎連城鯤鯨失勢制螻螿腹中五岳詎  
可平昨來別酒情更真明朝欲度浮雲征高堂  
割戀聊捧檄此行豈是希榮名 聖朝雨露江  
海寬胡為獨嗟行路難余亦辭君渡湖口咫尺  
欲進愁濤瀾行路難日已遠素書莫寄雙鯉魚  
北望長懷帶應緩

送楊別駕之大名

侯建寧人文敏公榮之後

我聞楊侯大賢後點筆能使風塵開嘗為天曹  
不稱意三年官冷隨蒿萊諸公見之皆歎息豈  
容久困非常才爾來聲名不可當一朝瑞氣眉



命詩集卷之四  
間黃呂虔有刀不敢佩錢卿有蟹不敢嘗春風  
三月漳河道此時相歡滿懷抱丈夫用世固有  
時富貴寧須致身早嗟我閉門多苦心皆道揚  
侯知我深前年過門不相值未知何地還披襟  
此去雲山杳千里南來不惜寄徽音

巨鼇歌送王子敬子欽兄弟會試北上

君之大父岳伯尊雄才脫畧無比倫身當逆藩  
氣不奪世上猶未知公真天獨振耀公子孫君  
今兄弟才力均文章璀璨皆遇賞青雲廓落辭  
埃塵明年射策蓬萊殿一朝齊名共爭羨懸知  
明主賜衣財復道承恩向春宴此時春草如青  
袍銀鞍玉駿聯金鑿千年巨鼇掣海水時來不  
為夷亭潮我今落魄如沉沉檐前烏啼人跡稀  
何當遠景灼寒素使我寂寂生光輝

贈歛方同姓

嗟予衰颯如窮秋十年病首無時瘳吳綿裝輕  
不暖體紫貂蒙茸長裹頭方君為詩有聲久千  
里命駕來相求幽棲往往與世絕門前有刺無



命年庚先生集卷之四  
人收歡然反謂太古人相知海內心最親篋中  
舊草已蕪沒一見便覺生陽春建安以來誰復  
知長松落落無妍姿嬌花穠葉世爭取一朝落  
盡如沉沉君有竒心與余合兩日從君掃塵榻  
明朝別我更有情杯中綠蟻還自傾相期共訪  
黃山裏行采真茶石上烹

送蔣生歸鄖陽

春來雨雪寒惺惺鄖陽歸客郢可停離離郢樹  
霧中黑苒苒江蘭烟際青天長道遠行人少此  
日賢兄詠春草尊中綠蟻安可辭懸知醉後情  
傾倒

送劉山人歸由拳

永嘉鮑生稱善奕于今國手人莫敵近時又得  
顏與李三人往往同破的劉君五月來由拳言  
嘗遇鮑纔雙先青州兄弟好竒者閉之樓上將  
窮年比訪青州初識君饒先七子星滿天初疑  
下手猶眼前忽驚傍擊復斜穿沉精九路盡竒  
伏注視不動心確然陷之死地反得生乘危據



險不作聯腹中新勢日千變世上藝經空復傳  
憶昔嫖姚好方畧心輕古法如纏縛始知制勝  
在一時不用閒心枉隄度明年此日君何許懸  
想饒人嘯儔侶安得東山起謝安任君賭取山  
陰墅

### 郭將軍歌

漢家烽火東海傍奔鯨蹙浪吹天狼將軍受詔  
辭劍門拔劍起舞心飛揚三杯走馬一萬里來  
時不知道路長萬里橫行決海雲連旗轉戰日  
紛紛獨當一隊破堅陣斬得名王不顧勲曾養  
生俘留部曲時賞金錢結心腹去年行間收奇  
功果叶英謀不遺鏃功多冠軍名日高黃金刺  
帶明珠袍天子非常賜恩寵臨戎大拜羅旌  
旄一星光彩動西落海上春來罷宵柝身作長  
城此地偏三軍解鞍但晏眠柝花駿駒獵卒田  
田間草深綠如烟草溪沒麋射不得將軍射之  
卻盈千帳中徃徃夜擊鼓銀瓶玉缸酒如乳重  
延詞客更投壺月白參橫未開戶自是將軍動



命仙集卷之四 七四  
若神天聲四震無風塵古來名將誰可比直作  
麒麟第一人

贈善相郁居士

先生高卧知止足背城而居面清澳梧陰滿地  
六月凉晴苔一色連溪竹午疇繞舍就耕作隱  
處依然自成俗秋塲夜築新穀香獨進芳醪不  
辭濁仍將妙識鑒人倫坐蒲烟扉走華轂嗟予  
淪誤無所預雄心已盡唯肌肉自知須賤日枯  
槁令我形骸轉羈束

贈性公

性公老禪僧中傑目似青蓮心似鍊天花結鬢  
垂龐眉香氣隨風生頂穴心持貝葉日千遍手  
拄猢猻藤百節庭前柏子菩提青階下澄澗無  
惱熱經行處處藏烟霧住世無心路長絕我來  
蘭若多年所自笑鳩留困于此吾師五指能四  
分僧跋時時還入耳何年更乞甘露偈一灑清  
涼潤肌髓

昭王元美



北風撼天夜半來黑雲如山勢欲摧  
含沙凍雨捲飛雪空中黯黯梨花開  
劉伶龜手醉不得高陽酒徒面死  
灰紅爐滿堂光焰短一日徒傾三百  
杯長河此月無人行鄒生管裡吹作  
水君家得意正留客暖氣偏從東海  
蒸誰憶袁生掩扉卧白頭敗絮相陵  
競

送慈谿吳志道再往邵武謁吳使君

吳君有詩合風騷能歡邵武遺綈袍  
留之累月意未已邀以再往酣春醪  
君今又向汝南去仍能醞藉傾吾曹  
我昔嘗為邵武賞時來訪我操輕舫  
惜哉不遇枉空札至今寤寐思英豪  
春風拂拂還送君千崖萬壑清猿聞  
此中邵武有佳句解道初衣傲白雲

文內翰所藏趙魏公畫馬歌

大宛西來七十城吾聞駿馬名河精  
一夜飛騰渥洼水四蹄踔躡繞山行  
此馬神俊久稱絕初在衆中誰更別  
猛氣猶帶龍宮腥自是當時驚汗血  
胡雲如花翻入空獻狀新從鳳苑中  
蹴踏



寒禁葱嶺雪肯隨厖馬鳴春風今之画图二馬  
轉嶒崿恍惚真龍此其匹奚官錦袍丹砂濃紫  
韁掣電開金鏤拳毛颯颯勢欲動似向萬里收  
竒功丹青豈能得如此嗟哉魏公絕代工一筆  
真能辨情性九方妙識天機同枉使黃金買枯  
骨圖上空憐逸態雄

王尚書古松幃子歌

王公名以旂

陵山之松世不常誰能画此生華堂壯哉高蟠  
得地勢氣霧匝匝森開張根株巖從自太古鼓  
盪六氣升朝陽上枝下枝霜雪彊千葉萬葉珠  
璣香泛月遙承九霄露偃盖下拂三珠光有時  
變化合蒼烟紫鱗半蛻俄出淵橫空攢雨陰未  
落慘淡淡黑來長天左擎右攫不相讓由來異  
物難為狀徂徠嵩華何足驚對此蕭然覺神王  
嘗聞伏生與偓佺自言采服乃得仙世上後看  
棟梁用豈知此物能長年

金翅鳥食龍歌

西方有鳥未識名翅羽絕勝閻浮金日食四生



龍一食五百勢莫禁俄觀珍圖上画出茲鳥樣  
燒天欲火乾沃焦龍王空宮白骨高蛟鼉腥臊  
不充腹中有一龍折頰流瓊膏上躡天戶驅風  
霆下摧地軸走百靈龍兮龍兮悅惚變化徒狡  
獪未脫煩惱皆塵形始知禪那願力殊一縷可  
活千龍軀手足可斷復可續恣體何惜它人須  
不然天地雖廣大雄吞弱死隨苦海浩浩之劫  
終與塵灰俱

獅子搏虎歌

黑雲挿松岷壯氣長不開下有猛虎穴養子深  
林獨往來冥冥棘徑苦竹長毒苔遠谿吹野香  
東海黃公厥無力北平將軍射不得前岡有獸  
筋骨竒蒙茸斗尾黃金綫須臾拉虎如拉螻吃  
哮踏地聲不起腥風射沙日色死鈎爪長牙貫  
心髓當時自矜百獸雄朝食赤麀暮黃熊豐毫  
五色爛霞彩一朝委骨空山中又聞魏武經白  
狼道逢此獸勢莫當忽驚有物扼其頰遂殺此  
獸橫車傍始知勇力會有屈折時焉能恃之久



不亡君不見秦興漢滅翻覆本無常千年萬年  
哀國殤秋風碧燐天茫茫

龍水圖

有客示我蒼龍圖開圖黯黹如澄墨春雷十日  
飛霹靂長身天矯倔強極鱗甲寒腥角尾古千  
年偃伏今始得出沒震蕩雲海翻珠光晶瑩日  
無色虛游萬里不以力徃徃反覺天地逼嗟哉  
異才亦復同變化恍惚汙泥中斯須雲雨遍九  
域能使枯槁皆豐形題詩與君思轉逸觀此不

獨最神筆

画竹歌贈彭明府

蕭蕭萬莖竹一一抽琅玕亭亭曉拂暎天色滴  
滴夜垂空露團密葉低攢烟雨暝長根曲走蛇  
蛟蟠六月赤雲燒土乾火山熱坂焦飛翰時聞  
哀響激金奏此中自有清風寒又如玄冬十二  
月層冰嵯峨積飛雪千山木落顏色改白日匿  
景行人絕此中含彩獨青青羞比春榮競高節  
古來愛此全堅貞伶倫吹之學鳳鳴遂偶雲和



奏天關共協箫韶登九成  
堯侯堯侯還復同天  
書此日徵夔龍應知高節不為苦  
寒易南威赫  
處但覺淅淅流清風  
人謂丹青有殊智象外真  
能更生意

周使君丹臺五松圖歌

五松拔地無附枝  
霜根紋石苔  
蘚皮龍鱗長身  
天矯疑變化  
半是千年雲霧之所為  
旁插高崖  
色如墨  
欲雨不雨無晴時  
中有神泉百道蒸陰  
靈飄灑細葉含珠璣  
流脂潤液長芝草  
列仙之  
人咸來選擇  
輒熟充朝飢  
金華太守南昌仙  
上  
通大道合自然  
時能却粒養真氣  
案頭唯有古  
苔篇  
古苔冥冥絕塵想  
偶閱珎圖足心賞  
三山  
自是協幽期  
名署丹臺未能往  
松風颯颯清我  
襟  
為君微吟寫君心  
遙訪芝田十萬戶  
吹笙駕  
鶴相追尋

孫少府蒲萄圖歌

嘗聞漢使來西極  
移植蒲萄上林側  
長條百丈  
蛟螭蟠密葉  
千重烟霧色  
青青滿架當朱陽  
紫



瓊亂漬垂芬芳除煩解飲破甘液掩露更覺靈  
味長又聞釀酒氣至醇遠過宜城曲水春曾經  
武帝下神母此果豈比他方珍誰能画此意最  
深為君分作滿堂陰詎知可玩不可摘終歲偏  
諧靜者心

與沈隱君撫馬鞍山石歌

沈君有石四十年色如積雪含秋烟連巒疊嶂  
不盈尺復有洞穴多旁穿嘗聞墮地忽摧折天  
骨至今皆可憐君能知我性尤僻不惜携來破

岑寂年溪往往苔蘚痕自汲流泉日衝激恍疑  
烟川雪欲消晶光射日驚波濤初意還君翻自  
惜摩挲再拜心為勞憶昔胡公与李白曾以白  
鷗撫雙璧願君應自學胡公莫學相如賤頭額

險竿行

東海女兒年十三花鬢婀娜氣若蘭百尺長竿  
豎平地掀身直上蓮花盤蓮花盤盤露織足足  
半蹴踏青雲端偷纏寶鏡當中心竿頭窵旋如  
飛鸞四肢無骨似無力東倒西傾看不得反腰



掛影忽疑隨千人齊呼萬人和  
須臾騰上勢轉急使我愁看入  
還坐嘗聞陷陣劉將軍心膽願  
死不願生見之徃徃氣欲奪  
擲與金銀稱絕能始知大娘舞  
劍器一時見之以為異試看今日  
漁竿兒自是人間不常事

贈詹生龍澗

憶昔嘗游虞仲山山陰半日長  
松間松長草深人絕跡惟有破  
龍之水流潺湲詹生歌聲若流  
水家住澗南無十里一杯一曲  
聲轉清朱陽遲遲如有情曲終  
相顧不能起何日再聽還洗耳

送太倉宋學官遷國子助教

宋公有才不遇時屢試春官人  
罕知低頭受駭東海上三年教  
成聲始馳爾來補官官獨冷有  
才不遇將何為吾聞天子方急  
賢况復四海多瘡痍此時用世  
在公等如公豈合長數竒春風  
吹雪寒淒淒征車彭彭徃京師  
逢時不用九府辟一日騫騰知  
是誰

秋夜長



木葉微脫夜初長白苧蕭瑟體清康同巷相從  
樂未央思君豈遠終異疆明月無心直入房翠  
盤金爵徒悲傷妾獨有此未敢嘗

送吳純甫會試之京師

吳地一尺冰長安一文雪青氈帳薄狐裘單燕  
姬回首琵琶折吳君磊落天下稀苦寒之聲安  
足悲青眼長鳴蹴寒月對此可以增光輝風塵  
蹭蹬亦何為寒盡雒陽春發時紛紛射榮長楊  
殿裊娜金堤御柳絲紫清陸離金碧瓦羽林侍  
兒拖花馬拖花馬珊瑚鞭君但乘之朝玉京我  
騎白鹿昇青天

老將行

君不見黃河之水戰士血萬里胡霜白於雪巔  
崖恠谷常陰陰北風吹落天山月自從辭家賀  
闌走弃置中原忽已久戰馬吞聲風土惡未戰  
癰疽生左肘殺氣如雲衝北印死生半墮強胡  
手燕姬對舞擁貂裘胡兒半醉歌莫愁歌聲別  
是胡人語老將聞之淚如雨焚火白骨燒軍營



力盡戎行未有名一戰空城死麾下樹勛幸免  
咸陽系

送徐封明觀察之武昌

昔日景王初在藩勢欲併兼方橫行君為荊州  
不如吐身投熾焰鴻毛輕壯節難伸即易屈十  
年困躓逢時清天子聰睿過周成公卿戮力皆  
忠貞芳蘭擢拔無遺本看君此時致身穩赤心  
部上不顧私三綠武昌楊柳枝事平偽顯名愈  
出豈如徃歲多淹遲沅湘未必離憂地富貴大  
抵非人為自余知君各不疑爾來已是深相知  
追隨杯酒意不盡千里長江勞夢思

郎官柏歌贈許給事

郎官種柏今幾春託根乃在玉山之白雲中心  
十圍養精氣時流汁液通竒芬蒼皮點點莓苔  
色赤勛徃徃波濤文堅貞寧避雪與霜正直還  
堪棟作梁地清邠得塵埃雜葉密偏舍日月光  
泰山千株詎足數華林兩樹不相當未央神鶴  
時能過中臺老麝自飄香別有離離實最良仙



人却取長生方此日珎圖寫殊狀挂君青瑣之  
高堂願比南山歌壽昌與地等久天齊長

送姬知道北遊

春來無花雪作花落蒼牛落山人家朝扉不開  
花滿地昨夜故人尺書至書中徃徃傷春心復  
道離家北游事開書感君仍送君長安貴人誰  
寂親如君豈是憔悴者片言合意皆陽春昔日  
杜甫歌莫哀能開抑塞磊落之奇才君聽我歌  
亦如此會看一日辭蒿萊

楊花舞歌

武昌城頭啼早鴉章臺長條俱作花邯鄲小婦  
少留家衝花拂曙藏香車官渡營前日欲斜春  
風一夜繞天涯塞外征人衣帶緩青冢雖青草  
猶短學得新聲調細管無事亂吹腸即斷桃花  
紅顏安得常婉婉思厚酒濃莫辭滿

竹枝舞歌

巴丘雨多無絕時江蘭萎謝汀芷稀唯有檀欒  
青竹枝含烟泣露無改移巴人能歌還制詞流



聲度曲令參差管清調急月將落風輕裏長卷  
秋葯濟房曲筵隔阿閣啣雲玉杯細斟酌人生  
百年能得幾時樂願保貞心永照灼

幽蘭舞歌

春風吹罷鷓鴣悲沅湘草長無路垂垂璫紉珮  
停路歧獨采芙蓉涉江湄幽蘭孤貞世難知雖  
有芬芳當過時盛年流邁不淹遲朱唇含笑復  
含悽熾熾素手弄朱絲一聲一聲故愛移何為  
九山連綿名九疑令人咨嗟枉相期

梅花舞歌

璇閨繡幕鈎曲瓊中庭紫梅無葉生長條匝匝  
先着花花花當窓自分明芬菲麝烟流日精吳  
刀楚製安足營美人至此久沉吟不願博山鑪  
中蘇合香不願頭上金爵玳瑁之寶簪願得一  
枝寫春心含商變徵翻入清吹音清夜歡娛極  
當今

方壺圖歌壽太倉守孫侯太夫人

青冥無塵玉作天珠樹萬丈羅紫煙銀濤高翻



洗日月方壺負嶠雙鈎連緱山之鶴不知老朝  
飲瑤池暮瑣田羽毛如霜六月寒逍遙亶翔駕  
群仙龍魚凌風弄海水空中笑傲飄飄然安期  
羨門不可問靈砂飛丹知幾年芙蓉為衣顏色  
鮮時騎白鹿戲雲間青童佃嬉玉女舞雙雙微  
吟大曆篇西辭倏忽崑崙巔東遊滄海意渺綿  
襪祥雜沓相周旋嶠州甜雪羅綺筵堂中今有  
太夫人冰霜不數南岳賢髮白更黑玉齒堅蘭  
蓀滿地開金萱願得仙人齊獻壽後天而老還童顏

夜猿啼

夜猿啼朝啼人不覺夜啼聲更悽悽明月夜  
度月落已西月向已西落山從楚塞分常時接  
山鬼幾處吊湘君聲斷罷還續近聽復遙聞近  
聽似舍巫峽雨遙聞已入蒼梧雲蒼梧巫峽杳  
冥冥萬古愁生此夜聲那將棄婦出詎遣逐  
臣行夜猿啼夜啼聲更長切切冷冷驚落葉遙  
遙夜夜雜繁霜山悲能谷響聲多自斷腸君不  
見垂藤古木聲最多三聲雷裳柰若何何為離



家遠相過又不見激楚回風音更促若比猿啼  
非怨曲緘情凝思不忍聽自知無愁愁自足

王穀祥画五色牡丹歌為永加王大眾題

百花開在牡丹前細碎飄零那可憐獨有牡丹  
春盡發花開別是一般妍千房膩紫風吹坼萬  
朵嬌紅日炙鮮嫩白輕黃亦無數凝情轉態相  
縈牽石家蠟燭寧須火荀令香鑪不帶烟戲蝶  
雙雙求粉入游蜂隊隊抱香眠此花不信人間  
有占得春光半月天江北江南同此月傾城傾

國被花顛吳綉窻下剪難好蜀錦江邊織未便  
一遇名工揮彩筆珎圖已向高堂懸濃調五色  
爛霞景富貴真堪助綺筵不在衛公宅畔迹彫  
佩不在西明寺裡媚青蓮海上桃花開不落臺  
中柏樹老還堅試比年年圖上色聊將一曲奏  
神仙

贈戴郎

戴郎識曲音調精馬融長笛子晉笙舍宮激羽  
抑隱輕好作龍吟兼鳳鳴繁音促節時代轉能



倚嬌歌成一聲閒  
館曲房聲最清  
春江花月又多情  
香車狎近時  
田聽寶馬迴鞭不肯行  
若使揚朱唇  
按玉指  
管中蘭氣吹入耳  
不須曲終便欲死

晚山庭

黃鷹獨過山庭暮  
欲語不語顏色苦  
岬高青草叫乱蛙  
風急漁船暗燈火

讀管晏傳有感

憶昔管晏稱才雄  
奔走諸侯天下空  
兵強國富衆莫敵  
匹夫能成震主功  
子長記事不及此  
只記知人與知己  
鮑矧之賢曰  
友生石父之賢起  
妻子知已知人良  
獨難此事豈在形骸間  
嗟余淪落無所遇  
白日焦紅忽頽暮  
已知此世無兩公  
自合齷舌埋蒿蓬

龍劍出匣歌

君不見匣中劍  
寶光射天天為寒  
况當玄冬十二月  
海水百丈生  
闌干君今匣之走  
長安龍精感氣雷  
盤盤忽驚出匣人  
競看尚方之劍青斑



斑魚乃古澁存空觀豈若此劍新出匣 天子  
何不急用之坐使四海皆安瀾

天馬歌

漢之武王好武功西通雪嶺西萬里塵沙空時  
有天馬汗赤血上從前膊小孔中目掣電尾捎  
風澹注水底騰真龍單于小隊未曾識駑駘萬  
匹相雌雄豈知異物生異域一來入御驚天聰  
新開苜蓿苑同築葡萄宮皇帝坐明堂歌馬德  
巡五岳拊八極小臣再拜稱萬壽百姓安樂忘

帝力

寒鷓吟

高堂羅幕推雕梁九華帳中辭錦衾寒鷓蕭蕭  
落木陰不隨嬌鳥啼春花獨自含思怨暮深寒  
鷓吟愁人心

虎丘茶歌 謝周仲子

君昨遺我虎丘茶不數仙掌丹丘茶婆娑百木  
祇園裏年年採摘供豪家家分鉢而貴金玉何  
幸緘封到茅屋不信能令羽翼生先試緗花浸



新綠新綠吹香露芽早啟稱酒德稱茶道憐君  
亂踏虎丘雲使我胃中蕩憂抱

清明得出字前平後仄

少年意氣誰得當一生結客在平陽競逐風光  
行樂處千金醉宿邯鄲娼邯鄲花底迷朝日睡  
起相看意適蜜更將留宿待來晨欲笑還啼歌  
舞出

送徐郎中子與遭汀州太守

使君有逸翮脫畧辭風塵清冰玉壺映寒雪投  
軀早致要路津一從受命彤庭裏揚眉轉眄白  
日新深狴豈無鄒陽客密網一解天地春興來  
灑筆如有神雕文藻思稱絕倫論交未許當世  
士何意遠顧蓬蒿人邀歡痛飲不作難傾蓋忽  
復欣盈旬物情往往棄疵賤高義特與風期親  
由來賤賤非所惜憐我傾家無甌石鳧翁濯錦  
朱提銀筓中黃潤織葛白窮愁那得復有此使  
我驚起仍悲辛鷓鴣鳴時山葉滿乍逢還別腸  
堪斷一辭仙署越江邊荔枝花發南雲暖雲光



海色花氤氳使君之去乘朱輪千嶽萬壑開大  
府盡令草木含清真空庭宛宛見白鹿歲歲扶  
輪慰風俗漢家循吏十八人却掩馬名待君足  
君行幾時可得還目極萬里心茫然清光可望  
不可挹門前流水空潺湲祇應別後書來少不  
惜先傳臨海篇

送鄒駙馬獻壽還京師

將軍風骨無塵容十六尚主明光宮是時天  
子多隆眷殿頭騎出浮雲駘高門甲第連朱邸

寶蓋香車若流水時傳賜予出金銀鸞簫鳳管  
天中起鳳管鸞簫散綵烟平陽歌舞歌芳年  
天子重憐禁鬱壻承恩日日去朝天此日恩華  
真莫比願得捐軀報天子批鱗一諫世莫知  
自言臣罪當誅死去國三年秋復春拂衣長嘯  
謝時人苦心徃徃申長句古意時時追隱淪興  
來每汎清江曲復得尋山徧春谷紛紛磻戶百  
重花寂寂雲房一藁竹磻戶雲房非世情丹砂  
可學幾時成清都咫尺九天上又欲騎龍朝



帝京帝京迢迢三千里獨抱丹心未能已龍顏  
會解自有時時來不得推真理裛榮反覆本無  
端自是如天法令寬聞道彤庭初獻壽春風幾  
日到長安

謝王敬文推官寄建谿秋蘭兼要游武夷  
山

建谿之山多翠沙沙中積翠生蘭花人家遠山  
得花種朝朝賣花衝曉鷓王君有古詞詔少詔  
息時平散衙早時披花譜記澆時庭前種蘭如

種草去月人來惠我書自副盂蘭花尚舒提携  
走險二千里開書對花存起居君名藉藉滿羣  
口我病虛煩歷時久花氣依人每欲瘵見君為  
人情更厚復道武夷天下殊青崖拔地無根株  
九谿灣深洗岨脚悅疑天鏡開蓬壺仙事紛紛  
遺臼杵昨暫躋攀欲輕舉此時孤賞恨莫同邀  
我相携入雲去遙朞蘭爰期歲寒欲往不得空  
長歎秋清興遠隔天末日昭瓊枝思所歡

安樂謠贈南陽太守徐子言



使君握虎符赫赫專城居奉公守正法令至簡  
吏民不侵漁化姦為良銷劔為鉏盜賊稀息囹  
圜以空虛農田盈原野苗蔬賴密百姓殷富  
家有河渠書田畷至喜三年耕有九年之儲  
吏廉食道旁鳥來攫肉不能驅斑叟不負戴齧  
稚不掩雒市無豫價道委遺金咸知禮讓若愚  
庶庶直繩當義不躊躇卒逢艱虞皇帝賢明  
登用俊乂使君願得輸力宣布德化歌之於康  
衢使君行野伏熊軾乘斑輪百姓安樂鳳凰

翔於郊神雀集其庭連理並植芝草叢生前有  
召父後有杜母今徐君世世有賢名

送梁伯龍游太山西登嵩少遂入秦中望

寒垣詩一首

梁生四十仍落魄徃徃壯心兼壯遊東行還訪  
二千石愛看海市經萊州珠璣五色散文錦挂  
席獨徃窮冥搜自言四月上泰山雲霧窮窈青  
冥間金泥玉檢復安在七十二君空徃還天門  
浩蕩望不及中歎白日凋朱顏興來却感濟南



生一冠已挂鴻毛輕嘗登太華五千仞攀崖躡  
磴隨烟升著書時誇建安作舉世未許人知名  
去冬書來通我心惠盈一帑喜欲驚爾到須開  
蔣生徑倒屣出戶懽相迎相懽相憶復堪嗟西  
辭嵩少採三花更向秦關窺紫塞咸陽萬里飛  
胡沙悲笳亂動秦關月胡沙茫茫皎白雪剝龍  
漢使髮垂銀射鹿胡奴淚成血此間王公我所  
親只今海內惟知音時參大府政多暇一見能  
使無歸心人生行樂自有期我為長歌遠致之

春風鴻雁南來少莫懶鄉書慰所思

龍別駕黔中八景圖歌

三江浩浩波連山金龍嵯峨出雲間遙看落日  
下蒼藹孤帆不動浮澄灣還聞三洞剖半壁攢  
靈壘崑嶒與世隔一朝神界敕花坊自是游塵日  
交積別有孤峰削不成天開秀色青崢嶸昭王  
空營古烏井寒泉明青陂曉霧暗迷幕沅汀夜  
月流光晶又聞藕菴香爛熳溢金塘駢枝並蒂  
吐祥藂能使寸舌揚芬芳始知黔中勝槩天下



無移來彩翠為珍圖  
龍侯逸興足蕭爽新詩往  
往含隋珠只今惠政多  
美譽清謠已結滄洲隅  
行將上最列九府何必長吟思故都

葉氏菴竹草堂歌

莊公少年拜夕郎日有封事能勤王  
後來受命擁羅虎長榮大功在朔方  
又聞頌表衆益稱朱絲之繩玉壺冰  
天曹洗手天子驚五世不減清貧聲  
摩挲九流十萬卷欲貯一楹終不成  
先題菴竹系書目於今獨有空堂名  
公之玄孫俊

且良積風已至將翱翔家藏之書日編輯  
好求祖德新為堂唐時相國李贊皇  
筆筆自記千泉庄竒花恠石徧巖谷  
斥逐未久皆夷荒如公子孫具善述  
昔志未遂今能償始知古來貽謀貴  
樹德然後一世可至百世藉藉垂芬芳

歲晏逢二子行

二子徐使君子  
与王副使元美

憶昔少年好竒俠心輕監儒鄙章句  
高歌寶劍視白日青天低昂忽驚暮  
古人徃徃猶眼前結友臨淄不能赴  
中遭病困無所逢幸逢二子肝



膽同時來顧我喜欲死壯心已落蓬蒿中誰知  
二子多憔悴素標挿頭又何遽既來且復不須  
吏明朝別我東西去歲晏相看淚欲滋飲以定  
州劃花瓷願子痛飲勿復遲

送周孺允計偕赴上都

君家巖君不顧身能以直諫批龍鱗無人為脫  
北門厄間關萬里窮悲辛大名難摧倖豎死一  
朝獻納承明裏天聰忽悟迴恩榮皆道山東謝

安起

公名廣武宗時為御史奏劾錢寧被  
譴間道脫走寧誅累遷至南刑部侍郎向

來事往五十年看君壯心亦復然讀書萬卷意  
猶少往往落筆人爭傳時清運濶苦未達高歌  
贈澄涼風前聞道石渠開寶書羣才絡繹無閑  
居此時蔡公薦文禮騏驎何必終鹽車與君抗  
手動秋色空懷逸興城東廬

徐汝寧被播後經吳門周公瑕王元美兄  
弟載酒邀泛石湖分韻得客字

使君有才不可當青萍出匣生寒芒文章未為  
當世用化作繞指蛟龍藏西辭汝水二千里五



月道路空荒涼一朝遂為吳門客往往論心重  
金石爭鬻置酒浮大舟遙泛明湖入空碧空碧  
沉沉夏葉多雲房澗戶聊相過舉杯慷慨邀落  
日伸眉恥作夷門歌虛舟但養揚州鶴袖裏時  
驚出新作從茲一別五湖西何日尋烟弄丹壑  
南山虎皮歌 謝曹昭服

曹生工文格不卑結客好俠仍好奇高秋獨夜  
露肝膽贈我南山真虎皮山深氣偏鬱奇色萋  
萋短毛皆勁直燁如松花落粉生片雲又如松

心裂作純漆文斑斕疑向霧中出林光日氣  
相氤氳長尾橫拖霜爪稀稜稜尚有百步威却  
思向日深山裏鬼哭時聞穴中起野麋竹兔蓋  
無聲正晝橫行入村市自是雄心不復猜身陷  
獵圍難再開留得空皮長高價糴輸淺織慚絳  
摠卷置高齋時感生累日拂拭生豪情黃昏燭  
照勢欲動黑夜河翻看每驚更憐垂老興未已  
長嘯還歌猛虎行

屈初画古松



古松巖後多異色獨立空山人莫識  
斂皮感沓莓苔痕屈鐵攢柯半成墨  
千葉齊生九粒竒落花滿地香風吹  
含烟不動拂雲日長疑黑處藏妖魑  
誰知画者意更別移向高堂景尤絕  
豈若推沒空山時相與蒼藤老霜雪

憫匏尊

并序

吳少君越人也性好名山六時遣意翰墨往  
來多寄跡佛寺中嘗取匏精佳者日摩挲之  
遂瑩澤色如蒸栗乃上通一竅腹傍作味以

淡紫細竹寸許為之其一傍以天台垂藤千  
年蟠結者作把手名曰匏尊清古純朴可以  
敵金壘玉尊之貴率提携自隨遇盜致毀賦  
此憫之

吳君匏尊天所成狀如鴟夷臍下平紫琳一寸  
味生腹蒼藤背上蟠蛟精摩挲萬徧變本質色  
奪蒸栗別有情千里提携將幾年含光射日輕  
且堅中藏雲漿可一斗自誇飲之能得僊昨來  
憔悴荏苒間此尊已毀心茫然此尊雖毀此道



存一身去住唯空門今日相逢且傾倒賴有鷓  
冠葛屨隨君老

送柴都事虞叙之越中

我聞越水遠碧山千巖萬壑流潺湲皎如明河  
落天半空濛灑出浮雲間浮雲捲盡碧山月使  
人對此無厭歇山中月色長向君薄領紛紛自  
可輕綠尊取醉肯辭劇碎務何足羈豪情自憐  
淪落無知音送君一去愁吾心遥望名山不可  
到冥搜却賦夢遊吟

贈楊將軍

將軍八尺才且雄樓舡獨出雲海東紅雲如山  
駕白日波濤浩蕩開鴻濛鴻濛雲海蠻夷居雕  
悍恣虐稽天誅徵兵羽檄徧羗落連年失律勞  
訐謨是時將軍能奮勇誓身百戰天為動頻聞  
獻捷功最多

天子憑軒賜新寵、加諸將恩最饒玉帶麒麟  
紫錦袍連營十萬盡高枕威聲不復浮腥鼉夫  
人堂上開慈宴共喜黃星照吳甸承顏委曲真



嬰兒指點中厨出珍膳初傳冬笋味絕殊復有  
冰鱗玉雪飛涼風滿坐會賓客願將萬壽停朱  
暉可憐慶門忠與孝毋享高年子年少他時作  
頌有楊雄壯侯千古還同調



仲蔚先生集卷之五



吳郡俞允文著

五言律詩

塞下

獵獵動寒城  
匈奴騎盡精  
陣深關月壯  
雕落塞雲青  
玉帳蒲萄暖  
金鞵赤驃生  
從來李都尉  
白首縵胡纓

聞南征

萬里樓船出  
將軍上國才  
蠻雲標海  
吐毒霧觸



山開日月旌旂滿風塵羽騎迴何時班定遠一  
為去蘭臺

閒居二首

出楹初鶯滑春朝拂曙過學書魚體變清翰引  
文多鑿戶開松木穿雲長薜蘿端居思內養披  
寫對山阿  
天寒千橘秀晴雪映深房翠帶垂黃實丹苞含  
素香池清飛月彩谷靜度雲長繕性通迷誤虛  
無道可將

朱氏園林二首

高士精廬敞開軒並碧岑雲移峰勢動日過水  
光沉幽梵林中遠清機物外深自憐非暮齒已  
有尚禽心

誰謂草堂靜春來百舌鳴花間留石砌樹杪出  
山城竹色含烟淺梧陰帶月輕自餘無俗事一  
徑日經行

周氏園亭

紫紺琳宮側芳園麗景迴焚香青靄聚洗鹿白



雲開猶想靈均什亭堪內史才更憐花徑裏月  
色夜深來

贈常熟張居士

地僻因山郭巖巒帶栗林花藏香塢遍雲覆石  
堂深迢遞連高棟逶迤出遠岑端居自怡悅  
嘯聽新禽

舟次菴画谿

菴画舟行好何如若耶亂山臨岬盡夾樹轉  
谿斜水色三湘綠林香四月花任公此垂釣深

曲有人家

豔曲

院閑春雲黑薔薇露氣滋病開香宛轉笑並玉  
參差翠結鴛央帶紅垂鸚鵡絲清盈瓊簾月少  
有外人知

夜過周夢山宅月下留酌登板橋作

勝引延踈酌良游暢夕情薄雲分樹隱清月駕  
潮生路迥呈橋出山連雉堞平步迴寒漏永華  
露湛虛明



哭集雲寺明性上人

空門盡日掩苔澗自餘春欲究無生理因觀不  
住身別來方換臘化往竟踰旬杳杳棲禪處經  
臺生梵塵

獨往招提暮松青月殿遙妙香真際滅幽梵定  
中消出世辭煩惱分身示寂寡歸依竟何地沾  
灑及論交

贈孫守社

迢遞高樓處銜階衆壑連白雲松路宵碧樹石  
潭圓野瞰疑無地山迴覺有天因君垂惠好重  
想薜蘿烟

閒居

野溜谿谿急新陰樹樹深芳叢薰細藹幽鳥度  
輕音寂寞近三益逍遙戲五禽不知高卧者于  
此竟何心

獨坐

獨坐高齋裡悠然向夕曛天空山勢出樹斷水  
光分遠色看成霤輕陰隨度雲谷中人世隔麋



鹿自為羣

章皇帝画馬圖詩

太乙昭靈睨天臨睿藻開應圖呈異体戀主見  
殊才踈足依金埒垂梢想玉臺春風綠楊道疑  
向濯龍迴

周征西將軍祠

命代生英武遺靈尚肅然陰崖空虎穴春水滅  
蛟涎翠木籠祠宇青烟起墓田臨危殉忠義千  
禩國人傳

邊城秋思

秦城萬里外曠望極蕭辰傍虜金微月連胡玉  
塞塵年深天使老戰苦國殤新漢恥何時雪長  
驅瀚海濱

入玉陽山

百里度連岡逍遙趨玉房谿谿帶松色步步吹  
蘭香古道入雲遠新泉疏脉長此地若廢賞徒  
令煙樹蒼

岳山人岱許籠禽見寄貽詩趨之



巢居全野性靈笈每能誼漱玉泉初引燒丹竈  
已開四隣惟種竹一迳自生苔何日籠禽至羣  
呼就掌來

蜂

春晴逢穀雨汎濫繞林篁逐醉紫輕袂纏蒼獵  
異香叢棲懸玉宇壘構隱金房靈化知何術神  
功寄藥王

秋日感懷

慘澹關雲白淒涼雁鷺悲江湖多盜賊天地日  
瘡痍王者雖無戰將軍在出奇萬方徵鎧甲詎  
敢論安危

出塞二首

萬里皋蘭北天長磧路微黑貂融雪冷白雁獵  
霜飢臘盡冰仍合春深柳尚稀少年多胆氣猶  
向夢中歸

天子重開邊將軍出酒泉候烽連曉月突騎起  
寒烟玉塞初平虜金人遂祭天戎王多拜爵揚  
武大荒偏



張通政丈餉新茶賦此奉謝

忽枉銀臺使，欣承碧澗餘。  
春雷一雨後，晴焙午烟初。  
色帶青霞卷，香浮綠翅舒。  
絕勝三百片，鼎鑪自吹噓。

寇亂憶朱氏長女

離亂今無象，徵兵更寂寥。  
孤城圍轉急，四野寇仍驕。  
白晷辭家早，青春失路遙。  
愁心日夜結，雪涕哽流潮。

夜望城上燈同諸公作

巖城喧暗析，高炬萬枝懸。  
連影含星動，遙光合燧然。  
照花開劒鐔，伴月度弓弦。  
詎以金隍固，翻愁不夜天。

春日雪中

春雪仍殘臘，重襟慘欲輕。  
亂花消酒態，細蕊雜寒聲。  
色潤鷄烟暝，光含隴月晴。  
千門應共掩，真意竟何成。

荅周鳳起林園獨居一首

昔聞北山隱，今憐南澗阿。  
花蒸丹氣遠，樹雜碧



雲多企水猿相接窺巖鹿兢過此中有竒徑延  
想共春蘿

蛺蝶圖

曉日藹依微雙雙高下飛值花拳翠鬣拂網冒  
紅衣入夢應俱化披圖每不歸無論心與跡所  
得共天機

日

旦拂扶桑野宵沉細柳津九光飛瑞珥五色煥  
祥輪乍動羣陰伏俄升萬象新神功信殊妙仰

德在陽春

月

露淨氛埃息天空月色多重輪披玉彩九道溢  
金波上客追飛蓋清池戲影蛾還欣滅華燭中  
夜命稱歌

星

萬類昭靈象參差穆上玄授時均次舍列宿紀  
山川照月光初斂披雲色更鮮願言舒景耀歌  
舞樂堯天



雲

勢不崇朝合逶迤觸望生從龍開鳥陣扶日紀  
官名遠色舍烟起高陰度隴平帝鄉如可至仙  
馭杳難并

風

倏忽生蘋末飄颻上楚臺千林無定影萬壑自  
生哀愠解虞庭化威加漢帝才願施明庶惠九  
有詠康哉

霧

漢帝朝元日殷王報德年瑞圖方出洛寶璽復  
歸燕汎日金沙湧紫空素幔褰不因三五術玄  
豹已深跽

雪

穆滿申謔日梁王命賦辰瑤山千嶂曉玉樹萬  
條春入夜聲偏密凝寒色漸純共欣盈尺瑞詎  
想卧扉人

珠

名標金闕舊瀛海鳳啣新協氣通靈景藏川類



命何處先生集卷之五  
隱真一枝輝寶月三色麗瑶辰共識神胎異堪  
為掌上珍

玉

體乾含粹美精氣靄氤氲六器名斯重連城價  
六珍祥虹初比德瑞雪已流津未即磻谿釣甘  
為抱璞人

閒居

暄暖扶衰疾香厨雪飯餘水田治道服山葉蓋  
精廬霜冷縣徂衆天清過雁踈洗心脩靜理長

此接游居

南禪寺晚眺

天晴諸望迥萬嶺氣橫分野日團荒戍寒城落  
暮雲樓臺夾樹起鐘磬隔川聞獨此追竒趨飄  
然逾不羣

題雜画送龔温州

萬頃山陰雪千巖香不分夜深浮剡棹寒重入  
谿雲辨色還同月分光欲送君湘江與巫渚春  
水自泫泫



贈高煉師

采藥北巖下尋師鶴徑賒金芝新比鳳玉粳舊  
如瓜蒸氣真人宅青牛道士家整來逢六博歸  
路滿烟霞

古樹發烟華澄潭蓄翠霞秋杯浮菊蕊春蜜煉  
參花幽石橫階淨孤峰限日斜長生定有訣早  
晚學丹砂

送童子鳴歸太末分韻得銷夏灣

有客歎睽違三年始一歸壯心燕市晚鄉路越  
江微賦就無人購歌殘聽者稀何時太湖曲同  
往却炎暉

贈方士

羨子多竒術何人不賞音青囊長秘寶丹鼎欲  
成金彷彿分三漏逍遙戲五禽松喬如可挹天  
路日相尋

贈黎學官令子

十月霜花落天高鴻雁羣清川帶遠藹古木麗  
晴曛別路侵星出離舟指日分頻年過庭訓何



日更相聞

贈郭將軍

受詔許專征將軍即橫行吳都新罷警漢將舊  
開營組練江雲淨旌門海月明功多連拜爵重  
譯震天聲

隆慶改元詔免天下田租之半尋復停罷  
而吏治益促百姓缺望時值燬蒸有感一  
首

卑棲連雨後綠葉更蒙籠閱歷三朝始裏遲萬  
姓中新恩還易酒古道竟難逢此日誰嫌短矣  
蒸苦蘊隆

九龍山居

百里梁谿曲岿峴想薜蘿時無嘗水至人少聽  
松過鳳使迴朱轂龍丘隱翠阿世人遙望處只  
有白雲多

送周燕生應試南都

金氣落踈桐秦淮八月中大才無不可灑筆竟  
稱雄北海搏初翼南圖騁積風桂枝青裊裊天



路自相通

王氏湖上園林

渺渺川光合冥冥海色來  
月中移桂棹天外接  
霞杯孤嶼浮青靄  
深林淨綠埃自應人跡絕  
一徑為誰開

送嚴汝和赴烏程

君向苕谿去沿洄浦溆連  
水聲長帶雨山色遠  
成烟斷岬舟為市條桑葉  
拉錢一官兼吏隱清  
譽美藍田

送徐按察林明之汀贛

兵符外鎮崇九府共推功  
改剽唯高選同時不  
數公行營青嶂裏  
校獵白雲中緬想紆長  
榮封書日幾通

高義馳聲久何煩到日通  
首豪唯折簡部曲會  
發弓約法因民俗陳詩  
繼國風此中多暇豫躡  
步躡崆峒

設無美掩關詩

寂寂謝時人長關不計須  
異書探道要曲几見



天真翠戶日光薄青蘿雲氣新誰知窠廊意自  
與爵羅親

苦熱

長夏苦焦埃高窓四面開林疎不成蔭池淺獨  
生苔日出收殘雨雲稀散薄雷煬蒸良未歇何  
處好風來

送陳鄭州服竟之上都

服竟朝丹陛春風拂去旌顏仍揚子宅名重漢  
公卿別思盈初柳離聲雜早鶯懸知候明裝懶

愴隔山城

將去舊宅玉蘭花間有感一首

花葉經秋長春風二月催十年欣始茂三尺想  
初栽似欲留人賞偏於去日開久看應濺淚不  
忍更徘徊

哭大司寇顧公四首

箕尾升新曜公槐落故壇兩都留德業四海絕  
交歡白日埋瓊樹青天下玉棺里春應罷相行  
哭慘哀滿



歸老中臺舊端居外物踈青霞窓裡散紅藥檻  
前舒句股開靈美從橫入聖書蔡邕遺藉在千  
古恨長餘

尚想白雲隈餘春滿綠苔連峰烟際失遠水日  
邊乘石路扶筇上山樓置醴開故庭今寂寞啼  
鳥自生哀

淒涼思展舊若水故依然國是瞻遺老時危屈  
大賢市中無第宅僻處有山田何日朝恩下重  
開京兆阡

送王觀察元美之晉陽

六月火雲驚看君自北轅 朝廷思治理湖海  
失沉淪才大時難棄名高衆益尊公卿政虛左  
何日候歸軒

窮巷寡來過連陰長薜蘿又聞新命促其柰故  
人何生長清時少飄零白髮多未能隨痛飲那  
免一狂歌

水入黃河險山當白馬寒壯心多感激行路豈  
盤桓不必三年久能令萬姓安北門應寢鑰胡



月醉中看

桂楫泛河中

錦纜沿隄直青龍出浦斜  
詎聞歌瓠子將及泛  
桃花楫轉迎遙浪帆開帶雜霞  
黃河一千里逗渚復衝沙

名都一何綺

宮樹直參天宮鶯花裏妍  
金鞭緹騎出玉軸寶車連  
鴉鵲浮雲氣鴛鴦吐麝烟  
春風騁春日天子幸甘泉

為我彈鳴琴

清琴獨夜秋琴清心復幽  
細吟依葉響虛泛入雲流  
高搽無人識空山有月愁  
知音儻不遇自可抱篁篴

羽觴飛上苑

芳春動高宴禁苑百花初  
低蓋俱停鶴文軒半刺魚  
對觴催引滿促席偵留餘  
猶惜紅塵暮蘭膏貯別車

謁帝承明廬



華闈麗高。清春晴紫。綬輕不須趨。別殿直以謁。  
承明朝。擅篇章。美人推校理。精此中。堪近侍。早  
晚獨垂纓。

處處春雲生

何處不春雲。飄飄升復沉。隔烟輕柳色。翳日亂  
花陰。重疊生遙岼。參差出近岑。含滋復何似。似  
有別離心。

徃徃孤山映

初日照芙蓉。嵯峽似隱空。孤高白雲外。出沒翠  
烟中。松磴行將失。蓮峰望忽通。躊躇此分手。陰  
遠意何窮。

巖穴無結構

野性協幽棲。巖間桂作扉。暗牀青蘚出。曲几白  
雲飛。石墨書翻古風琴。響入微。垂垂挂蘿薜。密  
葉自成幃。

寄周胤昌

遙想湖南勝。多君吏隱名。數峰新雨後。一面白  
雲生。山笥藏書古。藤杯凍飲清。更聞詩律細。千



里倍含情

朔氣催砧切寒聲雜雁初天高三楚外木落九  
江虛浩蕩風烟迴蕭條歲月疏故人多白髮莫  
自嬾鄉書

吳興道中二首

安流自茲適獨往意何窮曉樹踈晴霧春湖澹  
遠空宿帆青嶂裏啼鳥白雲中杳杳前路沿  
洄更幾重

風景鄰吳壤山川自越壘星橋浮漢出波路接  
雲長野店燒狙栗船市女桑蠶飢催小婦陌  
上自提筐

留別徐子與二首

離憂不可盡東望促鳴榔興逐杯中蕝情看醉  
後長亂山蒼霧起臨水白花香兩度菰城外消  
魂暮雨涼

偉長今傲吏清論往時同寶劍堪孤倚金尊可  
放空鑑惟惟海月解帶有松風別後如相訪還  
期首夏中



顧山人元慶大石山居

白髮無王事門當大石山雲霞棲棟裏歌賦向  
人間谷口聽禽至松根拾菌還客留唯茗椀日  
覺古心閒

送王大叅明輔赴陝西

鏡吹轉江城恩深此日情定知分陝重稍覺去  
吳輕萬里征塗遠三年治行成後來多古意不  
欲近浮名

送梁之隆之崇府

千古河陽地賢王宴賞開八公傳道要七叢揆  
天才曲觀追飛蓋平臺挹上杯此行當盛夏方  
及獻瓜來

送徐副使焯明赴鄖陽

景王新封侵遼藩  
故地焯明時守荆  
州抗法被譴調補南陽今遷湖廣副使備  
守鄖陽賦此送之

舟楫從茲遠天隅向綠洲城當鄖子國路遠漢  
江流藤挂彌猴小雲參瘦樹稠羨君高詠日蘭  
杜搃宜秋

画熊頻出守問俗楚人憐吐節艱虞地高名放



逐年揚旌旋舊浦伐鼓沸遙川此去多才略春  
蒐雲夢田

辛酉秋日苦雨

愁病復愁霖艱難老更侵重湖四望出萬井一  
時沉水勢連雲上陰寒次骨溪孤城日浮寄白  
髮自森森

贈醫士

東海孤城畔何時離隱居開窓馴野雀斲地滿  
嘉蔬樹古唯藤葉囊輕只藥書焚香了長日身  
外復何如

爆竹得無字

爆竹千門曉仙堂一葉敷翠烟驚早電珠火散  
寒蕪壯氣能消稷雄音欲振枯更憐開抑塞餘  
響入虛無

春帖得平字

萬國開新慶宜春勝裡呈黃金懸瑞藻白玉麗  
神京曉拂霓旌動宵通燎火明明年年獻嘉頌長  
仰泰階平



卧疾

經旬嬰肺欬秋色閉門深高樹踈晴霧空庭落  
古陰時危嗟食玉義重感投金今日高歌者應  
知券內心

和顧禹祥

許邁忽乘興春風送綵舟綠楊看棹轉千里越  
鄉遊水闊江南路風高翼北秋碧雲應屢合芳  
訊遲頻脩

答徐道潛惠舊端石圓硯

端州一片石遺贈寵兼金珠魄埋寒照丹規隱  
厚陰水殘苔繡古膠退墨花淡為問臨池者如  
何獨苦心

玉蘭花

木末標孤穎靈苞散九華映空遙汎雪翳日細  
通霞色淨黃金屋香飄碧玉家不妨零落盡綠  
蒂已新芽

閒居戲效回文體

斜迳一林虛綠苔侵古渠花飛接闌鳥藻亂礙



遊魚霞彩籠烟薄露華凝日初沙晴愜緩步寂  
寂自幽居

詠草

何處多芳草青青滿地生芊眠松下軟敷蔚雨  
中榮三月江南思涼風塞北情還看千里色蕪  
沒暮烟平

元日日食有感

煖律沉槐火輕飈動瑄灰鬢華看轉逼柏葉評  
頻開薄蝕三朝晦微輸萬國哀漢廷踈賈誼不

敢論時灾

鏡

寶鏡秦宮鑄江心五日胎麗人嬌影出野魅怪  
形來月魄匣中吐菱花背上開千年殘蝕處丹  
綠繡莓苔

九日讀陶彭澤詩有感二首

屢辭公府辟獨進野人杯秋菊忽盈把春醪還  
自開籃輿兒子舁詩草故人裁素抱苟如此時  
人詎可回



嘗懷孟公飲唯是恥虛壘止酒真非止無懷信  
有懷安貧感陳厄乞食愧韓才茲事已云遠如  
何使我哀

春岬望江

二月江潭上淹留杜若情天長雲意遠水漫石  
痕平翠壁含虛動丹霞映日成漸看來暮色京  
口月初生

獨往一首

獨往無人境千岬落照時雲寒疑帶雪山暝欲  
含滋亂石流荒澗枯林裊細枝平生足幽思未  
必厭淒其

送周廉使赴西川

萬里蠶叢國青冥劍道開人烟通百濮山勢斷  
離堆古棧歌雲險清猿印壑哀惟應舊父老重  
喜使車來

贈張師周讀書鄧尉山居

鄧尉名山隱飄然絕世紛巖飛洞庭月岫出蒼  
梧雲暗澗流苔色幽叢落桂芬還知讀書處別



有稚珪文

贈周道士

羽客何年任叢霄  
紫氣多九丹飛瑞鼎  
五色聚神城  
鶴徑烟中出  
鸞笙月下過  
何時寫經去  
遺我山陰鷺

贈劉將軍

漢將留屯日  
差營禁衛分  
玉花千里駿  
寶劍七星文  
衛霍功全幸  
孫吳識暗聞  
藍田高臥久  
看取榮奇勳

丹陽孫氏園亭

迢遞高樓處  
銜階衆壑連  
白雲松路窅  
碧樹石潭圓  
野瞰疑無地  
山迴覺有天  
因君垂惠好  
重想薜蘿烟

夜

夜長愁寐少  
坐久語音稀  
連雁無聲度  
羈禽接影歸  
露光團樹密  
風氣入空微  
不覺明河淺  
澄澄散月輝

風



空遺小言賦復使大人誇犢鼻生涯稔鷄裾隱  
路賒映膚含石墨化卵出丹砂莫自甘肥澤終  
然罹瓜牙

蚊

利嘴期填腹濛濛沸若雷每於明處隱惟是暗  
中來逼枕吟成曲捐燈伴落煤不知亭毒意生  
尔竟何木

筆

紫潤霜毫熟森森建綠沉石蘭猶合穎玉棗乍  
抽心茂績因文遠遙情揆翰溪何當還入夢希  
尔振奇音

送梁伯龍

楚水不可涉應憐宋玉才三秋征雁少九日片  
帆開地入荆門盡天浮郢樹來知君有奇藻今  
日訪陽臺

秋海棠

搖落清秋日空庭異蕪裁細香醒處得豔色夢  
中開翠葉萋苔染頰莖紫茜裁不應芳杜若偏



動楚人哀

贈春上人

釋子彌天侶神清藻思通  
彈琴三疊後飛錫萬山中  
慧眼蓮花寂禪心貝葉空  
誓將捨秘寶于以息微躬

題畫寄壑使君秉德七首

案落蒼山外虛嵐映夕曛  
寺陰餘野雪谿冷滯殘雲  
故國何年別清猿到處聞  
賈生多涕淚留賦吊湘君

二月潯陽路桃花春水生  
星橋平欲沒霞閣晚逾明  
遠樹看難辨昏峰削不成  
片帆天鏡裏自有便風行

渺渺春帆遠離離杜若生  
雲歸三楚盡日下九江平  
樹古留寒色風多雜雨聲  
故人日千里徒倚倍含情

極日巴陵道哀猿不可聽  
來帆疑入浦去鳥欲連汀  
積氣沉山黑浮光溢樹青  
蕭條蘭芷意千里一揚舲



迢遞分晴望江臯宿雨空人家山色裡雲樹水  
光中泉以澆花得橋因劇笋通襄陽有耆舊莫  
使避乘驄

水國東南永何時到渚宮共言臨汎美還與昔  
人同天遠蘼蕪綠春深雁鷺空悠悠迷處所津  
吏夕陽中

寂寂江潭上差池雪後看已辭關塞迫猶帶隴  
雲寒侶浴依晴渚羣鷺起夕灘莫輕千里別漸  
覺係書難

清真觀訪李明舛不遇

竹里過仙館真遊想玉臺近人青藹散映澗白  
雲來暗草含苔長晴花冒雨開高踪眇難值松  
迳屢遲迴

閒居

野宅圍青草江田灌白波雲陰秋漸薄月色夜  
仍多水綠藏魚虎霜紅卷薜蘿病身踈懶極於  
此數來過

登焦山



孤岫碧巖屹盤陀積水痕遠風聞海鶴殘日起

江鼃鼎刺周文字

楊相國以古鼎留寺中徑可二尺許有銘二百餘字蓋周也

時書 碑書漢隱淪

山中及陶弘景痊鶴銘

迢迢翠虬

駕長此秘精魂  
月下見負薪者

伐木空山裏蕭條夜色沉披雲迷斷壑乘月上  
層岑薜荔龍鱗古萋苔虎跡深誰知負薪者偏  
喜得幽尋

詠劍

昆吾有靈劍煅煉自良工夜氣連珠斗朝光拂  
彩虹折衝千里外決敵萬人中凜凜芙蓉鏑相  
看意獨雄

威鳳棲梧桐

威鳳來丹穴凌霄待積風詎能依枳棘本自集  
梧桐彩溢神符外聲諧帝樂中將須聖明化此  
日下齊宮

詠刀

挺質軒黃代周防籍體安金環規月巧寶鏑帶



霜寒陰燄開凋戟虛光動玉鞍應知百煉後一  
割未為難

詠馬

渥洼龍種多萬里倏來過向日開金埒迎風散  
玉珂驕嘶依弱柳細蹠下晴莎一御鳴鑿去香  
風近綺羅

董子元移居次韻

逢君嗟亂後徃徃欲迎名投足應無地移家暫  
薄城穿池營水畜葺館聽山鶯杳杳東臯上遙

憐棲隱情

高士無稀世長深薜荔居名杯棄落酒芳搗酉  
陽書末路初欣邁清光每翳如何能數來生谷  
口候柴車

靈隱寺

寶殿北山隈何年錦石開雲光明画棟竹色淨  
香臺幽磬綠空度清泉透澗來願因起累劫戀  
賞復裴徊

入呼猿洞作



春遊尋洞壑，窮窅入仙宮。  
石出丹青古，天開戶牖通。  
日光懸靄細，花氣與烟濛。  
會是留真訣，何時擬再逢。

行經岳鄂王墓

勾踐湖西路，高墳宛在茲。  
一家同授命，孤績竟何施。  
胡馬驅馳日，中原涕淚時。  
天心與人事，千古為傷悲。

早登寶林山寺望湖中作

探幽躋淨域，候曉躡空林。  
天入蘿藤小，雲連嶂嶼深。  
溪水光浮檻，山色下湖陰。  
杳杳虛嵐外，方知出世心。

送秦君敷明府之德化

鳴絃將萬室，一半是山家。  
不種河陽樹，唯栽九畹花。  
竹雞飛食螳，松鼠下吹沙。  
因知循吏政，清靜不諠譁。

不擇閩荒遠，之官豈為負。  
青雲無曲路，白髮有慈親。  
百里看花得，三年見雉馴。  
政成應不久，歸覲復何辰。



問舍不得有感一首

衰蹤歎轉蓬日短值途窮兄弟凋殘後風塵感  
既中書從孤憤著歌向五噫工誰起幽人宅郝  
超自不同

寄徐少參子與

萬里承新命天南盡百蠻路開秦漢古書遠歲  
時還草綠丹砂穴花紅石黛山何時接杯酒相  
與慰衰顏

分野南荒外星辰各異躔天分長暖日地出倒  
流泉雨洗金沙淨嵐蒸寶氣鮮圖經堪檢點別  
是一山川

天心私遠徼異產屬夷人象齒充方貢雞窠入  
饑珎煉碁燒雜寶鑄劍錯花銀此地多饒富唯  
君肯自須

聚落互參差文章鳥獸皮絕崖人到少雜種事  
多哥衣服纏通幅蜻蜓美過飽如何遺惠化能  
使置生祠

秩高家更遠山水萬重過未覺音塵關仍緣惠



命何處先生集卷之五十一  
賦多賣文難索價唾沫自成波獨歎支離者  
嘶恩柰尔何

送王比部改北部之上都

南部三年冷名高任晚推此行丹地密未改白  
雲司獨以文無害能令衆不欺漢廷仍厭酷一  
為掃繁詞  
計日促嚴程辭家赴國門挂帆秋色遠疊鼓夜  
聲繁關樹飢鳥集津亭小吏喧送君多意氣抗  
手復何言

賦得涿令行春反

循良古所稱涿令舊知名飛鳥聲方掩彈琴化  
自成朱輪行縣日白鹿擾車迎遺愛今如此誰  
言邑宰輕

程惟元秀才

三十未逢辰聰明獨邁倫隸書鍾太尉楷法衛  
夫人父子為知己風塵肯失身坐看騰蹕意清  
夜轉相親

贈玄妙觀朱煉師



真籙奉芳盈金壇朱艸生窓中青鳥度洞裏白  
雞鳴每候丹爐熟時疑鶴駕迎翠房還自隱遙  
聽玉琴聲

題文待詔畫

遙情物外真野色望中新雲重常舍雨苔沒不  
受塵亂山青皦皦荒澗碧粼粼此地淹留處松  
根道舊人

瀟湘夜雨

瀟湘逐臣地多有別離情竹換朝烟色江含暮  
雨聲漁船依樹暝山鬼嘯巖清帝子遊何處千  
秋怨屈平

烟寺晚鐘

寂寂古龍宮莓苔盡日封潭空沒萬仞猿嘯入  
千重起月開青嶂歸雲挂碧松孤僧尚行乞頻  
聽夕陽鐘

漁村夕照

古樹留殘照孤村起夕烟水花穿網落漁火亂  
星懸市酒難成醉江鱸不用錢生涯波浪裏來



往白雲邊

陳氏紫薇山房

秋庭有嘉樹遲久自開花  
密葉攢青藹叢枝簇紫霞  
離披含雨重荏苒就風斜  
何必呈華省芬芳隱士家

何太學伯謙山居

曲徑有幽趣我來多所歡  
雲陰當戶起山色捲簾看  
散恍因風亂閒花任鳥殘  
更餘栽藥地且得數弓寬

贈從弟肇甫

吾弟真靜者甘貧與世疏  
老妻朝秉爨童子書攤書  
短樹巢馴雀豐苔繞敝廬  
偶采鮑坐久頓覺此心虛

卜居

一畝居非易移家苦自勤  
畫龍宮外月抵鵲嶺頭雲  
喜至酬新景愁來檢舊文  
始知棲泊處短髮已紛紛

送顧太學之選部



清祿向彤墀春風上路吹大木行組日高選渴  
賢時綠柳烟絲慘青驪躑躅竒離亭酒盡醉酒  
酸玉蟠螭

抽思

秋氣淒肅能使興盡余既老而多故傷如之  
何因擬抽思七首以紹古之七哀兼復貽諸  
相知云耳

惻惻起秋烟看雲日暮天葉危應易隕灰死未  
曾然兄弟此生盡悲涼是日偏鏡中饒苦色何  
敢映時賢

涼露下空庭荒苔濕自青勁風如有警永夜不  
堪醒假息依鸞鷺愁心伴鶴鷄鬚邊應更白渾  
淚幾時停

爽氣肅青冥寒花落故庭不禁時冉冉難鑷鬢  
星星多病非緣鵬浮生輒類萍深恩叨茂宰猶

足駐頽齡

洛下王公用事時為  
邑令每有慰藉之言

獨坐傷心日裏遲已怯行暝來青藜重雨過白  
雲輕缺月三更上長天一雁鳴寂寥人世隔空



記往年情

毒熱踰三伏昏昏似峽中共言今歲別無復往  
年同草木經時槁乾坤大小融蕭條荆樹色流  
恨竟何窮

兄弟凋傷久纏麤歲不虛吾衰常自怯汝疾竟  
難除一死三秋暮相違二月餘蕭然環堵宅未  
可卜安居

今日又明日抽思寄苦言新愁催舊疾殘血灑  
秋原易盡桑榆景難酬骨肉恩所嗟衰朽質獨  
有未銷魂

送徐按察子與

高宴日相催逢君萬里來歡餘結離思歌罷促  
殘杯別路月初上孤城夜半開獨憐相送出携  
手復徘徊

文章老更成海內屬詞英意到須文好才當大  
受能高牙搖海色疊鼓震天聲已蘊風雲略功  
名且莫輕

萬壑泉聲滿千山榕葉稠白雲藏驛路赤岬引



鳴騶計日之官暇聽猿忘客愁供詩處處好不  
比仲宣樓

此日閨中去休嗟行路頻鶯啼溪樹曉花發亂  
山春公望朝端舊軍容海上新和門應罷整荒  
憬自來賓

薄帷鑑明月

古月無改色夜夜吐新光薄帷似不隔流影照  
空冰徘徊千里思泛濫九枝傍未眠還欲起翻  
自怨宵長

長笛吐清氣

長笛似龍吟還因截竹成聲從空處激氣逐管  
中清嶺戍梅初落關山月自明胡茄不愁思至  
此倍含情

風生翠竹裏

脩竹夾梁池檀欒起夕颺青蘋看苒苒翠葉自  
離離嘹唳舒龍管參差雜鳳吹若同萬籟息誰  
復辨雄雌

采藥遊名山

俞中村先生集卷之五 廿七 時



靈藥閔丹經應非孛壤生華山逢赤芥銅嶺掘  
黃精乳竇無塵跡瑤潤不世情懸知攝生客五  
岳徧曾行

俠客控絕影

俠客控絕影意氣自相并白玉嘶雕勒黃金錯  
繡纓朝馳萬里塞暮入九重城猶嫌力未盡間  
道看奇兵

初春病起有懷元美伯仲

老至艱虞極春來歎轉衰自違顏色久不覺歲  
時移百里遠莫到寸心室復馳淒涼滄海田只  
有四愁詩

早梅得天字

紫梅歛初萼俱發上春前照日薰瓊靄迎風散  
玉烟怨將橫吹寫嬌約淺妝妍別有芬芳處菟  
園雪裏天

溪夜二首

溪夜發孤想望望何嗟峨清光亂離席涼氣生  
微波落月照危渡遙星沒曙河悠悠梧桐語况



乃楚陽歌

秋蘭夕含芳清輝振素裳愁思正彌彌焉知秋  
夜長鳴虫倦時息明月流中央參差牛女星回  
首上高堂

雪後登山樓

白玉仙樓古長空一望迷光搖萬戶動日出衆  
峰危鳥落雲牕曉城連峽樹低子猷多送興千  
載獨相思

宿南禪山房

僧定兀無語孤星野寺空竹虛時見月木落不  
聞風爽氣侵初夜危榭宿霧中那堪不得意簫  
瑟坐晨鍾

卧疾

卧疾馬牕下荒村楓葉稀夜空人語近雨際月  
光微宿溜踈林木寒星帶石磯躊躇多古意寐  
莫數螢飛

送王敬美

青年粉署郎早晚謁明光馬動新行色雞舍入



奏香握蘭宜揖讓起草泛芬芳莫使朝儀缺應  
須理舊章

巖石老蹉跎軒車荷數過懸知題漢柱未敢激  
商歌鵬鶚樊籠遠飛騰意度多人皆稱二妙歡  
喜復如何

送周參政子純赴四川

聞君候明發萬里向西州遠近風烟雜羗蠻部  
落稠亂雲橫塞起疊嶂與天浮自古羈離地今  
知德業優

蜀道誰云易經途亘五千陰岷長抱雪陽各盡  
含烟峽東湍流險嵐蒸氣候偏惟應多沃野汶  
下有芋田

蜀國四賢者寥寥千載餘沉冥開卦宅寐莫草  
玄居作賦通丹禁徵書下赤車資中有男子講  
德更何如

送周秀才

韋氏饒經術高才又得君文章堪擅美鵬鶚自  
為羣月樹澄遙色天蒼落早芬纓繻方自此應



不羨終軍

送鄔駙馬

鳳館聯姻舊龍樓御極新襟忠甘自引直節會  
時伸劍佩趨朝日驅馳報主身它年青竹簡高  
譽逼麒麟

周渭陽生子

此日充閭慶看君奕葉新漢公稱賀客周室喜  
生申昴宿大中瑞隋珠掌上珍何人親抱送又  
見石麒麟

送王儀部敬美

古來文苑傳衰意向君傾三載除麓服群公挹  
大名牆東停折簡江上望飛旌楊柳垂垂碧翻  
令別恨輕

寄武岡王

迢迢千里使重下九江春事勝還多阻情高亦  
易淪小山終愛客叢桂喜留人何日揚舲去追  
陪置醴辰

余訪徐太守子與長興既留四日子與復



送我五湖之西宿葭菼中賦詩申別余念  
輕別之不如壯盛時也為之惘然

一訪南州彥迴舟傍綠堤暫逢今又別相送復  
含悽踈樹籠烟密濃雲帶雨低不知何處所落  
日五湖西

送從子伯良迎婚雲中

婉戀吾家璧翩翩有勝風抱琴游塞上射雁向  
雲中關月窺金鏡邊花度玉駝應知孟德耀早  
晚伯鸞同

荅陽山顧頴

旅泊淹晨暮衰病愧友生寒雲城上疊荒月棹  
中行古魚知何用雄心自不平蒼茫暗中別耿  
耿見深情

徐使君子與臥病比得轉佳以詩見示奉  
荅二首

楚客多愁思春來花更紅心心慕同侶字字見  
深衷佳句懷痾屬幽期遣信通相望唯滿月千  
里與君同



大雅能遺世遙興狎隱淪明時懷散早愚谷著  
書頻歇處唯叢桂交情只故人紫蘭開史落吾  
道未緇磷

玉蘭

澆時多自記絕勝往年芳美玉分竒彩甘灰出  
異香暄來如有月凋去可無囊 鄒連朝雨愁  
弄翠葉長

周金華東林精舍

南城欣獨往北嶺見高稜五馬開初地三車演  
上乘丹魚浮翠藻碧樹引蒼藤已戀東林僻淹  
留惜未能

送周使君赴金華

露冕看君貴吾衰已二毛別離如昨日歲月甚  
驚濤路繞吳江闊山臨越郡高聖朝須選吏西  
望使心勞

每讀龐黃傳夫君唯此心轡軒重往日父老戀  
恩深諍絕翻玄草庭空落翠陰良哉二千石漢  
主賜黃金



芳樹贈柴別駕

嘗聞萬年樹復有萬年芳向日融朝景含烟秀  
晚霜叢生翡翠色圓實火珠光藹藹迎祥處懸  
知世德長

汪民部遊吳中諸山

萬頃澄湖上三秋水氣中遠天迷葭菼落日下  
葦叢使節憐方邁離尊恨莫同懸知聲藉藉久  
已在諸公

靈柈

仙人拄龍杖白日下高青童出靈柈玉  
女擎胎禽迎袖舞神鹿選芝行此日西池宴遙  
傳壽母觥

橄欖

迢遞傳丹繳霏微染翠嵐頰梅分半澀崖蜜送  
餘甘色借雕盤瑩香侵玉署含祇應凡口絕聊  
復破朝酣

壘秀才處乞榛樹栽

萬里遼陽樹移根檻外生叢花粘絮軟繁實綴



珠輕熟避玄猿喫枯疑赤燒成婆婆憐遠意願  
乞一枝榮

贈劉道士

上宮開寶籙長日肅清機鳳葉披雲細龍柯映  
月稀暗壑滋乳滑陰殿養芝肥為問緱山鶴應  
無七日歸

山谿

獨有山林興移舟曲漱春石淙縈壑緊陂榭轉  
條新遠水疑無浪虛嵐詎有塵沿洄碧巖裡理

揖候通津

九日遣興

浙浙風全落霏霏雨向稠草荒業菊短花積古  
堂幽陰薄青牛榭寒新紫塞表自憐淹病久物  
色故難留

賦得鷺鷥贈朱黃明

獨立清池蘩高標迥若迎廣庭留雪淨清漢拂  
雲晴每伴鷓鴣起時將燕雀驚迢迢掖垣路來  
往扈天行



蘭

奕葉含春藹參差媚曉光清芬欣入室幽探狎  
閒房尚想三閭珮遙憐九畹芳翻嫌踰峻嶺高  
價重琳瑯

除夕

除歲孤城晚閉門落照低天心回暖律地氣涸  
寒黏病骨添裊寒深更足鼓鞞春陵有遺咏應  
向使君題

兀日

棲遲逢獻歲蕪梗故人稀苦露含烟濕寒雲翳  
景微過時身獨老與物意多違况乃干戈際方  
春已抱飢

送羽士

青谿千仞絕一迳入明霞書渴金壺汁丹飛玉  
洞砂雲房通月彩乳竇滴烟華幾日茅龍去言  
尋松子家

夏日懷吳德重

高館臨芳甸清峰瀑野烟開書思伏枕長日亂



鳴蟬水靜沉魚見  
籬踈嫩竹穿無因  
見中散披  
豁一醒然

自潤州城南往虎踞山招隱寺訪戴顒故  
宅行經黃鶴磨笄菊花諸山瞻眺一首

穹崖閔靈宇禮謁肅天宗  
萬壑磬聲遍千嶽花  
氣濃紗香來洞口飛穀入雲中  
杳杳翠山裏空  
尋烟霧蹤

詠筆

象牙騰麗飾龍角  
騁雕鷲方士遼東賈將軍  
塞北捐含毫凝彩液  
弱管散芳烟何日文園令書  
成羽獵篇

詠墨

我有錦囊墨松烟搗麝芬  
浮光含彩霧吐氣結  
晴雲豈若金壺汁  
空書柱史文顏仍鑿甲喻天  
上榮竒勳

与子與登呂山一首

憐君相送出停橈登呂山

呂蒙正嘗  
屯軍此山

携尊復開

酌把袂恐言還一鳥響丹壑千崖澄綠灣聊因



緩歸趣蘿壁共躋攀

吳興道中

吳興古僻郡多有隱淪風路遶千峰出船將一  
棹通沿泗三百里雞犬水雲中自傷漁舟宿何  
人復歎窮

棲賢筍出湖州棲賢寺其色如玉甘脆特  
異筍微紫嗅之如蘭花云

去買苕錫市棲賢玉版茱竒芬新過雨嫩筍半  
含沙乍逞屠龍伎空遺集鳳嗟偶來聊抗吻如

破紫蘭花

西湖泛舟

西湖連嶂曲空翠滿澄波萬古歡娛地三春枕  
柳時金尊波上酌画鷁鏡中移日落長堤晚夷  
猶未忍辭

風木

寂寂茵幃遠依依軟孝思白華空雅什碧落振  
高詞重以鼻魚感還同季路悲蕭蕭古原上獨  
樹起涼颺



倚梧

倚梧生北海華實自披離奇韻來金奏輕陰剪  
碧珪遠停公子駕高聳鳳凰枝詎使囂塵染寧  
待歲時移

贈秋山上人采藥

杳杳大雄路寒山霜日暉連林黃葉去半嶺白  
雲歸靈藥採時采奇方閱世稀儻蒙慈濟力羸  
疾頓能肥

虎丘慈上人

開士深名理能談玉柄禪清齋雲氣入幽梵谷  
神傳灌頂留殘雪安心究竟天欲知羊臘數萬  
事已蕭然

徐文果九霞山亭

複嶺氣長白雲來無斷時野花幽色好枯樹古  
形奇機息鳥忘去行高人不知讀書唯遣日生  
事只茅茨

王比部昂爵見訪遂還上都賦此奉贈

卜居妨近市小巷接魚梁自掩蒙籠室唯薰草



樹香翠霞縈紫几丹錦委藜牀無事紆高駕應  
憐蔣徑荒

二月上河洲仍從小隱游情深多委曲才大豈  
淹留和緩書初輟淮陽疾已瘳春風送征棹翻  
向白雲秋

喜得徐少叅子與滇中書二首

白首昆明使經塗出夜郎外區天設險絕域地  
為荒萬里書頻到諸公意獨長天隅憐棄擲時  
屈昧行藏

楚鎮雄南岳斑麟見古碑麓山交劍戟

岳麓寺碑李邕

撰并書

峒嶠屈蛟螭

峒嶠衡山南麓別峰禹刻石其上唐何致于模刻下方

歲月消沉久烟霞事跡竒使君能搦寄跋百涉蠻

來

子與在楚時榻此二碑今自滇中寄來

贈張鍊師

嵩陽曾舊隱此日補仙官鷄犬分丹藥芙蓉製  
法冠三山消息近五岳往來殘冉冉青毛節  
鏘禮玉壇

蓮花朵田叟



百年住蓮花十里城市違  
種田紅稻熟起水白魚肥  
落日湖上大浮村烟際微  
世人皆不及老酒莫停揮

附六言律一首

朝爽樓即事

西山半嶺朝爽南郭幽人  
畫眠啼鳥尚含宿雨浮雲  
時帶輕烟閉戶青苔滿榻  
著書白首多年寂寞何曾  
問字悲涼直似棲禪

仲蔚先生集卷之六

吳郡俞允文著

七言律詩

送顧子韶副使遊武林

君到長堤興自豪只應分日作遊遨  
寺浮湖色兼松色雲接南高與北高  
桂子月中堪進酒梅花祠畔可停舸  
懸知八月枚乘筆為寫錢塘白馬濤

王太史宅碧牡丹次王元美一首



當時魏紫與她黃家家爭看牡丹芳其如冷焰  
含虛碧別有竒姿吐異香不比珠林閒處種全  
勝金谷醉時妝托根況在青雲裏三月韶光此  
日長

漂母墓

西望淮陰淮水濱荒墳寂寞漢碑平王孫未遇  
封侯日漂母能深國士情一飯暫將枵腹飽千  
年猶使吐心驚息多只在艱難際此後投金事  
亦輕

愛妾換馬

妝成豔質繡香車換得名駒勝渥洼不惜雙蛾  
怨紅粉翻憐一騎入黃沙青絲緩控先過市翠  
被纔薰已別家空有桃花好顏色羞將顏色比  
桃花

奉答輔國將軍豫章朱用晦次韻一首

頻年遷次少過從千里驚看一雁通南郭繁雲  
還易合西園明月更難同虛名已擲風塵外長  
句時成感慨中最是梁王能好客肯來分餉鹿



皮公

賦得龍石贈休寧程子行

誰知翠壁有龍埋一夕風雷忽自開天上飛騰  
初脫骨洞中痕跡已辭胎猶疑水氣含雲動直  
恐珠光換電來異物自于人意合懸知君有出  
羣才

有懷金陵舊遊作

千古金陵勢尚雄九門佳氣曉葱葱長堤碧樹  
王城外落日金甌紫禁中鍾嶺雲溪時見鹿北

湖波靜有飛鴻六朝舊事今何似應有秦淮月  
色同

送馮山人遊廬山

聞向廬山訪三隱令人却憶此山阿香鑪雲氣  
時時滿瀑布泉聲處處多李白長謠從此發謝  
公佳句復如何清暉信是能娛客直渡潯陽九  
派波

冬夜同王副使元美進士敬美許給事伯  
雲宴陸林原林亭送徐使君子與分得花

前中府先生集  
卷之六  
三



字

寒城嚴鼓夜頻過  
此夜偏驚歲月加  
雁足銅盤燒絳蠟  
鬼丸泥火印丹砂  
人間共醉千季酒  
天上時芳六出花  
寂寂坐深追舊賞  
思君一倍惜季華

春寒有懷

一春寒雨歎蹉跎  
花落空林長薜蘿  
綠迳不鋤行客少  
蒼池自養雜魚多  
高齋獨喜雲霞入  
老病虛擔歲月過  
心事茫然何所有  
賦詩秬許寄

羊何

謝靈運登臨海嶠詩  
與後弟惠連見羊何  
共和之羊何東海何長  
瑜太山羊璿之

除夕陸光祿丈遺新曆烏薪作此奉謝

高卧無心歲月遷  
門前綠水地仍偏  
烟霞室靜長生白  
薜荔帷淡自草玄  
重荷烏薪暄永夜  
兼將鳳曆報韶年  
踈慵每媿追陪久  
數枉緘書意獨憐

聞張尚書軍至蘇州

漢家十葉中興主  
經濟艱難屬上才  
萬里鯨鯢傾日域  
一時羆虎下雲臺  
行營盡日朱旗繞  
吹



角清秋玉帳開看取功成多拜爵大封京觀海  
東來

毛女

千年肌骨透奇香剥棗食花葉作裳漢代羽毛  
何日長秦宮珠翠幾時妝白雲有路金梯接青  
草無人玉洞荒欲去暫留烟霧裏亂峰迷處半  
斜陽

安石榴擬應制

五雲香駕碾春雷紫禁朱榴范露開萬里遠辭

秦塞出一枝新逐漢臣來已看接翠啼嬌鳥別  
有連珠矇早梅聞道南來能釀酒大官先進萬  
年杯

早梅擬應制

漢土重開上林苑江梅爭獻萬方來詎誇巴榭  
連冬簇自有林花映雪開曲裏纔聞驚早落妝  
前初拂闥新裁懸知解結連珠寶長使和羹屬  
上台

江南感事和朱察卿二首



詔書天上下將軍萬里徵兵羽檄聞龍劍連星  
銷苦霧桂旗斜日卷高雲帳中夜起平羗曲海  
上朝傳喻蜀文行佇鳳京多奏凱重看佳氣遠  
氤氳

占募經年到海涯甘心赴國豈辭賒一身屢破  
重圍出百戰長酣暮景斜樵上神駒嘶紫燕腰  
間雄劍蛻青蛇借問軍中誰第一木蘭肝膽盡  
胡沙

寄陝西王大參明輔一首并送玉環一枝

萬里遙心寄玉環使君於此濟時艱深衷已覺  
行藏古大雅能令案牘閒胡塞風高如劍戟秦  
關月滿似刀鏢此中豈是淹留處借問何時可  
復還

王百穀半偈菴新成一首

聞君高隱戶長扃百轉流鶯懶去聽天際浮雲  
終變滅松根軟草足沉冥無心自結蓮花偈有  
髮能翻貝葉經還憶去年燕市裏春風日日不  
曾醒



落日浮舟過虎山橋望洞庭諸山

向晚乘舟過虎谿山山落日洞庭西五湖新水  
垂烟釣萬頃平疇帶雨犁天外白鷗波上下雲  
中綠嶂樹高低自知踈懶多違俗便欲携家就  
隱樓

潘侍御巡按頌表有甘露降于庭樹同諸

公之作

勇冠白筆簡書飛節使橫行出禁闈已見霜威  
凌草木忽驚天酒下霏微光分曉閣明珠珮色

借晴林引繡衣此日仙盤調玉上懸知明主賜  
恩輝

送邵參將赴惠潮

六載平戎有大勛樓船橫海拜將軍帳中高枕  
雄三略天上徵書下五雲金虎按行榮去節銀  
鞍送別悵離羣春風萬里潮陽路唯有蓬心可  
贈君

送廣西計教諭遷國子博士

三年鱣館重諸生此日雙龍關下行莫以一經



淹散秩還摧五鹿著高名烟拖柳葉離亭晚水  
長桃花去掉輕自歎相如多老病春風不解別  
離情

元日次王元美韻

經旬雨雪送春晴啼鳥間關枕上驚病骨逐年  
添偃蹇壯心垂老尚崢嶸避人自矜庭前樹佳  
句還傳海上城試問何時移桂楫為澆壘塊待  
參橫

紅牡丹得雲字

洛浦年光春已分名花妖豔摠難羣仙人畫道  
丹砂熟游女遙將綵珮薰日射樓臺千葉起風  
吹香靄半空聞還疑小度巫山峽散作朝朝暮  
暮雲

送王元美敬美赴關上書

十年懷疏淚長枯兄弟伶俜滯海隅此度別離  
俱慷慨不知天地有崎嶇孤忠久抱千秋恨元  
惡方嬰兩觀誅正是 聖明新雨露恩波應已  
浹玄壚



寄李于鱗

海內于今有大名自耕黃紵隱茅衡論詩未必  
推公幹作賦還應過長卿萬里白雲知我癖十  
年青眼望君情故人此去多傾倒况復相違愧  
此生

貽許剛府乞画眉

當窓綠樹曉沉沉山鳥懷春弄好音乍聽去來  
疑結伴忽驚宛轉似羣吟河陽花底棲偏穩  
魚父絃中韻最深借問政成多暇日何時籠寄到

雲林

顧懋儉白雁

朱雁曾聞漢武朝今看素彩出奇標衡陽水綠  
雪仍在吳苑柰紅冰未銷暗度關山天外曉孤  
飛池沼月中遙此時混色應難辨還伴青雲上  
赤霄

白鷺

曾伴烏衣度海雲獨憐孤潔語慙慙晴飄白雪  
光難辨暝掠青芹色自分金屋歸時多曙影玉



筐携處每驚羣梨花深樹偏留宿故逐飛花取  
夕曛

題葉伯寅安石榴圖

萬里移根出大荒千株曾表上林芳  
新栽翠的攢朱葉嫩簇金牙結紫房  
湛液疑含仙掌露流甘不讓帝臺採  
誰言多子來時晚絕勝春花怯  
早霜

李于鱗訪王元美兄弟夜經崐山不遂披  
觀寄詩存慰次韻奉答

老病經年半白頭時時天際望仙舟  
不圖往返俱乘夜自歎蕭條摠是秋  
在位王陽應念禹窮居王粲只知劉  
更期後會嗟何地日把緘書比  
舊遊

送談太常詣關上疏乞營先中丞墓田

旋聞服禮又經春千里迢迢謁紫宸  
一疏淒涼悲嗣子兩朝匡濟失名臣  
梅花嶺外勲庸盛馬鬣封前歲月新  
明主只今存舊德邱山應見起  
高墳



憶昔承恩擁大兵，壯懷長策在澄清。南橫濁海鯨鯢靜，北掃妖氛組練明。寵極曷猜奸自起，功高難掩頌還成。欣逢此日沾新渥，一雪當年報主情。

早朝

百轉春鶯繞鳳臺，瞳矐宮漏曉光催。天迴玉輦龍鱗動，日射金莖露掌開。青瑣侍臣承詔出，朱衣中貴引香來。懸知此日多延納，誰薦揚雄作賦才。

贈周煉師

仙館冥冥無世情，時時空外聽吹笙。三山定有仙人至，九轉能無大藥成。階下紫芝雲氣養，巢中青鳥羽毛生。人間信有無塵境，好接盧敖戲太清。

樓居自述

日苦頭風不着冠，簷前惟恐鳥聲闌。山從野寺浮青出，樹在隣家借綠看。架上斷碑秦石刻，几間承水漢銅槃。徵君養疾無多事，臨寫佳書贈



所歡

立秋日同陳庫部徐文學王比部宴集王  
使君池亭觀荷比部首為長句二首見示  
使君復貽示相和之什仍但和詞遂次韻

二首

使君亭榭倚雲騫並命追涼集後園松迳烟懸  
承細草荷池蕭爽助芳尊已辭炙手金魚貴偏  
喜清言玉露繁此日歡游多著作謝家才藻愧  
諸昆

紛以平岬影玲瓏落晚臨秋斂彩虹色湛仙人  
花上露香飄少女葉間風千房細擘抽青蕙一  
幹高擎引翠筒別有笙歌來隔浦却扶衰蹇傍  
諸公

楊將軍牡丹圖

雒陽三月盛繁華無數姚花與魏花繡幄千重  
迷作霧金蘭幾處簇成霞平章宅裏看還少蜀  
國圖中見每賒此品云應稱第一但將描寫到  
君家



誦南昌余按察德甫次韻

千里江山指顧中同時何苦不相同  
新詩把玩還終日短札慙慙託便風  
自分微才於世屈獨憐直道豈天窮  
滄洲此路無塵到信是冥冥別有鴻

送王鴻臚

君王端綏會昌朝共說中興此日遭  
閭闔不時開曉伏蓬萊何處擁晴旄  
風傳玉漏靈虬遠雲捧金莖露掌高  
總領羣班霄漢上恩榮何必問

官曹

送顧大參赴任貴州兼督湖廣四川三省糧儲

征旆翩翩節使雄百壺追餞悵臨風  
雨承睿旨

驅馳遠

公自廣西按察副使轉貴州

三省分司部落中東鎮

長沙當楚塞北通蜀道抵蠶叢  
知君惠政能安俗早晚聲名達聖聰

誦王中丞元美兼要寫登武當之作

柏府弘開楚蜀偏中丞西去絕烽烟  
已知坐鎮



多雄畧復睹登高出大篇載記條條分委曲丹  
青一一画山川還須楷法成三絕先損荊州五  
色牋

雙鳳周文學庭前玉蘭次韻一首

春靜簾櫳淡灑香素姿堪映美人妝含風似覺  
晴還好氾露仍疑夜有光不比秋蘭怨濃浦全  
勝玉葉媚唐昌偶來整喜逢開日却少移花醉  
舞場



仲蔚先生集卷之七



吳郡俞允文著

五言排律

擬元日侍宴應制

青陽開寶曆和澤肇初正  
六氣依辰至三光照  
物平旌搖天伏暖燎徹鳳樓晴  
柏葉傳仙藥樹  
花獻玉衡一經揆道要重席寵朝英  
黼黻千官  
擁魚龍百戲呈睿情熙浩蕩皇豫屬休明  
日月  
堯薰合簫韶舜樂成八荒齊蹈舞萬壽協靈禎



願以微臣陋長瞻聖主榮

擬人日侍宴應制

帝出時乘震天臨屆早陽禁鶯調露轉堤柳拂  
烟長泚氣通午樂榮光繞建章言陪七日賞預  
捧萬年觴巧勝傳宮綵妝梅入御香清歌雲外  
逸妙舞鏡中翔玉膳和神鼎金壺溢帝祿已欣  
承睿渥轉使愧才良有道人俱暢無為物自康  
小臣徒雀躍何以荅汪洋

擬十五夜燃燈繼以酺宴應制

睿賞惟稽古鸞輿展上陽金吾初放夜寶炬儼  
周行萬戶呈分彩千門月讓光合聲催疊鼓代  
舞按霓裳火樹開晴焰天花雜露芳重關通曙  
啓游騎接雲長春發遲行漏寒回薄禁霜笙歌  
平路滿香靄半空翔惠洽君臣泰人和國步康  
方知同鑄飲化被自無疆

擬五日望拾採應制

茲辰望拾採麥候尚清淳綠艾逢幽客香茗引  
麗人蘭湯百種氣葛酒四重醇赤印懸心小朱



砂點臂勻約絲投楚鬼潔服祀陳神八字丹書  
秋千年命縷新鏡奩開寶月画鷄搶龍津共喜  
天中節游娛續上春

擬冬至應制

子月周王正陽文漢律元三光回短晷萬寓渙  
湛恩灰管飛緹室珠星映綺門驚時開荔色應  
節吐蘭根日氣迎雲淺衆心動谷溫蒼鷹望雉  
下綵旄候風騫羣辟方占瑞因知道化尊

從軍行

虜騎初傳寇將軍別置營猿肱求陷陣燕頤請  
專征冰壯蛟紋闊霜乾雉尾晴拚弦攢月的鏤  
劍寫山精制敵隨形勢全軍出死生怪雲衝障  
落吉氣抱鞍行注黑防流毒山紅偵伏兵雁毛  
梳雪短虎蹟漫沙平漢月猶能辨胡星不可名  
相看無一語醉拔骨都城

奉贈楚王

上國頻開第高標仰若神藉茅分寶玉連萼賚  
金銀梁苑嬉游盛河間著作新郟枚思振藻申



白引為賓水泮岷山雪花含郢樹春興優多暇  
日禮洽編芳辰服食迴丹景淹留想翠塵何時  
小山路千里奉芳茵

張明府秋日登寶山望海同諸公之作

乘秋凌海嶠稅駕眇雲裝想象三山客憑瞻百  
谷王浮天壯險介載地表靈長沃日搖千色飛  
霞變九光龍宮連島嶼鯤窟限偏荒水府魚鱗  
合瓊田草樹香文沙聚雲錦瑕石被銀黃落鴈  
迷烟斷鷺帆破浪翔川源窮析木波路渙扶桑  
善下功難並神翰德詎量波臣思無已四顧轉  
微茫

八月十八日觀濤作

秋濤凌太白萬里奮溟池決勝難為體參神每  
應期縱橫騰駭駟駱驛起翔螭臨水悲寬相沉  
沙憫孝姬回颺衝浪急淪景出波遲紆鬱鸞簫  
引淹留桂擢嬉煩襟堪澡練高宴喜追隨緬想  
枚乘作徒慚黃絹詞

送溫侍御還京師



俞允彙集卷之八  
柏府推公雅乘驄見直羸丹心輸上畧白筆著  
高名使節臨吳甸征車指帝城勢傾山岳動  
風肅海波清柱鐵雄周史埋輪壓漢京三台應  
側席萬里可橫行屈草莽芳盛豪鷹搏擊能定  
知旋奏入四海佇昇平

貽王郎中元美二首

族貴分龍節才華歷粉闈詔從三署轉時擬二  
星歸已著寬平法能消早暎威青雲隨望迴白  
雪和詞稀暫憇匡時跡還探善者幾曉陰停鶴

蓋秋色引鷄衣羨爾承恩入含香近紫薇  
雅望推王粲英詞重陸機遭逢仍戮力出入荷  
恩輝雲署新銜迴星臺舊獄稀中朝隆揖讓下  
里失芳菲祖席連吳苑離旌指帝畿銀塘清藹  
散琪樹早涼歸計日承明對知君有弼違

贈任別駕遷太倉兵備副使

循吏臨戎日將軍授鉞朝膝歸千里外敵取萬  
人驍玉劔秋魂冷金鑊夜壁遙建牙亭野色吹  
角動陰飈調箏方疑虎拊弦合隊鷗平吳杜元



俞何原先生集卷之七  
五  
凱破虜霍嫫妣嘗苦天心應巡寒士氣饒佇看  
氛祲息還珥漢廷貂

送葛理卿比部奉使減江右刑獄

帝綱祛三面天慈降五年星占方選使華省獨  
推賢詔遣平反徃權歸用法專蒼鷹慚搏擊白  
筆奉周旋山月鳴騶引江雲倚蓋懸齊臺涼吹  
襲燕地曉霜翩槁木長思潤寒灰欲起烟惟良  
應代出殊渥不時宣多病文園老窮居執戟偏  
看君旋奏日高譽逼台躔

送李別駕賀 聖誕赴上都

才以匡時出時當展驥初義高頻解榻名重即  
題輿碩画延尊俎深仁浹里閭落花公宇靜帝  
鳥俗塵踈按縣何辭劇開懷每見虛呂虔仍許  
與管輅且吹噓征旆三江外長途百舍餘去思  
惟酌水遺愛必攀車上最無淹秩新恩會立除  
還同歌萬壽長拱北辰居

贈詹處士從柳將軍破山獠一首

匡時趨幕府投筆事推鋒仗鉞驅三畧分符出



五戎來從萬里外轉戰百蠻中月滿軍容肅霜  
清劍氣雄鯨鯢朝登靜獠緝夜烟空  
獠緝山名  
獠人居所  
才傑陳琳檄英豪劇孟風雲臺鬱高議天闕佇  
勲庸此日應旋凱重標漢柱功

奉贈瑞昌王

白茅資右戚朱邸列英藩  
奕葉神明胄真圖太乙縑  
星躔分翼軫天險控荆門  
盤石周屏固維城漢輔尊  
妙書傾北海高宴洽西園  
香氣分花出霞光襍樹翻  
五車承棟起七閣與雲屯  
入楚

心万切遊梁道即存無因叨滕引接醴侍芳尊  
送張明府赴京師

夫子當朝彥高文早見推  
徒勞綰銅墨况復值艱危  
拙宦安時論冲懷取路遲  
賈生多偃蹇真伯總流離  
野雉空吳甸仙鳧向朔垂  
衰年慚遇賞指日嘆睽携  
有地皆遮轍何人不去思  
山濤留藻鏡未必久瑕疵

贈鄔駙馬還京師

公才應世出帝室降天姬  
茅土分封厚山河



異姓親恩深長次骨詞直每批鱗共歎沉淪久  
遙知拔擢新近臣今第一簪笏侍丹宸

送顧苻卿奉使冊封晉王還朝

上卿銜命日祖席動羣公世德滋霖雨君先少傳文唐

公在京師時有霖雨堂時人仰舊風奉詞傳寶冊分錫擬

彤弓魯衛翰屏固河山帶礪同路從三晉遠恩

向二藩通九族應知睦封章奏紫宮

送王別駕遷工部員外郎

佐理頻輸榮仁風徧海陬閭閻三郡遠凋瘵一

時瘵按縣何辭劇疏奸必去尤清心能用簡至

治欲還休列辟推龔遂中朝仰鄧攸忽承新命

迴方此用賢秋是日爭遮轍由來惜去翰關河

當建節驛路引鳴騶合沓雲初起參差樹復稠

離旌不可望含思竟何抽

秋日園居二首

平生多所乏寂絕反為宜起看遠雲度坐隨浮

景移園同漢陰老竹等渭陽師湘浦獨醒日清

漳抱疾時秋來摠搖落無感亦成悲



冥冥秋氣寂園柳望中稀容色隨年換天心感  
物微夢淡形役苦觀靜俗塵違是日非知命何  
年乃息機古來持此者空老北山薇

題周氏園亭

華館遺塵境熾庭隱跡深竒峰夏雲起古樹曉  
烟沉曙景通虛幌春叢轉候禽高蹤資僻遠勝  
地狎招尋小徑飛梁接文窓暗竹侵焚香汎蘭  
氣蔽月下梧陰文几浮鴛錦踈簾障碧潯遙情  
屬芳杜清賞隔華簪載筆慚詞客何由振雅音

葉伯宣新亭

古樹芳園匝幽亭梵宇傍穿池潛引竇開徑屢  
鋤荒赤鯉依濃藻丹雘鏤篆巨房竹踈雲色淨風  
細鳥聲長意愜嫌遲往淹留到夕陽

同曹進士遊虎丘山

近郭騫孤嶂迴巒隱化城空壇行易響磐石削  
難成岨坼交林合雲消洞塔晴碧池沉鱗彩銀  
海發金精語法天花落鳴鐘夜梵清連林看竹  
至幽葉見茶生曲檻憑丹壑遙岑竦翠屏松門



華月吐苔逢古烟平致有西山爽能深入谷情  
曰君繼幽贊往往欲逃名

王明佐游天池山次韻一首

鷲嶺鬱孺森迢迢遠碧林枕中探秘記老子枕中記華

山在吳西界可以度難山頂有方池又名天池池中生千葉蓮花相傳服之羽化方外

契幽襟荒楚叅天色悲松學梵音絕巖無過鹿

芳樹有未禽夏葉千花碎春池八水深繡幡搖

佛影石壁定禪心惠氣憑初地空香散濁陰無

因證三疊揮手弄瑤琴

孔子廟杏壇

緇林遺至化文杏繞壇開嫩葉宜遲景新花間

早梅近烟初結霧積雨半含苔香逐聞歌鼓陰

隨聽講來逢時應有數得地不因培長此尊儒

教懸知出眾材

夾綉屏風

趙蕞金陵人多伎巧能以刺帟刺成花竹禽

鳥之狀隨輕濃暈色鎔脂塗染用吳興輕綉

雙縑夾之稍令映日則光明瑩徹芬菲翔舞



恍在輕烟之中與真者莫辨王元美兄弟並  
賦詩讚歎遂有此作

高館宜珎賞綉屏拂翠烟映空雙鳥度照影百  
花然幕麗金鑪氣依微玉戶天踈光澄宿靄豔  
色駐韶年隱見連珠綴玲瓏間綺錢嫩枝鎔蠟  
淺密毳點刀偏雲母虫蝨鏤薄蛟冰鬼刻妍中郎  
慚繕理作賦使人傳

吳山人病瘵

春山路不極更爾夢中賒忽就丹砂鼎迴看玉

洞花悟淡同化蝶痊損失沉蛇合喜瘵龍舛俄  
聞起趙嘉時日問真訣幾度拂烟霞

贈常熟顧太醫

別有仙人宅烟霞紫翠房八齋分帝藥六局和  
神方玉釜長生乳金鑪不死香山中兼種杏世  
上比長棗訪道聊騎竹行天即化羊千齡白雲  
上還戲綵衣芳

送顧副使子韶赴辰沅

千里分符出三年治理成紗聲方上簡長榮遂



差營大府高牙建翹車撰日征霜寒巫峽遠木  
落楚江清劍客還趨幕書生或請纓定知能扼  
虎相以挫奔鯨訪古應憐賈哀時即吊平林芳  
多蕙氣谷響是猿聲蠻峒長虛警和門欲寢兵  
歸耕無雜種慕德有遺儂暇豫宜延眺懷柔在  
結誠何時報 天子殊績奏承明

送粟別駕遷陝西副使

佐郡求民瘼掄才擅國損人歸合浦化時有賴  
川許久著甘棠美新加大府名思餘仙史渥詔  
遣睿詞榮欲識韜鈴秋先推禮樂英山川通漢  
壁關路遠秦京詞翰長揚賦軍麾細柳營愛遺  
循吏往官重簡兵行膏雨隨車至鮮雲擁旆迎  
佇聞銷劍鏑黑水灌春耕

送歸開甫之信都

開甫以經術理長興屬余寫卓茂傳揭之廳  
壁其治多準古道而不合於今之人故訕者  
森若交戟三年稍得判馬政於信都殆所謂  
榮騏驎而服鹽車也賦此言別兼以申其屈



云

百里長城縣山迴萬壑紆陽坡眠敵棘陰洞產  
於菟紫笋披雲摘青蘭帶草鋤土風饒險勁案  
牘少歡愉卓茂存心古鍾離與衆殊名高翻忤  
俗道大不因愚此日騰文戟何人悔失珠九方  
沉藻鏡萬匹混駒駘自是龍為友無煩罵化鳧  
周王求八駿非爾欲誰須

送董侍御還上都二十韻

代

自古安瀾久王風每易澆頻年遭戰伐萬姓日

蕭條即有侵漁蠹時緣漏網饒沒身投巨室詭  
籍避常徭國稅嗟何補城狐勢轉驕天心思剪  
惡 聖主獨當朝簡命初無匹公才已足超左  
雄簪筆竦公雅使車翹霜簡題青素冰心貫赤  
霄豺狼當路屏山岳一時搖烈烈持繩色稜稜  
指直標竒驄千里駭豪隼九秋遙道峻威懷適  
人和法令調瑕疵期盡洗姦宄會俱銷事業堪  
遺範謳吟滿去軺省躬同涸轍濡沫過流潮揚  
憚終淪躓虞翻竟寐窠高塞慚鸞鷲易足戀鶴



鶴訓德虛冥報論心敢後凋自傷衰老質輾轉  
奏長謠

贈梁石仲二十韻

炳蔚東南美紛綸五十年同時多省閣高足久  
迤邐學術梁丘賀寸華王仲宣考詞恒怫悅投  
翰每聯翩秘愜玄中趣真承法外傳興來翻七  
澤思逸動三川華組嬉遊盛諸生揖讓先義翰  
然諾穩心向友朋偏劇論宜樽俎清謳敵管絃  
花繁金谷妓雪淨剡谿船選膝移歌席邀歡狎

舞筵風期良有裕灑落竟忘筌有志唯須逞無  
營任自然長驅看老驥驤首向秋天顧我非傳  
匹于今獨棄捐塵形資物累孤伎復誰憐永協  
丘中賞多慚海內賢乾坤乘浩蕩日月共推遷  
夙忝招要德能將契分全願言叨奉引聊欲偶  
羣仙

送范太守擢雲南兵備副使四十韻

佐時惟俊傑應運出忠賢妙動天人畧名将霄  
漢騫初臨白雲署旋拜紫泥箋分命司南服征



麾自朔燕舉時稱伯起列郡議任延地是延陵  
舊風仍太伯遷山河侷武德星紀分郊鄠俗印  
清淳理人逢訟獄平潁川威鳳下合浦去珠還  
召父恩彌重文翁政益虔 聖情方恤遠廟美  
在論邊重以韜鈴寄恭憑節制宣一身思恐後  
萬里氣無前旌旆連平陸驟駢遠巨川共遮戾  
霸轍莫挽鄧攸船稍出三吳地將窮百越天裂  
縑津吏送飛檄島夷傳觸霧聯塵入梯雲絕磴  
懸路刊龍額道微入象耕田通歲經寒少殊方

得氣偏澗芳千品雜春色四時全卉服逢花纒  
山饒奉鬪羶首渠烏黷種部落白蠻孺舞按狼  
歌陋書諳緬字便臨戎惟此日開國自何年漢  
將曾誅粵秦兵久畧滇懷攜恒在德戡亂必韜  
鉞公望朝端迴英謀閩外專共期元輔切思睹  
秉旄旋仰德看前輩如公少並肩恢孺頻解榻  
招隱尚餘篇涸轍知無援窮途每見憐登龍值  
元禮相馬得方歎竊忝吹噓力俄增羽翼鮮竭  
來甘病廢翻欲謝連翩遠屋從蒿沒長肌任屨



穿浮沉真委運寵辱已忘緣曳尾莊生道灰心  
釋氏禪平生感知已今日愧空詮獨有勞歌意  
蒼茫向暝烟

送王大參赴陝西三十韻

公太原陽曲人  
名道行為郡守

時年二  
十有九

公初為吳郡太守德化穰弘有渤海淮陽之  
理遷湖廣按察副使充常鎮二郡兵備尋兼  
管蘇淞開府太倉公簡練精嚴吏士祇肅和  
門寢析夷徼恬熙踰年以功擢拜陝西布政

司叅政撰日北轅徽音浸遠允文課蒙獎掖  
切倍馳戀矧復多病無能隨送輩均耶叟謹  
作排律詩三十韻用申去後之恩云

古晉標雄鎮扶輿鬱帝京山川呈氣色日月動  
光精天與珪璋彥神資禮樂英雲霄寧易致鷗  
鷺自橫行渤海聲逾迴淮陽政屢成漢庭方厚  
歟何武不為名自昔諸侯貴于今一水清周陸  
防卒史淳理渙懷綱邪叟甘扶送龍丘願輟耕  
素心唯偃蹇公望實崢嶸重以朝端議仍加聞



外榮雖雖輸上榮隱隱作長城夜壁閒朱戟秋  
庭駐綵旌令寬能罷警冠弭欲銷兵新命俄雲  
墜高車指日征離筵當夏首飛旆入秦并地古  
多前趾天寒有戰聲三條開廣路方軌列高閭  
宮瓦仍餘賞池臺已就平塞雲凝棟肅關月鑑  
惟明懸想謀謨暇尤宜耽聽情大才無不適孤  
憤竟誰鳴困頓憐馮諼病甚長卿經寒思墮  
戶盪火閉門衡豈計瘵無日後知愧此生叨逢  
頻倒屣過與或遺鎬學淺慚窺豹知深美食萍  
暖風抽宿枿膏雨發新萌酬德將何地懷賢每  
若醒長謠著心曲臨水復正營

嘉靖辛酉夏苦雨三十韻

霖雨多神變無時敢自寧皇天高慘慘積氣下  
冥冥急瀉俄懸瀑狂傾甚建瓶陽精疑避道水  
恠忽騰形揆漢驚遊電憑虛激壯霆二龍嬉鄭  
洧一足舞齊庭浸灌踰三板沉絲過九齡桔槔  
相汨沒捷竹半伶僇衾枕潺湲入階墀蚌蛤腥  
遠遊妨跬步平吟任飛舲萬頃荒涼白千村點



綴青荷鋤填罅漏摘杖引泓渟漠漠浮汀鷺飄  
飄亂渚螢灰心傍田作活計守津網水府遭重  
圻虹梁掩七星腐攘同泛梗崩岬雜流萍白馬  
虛沉鬣蒼鷹畏濕翎繁雲時自起漲水未全停  
澹瀕淪孤魄昏陰淡四溟催租猶濫楚卜禁每  
愆筵捐瘠爭謀食懷飢競觸刑蹠財應有法歸  
糴豈無經疫癘延比屋推埋偏近坳泥塗難振  
拔耳目失精靈流俗知皆困長負厥獨醒扣門  
言已拙非雪戶仍扁矢志淹遲暮哀時歎鶴鴒

正兄偕南嘗上水利及採荒  
書今太守太原王公甚嘉之誰人脩禹績何日  
損堯釧頃刻思軋土悽惶望濁涇此生那免哭  
殘涕欲飄零

烹蟹次周太僕四十韻

寂寞成都宅淒涼漳水濱祇應堪委陋况乃值  
蕭辰霜重踈紅果風輕獵翠蘋人情相窘踈世  
路隔通津疲駟知皆騁潛虬敢自信閑籠羞澤  
雉涸轍類波臣歲月凋吾志泥塗悴此身如何  
懷國寶六復邁時也恬愜安浮議淹留即課畝



傳巖調魚叟渭渚釣璜人落落辭絳組依依狎  
隱淪長篇俄爾出高價響然臻險韻驚孤竦清  
心聽百巡報章稽累日卧疾動彌旬未盡鈿頻  
折天寒骨每岫稍披疑有託細和怯無隣韓澆  
丹青逼周官冀簞陳旁行看總總郭索笈續續  
已歷何曾疏休矜宿氏輪形容難得體物色諒  
虛親聊取持杯樂寧妨用意仁萬錢徒自侈一  
味詎為貧酷嗜甘成癖訛烹悔失真雙螯能用  
武拾穗必輸神自昔嘗遺貢于今或筭緡豈惟

欺海錯曾是重蠻珍酒氣元相入橙香各自均  
芙蓉開白雪琥珀泛青春足款淮南客堪留鄭  
驛賓但言供酌酌直欲離風塵謀國猶思越痊  
疾尚憶秦無論陶侃鮒昌數季鷹尊壺老羨還  
薄中郎醴未醇貯盃丹炯炯在藻碧粼粼腥沫  
駢珠碎寒蒲綴甲勻會須填巨壑將以奉高茵  
顧哂雕虫劣何酬大雅淳遣言多鹵莽抽思日  
酸辛子建才難盡陳琳氣欲泯未能燒筆硯空  
愧揆麒麟



命仙齋先生集卷之十九  
聞海賊自嘉定至太倉南門焚掠殆盡數  
日兵不得進復留屯上海諸道更不發兵  
因賦此作

戍烟樓上合宵柝雨中間雜虜頻侵境元戎久  
駐軍猖狂還結陣殺掠動成羣百里連秦火千  
家哭楚雲水容含苦霧城氣落妖氛浩蕩風塵  
迴倉皇骨肉分時危寧有託天幸豈無勳日清  
寰海膚功啓大君

萬姓誅求苦羣凶索戰豪歌斜捎快鶻躡捷透  
輕篠釘竹纏飛鏃吹刀落斷毛伏竒依灌莽出  
沒混波濤募勇黃金賤徵兵赤羽勞經途稀逆  
旅孤戍絕單醪麟闔靈烏蝕星占太白高正月  
元日  
日食四月十五日太白晝見  
是歲嘉靖三十二年也  
艱虞嗟未已投筆  
媿龍韜

玉蘭花

名園徵勝賞異卉絕幽經冷豔辭雕飾清華出  
杳冥三珠開秀色九畹動芳馨細棘叢心紫輕  
苞合蒂青江妃瑤珮失漢女翠梭停接月通殘



霽舍烟耿曙星分花飄雜樹懸影度空庭詎使  
湘纍擷離憂賦獨醒

詠芝草

仙人十萬戶不食紫霞漿並種芝如草兼今夜  
有光玉梁初孕秀金鳥已翱翔竒象成宮闕靈  
真吐鳳凰與君發玄要天壽可齊將

鸚鵡

靈鳥名鸚鵡崎嶇自絕垠嬉游寧妄集羅網乍  
相親惠性雖難辨竒標信可珍丹砂啣更好嵐

翠拂還新永狎蘭房豔俄飄綺袖塵間闕長  
匹言語每依人摧翮籠中老驚心海外春故鄉  
徒有恨芳樹已無回荏苒羈孤侶淒涼放逐臣  
更憐禰處士感激賦娛賓

早梅

蕪艾衆芳後孤花照雪初香從風處遠影向月  
中踈橫笛驚吹落高樓學剪餘聊裁廣平賦不  
著屈原書幽澗竟誰賞端居恒晏如

送太倉孫侯還本郡別駕



海上頻經亂秋青見廢墟九年無積粟萬姓總  
為魚循吏應時出賢侯是日除刑輕虛案牘政  
簡息侵漁野有新通洫園無自種蔬劍銷鉏鑄  
地卑歇羽毛書化洽烹鮮美恩加展驥初陳蕃  
還拜職周景即題輿別路宣追餞離杯想抹拈  
去思方心劇與古定何如

周鎮平將軍旌孝詩十六韻

天啓皇衢闢神資帝緒新應期標秀格晬日表  
殊珍禮樂河間重文章子建淳白華堪以潔綠  
服藹娛親大孝為名久羣公入奏頻虛懷常有  
讓盛德自無鄰聖渥霑濡遠宸章日月均九天  
矜錫類四海會歸仁宿昔叨弘禮渣滓愧沃醇  
山雲開綺閣松月照華茵濟濟清儀茂依依晏  
語真間闕垂晚節浩蕩隔通津急景嗟難駐驚  
波或易淪投壘竟何報挂劍已無回嗣業看鴻  
胤緘書到遂臣願陪良史筆貽則在千春

寄吳中書

窮巷遊偏肥無心自漢機梧桐聊借蔭薜荔待



成帷若氣時參霄雲陰近濕衣露滋花並吐日  
落鳥分歸賦就無時賣書成換着稀唯君能好  
我言別自依依

奉陪大中丞西蜀張公宴王觀察元美西

園二首

上客耀金章飛旗並海壘  
輦紆塵外軫聊肅座  
中霜樓榭烟霄外歌鍾水竹傍  
闢花鋪錦席映  
月遞瓊滌峰奪蓮華秀  
徑繙貝葉香蕭然足真  
賞灑筆頌時康

佐代推英傑山川間氣開  
吳都千騎出蜀國四  
賢來訪德尊者舊搜竒  
編草萊韜鈴輕起牧詞  
賦狎鄒枚思逸天標外  
風踈谷口延獨慚坏遁  
者偃蹇課追陪

端午日奉陪張中丞宴王觀察元美西園

名園依淨域勝賞集佳辰  
丹粟浮杯細青菰解  
糗新珎圖披曲几古意謝時人  
已狎難馴性仍  
憐易病身孔障徒草檄  
二豎自為鄰未得娛終  
宴空懷別後塵



送王觀察元美之武昌

宇宙登新主公卿仗老臣此時方側席寧復滯  
斯人果得超賢佐堪投報主身有司勤勸答何  
日動征輪庭鵲迎人喜園花映綬新時來非用  
意才大若通神逸氣滄凡格虛懷見本真文章  
皆通古政事每依仁藉矣聲華盛悠然德業臻  
安危真足倚泉石且虛親稍挂陟蕃榻聊停鄭  
驛賓共知安在起自覺啓期貧會面從稀闊居  
情易苦辛青冥看勁翅涸轍歎窮鱗忘刺天心  
慄艱寔晚節屯蒼茫何所向回首傷松筠

詠仙女

天外白雲鄉仙槩出異妝烟中飛翠輦霧裡度  
金梁靈竇流瓊液神泉化玉液行厨玄鹿脯分  
餉紫芝梁王母乘羣玉方平過括蒼千年知豔  
注玄跡自難忘

送顧子韶觀察之嶺表

萬里睎荆地千秋銅柱荒明王初御宇至理切  
殊方重以鷓鴣宣簡約章德流推髻種威



霧在衣鄉義

近時不忽戢歲大川消毒

霧攢樹失尖光氣候花相續巖巒路獨長峒禽

輸翡翠市粉出枕椰野淨簞管綠洲香橋柚黃

南中今已樂抗手一稱鷓

送葛運使之杭州

聲教浹方隅昆明豈外區一心能許國萬里即  
投軀不覺三年別連分五郡符風猷從此著跋  
跋未為劬復得監鹽筭還看行國儲莫將嫌宦  
拙才大任時須

仲蔚先生集卷之八

吳郡俞允文著

五言絕句

柳塘

高柳映春渠浮烟引輕素香杳人羣遠落日下

荒渡

隴江

雙松出岵巔浮陰映清泚待渡竟何人日暮成  
徒倚



雪

晴開數峰雪愁陰尚平野  
窸窸天壤間誰為掩扉者

松

結根大壑陰蒼然出塵表  
經年抱霜雪偃蹇日月光

竹

曲池自清浹瀟灑落空翠  
竟夕不聞人居然有靈對

朝日

朝日映川素積霧山影黑  
鸕鷀飛鏡中芙蓉照谿北

月出

月出霧露滋溟溟如朝靄  
僧鐘隨空香時復近寒韻

水仙

繁英簇寒瓊勁葉剪深翠  
獨夜秋風來竒芬龍子佩



龍磯

神龍潛溪澗往往不見已  
伏鱗日在眼寧無陵陽子

臨江館

瀾瀾清江流迴環幾千里  
時看遠雲渡日夕成徙倚

仙臺

高臺何嵯峨朝朝出雲烟  
仙人去已久遺蹟空茫然

古閣

飛閣何崢嶸迥出丹霞上  
禹蹟竟何如臨流獨惆悵

蘭蕙畹

幽然讀書處階前多楚芳  
春雨時開花芳氣長滿堂

松篁徑

蕭蕭脩竹枝落落長松陰  
地偏無氛雜惟有幽人心



麒麟山

門前麒麟山蒼然插天表時有白雲來下拂羣  
木杪

鴻溝

淼淼江上洲落日映空曲遙看遠鴻度下伴漁  
舟宿

茶焙

西山三月時籠焙千萬家家起茶烟山山冒  
青霞

鴛鴦

鴛鴦不獨宿雙棲紫蘭叢詎知幽閨內繡被含  
香風

庭中橘樹

庭中有嘉樹垂垂耀黃金一朝霜華落復作丹  
砂沐

嵐霏

嵐霏不成霧地靜人亦閒銀雲拖翠嶺玉溜出  
清灣



松筠徑

高松蔭綠苔擅藥映脩榦清風颯然至色與烟霞亂

蘭蕙階

春雨蘭蕙滋芬芳滿前軒采之紉雜珮不在湘與沅

仙臺

縹緲古仙子遺跡徧荒臺舍烟復含雨空有枕花開

鴻渚

木落秋雲高月寒洲渚空時見清淺流唯有歸飛鴻

楚嶠

淼淼江漢流日夜浮楚嶠連天遠岬嶽雲水相照耀

戲傲純陽

獨宦下江秋荷卷白於雪天風吹蘭臯波光蕩明月



浮雲捲碧落長嘯  
清冷萬里芙蓉洲  
明河亂  
秋影

擬古

迢迢明河漢  
青天淨如掃  
薄暮竟何言  
流螢度  
萋草

送謝教授致仕歸襄陽

落日盪歸帆  
春風漢陽渡  
久作江南人  
忘却襄陽路

欲上臥龍山  
長懷入荆楚  
久不到衡陽  
已作吳

人語

紫薇

千葉復萬葉  
初疑安石榴  
分房出韶艷  
循翫及  
清秋

桂

葉葉黃金花  
時向月中落  
聊將雜佩贈  
詎此芳  
杜若

水芙蓉

八月清光上  
穠芳照水中  
汗泥曾不染  
難雜水



芙蓉

淡竹

似竹還非竹  
綠堤被淺涯  
天然生異色  
石黛點青花

柰卷

宿雨初收際  
清陽乍吐時  
口脂猶自濕  
欲語恐人知

雜詠

六月堪獨往  
欲使暑氣消  
陰陰竹林下  
灑筆寄

清謠

遙觀山中雲  
吐吞無已時  
人家住山下  
不知知不知

松古枝亦少  
一枝一枝勁  
棲鶴無低昂  
乃可見本性

松老變奇色  
幹青枝復青  
一拂綠綺絃  
彌覺風泠泠

山迴橋復出  
水斷路還通  
扁舟竟何取  
垂竿釣谿中



命个原先生集  
平湖葭莩中濯足仍曬經甦知賣魚還酒酣志  
意廣

春鳩平田上靜寂無鳴聲不知天時意思而復  
思晴

陰陰叢竹根長如清露時積氣不能散生蘭復  
生芝

山深晴亦陰况復積雪時開窓茅簷下似不  
敲  
凄其

古樹無一葉寒鴉夜夜棲勁枝長欲礙鷲起復  
高飛

蕭蕭五柳樹盡日無人行時逢獨往者惟有醉  
先生

谿光含樹淺雨氣冒山深四野暝色來歸人何  
處尋

山暝雨來急橋低水漲初谿頭有漁父下網待  
鱸魚

落落長松下青青不計年携琴且未拂三峽聽  
流泉



寂寂谿山曲蕭蕭樹木踈白袍垂釣者志豈在  
求魚

野竹不擇地參差生石根斜枝與亂葉青翠自  
飛翻

叢叢綠葉裡積雪不凝寒欲知妖豔色互向月  
中看

苔華若丹砂蒼實同一時奚獨松與柏不為歲  
寒移

仲蔚先生集卷之九

吳郡俞允文著

七言絕句

塞上曲十首

雲黃沙白是胡天生不逢時恨在邊老將從來  
多困絕嫖姚高冢像祈連

葱關雪淨月蕭蕭大將功成玉帳高天馬不愁  
西極遠上林新種紫蒲萄

風高塞虜入龍堆大羽凋弓象月開一片黃雲



秋磧裏遙看精騎射雕來

萬羣哀雁北來稀  
宛馬初調塞草腓  
無數金茄吹滿月  
單于分隊獵霜歸

大漠荒秋日暮天  
黃河西北望成烟  
羗胡轉戰無時歇  
漢將旌旗日夜懸

征人萬古沒胡中  
百戰難收一戰功  
隴上長愁雲不斷  
何年重向玉關東

將軍赴利能深入  
直度月氏斬折蘭  
破虜功多日親貴  
降胡十萬到長安

金鞍玉勒控龍媒  
泮水芙蓉對日開  
兵氣盡成烟霧起  
夜淚新破右賢來

張騫窮使到河源  
廣利留屯望玉門  
不惜連年誅大宛  
當時汗血勝烏孫

度幕橫行千里餘  
環營盡用武剛車  
日暮風昏沙磧起  
連翩分翼遠單于

宮詞六首

海日初通內苑花  
分林香氣撲紅霞  
層層七寶雕闌裏  
猶有輕烟向外遮



曉烟籠樹露垂窠不是凝妝態更多半咽香風  
含笑語叢叢春色醉湘娥

太液池頭雨半收綵雲樓閣禁中秋傳將漢女  
能分巧細縷斜穿透玉鈎

雪晴鳩鵲尚澌澌天子金輿出每遲新粉未乾  
朝較早坐熏龍腦膩紅泥

一承恩澤入蓬萊別賜輕繡稱體裁剪得辟邪  
新繭子玆房宮女闥看來

鳳城門外踏歌聲院院燒燈綵旖旎宣與內家  
分夜直每從花裡聽交更

贈法貞上人

高僧不出住花宮百毳袈裟手自縫遙想千巖  
秋色裏六時放梵下虛空

寒食

小閣啼鶯春漠漠青霞欲曙柳娟娟梨花細雨  
嘗新酒寒食家家起暮烟

有感

漢武求仙事最近自然山澤盡清臞蓬萊不信



無人到紫殿清齋學步虛

無題

青衿白臂紫綃裳翡翠斜分十二行最愛隔花  
人不見玉盃閒自浴鴛鴦

搗衣二首

月榭朦朧夜色微清砧不斷曉雅啼十年少婦  
閨中力誰寄遠陽萬里衣

重關月色早涼分夜夜砧聲逐塞雲淚盡天南  
與天北胡笳同是月中聞

泉

能將映地復飛空冷色遙清石上松千載已無  
人洗耳祇應流入亂山中

園居

蕭蕭無伴獨為家靜裏經春任物華綠樹千重  
啼百舌香風吹盡紫藤花

送吳處士

春來愁雨復愁寒此夕憐君各盡懽明日舟行  
三十里城中山色隔城看



夏日園居

經年香氣發雲霞長日清齋煉玉華一徑已從  
烟草綠滿林肥雨橋初花

鶯

暖日青垂弱柳絲蓬萊天仗出花遲皇州二月  
春如海百轉空聞陌上枝

雞

月落空營舊壘低寒風獵獵大荒西驚魂易斷  
江南夢惱殺重城未曉啼

雁

江上芙蓉錦作堆蘆荅如雪一時開可憐月下  
差參影萬里相呼入塞來

雜詩八首

高天無雲紅葉晴長松倒映萬壑清地偏盡日  
無人到獨往谿頭待月生

菘蒲水淡菱角肥朝朝採菱多暮歸歸時一片  
春洲綠寂寂洲長人語稀

稀微遠樹抹春烟水上清峰落日邊風急晚來



歸客少渡頭長泊下江舡  
蒼山高頂出雲晴瀑水杉松帶雨聲谿路入烟  
猿鳥亂不知何處有人行  
遠樹高低不斷林半山落日半山陰白雲杳杳  
向空盡一入松谿霧已淡  
千山暮雪暗平沙長空片片飛梨花渡頭無人  
雪更厚扁舟不到戴逵家  
草樹陰陰谿閣清獨開一迳蔣生行千年積石  
唯蒼翠何處流泉漱玉鳴

五月谿涼草閣淡遠山重疊畫陰陰柳條拂岬  
綠如雨無數菰蒲長碧潯

送休寧汪禹東之武林

聞君已得青霞秘此去尋山不到家試問長生  
如可學為從勾漏覓丹砂

牡丹

花時傾國亦傾城不在貧家冷地生別出一枝  
閒淡色更於何處惹多情

荷花



荷花蕩漾晚風涼  
半面嬌紅水上妝  
零落漢皋游女伴  
只今留得裏衣香

黃葵

中庭秋色晚芳遲  
帶露嬌黃一兩枝  
朝日影中含冷焰  
悄無人處欲開時

雞冠

頭垂赤玉碎丹砂  
別是秋容一種花  
若比鬪雞冠上色  
千金不到賈昌家

瑞香

綠樹婆娑出不長  
蟠枝葉裡吐芬芳  
空階清露日未上  
揀得一枝分曉妝

山茶

山茶多種山人家  
此地寒多少着花  
聞道南中饒暖處  
千花萬蕊簇丹砂

芙蓉

秋來江上水連空  
蕩漾輕舟不耐風  
我欲涉江若箇伴  
為頭憔悴採芙蓉

玉樓春



嫩白輕紅染露華層層香瓣簇金芽美人偷比  
妝前色不是西湖寺裡花

葉伯寅中歲生子以王明佐所作蘭玉圖  
見示因大快寫喬松芝草并詩奉賀

徂徠真骨老龍精葉葉長含雨露榮香髓千年  
龍甲紫變成芝草着根生

題画

古樹幽篁滿綠苔遠山一半夕陽開眼前有景  
無人會恨不披雲此地來

漁景

漠漠秋江烟雨空一竿垂釣水雲中魚錢入手  
從渠醉不繫虛舟趁晚風

寒食得春字

荒原無路少行人一片黃茅野火新獨有棠梨  
孤塚上年年寒食哭殘春

奉酬徐使君子與以詩相邀撰汝寧志兼  
遊嵩山四首

病裏頻驚歲月除紛紛暮雪暗空廬平明忽得



梁園信邀我西遊強著書  
十年痛首臥柴荆自嘆踈慵送此生誰謂江淹  
才未盡白頭猶竊著書名  
與君一別製千秋終日思君汝水頭溪媿遠勞  
分祿至詎須連謁五諸侯  
落花啼鳥共衰顏欲乞長生煉九還抖擻為辭  
須里去與君騎鹿到嵩山

題画

天開萬疊翠芙蓉石上流泉韻晚鐘坐久不知

空翠落丹霞裳上寫烟容

山翠濛濛隔市喧巖高惟有白雲屯知君隱處  
無多事落日平原見遠村

春思

庭前風掃落花多日日春風怨綺羅百舌亂啼  
聽不得機中小婦欲停梭

江上孤亭落日間白雲縹緲水潺潺芙蓉折得  
無人寄遙寄愁心萬疊山

綠楊影裏日光遲枝上黃鸝欲轉時羞逐使君



歌舞處自拓新句寫烏絲

沉沉深院別為家盡日鴛鴦漾綠紗  
獨自有情人不見沿階開編蜀葵花

瞳矐曉日照芙蓉半出屏間意轉濃  
聽得琴心無一事春風幾日到臨邛

落落長松仙事深梅花如雪滿空林  
壺中自有成丹火局上應無賭勝心

羣山萬壑樹縈迴一雨初收滿綠苔  
草閣畫長無事坐黏頭野鹿近人來

綠烟縹緲樹朦朧一道飛泉挂碧峰  
直到黏頭通曲檻靜看容與夕陽中

寂寂山中意若何山中惟有白雲多  
雲多采藥無人伴野鹿相隨過澗河

### 宮詞

春宮二月每當家逐日閒階望翠華  
行過海棠開盡處一叢晴雪暗梨花

### 有懷金陵

禁樹經霜一半紅蓬萊宮闈在虛空  
長干月色



長如畫十里笙歌香藹中

湘妃

不共當年漢女游羅衣翠薄不勝秋蕭蕭野竹  
湘潭上獨自含悽雲水頭

清泉寺川上人

泠泠金榮破黃塵萬里還投乞食身苦海西頭  
應有岬不知何處渡迷津

上人自歛而來孟中貯墨徧施擅越乃開

募疏

水晶盃裏碧松煤白業翻將黑業來自是蓮卷  
生火宅海中珠藏一時開

川上人西還附酬王仲房

龍山飛雪滿蓬廬多病年來懶寄書一片閑雲  
行脚底為余直到輞川居

贈川上人

閒雲寂寂鎖龍宮萬頃春湖洗碧空惟有白猿  
聽講後向人長嘯月明中

有懷元美兄弟



春花落盡又芙蓉不得瑯琊錦字書目極天涯  
心更折朝來白髮不堪梳  
菊門秋色使人哀萬里浮雲暗不開幽興只應  
愁裏盡南臺猶喜薦書來

晏坐

空林六月每朝飢偏喜涼風着夜吹晏坐不知  
新月上為看茉莉欲開時

画白鷹

蕭蕭氣敵萬人軍画作奇毛白錦文  
樹叢中

凝積雪黃沙壑上度孤雲

題画

淡院曛曛掩曙霞暖風吹軟繡柵紗停針細語  
無人聽開徧階前夜合花

宿鸞脰湖

天邊歟灩碧山流萬頃平湖画玉鈎今夜愁心  
落何處烟空一葉坐扁舟

雜咏

何用迤形與避名靜來淡得古人情谷口不聞



丹詔辟山腰長見白雲橫

聽歌

殷勤低唱解鬆鬟一片春心不耐閒老去只應  
尋樂事暫將白髮惱朱顏

題白頭鳥

朱闌斜轉晝沉沉新葉初齊復綠陰  
敕罷鏡前還自照忽驚花底白頭吟

題文待詔玄墓四遊小幅

春光著處使人迷柳暗花繁雲水低  
一路沿洄

光福寺太湖還在石橋西

山尖欲出沉青靄松頂長含雨氣新  
茅閣半開安穩坐恰將好景待幽人

山重重處樹重重一道飛泉掛碧松  
松徑寂寥堪獨往白雲不起起孤峰

千年荒殿滿青苔盡日無風湖上開  
更是空林春色晚誰人為掃落花來

雜詠

疊嶂連巒復溪復溪青嵐白霧晝陰陰  
陰空亭寂寞



疎林下足有幽人會此心  
九月涼風百草腓閭閻兒女盡啼飢如何野糝  
垂簷實養得長須鬼子肥  
谿水幽迴隱路長鮮雲芳草自生香春來釀酒  
千朝醉午餉長炊百日黃

秋江晚照圖

澹澹澄江杜若秋青山半斷白雲流初看遠樹  
通殘照已見長天挂玉鉤

白鸚鵡

蓂蓂戴膝染鴛黃別產竒毛似雪霜深養雕房  
解人語鏡前啣得著衣香

謝金圖南餉二泉天池茶

獨往陽冰聽松處自汲山中陸羽泉一棹梁谿  
能餉我蓬蒿今日起茶烟



仲蔚先生集卷之十



吳郡俞允文著

序

送王郎中元美還京師序

去年秋王元美以刑部員外郎奉 詔案決廬  
揚鳳淮四郡之獄平寬慎恤號無冤民俄還本  
部郎中七月之吉將還京師乃損書及詩曰是  
行也不可無言予惟元美以先大司馬為之  
祖今中丞為之父中丞公方秉節鉞之任分



天子之憂具是文武芟夷荒夷誠開天心威  
愴日域元美即以寧覲溫靖有儀一時父子忠  
孝光於南諸侯元美妙齡登庸雋譽清劬而天  
與盛才蓄不盡發往往包徐孕劉出其所未嘗  
有雖三言之士當之者若睹睢漁而驟失其采  
游邯鄲而歸增其貌如余之偃蹇淪棄尚奚足  
云而元美乃獨遺去聲耀剪剔視聽與之窮詰  
極難追用陳古之道施之於言以為快然余自  
念偃蹇淪棄于世久矣若復欲推而引之于通  
達之中斯不已過乎况元美纂累世之洪業承  
國家之寵數宜竭心公朝以熙贊休烈然後靡  
容暇豫奏瓊璫之響煥鸞龍之文協之雅頌與  
仲山吉甫之倫俯仰于天子之庭垂之昂彝竹  
帛令千萬世無乏其美不當與偃蹇淪棄之士  
商摧雕蟲也於其行姑以是謝之

送趙庶夫遊武夷序

自越西南行千里始入閩閩之山水最勝聞最  
勝而初得者莫如建安之武夷武夷者蓋山谿



有仙人武夷君墓處漢武帝時用方士言祠武  
夷君其山故云山奧絕崖壁剝削金石無土下  
枕回谿谿有九曲湍流折送行二日所始盡谿  
路至是山益深負勢爭高其遐恠極無蹊徑可  
下上人適閩與自閩而來者無不言武夷之勝  
故有未至而慕之慕之而力不能至既至而弗  
能窮好遊者咸以為恨趙廡夫邃於學而以恬  
引自高又遠託慕於武夷而王參軍君美賢而  
好竒遂要廡夫以畢武夷之遊廡夫喜屬余叙  
其事余謂廡夫于武夷嘗未至而慕之矣今慕  
之而力復能至矣其至也必能振拔穢累揭其  
天標以釋余所謂向者之恨以窮其勝余甚喜  
乎其為言也雖然昔吳均謂富陽至桐廬一百  
許里其山水徃徃使人窺谷忘返閩之山水最  
勝莫如武夷又不知使人何如耳且武夷君後  
世多隱淪異人余又懼廡夫之果有合乎而未  
知其返也叙以送之

送顧舜祥授四川鹽課提舉赴治所詩序



蜀山岵岵攏東大江道徑四塞鑿山而通又聞  
揆阻財容人行行皆仰側與霞闢起其下也若  
從雲墜而不知其所來反視故所繇徑則阮連  
谷迷如復無徑閣道離屬緣深迫高復有不測  
之谿鬱鬱浮浮目不可竟極過者徃徃為愴楚  
蓋古蠶叢魚鳧之國當井絡之次天地之外區也  
願舜祥方授四川鹽課提舉均輸成都嘉定等  
七郡三州之鹽將行或有稱蜀道難者余以為  
不然舜祥端飭而雅厚信而不薄與人敬而臨

事忠自能夷險一致而其先相國文康公又以  
弘度偉望為今天子所倚重者越有年載其子  
孫必不肯斂轡還車以急若事且王逸少言登  
汶嶺峨眉為不朽盛事而每馳心焉何則登培  
塿者起衡霍之心游洎澮者發江湖之思若舜  
祥既受命茲土而又獲此偉觀能無情乎是行  
也於舜祥乎何有舜祥數欲余言余因賦此作  
為舜祥申別若夫脩牢益謹衡石均輸以贍國  
用而流味於四方使民知利之所利而不知有



害溢為嘉祥以熙聲天朝取介位紹前烈者則  
在舜祥而已余不得而贊焉

送狄博士之國子序

昔漢室之盛文帝尊鄉儒學乃因秦舊官置五  
經博士于時言詩則有申培公轅固生韓太傅  
言尚書則有伏生言禮則有高堂生言易則有  
田生言春秋則有胡毋生董仲舒而後世傳業  
者侵盛公卿大夫士吏亦斌斌多學之士其或  
致書匡主位列九卿咸極其道而司馬遷獨著

之列傳以為儒林故博士之職于今日慎其選  
上叅訓胄之重非通洽高行者不得由是任焉  
今狄君端厚醞雅簡質冲夷研討六籍屏居守  
志泊然不屈于世務以易中鄉試補青田學官  
能出其所有教授子弟灌溉深滌者五六年而  
青田今知有狄氏之學名聲大著遷南京國子  
博士君於斯任也可謂克讐其文矣余友國子  
生徐道潛是古而邃于學明先生之道而無所  
牴牾今為狄君門人方與天下之士就灌溉深



滌之下君又當出其所有發眇論於金馬石渠  
之署使天下師心曲學融結陶鑄咸歸之大同  
不亦盛歟于是教化之行繇內及外可以覃及  
重譯天下又孰不知有狄氏之學乎非若一邑  
一川之區區鑽仰而已若徒分行課日使生徒  
趨趨進退於廟廡之間而無所可否則何以率  
勵多士以風四方乎今道潛屬余為序以道君  
之行久矣因書此以并質于君而欲進之于儒  
林也

送周若蒙良醫之任序

汝南周若蒙讀書屬文四十季試於有司率不  
克讐言其旨以為士固因時而建功之路不一不  
肯碌碌復俛首諸生間而以先世嘗受竒方入  
掌上藥遂去充良醫而游襄王之府以發其所  
蓄積朱弘甫文學厚於若蒙相與謀同游之士  
若干人屬余為序以道其行而惜其志之不遂  
也余故為之序曰古者裂土封建諸王為天子  
之藩屏故置吏自師傅下逮僚屬莫不慎擇其



人而漢時諸王多賢尤尊響文雅天下博聞強  
識之士亦莫不趨而歸之其時則有若申公穉  
生入楚賈誼傳長沙鄒陽枚叔游梁董仲舒之  
在膠西大山小山及蘇飛左吳八公之後之容  
淮南凡此數子足稱一時之選而諸王皆敬禮  
之而其國係以輕重名聲無窮焜耀王室今襄  
為名藩而聞王之賢不後於漢之諸王如若蒙  
之文雅其嚴君又以方伯之重碩德偉望有教  
誡之素其往也必克讐其旨而發其所蓄積王  
亦必自忘其帝緒之貴而接道之有禮如數子  
者之在諸王時也非直以藥石針刺灸療而已  
而奚志之不遂也且枚叔嘗以楚太子有疾談  
七散之文以散之言太子之疾可無藥石針刺  
灸療之而宜以博聞強識之士論說要言妙道  
使之變度易意而其疾自去斯其言可謂醫之  
至良者也若蒙從事於斯則聲名之焜耀有日  
得無亟其行乎是為序

侍御史八閩陳公德政圖頌序



御史之職冠法冠衣繡衣在殿陛之上則簪筆  
以奏不法巡行風俗則糾姦別蠹以肅清違湯  
稜威所向靡不豫震古之所謂御史之職如是  
而已今八閩陳公以御史奉使巡行鎮常蘇淞  
四郡獨以為不然以四郡久罹兵戎旱潦頻仍  
加之此時之歎民之凋瘵寄命漏剝不且束以  
陌憲公至之日乃遂決去准繩開張維新之化  
以文德之晦昧也則弘誘以樂育之武功之急  
棄也則簡稽以振厲之黎氓之阻飢也則賑贍

以聚食之夫札之溢至也則醫藥以療治之戎  
士之冗食也則按伍以汰除之骸體之棄野也  
則榘櫛以掩瘞之囹圄之煩苛也則緩罰以宥  
釋之恩澤之不普也則竭忠以剴疏之公之忠  
悃憂勤履道而弗悖煦嫗仁薦秉德而能冲至  
於吏之貪墨有戕於民者則又不廢怕憲下孚  
物聽上格天心由是靈潮翔涌乎糴舟雨雪不  
愆乎常候甘霖降於林樹醴泉出於川谷禎符  
之應穰穰而臻方之公雅避驄之謠文紀埋輪



之奏蔑如也豈非古之所謂大賢歟公既按部  
一年當復奏 天子天子嘉公之賢復詔留公  
拊循誠此方之至幸也茲以十月之吉言歸上  
都士民不勝感德悵慕之私某猥廁諸生謬蒙  
獎掖於公是行其於感悵實信怕品輒敢倩上  
圖公之德禎而系之以頌以為使歸之獻將俾  
媿美徃哲垂之未今尤以見 聖主之得賢臣  
政平而頌興也

送歸開甫赴長興序

古之人其傳於後世者以為非今之人所可及  
皆過論也熙甫明經行古之道其為文以司馬  
遷劉向揚雄班固之後為法其為人恬淡敦實  
淡湛簡素口雖不能發明有造次之才然文敏  
而辨其述叙事理治亂成敗若日星之照焯白  
黑不相混也熙甫雖生於今之世豈可謂不及  
於古之人耶且熙甫非古之道不行非古之詞  
不法天下翹首歌其風聲而乃數不讐於春官  
之試徃歲始舉進士第次又下不得居承明近



侍之列鋪揚謨詰之詞而出為長興吏使之煩  
但於簿書諍訟之間此殆古人之不遇時者也  
人謂熙甫必邑邑不懌而熙甫乃絕無芥蒂以  
為能自專使百姓乂安致中興之功而聲名施  
於後世者唯郡守與長吏也吾安用邑邑為哉  
是知熙甫之賢誠不異於余所云也余與長興  
徐子與善子與仁厚篤雅亦不欲為今世赫赫  
之名而又能知熙甫喜熙甫之蒞其地也數以  
書來言其民俗之所宜他日倡熙甫之化使百  
姓乂安致中興之功而名聲施於世者必子與  
也是長吏與民之賢其道相濟而化實相孚非  
不遇時者矣又今刑部尚書晉江黃公嘗為長  
興百姓蒙其德立祠五峰山中子與屬王青州  
元美撰為遺愛之文余則丹書刻石熙甫之徃  
也其可傳於後世者當不後於黃公余將操筆  
以俟而以告子與

送大中丞觀所周公赴江右治所序

三十有三年春惟茲校夷弗諱弗柔褒其凶頑寇



我東鄙肆掠境內江南數郡之間靡沸而不可  
解列校緣戍屠潰者相望徵兵四出海內騷然  
煩費矣由是天子為之旰食公卿大夫勞於  
校笑時雖日勤致討而阻衆犯威未即殄殪公  
時以御史日膺誕命巡行大江之南監其軍事  
以董不虞夙夜罔懈乃弛乃張建忠弼之謀奮  
鷹揚之烈申弭明誓以速天伐且兵旱相乘俘  
羸狼顧千里之內化為寇墟輒復剴奏大飢上  
啓天衷散其廩積以贍群枵是時民安寇遏

底有茂勛報勞未幾荐有督學之命敦懿博大  
之度弘碩潤粹之學進式多士聿觀厥成迄茲  
十有一載然仍罹大水寇害未夷百姓流離寄  
命漏卮而睿斷精專仍任公鎮撫兼之節制以  
還舊邦以綏衆志公尤殫竭謨猷潛機達變不  
矜不伐示德示威內輯瘡罷外摧狂醜殆於寢  
關罷警而常以居安慮危榮規伏能克嚴備豫  
屬者寇果以歲久弛備復凌風駕舶沿海內伺  
而不知我備既素臨戰之日曾不挫刃而俘斬



略盡所謂隻輪無返者未之過也士女恬嬉行  
旅驩通以為公真柄是文武之道施功德於民  
非一事一日而已咸相與肖公之像而祠之使  
無忘於世世古之方艸潔侮詩人歌之克國薄  
伐揚雄頌之而乏師模之重是公蓋度越二子  
矣今 天子增公之秩移撫江右將撫日以行  
咸復相語曰昔公之來若渴得漿若寒得衣今  
公之去是吾之飢且寒而失漿與衣也如之何  
其弗思余方荷公展顧之隆而公之道又得民  
之深若此其能默默乎遂叙不腆之詞以為公  
西行之獻若其道大化光必當入贊皇敵比跡  
臯夔魏魏中興之績工言者將復秉筆以效旂  
常之畫不敢贅也

濱州別駕金公五子字序

濱州公子大年四十始有子王太史繩武為文  
賀之曰昔商瞿年三十八無子其母欲為更取  
室而孔子使之齋毋為請留孔子曰無憂也瞿  
過四十當有五丈夫子已而果然濱州年過四



十復生四子人亦咸嗟異之以為濱州之克邁  
種德而太史有以發其祥也時太史名其子曰  
允成後濱州自名其四子 曰允殖允文允武  
允揚而命其壻蘄州別駕顧舜祥問字於余余  
辱濱州之知重以別駕之請不敢辭竊惟古者  
名以制義字以尊名亦所以釋名也曰允成者  
生而信能成其宗紹其世德且復協於商瞿之  
徵實天啓其胤而俾之蕃昌也宜字之曰胤甫  
曰允殖者殖者滋殖也物之滋殖於土必有茂

美之華行之滋殖於躬必有茂美之舉宜字之  
曰茂甫曰允文者經天緯地以成其道則謂之  
文文不惟能育其身亦足以昭其憲於世詩曰  
文武吉甫萬邦為憲宜字之曰憲甫曰允武者  
夫武固不可黷而戡亂定國則非武不克詩云  
共武之服以定王國宜字之曰定甫曰允揚者  
書曰明明揚側陋揚爾舉也君子負卓異之才  
雖居側陋之中當必為顯者之所爾舉終不以  
側陋而成遺也宜字之曰爾甫夫字固所以尊



名而釋名之義然德不成者則曷由以曷其胤  
行不殖者則曷由以茂其譽文不賁者則曷由  
以昭其憲武不克者則曷由以定其國才不卓  
者則曷由以副其備是字非徒釋夫名而尊之  
也而亦有規道焉今濱州五子咸穎惠駢秀而  
專於學遊僞造入國子彬彬有聲是必能弘樹  
世業者也余遂以是字之復釋其義以規其成  
以符命名之意而書其說為序云

送邑博厚菴計君遷國子博士之任序

邑博厚菴計君頌表人也頌表去京師萬餘里  
累卜第于春官之試直以跋涉回遠遂屈教茲  
邑君之志以為邑博職在清簡日與羣弟子聚  
而習焉將復益邃其學而弘其詞必有合於春  
官之試而後已也居甫三年君實能以師道自  
任而弟子咸澡身浴德以就其模範而不敢悖  
其師之教由是君之譽寢以聞於諸公間而亟  
有博士之拜時或以為君之志竟不獲伸才之  
大者果不獲盡其用也余獨以為不然昔司馬



遷讀功令及廣勵學官之路而至於興歎今博  
士在太學參訓胄之尊發跡釋疑俾濟濟多士  
率底於學以為邦家之楨所謂太平之原其在  
茲乎且方今國家急於用賢其于世也惟賢之  
是任而未嘗限其資三山溫公其資固不異於  
君也屬以御史為吳郡守再遷而為中丞受

天子之寵命董節制之師以臨塞垣於國家有  
干城之重天下亦皆知有溫中丞是誠以賢而  
不以資也然其事豈遠哉今君有懷偉博大之

姿通敏練達之識而又佐之以經術之醇雅其  
施於政也必能推弘其績自著美譽以贊揚中  
興之化如溫公者如是而君之志豈果不獲伸  
而其才果不盡用於世哉余既知君之賢重聞  
君之拜是職也然後知諸公未嘗以資限君將  
欲大展其才以為君發跡之始地君行必當酬  
諸公之所以望君者而不宜自少也余不敏輒  
叙其言以道君之行而因以為規云

賀太學君魏濬甫五十序



魏恭簡公以其道自振於濂洛之後號為大儒而光祿典簿公為恭簡從弟愷悌仁厚克恢世業雖躬處末僚薰然以長者之譽溢於士大夫之口若古矧向之與伯華兄弟之美豈不相媿乎今光祿之仲子太學君濬甫溫醇易直和粹夷雅交於世也未嘗有詭異之行讀書為文尤能探討奧蹟剌勵不怠而卒不克讐其志乃檢誨厥子並以才雋登造士之選心通而藝專識明而志端知者莫不器異之而又歷聘名士與

之遊居以勤黻礪之事父子彬彬劬其家法為魏氏良子弟信乎盛德之積有不誕昌其後者歟余以是知濬甫矣濬甫與余友善家邑西郭外信義里屬寇亂徙城中時從往來其仲子大用每以文字過余尤數今濬甫年五十而大用與兄大經請余言為其大人壽余生與濬甫同歲後濬甫五月而余跼蹐衡茨裒病荐至有子蓬髮歷齒惛惛不知久生之歡濬甫承世德之舊綏賢子之奉而又能冲退養真食服丹餌雜



蔣琮奔道遙園廬神完而氣適以永保性命之  
期余視濬甫有若遊於方之外者辱其請不報  
自憂大為之喜而有慕焉濬甫豈誠樂乎遂叙  
其意以復二子以賀濬甫

送董山人歸將樂序

徐使君子與為汀州時始識董君於將樂君善  
画往歲因延君長興君嘗為余圖狀圖成傳以  
示人人皆誼然相指笑以為酷似余余固不能  
自識其似與否至觀君所為與人圖狀無不酷

似亦不必盡余之熟識凡一與余邂逅接顏者  
皆能使余卒然識之而知其為某也余尤自笑  
生且七十九年初不自識其狀一旦乃由君識  
之而歎君之善画也且不特其狀之能似往往  
於其談語動止無不寓之點染毫末之微君真  
能出於形骸之外而得其神矣夫神不可見是  
亦以神遇之也時余輒綴言贈君以優孟學孫  
矧教事以發君之神士大夫聞余言者以為必  
有實徵莫不爭相薦援謁君圖狀而饋遺君君



遂久留吳越間而名益著今以其地多警毋氏  
春秋高即決然欲歸而別余山中衆推挽之不  
能得於是其等復請余言以伸睽離之思余既  
愴君之不能留而又嘉君有孝至之行非直挾  
其技津津自喜浮沉而專取資於世者也乃復  
目諸君之請綴言以道其行

送蘄州守滁州石侯入覲序

天子四十有一年春正月元日惟大朝會羣牧  
畢至考其行事殿最黜陟之以教勸沮由是蘄

州守石侯將奏最 天子其僚友吳郡顧君舜  
祥與古歙李君元峰方佐侯之理事必受成於  
侯乃集以侯之弘風長譽辟猶雕鶚之厲天  
旣舟楫之汎溟海而其最于法當陟懼其去而無  
所模範也舜祥乃遺書千里屬余為文發其所  
以願慕於侯者且曰嘗出余所為文示侯侯即  
喜其有合於古願非余之言亦無以有合於侯  
私竊媿且幸焉而不敢以辭余惟吏治之近乎  
民而能興利除害還澆使淳者惟郡二千石與



州邑長吏而已故漢宣之世特重其選稱為中  
興今聞侯有夷雅端粹之德而持已廉公臨事  
敏察決訟不為苛細巧劫之法而獄無冤聲歲  
賦有期租無宿負屬景王之藩道經于蘄供張  
之費數以萬計所至郡縣罷於奔命而侯調度  
有經每事豫集吏民皆安舒不知有紛張促迫  
之煩侯亦蕭然洗手奉職而罕嘗自矜其能侯  
真賢哉矧侯博學嗜古尤以經術緣飭吏治俾  
民獲其利化醇而俗茂即中興之良吏無以加  
也其往也必得上最以膺顯擢固不當久留於  
蘄然蘄之民將復有上書留侯者使得賜金增  
秩久於其治而侯之來又可指期以俟舜祥姑  
無有邑邑於懷者敢輒書其所聞為送侯序以  
復舜祥而謝其所以遇知於侯者

送浮梁吳先生之任海寧序

凡士之舉於鄉會試禮部登乙科及下第者選  
授學官三年法得再試唯選轉它職則否國家  
將以博采天下之賢而亦以賢者之不必盡遇



於一時也浮梁吳先生之不遇於時也為學官  
於茲者二年矣側聞先生之於學也旁采博綜  
研幾極原日未嘗輟觀於書先生之於為文也  
含精漱腴撝藻擢穎煌煌乎參衆妙而獨得且  
貌恭而氣柔言確而行敦不飾矯以拔異不取  
同而委隨學者尊之齊其進趨方將崇弘濟乎  
人倫行當賈勇乎甲科奮巨鱗而縱溟漲張勁  
翮而乘積風辭尺鷃於蓬藿謝涸鮒於潢汗誠  
以先生之賢殆始不遇而終遇矣屬者監試頗

表甫竣事而遷先生為寧海令而又平限於法  
之所不得為以讐先生之志余由是益歎賢者  
之不盡遇於時其遇者又未必盡如先生之賢  
也且寧海海壖下邑島夷出入郊坰之際師旅  
之所蹂躪百姓駢跡而錯處其間如是者而乃  
以先生居之是猶驅驥駉而服鹽車也雖然賢  
如先生其於民也必能興利去害以覃安瀾之  
化弭境外之侵垂功德於遐迹曷足為先生少  
哉余弟允濟承先生之德教乃徵士大夫之工



言為詩歌以道先生之行余素叨先生之知尤  
知先生之道光大始嘗以為先生惜終又以為  
先生喜遂書其略以引其端云

送朱憲曹赴閩臬序

言山川之勝者必西至蜀南至閩至粵始極焉  
然皆去中州數千里而獨閩為近閩雖左控溟  
海右連百越而水陸道里之險阻于蜀粵惟得  
其十之一二焉故凡仕宦而至于閩者稱為美  
仕孟春之吉憲曹朱君受命選部將南轅閩中

相與之士滕餞盛集具美乎詞余既辱君父子  
之知而媿無以貺遠輒敢申之以言而且以見  
君之是行也蓋不特為美仕而已惟君以文雅  
貴仕世其家自唐以來千餘載而于今尤為最  
著元兄太宰公有厚望為朝廷重臣端鎮雅俗  
子弟生而承焉奕簪纓之舊不知有黼績梁肉  
之榮咸恂恂有萬石君家法太宰之尊府侍御  
公君之伯父也亦嘗按節閩中德刑之政浹於  
衆茲而君又以馴謹貞固之道克實敦茂出其



密畫贊是憲府以為賓僚之良必能光紹休烈  
以永永稱賢者豈特美仕乎云哉若夫山川之  
勝雖不欲昌志乎盤游當自得於豐暇閒逸之  
餘以蕲其歡愉溫麗之什他日有道余以聞之  
事所謂知吏事而能文者在君而已若曰不然  
吾不信也

贈大雲菴雲上人序

釋氏自如來初未嘗與中國通而迦葉摩騰及  
竺法蘭始以其經來至于洛下迄今已二千餘

季其斥而闢之者不可以數計然而王公大人  
以至秀行高德之士徃徃猶依慕而尊禮之者  
何也余以為釋氏之所以異于我者固無足論  
至其為道真能絕嗜欲出死生了性藏仁冥真  
隨順而與世之矜榮誇權競險鬪進經營毫毛  
之後辟猶重昏之與朗照若釋氏吾庸盡斥而  
闢之耶此其所以同于我而能使天下依慕而  
尊禮之者非妄也余性多妄執而與時侵違獨  
于釋氏乃喜與之游蓋將嘉其所以同于我也



若雲上人者服道於本郡之大雲菴大雲為集  
雲寺之別院廣陵南國之故趾寶曇法師之遺  
塔在焉地狹偏與景育幽竒古括交清滌池環  
映信禪刹之名區也余與集雲性公為方外交  
餘二十載去來往復必經行焉且上人嘗師事  
性公智源慧辨兼闡藥方法趣玄超旁舍風雅  
有若斯人雖未必盡通其道殆所謂釋氏之秀  
也夫既以其地之勝而復有其人故余尤喜與  
之游焉郡之諸寺都緇缺負久難其任而上人  
乃權示應身屈領是職于是文學之士與上人  
游者咸以為上人之為是也必能慎攝律儀堅  
持教戒依勾圓脩應形殊對演一音之教開六  
道之遺者矣豈徒然而已耶而吾凡與上人游  
者於言不可廢且以余能知上人與其道之非  
妄遂屬余為之言以寵其事

水東日記序

水東日記者吏部左侍郎文莊葉公之所著也  
其書專於記事覈古綜今關諸軍國弭為通博



書凡四十卷以其書成於淝水之東名為水東  
日記云公名盛字與中崑山人也正統十年舉  
進士拜兵科給事中英帝北狩六師陷土木九  
月郟王即位虜益屯通都城公時屢奏封章皆  
當世急政尋轉都給事中山西右叅政監督宣  
府糧餉兼管屯田獨石馬營等處軍務公乃有  
功於邊以父憂去職英帝復起公喪中令無遂  
服擢為右僉都御史巡撫兩廣公至則徙征蠻  
府梧州而廣接比要害處以制外蠻通鹽利令

商賈得出境市鬻憲帝即位轉左僉都御史巡  
撫宣州公至益開田歲歲增倍買戰馬千八百  
餘匹繕治屯堡七百餘所上嘉公忠勤且錄兩  
廣功賞賜甚厚遷禮部右侍郎再遷吏部左侍  
郎卒賜諡曰文莊公精明經術練達制度廉恭  
孝友兼體數罷當版蕩艱危之秋而尤能奮忠  
言嘉謨以匡翼其主自初官通歷三十餘載更  
事三世凡國家大議無不關決於公眷遇甚篤  
然位不滿德年不迨老而諸公咸有不盡用之



歎公生平所居潔清門無雜客惟購書萬卷曰  
耽玩以自頤殆廢寢食故其宅所著述於諸公  
為多公之玄孫公煥文雅醞藉能遵其祖德因  
出斯藉屬余題叙其首遂謹述公之豐功偉德  
被于當時而足以儀範後世與著述之所詣匪  
若閱誕破碎以廣異聞而已

徐相公少湖榮壽詩序

皇帝三十有二年相國少湖公壽屆五袞某月  
某日粵惟誕降之辰某官謹合郡邑縉紳之良

某等相次為詩歌以致遐祝以某辱公之知命  
為序引不獲有辭起而言曰華封之祝聞于記  
傳眉壽之什列于詩篇展義陳詩有來攸尚今  
少湖公人倫龜玉朝佇龍鸞粹朗清夷宏通恢  
裕休聲播物俊德在躬久摠啓沃之謨上協都  
俞之美出入華殿師長翰林年甫艾期任隆槐  
位天之所賴帝是用休維岳巘巘昔表降神之  
慶維公赫赫日臨生甫之期丹萸金舒振柔莢  
于春甸綠泉初滿媚澌景于芳原欣萬象之榮



光來九臯之秀色關舍紫氣呈潤黃明闢華堂  
以布筵汎霞採而極宴承雨露之殊渥睹鴛鴦  
之充庭過妙響於行雲招長繩以繫日亦既醉  
止于昏樂兮况乃臺鼎黃金挹高風于千載京  
居白玉齧勝槩于三山熊經鳥伸不尚延齡之  
術巖棲谷隱未為探道之精蓋將燮陰陽以若  
時贊化育而成務于彼黔黎之衆共躋仁壽之  
區斯誠屬聖主之欽明所以遂良臣之樂事近  
惟廊廟遙敷瓊玖之詞遠及江湖迭奏篋簧之  
唱盡寰中之盛典致天下之傾心無謝古人有  
如今日某等既辱公知又重其請敢以先馬拱  
壁之入操斤郢匠之明用約餘言編之右簡

平黎詩序

黎故蠻別種也去京師萬里在南海中其地多  
高山巖峒迳道阻阨危害不可羈縻而致其最  
獷悍者惟羅活不與他等羅活東抵榔温西接  
岐獠南襟椰根北枕鷓鴣廣延可三千餘里而  
瓊丹崖萬四州外環其壇十居其四且以絕遠



兵不能至往往剽殺將吏惡累罪稔逋迤天誅者四十有餘載今天子即位之二十年秋乃詔征蠻將軍安遠侯柳公珣帥師討平之仍命兵部右侍郎兼右副都御史蔡公經節制中權參戎將軍程鑒等為偏裨大發兩廣募兵十餘萬人分道並進粵自二十年九月十三日兵畢至羅活諸峒大破黎賊斬首數千級餘皆走墮阮谷間死者以萬數至明年春三月十七日而師還是役也後軍督府司教詹子中以秘術從征

安南事平復辟在柳公幕府參定計策而四會覃騰堯者時亦以拳猛義烈散其所聚數千金與子中募壯士出死力破賊與子中皆坐立功而騰堯舟覆堯溺死海中未幾而柳公又薨于是子中騰堯之功遂不復錄故子中情激痛騰堯以國事死終無以自明乃上書 天子刀筆之吏又抑歆而不揚至今十五年矣士大夫聞子中者莫不為詩歌嘉歎之而子中要余叙其本末子中伯父與余善知子中從軍功多遂為



叙其本末且令後世知圖難忘死著功殊域有  
子中與騰竟也

平夷倡和詩序

明興垂二百年天下厭于承平守衛寢弛民罕  
習兵今年春閩海巨賊南連羣夷剽畧得氣遂  
分其衆浮海東行進攻太倉上海所過燒燔積  
死彌野百姓奔竄無所歸命聞賊能鼓刃如飛  
多以銳兵要擊取勝于時鷓冠袂服之後皆噤  
閉臧縮莫肯出關時惟郡別駕任侯素以儒雅

自飭一旦援桴誓衆奮其忠勇以為賊勢甚銳  
即不能困後誠難服遂提所部士卒數與賊遇  
且馳且鬪日夜嘗數十合然士卒散弱每至阨  
厄而賊亦稍稍遁去侯時身被三創益慷慨未  
嘗少沮以為兵不勒習無以立懂乃專勒習士  
卒與共辛苦所受犒勞輒分賜之且以祭死事  
之士侯性不習水險親擊擢大海中以壯其氣  
戰罷引軍還壁侯獨單騎馳射為士卒後嘗有  
生俘抵鬮隸足侯怒立抉肉啗之以此士多感



激樂為之死故侯是役曾不幾時而散弱盡為  
勝兵萬夫熊熊齊其心膂以謀則順以戰則克  
賊衆挫斃力盡東鄙而又能焚賊寶玉以肅威  
稜分功戎臣以辭上賞此其行事過人誠不世  
出也且侯嘗移蒞崑山所居茹蔬飲水無異韋  
布片言剖劇洞若神明廉疑少息而侯實惠愛  
是以侯每過俾道經茲土士民徃徃感泣喜侯  
來歸願復留侯居守內地以至兒童稚齒皆知  
有任侯之賢人又言侯前嘗領縣其民皆剌石

頌德今侯於斯其功烈又如此漢之循吏莫如  
黃霸而不可使之將兵名將莫如李廣而不可  
使之蒞民而侯則兼之侯誠不世出也以侯之  
賢行其議於朝廷之上必能揚武除暴俾獷夷  
泥首遷情示天下中興魏魏之業而濡恩澤于  
無窮惜其兵微用卑日令與殘寇角逐驅萬  
死之地縱侯忠勇不世其于盛天子用賢之意  
豈不謬哉昔公孫昆邪猶能以廣泣請武帝方  
今有氣力者不少卒未有以侯名聞於上者何



哉比太學生紫秩京兆尹公季子也端謹好義  
能以侯所為軍中詩傳諷士大夫間聞者無不  
欣忭起立以為雅歌之遺遂相勉次韻為詩生  
因合為大冊仍屬某縣綴其事以申願慕之意  
竊念其疵賤不宜以枯槁之辭荒穢鴻烈誠以  
旂常竹帛之書庶必符於今日而亦以醜鷗冠  
袵服之後齷齪竊祿位以自得而不知愧者

周憲王所模蘭亭序

周憲王所模蘭亭凡四種而豐君以為此五種  
皆王所摹不知何也今所謂唐模賜本即太宗  
所得辯才本令歐陽詢褚遂良等臨摹以賜諸  
王大臣者於時詢摹特為逼真即勒真禁中以  
故人罕傳搨石晉時為契丹携往流落定武慶  
曆中韓忠獻公塔李學究得之以墨本示公公  
索石李遂瘞之地中後其子負官緡宗景文時  
守定武以石代翰匣寘藏于庫熙寧間薛師正  
出牧求者沓至乃剝別本應之子紹彭又模之  
它石剝損古剝湍流帶左右五字以別而定武



蓋有三本矣且古刻字微帶肉今所傳有肥瘦二種尤延之謂瘦者真定武王順伯以肥者為真定武而肥者今亦無刻損紛紛似無可據褚遂良臨本則一在同州一在歸德同州本後有延陵之印而此則歸德本也休寧金君偶索書其後姑述其始末云

### 居庸詩序

居庸詩者給事顧公之所作也公名存仁字子奇嘉靖間舉進士為餘姚令以治行擢拜科

給事中到官不握齟同世之毀譽言事多持朝廷大體世之所不敢言者而公始言之公剴直忠勤無所顧忌不言終不已也故卒以言事謫居庸而此詩乃居庸時所作恐歲久散失曰命某校勘褒集之仍題叙其首竊惟古之為詩也本以言志也故觀列國之風可以知其政治之興衰觀一人之什可以知其性情之邪正非務為靡麗取飾嘗翫而已公之是作也因事附詞因詞寓旨大抵詞暢而旨遠雖竄身羈離之



俗環寇之區而未嘗有嫉憤怨譏之詞觀公之詞可以知公平生之大節處艱危顛沛之中能不失其情性之正斯誠不謬於古矣其不敏輒述其大略而為之序

荆谿唱和詩序

震澤之西有荆谿焉谿之上有連山從橫絕頂與壑積咀負勢愈深愈峻蛟蛇龍魚虎豹麇麇竹樹蘭茝宗生族聚而神魂恠魄湫氣靈精雲蒸嵐飛蓄洩雷雨萬狀不可名究恒杳若世外

徃徃隱人秀士咸喜託跡而遊其間既遊而出猶蹇產不釋其勝於心必為詩歌以發之余嘗至谿上留旬日惟得詩三篇卒不能竟其勝而還比上海顧舍人從義字汝和為谿上之遊亦復旬日所與唱和詩乃至百餘篇且其緣事附情鈎竒抉鑿多出意外之語以相取高而未嘗見其乏思余讀之津津乎獨神馳乎是遊而媿其才之拙也于時與汝和同遊屬而和者凡七人沈明臣字嘉則四明人姚昭字汝晦董宜陽



字子元馮遷字子喬朱察卿字邦憲妣遂字以  
良妣遇字以奇皆同縣人汝和方詣京師以書  
附子喬邦憲屬余為序而以未獲接顏為恨余  
既嘉歎汝和之才彦而又猥加意於余不敢以  
辭不敏遂為題其首而名之曰荆谿唱和詩云

題梁伯龍遊越中詩後序

余嘗以為遊亦有二道焉而皆寓乎勝其于道  
苟茫然也則雖登太山履日觀未嘗不若遵平  
壤而行掘堦間罕到其脰之一毛也果何勝耶

而山之勝固鬱然也是勝嘗在山矣雖然余好  
為名山之遊久矣而卒不獲一至焉吾嘗夢而  
遊焉真若凌千仞之崖而逐乎雲嵐之表時固  
未嘗有山也而勝果在山乎是山與我乎果孰  
勝耶且吾未始遇乎山而徒以夢得其勝是換  
吾之空勝以超乎實也若必待與山遇而勝始  
出焉是又以目勝也則不若吾夢之猶有神  
說者存也伯龍嘗有是勝而卒遇乎山以發之  
而又有藻蔚之什是能合其勝者伯龍真能遊



矣夫既與山合勝而即未能與之忘焉是猶有  
勝心也勝既合矣而又若向者之遊焉而未始  
茫然也則坐進乎道矣

贈王按察伯和序

夫古之取士必欲盡天下之才而設科不局於  
一塗天子仍有徵召之命而諸幕州郡又得自  
辟或從事能高則貢之天子使之受署其於經  
羅可謂至審然其時懷才負志之士猶有齟齬  
不遇之歎方今 國家之所專任而最重者唯

止甲科而徵召絕不復行其所遺佚難以比數  
往往至於齒危髮秀偃蹇摧折蓬茨堀堞之下  
罕寄一命以攄其所長故士有一隙可以蘄通  
將無弗為者此豈士之過哉王君伯和秉沉敏  
之資持端雅之度研幾典籍含咀道腴卓為英  
詞以希世榮者有日而與之齟齬改隸太學爭  
雄六館之士而率亦未有合焉會屬者 詔下  
太學生有能以貲贍國即無論年資輒為破格  
受職咸以為士之不遇於此而遇誠不世之典



也伯和乃屈己應詔得按察知事其姒梁太學  
汝掄將往賀焉而問詞於予予曰漢之文學莫  
若司馬相如其始不遇也亦以貫為郎孝友莫  
若卜式亦以餉邊得至相夫士之久困而乍逢  
其時不當復泥於一塗有若伯和之賢宜以科  
發而此典特為非常雖非其志殆所謂不遇而  
遇矣王大理允美自稱其族之盛登甲科紆組  
綬者十有一人而伯和之嚴考光州公固其一  
也伯和嚴其家聲之大且年志甚壯揆其才以  
施於政必能亟起名蹟紹其休聲自出繩墨之  
外端在於此伯掄執余詞以往其誰曰不然已  
而曰然遂為叙而書之

華陽館集序

夫文麗昭天地之象辯名物之數闡皇王之道  
通神明之幽而敷為著述比興之作章施制度  
遵宣民風積于中和化成天下而文之時義大  
矣然亦係於運之盛衰氣之淳漓才之偏專各  
因所長不能兼美苟能兼之而使之彪炳光耀



于世稱為偉人者厥惟大中丞江右賜山公乎  
嘉靖中公舉進士授宰吳縣以廉平理劇政以  
慈惠撫惇黎以察敏剔姦蠹名蹟颺扇旁邑歸  
高三年拜監察御史秉憲不阿謹言所奏關決  
大體是以天下服其節鄂遷南京通政司參議  
喉舌之任公有餘局既而出司文教士得師模  
顯蒙開通鄙吝湔灑濟濟興行咸就中庸恢儒  
之風播于羣聽累陟太僕大理少卿明慎端審  
務在哀蠲國無寃人有臯呂之理尋轉御史中  
丞保釐東土糾督諸部不為吐茹振其紀綱以  
肅違慢比者夷寇深入海壖復肆劫掠數年以  
來荆棘之野未盡安息重罹寇害靡所歸命公  
忠憤惻中建牙海上簡稽偏帥程才量力出其  
驍銳口授成美渙發號令電閃霆擊揭竿而掩  
之曾不淹移子無遺醜腥沫澄晏萬里安瀾畎  
畝恬嬉以奠常業而公猶不敢自伐益固險備  
救寧其民 天子特嘉公勤勞寵賚增秩仍留  
舊任用光治久化成之偉烈於時和門寢闕改



府優暇愈益研味經術游思文藝以極著述比  
興之旨故凡平時感物叙事講德匡時登覽餞  
勞為詩歌賦頌答問條教之文若干篇編次共  
若干卷勒為華陽館集蓋託名於嘗所游居之  
所見雅志焉而授簡其為序自其與弟某為諸  
生時謬辱公之遇親濯其泥塵於稠人之中加  
之拂拭使改視焉幸皆叨第接跡朝倫庶幾竭  
心公家以母為公羞故受恩最深承命之日雖  
復逡巡辭不獲已竊惟公稟純懿之器蘊弘遠  
之才包潤邃之學遭中興之盛立政立功固不  
以文飭之藻身華國而所謂典謨雅頌鴻釀渾  
噩垂世作則者公皆根緒索源得其歸趣不若  
幽人畸士呻吟哀怨以散其噎鬱無聊之思於  
烟雲草莽之間偕時泯沒而已而公之是集也  
豈不偉哉至於公之它時近侍顯尊柄用文武  
與三事弼亮黼黻皇猷敦大宥審彞鼎之詞又  
非今日所得而濫述也

青蘿館詩序



嘉靖間余友徐子與以進士初官刑曹即有能  
詩聲故河南按察使濟南李攀龍山西按察使  
吳郡王世貞于時同官遂相砥礪聲益藉藉起  
矣處士臨淄謝榛故福建按察副使廣陵宗臣  
為吏部主事荆楚吳國倫為給事中故刑部主  
事潁南梁有譽皆集京師屬附之各竭所長以  
出雋語故刑部尚書吳興顧公應祥甚有重望  
善鑒人倫以為數子者並足馳騁古人當世不  
能儔也數子者亦復知余子與後自刑曹按獄

吳中特枉車騎歡猶平生禮出度外子與貌敵  
而氣和神逸而機清言辯而意舒愛博而仁至  
能令人出肺腑而不自疑予謂子與於人將無  
不歡然交通也然耿介之操未嘗隨時訕毀之  
聲得於異已尋出守汀州復補汝寧守左遷長  
蘆轉湖廣按察僉事今為雲南參議由是溯大  
江汎洞庭浮漢沔出夜郎太華點蒼之竒峻昆  
明洱海之遐僻殊無隕葉冬有蘇花絕地窮天  
之勝恒落於荒憬幽渺之區此惟懷才羈離之



士能專而有之子與曰是遂得徜徉寓其膝於  
詩以泄其憤懣難平之思而徃徃每出於常言  
之外新都汪惟一師事子與嘗繕緝子與所為  
詩自初官以迄于今刪取若干首勒為六卷名  
青蘿館詩梓之而屬余為序惟子與知予知子  
與者亦莫過於余乃為之序曰夫道麗事而見  
事曰時而行事不行則鬱於志志不達則昌於  
言言之昌者為文文之約者為詩詩固文之蘊  
也風雅頌者詩之名也興比賦者詩之體也非

卓犖之才不足以贍其體非玄解之會不足以  
究其本而子與之為詩清雄冥暢穠潤秀逸遠  
有所託近有所懷興文成篇意無乏緒故知事  
適其變而言出於常理會於玄而才究其美昔  
詞英諸公若梁之任昉丘遲沈約吳均陳之沈  
炯唐之沈千運孟郊錢起並遞起吳興而子與  
乃生於千載之後誠能馳騁其間斯亦豪矣即  
數子者又昌以加諸曰論次為序而題其首子  
與名中行吳興人



贈邵武太守江右古華賴公滿秩留任序  
漢史稱宣帝能重守令之選且令久任以盡其  
才而百姓皆相安其治故其時多循良之吏豨  
為中興今天子明睿濬哲冲年嗣位三事弼  
亮日圖至理以臻中興之隆而守令非選賢莫  
居由是江右賴公始以其官出守邵武夫邵武  
地周七閩有連山複澗之阻民俗狙獷而又經  
寇害瘡痍之後勢尤難為惟公之賢而為邵武  
也以端毅通亮之資包潤懿淹博之學開庶乎  
簡直之度加之以聰麗練達之才唯古酌今首  
程保約之規不使其民之濇於俗濟寬於猛繼  
立條鞭之令必使夫刑之協於中其折獄也應  
物以誠罔設鈎距而羣情自歸其摘伏也臨事  
致果不施巧劫而大猾自屏春行於野則朱旂  
暢轂悠悠度正以省不足之耕而農以勸月試  
諸生則青衿玄弁濟濟相趨以展有餘之學而  
士以興以至剔吏胥相沿之奸捐共張無經之  
費刺期賦歛均一徭征繕葺關梁更治道路周



丞掩骼夷難拯災凡事之有利於民者莫不舉  
而行之有害於民者莫不決而去之弘我愷悌  
之風反其狙獷之習扇以煦嫗之惠泯其愁苦  
之心行之三年郡以大治惡無不瘳善靡不彰  
境絕寃民廩有餘積財用肅給札瘥消弭古之  
所謂循良者何以加諸昔家君嘗守茲郡庶亦  
克勤厥職從民所安時丁寇艱而屬縣秦寧光  
澤未有城守悉為經畫以固險備救寧其民然  
去郡已十有餘載莫就紀錄而公獨定討舊績  
創建三祠至方之國僑名父褒人屈已永示民  
則此又公之與人為善之大公俾士大夫之事  
業不湮沒於後世殆非循吏姒姒者之所及也  
公今滿秩復還治所其郡民知某州事陳君謨  
與吏民咸喜公之留得久被公之化而欲公之  
鴻名長譽昭灼遐迹不遠千里請言于余余兩  
獲觀公之光儀載獲聞公之美政非常而結於  
人者如此其容以不敏辭敢輒綴言比之謠頌  
以復其請以慰悅其吏民愛戴之忱抑恐治久



化成遷轉非次即攀轅卧轍之叟尚何能滯公  
於一方邪穹碑岌祠表遺愛者自可計日將復  
垂筆以頌

### 薄䟽書序

夫假言以通心莫尚乎尺牘所以申獻酬便注  
復也而或稀闊數年曠隔千里慙懃綢繆之旨  
皆撮叙百言於盈尺之牘欲使之見事識情以  
次言面之歡誠文辭之不可忽者是故其體質  
其辭簡質貴覈而暢簡貴要而精太質則鄙大  
簡則踈除其繁復以出殊采尺牘之旨也陳遵  
造次口占百封古今美之亦意足而止豈在於  
冗長哉至有鴻才巨筆而於尺牘多忽而不脩  
若卑於書記之任斯為劣矣吳興凌玄旻文學  
竒分天出雄志邁倫研百家之言摘瓌麗之藻  
而於尺牘尤極翩翩積久成帙命之曰薄䟽書  
按漢書應劭注赫蹄薄小紙也今稱薄蹄蓋互  
言之即尺牘之義也玄旻方剖劂之而以書屬  
余序引其端友人王百穀復言序玄旻書者已



十數餘家而以不得余言為少余言豈誠足為  
玄旻輕重哉不能辭遂書以歸之

汪禹又暨元配程夫人六十偕壽序

新安汪君禹又嘗見余所為文若詩于其同邑  
程于行氏以為有合於古不類於今之人去年  
春遂垂扁舟訪余敝廬又以余不為浮言譎行  
以要於時留一月始別去其後連得君書殷勤  
綢繆忽若晤對遂不知與君有千里之睽遠歡  
踰平生焉竊惟君性姿聰辯博綜經緯旁搜子

史百家之言為文刻意司馬子長比興之作尤  
翩翩殆無乏思比為諸生時即起長譽及隸名  
太學而司成秦公若陳公范公咸推重之不以  
時之齟齬軒輊君君亦自以為然一時鉅公如  
司馬汪伯玉中丞方定之方伯江民璞山人陳  
達父王仲房与為石友益弘通人之致狹世之  
近情放跡于黃山白岳間萬曆改元 詔徵賢  
良長吏以君應詔敷辟不就視之蔑如也君真  
賢哉而獨不遺余之疵謏而過為獎飭是君何



與人之厚一至此也且程夫人為少保襄毅公  
之後出自名族夙標懿範為婦能去攸遂有蘋  
蘩之美為母能均異出有鴈鳩之仁中外推賢  
允堪女憲而招胤懋孝神情醞藉藻思清越流  
聲士林克闡義訓今君與夫人偕壽六十數當  
一周將舉觴稱度金子志溟君之館甥以余叨  
君之知特謁余為引祝之詞夫以君之賢九應  
南都之試不登夫薦書抱成藝而無所施於世  
夫人之替德而不因以顯畚於彼者必豐於此  
其躋享遐考永綏厥養天實有以祚之也祝之  
宜也其何能辭輒復綴其言歸之金子用申無  
疆之祝而書之為序



仲蔚先生集卷之十一



吳郡俞允文著

記

遊馬鞍山記

崑古婁縣縣之山馬鞍良次形勝旣麗不類土  
俗敢驕奢華歲向春鄉里通衢之人闔戶以往  
才豪強梁巖以相勝窮獨貧賤賴以為日當其  
時人有羸者矮者癡者瘖者跛者羶者口嚙者  
疥疔者聾者耳偏枯者眇者瞎者矇矓者牙黃



者峻類者髯如施朱者肥豕腹者韋條長者鼻  
斃削不羸鼻穢者口耳缺者廣頰突脊項禿疑  
鬢者首縮而足屈唇掀而齒豁者面五色具千  
恠萬象或數疾而同一人或數人而同一疾如  
是之人老幼男女蝟集蟻擁或羣而嬉或列而  
行或拔距走輶或張券恭鞫或喜相奔逐或怒  
相搏擊或提罌挈盃絡盛壺餐或邂逅交游扳  
連而往或握手道舊或倚樹歌咏或乘輿而至  
興盡而歸或興盡而歸援之而止或以事牽道

經而游或以遊至事牽而返或戲譁人貌或滑  
稽射遠或恃勇乘危或反接特行或喘或溺或  
嘯或笑或坐或卧或俯而僂或揖而讓如是之  
人不可殫狀山行郊游蒼集道隘當其時人有  
鮮好衣服張蓋擁衛瞋目咳唾擬于王公伎童  
雋妓曜色增態挽袂憑肩迎風掩笑千聲百氣  
弄影驕豔袍鼓振金鳴絲擊筑羣呼聚飲列炬  
而還如是者才豪強梁也翠蓋金璫朱衣華裳  
拂擊日晴五色並輝足若蓮瓣輕盈點石刺夢



鈎蘿丹碧支裏數步之內香澤啞人左右侍女  
前呼後應人莫敢仰坐口評論如是者皆才豪  
強梁家也夾道驩呼笑罵騰踊卒然之間日不  
及張遺簪墮珥破襟絕襦婦女鬢髮彷徨孤立  
日落神沮垂首斂色如是者男女交錯也其侶  
聞之莫不蒙羞疾行自謂至此死有餘恨乃今  
屏跡然猶有不畏者牽引乘攜左顧右盼妄稱  
故道迷復環視肢體皤腰胛若束芻髻秃缺鮮  
塗澤衣服故舊不相掩覆解衣市物且唱且行

如是者鄉里貧賤也牲酒羅列揖跪拜立但恨  
無地先後卜祝吉者欣然凶者復續灌酒謝神  
焉者圍立禱頌唱至盆盂高下一人迴旋莫可指  
画如是者歲昔廟祭也牛牽馬驅鬚斷行隊恃  
力扛石從事野燒競走益薪超烈越燭爭占為  
能如是者牧豎也數十百人攢一短褐閉目捋  
鬚搖首謔舌語言若注不喫一字解衣散錢者  
為王公媵佛諸天者為馬牛愚頑無知憑依若  
神如是者浮屠也曲席結舍圖形繪象衮人穢



夫極口稱道其狀與浮屠等者皆星士望氣人  
也無賴男子駢肩纍足衆口交唱一省之內山  
崩谷沸反走却避豁然成路如是者毬擊也白  
眼嫖罵足鬻不前偃臥隨道者游人醉也黃衣  
搨緇尼僧道士也幅巾厥襖武藝術人也屠酤  
酒肆星絲豆貯乘軒弛擔植然梗道百色之人  
莫不投業臣為盛事人聲鳥禽相和烟日風火  
焮發續續紛紛文文章章具一省觀豈不偉哉  
俞子往觀而嘆曰韓子云脉病而肥者死今之  
天下疲靡殘疾焚焚孤苦破衣救屨盡無斗粟  
日暮無食談笑自若數千百人罕有出此皆沿  
習成俗猶敢驕奢華是亦脉病而肥者也何豪  
貴豐顯作一大官以囊橐計而視以為樂悲夫

冷然亭記

汝南周若年既植嘉卉珍木於園中中為樓館  
亭池使相映帶而亭西之隙又種竹數百个其  
竹俯然林林宗生葡蒸竦直特揭天表其節落  
澌踈淨如含新霜如新解籜其影擅欒隨池水



中顛倒上下與它影相涉重重如畫雪封其枝  
月漱其根自樓中望之又滃若翠羽沉霧攢青  
控白汎濫不止余以為園之勝皆鍾于是竹而  
若年以為時當大火炎雲高屯黃神嘯吟於裂  
霄黑蟻襲匿于重淵辟猶大鑪烘灼靡屆不爍  
垢汗沐體悒悒不怡而遂之竹所偃息其下仰  
視高葉密若編葵霏霽雲布躋于厚陰欲日光  
不得而獨有風冷然從之不覺體便意適煩紆  
為之解朝醒為之析而遊于清涼之區也是竹  
于盛夏有弘益焉因復為亭居之名之曰冷然  
云其亭方不盈丈而欄檻周施可列坐五六人  
屬余為記將剝石而臨之壁間若年好讀書為  
文有竒思今稍出其竒于一事之微遂能忘地  
之隘移天之時而不羨夫淇園之廣山陰之奧  
也其事之美不可以不記

### 九龍山居記

出無錫北門行五六里有山曰惠山其形有蜿蜒  
起伏之勢故又謂之九龍云山亦不甚峭拔



而其下長松茂林蒼蔚葱菁蕭若積黛遠望疑不可入山腹吐乳泉不見其流而石池涓涓日數百人汲之不竭尤甘冽能使茶味良即陸羽茶經所謂第二泉者也尤艸野為山居其麓乃得據山之竒勢取居之中為堂五楹而堂之左為崇閣其後為精舍居之隙復為亭榭而又申之以竹木浮之以陂池經緯合折繚轉相屬或高敞而舒或奧密而幽可以臨觀可以游棲入其室則翠巒白雲殊秀清溢時墮几席間真足以娛目暢心眇然與造化者爭鶩於埃壚之表而不知其居是室也昔謝靈運述山居之美麗而事過於煩仲長統徒有願言而卒無以副之今艸野實有其勝而無過煩之累斯居之善者也且艸野先世宋禮部尚書文簡公者名重當代自稱遂初先生嘗為堂讀書山中已遠不可考艸野追景世德悼前之遺乃復署其所居堂曰遂初茲不特專事乎游觀而已艸野闔達有雄志嗜古博學方復潛精於此以弘詣其極而



致其大用於世此亦豈於野久居之地耶於野  
書來請志於石故志之

西野書屋記

休寧有連山連山之中拔起而溪秀者曰岐岐  
之西有璜琅二川之水折而合流曰汶口其地  
風氣鬱茂清泚程子行氏家焉稍去其家之西  
地益勝而野延眺連山則峻嶺峭壁攢青接翠  
出於天標又如高濤恠雲奔湊蹙背靡有斷絕  
昔子行之先子汝義喜茲地之勝遂滌薈蔚剋

磽确决沮洳使就夷曠為屋數十楹以藏九流  
之書命之曰西野書屋其前清池漣淪澄瑩玉  
潔池之外匝以平疇果園其後古松千章其傍  
脩竹萬个昏旦與連山一色氣候變狀雖善画  
者莫能悉其變也不遠舊廬別出新賞人跡罕  
雜囂塵不來而汝義時讀書偃息其中間嘗為  
詩歌以攄遐思叢沉滯求六義之所歸余雖未  
識汝義汝義其賢者歟汝義沒後二十年子行  
懼屋久傾隨時為飭而新之而乞余為記以述



先德必使傳遠若于行亦豈不謂之賢乎余聞  
程氏自唐都使澧當黃巢之亂集衆拒守始徙  
家汭上迄今三十餘世子孫益蕃衍而多賢今  
觀于行父子其不信然哉遂為之記

仲蔚先生集卷之十二

吳郡俞允文著

傳

何公傳

公名正緒字克承姓何氏其先閩人宋時徙會  
昌白埠家焉公仁厚樸直喜立名節公歿季弟  
正約甫十歲伯兄正纓有遺孤亦尚髫髻公憐  
之力為撫育友愛備至比壯任事乃悉出其遺  
產及所嘗自致貲財殆以萬計各令自裁取不



私一錢親舊有急輒復相為假貸年五十時虜  
數犯境公輸粟餉邊詔特嘉之賜以冠服能退  
讓以彰義聲公家世稱右姓然夙遭閔凶公身  
自持其家日夜籌策益拓其產起富而恂恂備  
飭不欲隨世俗競為侈靡邑令高其行召以鄉  
飲亦固辭不赴會昌介閩粵東鄙積阻多盜賊  
往往負毒弩竄伏林嶺間公嘗被掠盜驚謂曰  
吾聞此公素長者釋之其累行積德雖至暴能  
感服如此生乎雅嗜泉壑邑中有兩帝嶽最勝  
因自號少巖以寄其志又曰東南海中有三神  
山其上有碧巖故云年七十四終公孺人同邑  
小田劉氏邑南行八十里曰湘鄉有九田之屬  
川谷平行居多巨族而小田劉氏為著以故孺  
人婉孌端慎宗族並仰其儀範子三人泮湧渭  
渭明經以學官弟子負為國子生授崑山丞廉  
敏有幹略稱能吏焉贊曰何公負義助官分財  
昆弟奮氣立行不徼名聲而其子渭為丞崑山  
吏民敬愛好揚其父之名卒使士大夫數千里



外無不知公所謂避名而名我隨豈不賢哉詩  
曰豈弟君子四方為則斯之謂矣

### 周公傳

公名夢山字思仁更字維岳姓周氏蘇州崑山  
人也為人質厚內敏不肯矯飾異衆強記博覽  
經緯百家之書為文浩汗橫發罕切切繩墨而  
自能致美初父震為御史鯁直忤權貴出為浙  
江按察僉事公時年最少同官子弟多長與偕  
試語獨絕出不類咸共嗟嘆以為不及後以諸

生院試藉、有聲名次應餽廩公意丈夫俯手  
取一第此不足為也輒以讓貧者同縣吳公中  
英高流也慷慨弘辨薰動一時於廣衆中必引  
公以為重年近五十同學生才望遠出公下率  
至貴仕而公尚濩落恥守敝冠履與青衿躑躅  
黷校間有子三人曰之程之稼之穆之程之稼  
已補諸生而公遂棄去放志區外賦詩自適時  
過親舊飲酒必數斗霑醉乃去唯奮髯大笑而  
不使酒然不善治產晚歲家貧屏居馬鞍山陽



俞子蔚先生集卷之十二  
三  
日耽誦浮屠老子言以為西歸津梁益與世泊  
如也公性尤篤友愛父沒仲弟不勝繁徭公代  
為之撫幼弟妹如已子從姪後升少孤公為檢  
誨備悉後舉進士官至金華太守終不自言其  
德以此世皆稱為長者隆慶元年卒時年六十  
有二

俞子曰余與公善餘四十年公恬惓不附世榮  
曰嘿々手自讐校其書數百千卷以至沒齒良  
亦勤矣而卒不得少著見於時諺曰力田不如  
逢年此士之所以不遇於世豈盡人力也哉悲  
夫



南唐臨淄侯歛石虛中傳

石虛中者歛人也為人端厚堅密其先周時太公望與九人者佐武王定天下而石氏甚有功太公因為詞戒之曰石墨相著而墨邪心讒言無得汙白遂著之金匱之書以箴焉周末有與中山毛氏者贊孔子作春秋春秋成而毛氏去唯石氏孔子歿後猶留居廟中世由是咸推石氏而石氏族亦寡衍其在端歛者最有聲歛又為最值上無好文者浸遠跡當世唐開元中歛



屬縣有獵者逐兔至長城里遇石氏於巖穴間甚噐異之歸以告令而世復知有石氏其後南唐據有江淮歙郡太守始以虛中薦虛中為文有符彩好著綠縠單衣然在山澤久於國家制度罕合乃使其客李少微與之齧磨焉虛中為矻然變色客曰吾聞玉生於山制則破焉非弗寶貴矣然大璞不完君殆若此者乎虛中既至京師上聞之喜曰重客至矣召見祕殿虛中伸眉詣前直披腹心隨所任使意津津有以自得

也尋拜即墨大夫而絳人陳玄中山毛穎會稽褚知白三人者皆已用事虛中與三人者未嘗去上左右而後主尤留意文學寵至特至號為四絕天下亦謂之四友無何三人者相繼物故子孫以父祖積勞復見召用虛中老臣與後進雜處每嬰拂逆蒙澁心頗啣之一日上書倩客為撰草其略曰臣本伏產巖窟甘守鈍樸其地當連山蜿蜒狀象龍尾因號稱龍尾石氏而道險鬱絕鮮與世通不圖卒遇林虞轉偪州部



謬得躋金門上玉堂承清燕荷陛下之殊渥遽  
令發藻濡翰以吐宵中之竒臣時誠離割裂不  
敢以尸素自怠今臣已老敝又苦消渴疾膚剝  
角摧形色悴沮恐旦暮填溝壑不知瓦礫混體  
乎初臣與玄穎知白同忝供奉而臣實為劣今  
三人者忽並淪謝而臣獨碌々自以為有磐石  
之固老不知退塵毀之來嗟何及矣誠得還歸  
本土長保骸骨臣不勝至願書上上笑曰虛中  
生平無一言昔石言於晉石果能言邪愈益重  
虛中詔遣中涓給尚方金壺漿可療疾者并賜  
休沐封臨淄侯唐已後去民間十餘年莫知所  
在宋興多有言虛中者子孫咸至融顯矣贊曰  
漢石奮父子皆以端厚不言躬行見重其主虛  
中含玄養潤而臨事察々無脂韋之態豈其苗  
裔耶司馬遷以石氏為篤行君子虛中近之矣



仲蔚先生集卷之十三

吳郡俞允文著

墓誌銘

正友周子舜墓誌銘

子舜諱鳳來姓周氏吳郡崑山人也曾祖諱璩  
贈資政大夫南京刑部尚書祖諱紹累贈資政  
大夫南京刑部尚書父諱倫以進士授新安令  
擢監察御史累遷至都御史南京刑部尚書進  
階資政大夫贈太子少保謚康僖公有四子鳳



鳴大理丞鳳儀太學生鳳起太僕丞于舜公最  
少子也公尤愛之嘉靖初公以都御史嘗巡禦  
江南歸鄉里太守郊迎州縣吏相推排擁車騎  
出入威采甚盛是時大理丞並有名跼父子顯  
尊西都莫與為比而于舜穎敏夙持童孩已如  
成人雖生而有黼黻梁肉之饒樂非其好也為  
太學生即不喜握麪諸生間乃獨依林攜堂櫺  
軒回環以文木為壁甚精日燕處其中以閑絕  
人事罕嘗至其家好釋氏書因取釋氏所謂夢  
幻泡影露電為六觀者名其堂自稱六觀居士  
悉出其藏數千金購天下奇書圖画及古彝鼎  
璜玦之屬合珎怪衆物居之以歛其精英又難  
奇香令芬氣馥越苾勃篁竹間翳翳如輕雲出  
山熏日夜不歇游其堂紛雜盡屏眇然長懷有  
幽人之想故同郡楊公循吉有當世重名時年  
八十餘矣奇譎寡合獨嘆其高雅為綴記其事  
人士往往翹企思與之游焉能為五言詩善楷  
法多放依趙孟頫通古今名物辨證剖剝有卓



識諸稱洽淡者莫之能析也然醇謹自視常慚  
慚飲酒至醉能為莊語人或犯之亦終不以屬  
意尤悖行孝悌遇宗黨雖疏而有恩年三十有  
三嘉靖三十四年五月十六日以疾卒娶徐氏  
先卒繼娶吳江趙氏皆無子側室強氏生子男  
一曰汝蓀女一皆幼太僕以濟南監鹽官廉卒  
獲遷比歸遂卜以三十六年十一月三十日葬  
于舜于縣東南車塘錦里原先塋以徐氏祔焉  
先期以其孤來請銘曰吾弟臨歿時嘗有託於

子也非子無以俾其有聞嗚呼夫于舜以貴游  
名公子能自出於常習之外以恬佚為高而又  
汲汲于躬行之實可謂士林之逸秀者矣卒以  
夭折而使其賢盡于是誠為同志者之所痛悼  
不獲辭乃甄述其休美為之銘曰夫既溷溷紛  
不可徙兮幼志淵離若天所啓兮剝榮以為華  
所貴在己兮深閑外拒抗跡自處兮懷瑜握蘭  
蘊內美兮行之專專不逮是恥兮俾耆老者稱  
賢疇不可喜兮賢不受年竒願未止兮吁其太



息菟又何以身殞聲名垂永邁于先軌兮

亡女壙塹誌銘

亡女者予之首女也年五歲而天生即嗜病遭  
予之窮多故故自喜賢於生男撰為詩篇以戲  
之女既病益慧語班班增出非平時所引視說  
家人私以怪女不敢顯言然病數變日瘳乃氣  
滿水浮膚衍缺益以嘉靖十八年八月三十日  
後其生二日死遂以其冬十有一月葬先廷尉  
府右墓封外東北三十五步刺辭於玄塹辭曰  
吁嗟令女含和嫵柔瓊枝翠華秘玩藏幽奄忽  
而然飛遁焉求轉屍中野棄而不收關節不任  
枯腊伊優令辟為坑蓬顆為丘有桀松柏液錮  
膏流寧披重雲靡盡郭周千歲不食變化為芻  
哀哉恻恻沉憂

明故鄉貢士梁府君孺人狄氏墓誌銘

孺人諱某姓狄氏考存耕翁諱散妣虞氏兵部  
侍郎諱祥之孫封兵部郎中諱震之女存耕翁  
素饒資財而外家又貴孺人為翁最少女愛之



擇壻必名族乃可乃得梁府君府君諱九萬其  
先元時有諱元德者知崐山州事因藉藉為崐  
山人逮今二百餘歲仕官不絕而泉州別駕朝  
列公諱紉實生府君府君高明行直方與人不  
輕合為文藹質而豐於理甚有聲稱工部侍郎  
李公充嗣治水吳中聘府君教授其子親往謁  
其門傳瑞燕奕時人莫之比也然卒不遇時以  
貢士詣選部客死臨淄道中孺人年十六歸府  
君敏惠端嚴能盡婦道事尊嫜孝謹處娣姒間

委曲合禮府君媵婢七人而孺人遇之無嫉妬  
之嫌悉平均有恩如母子用是中外推為女憲  
孺人舉二子不育諸媵婢皆無子府君死以仲  
兄高唐別駕諱鳴鶴次子介為後介為平陽訓  
導死平陽生女子五人其三人嫁學弟子朱景  
太學生張廷傳縣學弟子張道隆皆夭死其  
一人嫁太學生嚴汝賢又早寡今為其妻者且  
多病而貧不能以養其母孺人泣曰天乎吾命  
之不良乃至是耶遂斥斷葷食日夜哀禮事佛



能出世之頓惱而願生西方夫人苟非哀窮戚  
之極則無以興安思嗚呼哀哉嘉靖四十一年  
五月十五日竟鬱鬱得疾死享年七十有六子  
介娶周氏孫懋元以孺人既死之四年卜四十  
四年二月十七日合祔于 之原府君之兆  
而請銘於墓石其雖不能文竊惟孺人之賢宜  
偕顯融豐其胤嗣萃膺繁祉以光紹其宗而天  
之報施咸缺焉是非追憫孺人之潛德若夫悲  
哀窮戚之思與死之月日則何以傳後世而安  
神心輒為之銘曰嗚呼孺人懿德是將誕生令  
族配合孔良之胡不泚率逢其殃莫寄其悲願  
生西方彼昭昭乎而第蒼蒼曾慟厥靈不俾予  
臧歡幾何其憂獨長咨后媪子孫來世之慶

張母鈕孺人墓誌銘

孺人通進張公諱寰之側室也姓鈕氏其先世  
淮陰人嘗客遊吳遂為吳人父諱某母許氏初  
通進公元配王宜人三十餘無子而祁州府君  
惟生通進一人甚憂繼嗣遂擇娶孺人孺人歸



張氏年甫十五又四年遂生子恒慕為公之長子時祁州府君以為張氏有後矣公妣徐太宜人與王宜人皆厚愛之府君高才不羈未五十到官輒自免歸公亦大度鮮可生產而孺人年少惠敏實能贊理中饋稱賢其大人後公為刑部時恒慕方齡穉而孺人獨留于家延師教子嘗夜不寢守其子讀書比公歸恒慕已壯大能屬文孺人益有力焉且公去位後好遊名山歲卒數月不歸歸輒賓客踵至其門公有子四人

恒慕與其弟三人更共養公人比之陸賈公年且老齒危動肴饌非溫淳熟軟不能食孺人為治具極其精腴以為公歡公每過必留止踰期而更孺人平居布衣躬自紡績每當戶風寒竟日不解恒慕為張屏風坐側乃反不喜曰惡用此費為也其織畱即瓶罌救器不忍棄之處屋婦間始終無嫌間雖僮奴操之皆有恩某年月日卒年五十有九子一人即恒慕以某年月日葬于某字圩之舊墓而乞銘于余余惟孺人為



婦為母皆有儀法其子又退讓而能文能藝其  
母氏之潛德其於公家有累世之厚遂為之銘  
曰 婉婉孺人泚慎齊止克合于張摩公胤嗣  
奉公之終後公而死載祔于公惟千萬祀

沈孝叔權厝誌

孝妣諱象賢姓沈氏其先山東人也元末世擾  
亂徙蘇州之太倉後復徙崑山今為崑山人曾  
祖諱祥累官至四川右叅議祖諱時以進士為  
泰和令父諱侑太學生母項氏孝妣生 歲而

喪母十三而喪父獨繼祖母夫人馬氏在孝妣  
既幼不能家家日已賀稍長乃砥行讀書夙自  
振拔師事其從兄世妣受左氏春秋頗能綜其  
終始為文詞婉約有度試補為邑諸生邑令王  
公廷盧公宁得其文咸加器異而孝妣亦自念  
取科不難也然每試輒不應指意卒卒不樂歎  
曰吾少無父母即無以自振拔寧復與里中子  
逐逐耶遂與同輩浸遠性本嗜酒至是亦斥絕  
不食閉門歲餘以嘉靖二十五年九月十九日



竟憤懣病死年三十五妻王氏封禮部郎中時  
賜之女三子守愚守謙守  
之兄子也守謙為後其從兄同姓聘陸氏二十  
九年九月十九日權厝溘瀆浦問字圩先塋後  
兄文焯與其孤守愚以銘乞予嗚呼孝姓以醇  
懿敦默之資而遇人甚謹雖羣聚嘲謔竟日而  
孝焯獨含胡不間發一語與孝姓遊者莫不愛  
敬之及聞訃莫不痛悼之而獨以銘屬余余其  
可辭也予嘗以為士不能有所發明功名于當

世則務存乎其言故身死而行事不得與之變  
然非積累有成學與得所因附亦何能自致于  
遠也每覽書傳所載其事若此類者多矣而未  
必皆若吾孝姓之賢也今孝姓既困阨且天又  
不幸而不得其人以傳則吾之知孝姓者自吾  
而止矣嗚呼吾誠悲孝姓之無稱焉以自忽也  
銘曰世適適壽頑齡子搏搏天啟生衆益晉輶  
紛榮子獨鬱意不盈羗邁愍含泚清罔攸憑殞  
鴻名經日月迫西傾篤繁祉後後成



故處士程汝義妻汪孺人墓誌銘

孺人姓汪氏休寧漢川人也父處士諱尚誼母查氏孺人為處士次女適同里程汝義生子男二長曰善定初娶商山吳氏淨之女繼娶大宅陳氏鈿之女次曰善夫未娶而夭孫男一曰起家娶五城黃氏漳之女孫女曰孺人端敏柔淑克閑四教而又詳於女紅夙標令問始自為婦而姑金安人已即世恨不及養乃并力中饋晨昏必求腍味以奉其舅氏備孝敬之道舅繼室

汪氏持家急諸婦頗嚴事之不敢近獨孺人愈昵事之甚謹異其悔悟後汪氏果自慚悔以孺人為賢孺人睦娣姒亦靡不盡其誠愛由是一室嘻嘻如居父母家時也舅嘗以舊廬湫隘欲旁拓之而儻後喧繁一時止與治辦孺人以介婦輒身先井臼給食而事率以倚辦舅既家居令其子行賈取什一之息汝義行賈歸必悉致其息於家不以毫毛自私篋中蕭然如未嘗賈孺人益為織黼脫簪珥佐之終亦不私一錢人



咸謂汝義之行義多孺人助成之也亡何而汝  
義客死嘉定孺人聞之每至痛絕以死自誓時  
二子尚在髫鬢親舊相為勸沮孺人乃為損哀  
抑志日夜盡瘁營克其家長養訓成其子家浸  
殷郁踰於汝義時而又能周亟恤孤推賢中外  
之黨于時二子更行賈而善夫仍客死善定吳  
氏婦又死孺人哀慟邑邑成噎幾十六年善定  
編求巫醫不能療陳氏婦乃為禱神割股肉作  
糜粥以進孺人食而甘之疾亦良愈已乃命善

定曰汝生產積著俱在崑山豈可恚委它人其  
往視之既而善定至崑山患危疾孺人疾亦亟  
動竟不起是歲為萬曆四年丙子八月廿九日  
也享年五十有九善定卜以萬曆己卯年二月  
初四日葬孺人于古塘山之陽而以汪君禹父  
狀來乞銘余惟善定生平痛父之早世今又以  
疾淹異縣恨不獲親母氏之含歛無以致哀其  
親謂非墓銘則貞淑之操無以昭著於後且謂  
非余無以志具其事余既嘉孺人之賢而善定



孝之篤又如此其昌能解輒為之銘其墓石銘  
曰於惟孺人天茂淑姿爰丁鞠函矢志不移  
為婦而貞為母而慈中外肅穆允式其儀宜享  
萬年奄然以歸哀哀孝嗣罔致其悲後後之知  
刺此銘辭

吳孺人權厝誌

孺人諱金玉姓吳氏休寧高山人父諱淨妣程  
氏孺人自多性姿端敏初舅氏程公汝義為其  
子于行擇配委禽焉既而汝義客游嘉定值島  
賊劫掠困圍中得疾死遂旅孺人時尚髫鬢聞  
之輒中夜飲泣悲傷竟患羸室不能有瘳比歸  
程氏亡何而姑又痛其少子夭折病膈噎加甚  
孺人日侍側扶携進湯藥為寬言慰解嘗念言  
觀音大士能拯拔諸苦時為寔禮求代兩膝至  
皆繭起無情容積數年而姑疾良愈人咸以為  
孺人孝誠所感以至至中饋睦外姻致勤盡敬  
並有儀法然生男多不育唯生一子遂為于行  
買妾而身竟以隨產死是歲隆慶三年八月廿



八日也享年三十有一子男一起家娶五城黃氏漳之女女三許璫源吳昇潮五城黃惟兆其一尚多于行以孺人卒之後三年春 日權

厝于鳳林之原將更卜良壤以葬持其狀乞志夫女子事尊嫜而能隆孝敬之實待妾媵而不蓄嫌嫉之私雖古女史所誠無以有加而孺人之賢於此是為至乃不克永其年悲夫聊為志其大者于石辭曰 行之淵子而命不淵天之常厥德子不常者為酷獨罹此酷而長冥子何九陽之不燭昭昭者唯銘辭兮于以志夫陵谷

三兄階甫埋石志

君諱允升字階甫踈達有才臨事能隨口辨折年四十為諸生家貧不得意益負氣不肯屈人乃求事可以見功業取名聲於時者以為吳非有南金象齒寶玉丹砂之饒而獨藉於田農田農之務莫急於水利然水利不修歲遭旱潦百姓荐饑常賦不登

朝廷時有霄旻之憂故因刺直單諤諸子水利



書條其可施於今者上御史呂公洵呂公大悅  
檄州縣齎糧令得浮遊五湖間相水利害之所  
由仍令與海虞鄧公等撰水利圖考頗以工費  
浩煩宰相又屢言災荒卒不果行後數年海壩  
盜起乃復言謹斥堠及練兵錢穀之法數十事  
太守王公通行與語合延為上客因留館郡東  
南佛寺中時步入府議事稍不合輒為危言撼  
之諸生時有在坐上者皆為屏息而王公益加  
禮厚居數月嘗苦瘧滿病甚王公為訪疾寺中  
復遺以金款歔不能去比歸數日竟不起是歲  
嘉靖四十九年四月十二日也享年五十有四  
王公行縣親拜其喪為文祭之言士徒以無用  
之文希取世資至於臨事則錯愕不知所出曷  
若吾子通明權略研窮當世之務論事成敗得  
失即衍稷下諸生何以加焉而竟淝淝困於繩  
墨以死豈非命耶痛哉生平所著復有時政十  
議蕪湖志蠓磯山志若干卷並傳於世初孺人  
顧氏福建漳州照磨鼎之女子男一人大猷武



科舉人娶周氏女三人繼孺人周氏女一人孫  
男二人溫舒仲舒女二人大猷卜以隆慶元年  
九月十九日葬君於夾潮塘先廷尉府君之墓  
俞氏之族不著顯府君又蚤世而君與弟允父  
允濟皆少誓以翼相覆掩庶幾終自振拔未白  
首而復相失誠有罔極之痛不能文故特叙其  
行事與死之月日而志諸石

三弟季通墓誌

季通余弟也名允濟一字楫甫先廷尉府君早  
世余兄弟三人季通最少鮮師友之訓性穎敏  
獨好書籍架上嘗疊數千卷尤喜莊周韓非司  
馬遷淮南八公之書纂其玄言而誦習之以為  
文然率與時齟齬年至五十每歎無所見於世  
思欲托事以立名節在諸生中有屈者輒徃直  
之語人曰即死後世亦知吾能以義自累其生  
者也為人負幹局能兼他人之事所有先人  
敝廬傾陔不蔽風雨遂勛力經營二十年一旦  
翕起新之以易常觀榱棟連列軒櫺通明可晏



坐焚香而游娛其中余因名之曰清晏之室而  
季通於此終不敢少自休暇以為生則營之死  
則休之天之道也知者咸謂其才見用宜大有  
益於世而竟不得用故居常多邑々恨其時之  
不逢也隆慶二年七月二十日病下痢純血死  
享年五十有二妻周氏大理寺寺丞鳳鳴之女  
南京刑部尚書太子少保康僖倫之孫自幼竒  
警明慧知書大略雖族貴隆赫而為婦恭慎侍  
先妣黃夫人疾甚謹娣姒同居能先意通緩急  
無驕盈之習絕嫌間之言毋顧冝人寡居事多  
諮決其女計事成敗識大體類非女子所能嘉  
靖四十年六月三十日先七年卒享年四十有  
二子男一伯良娶陳氏行都司經歷陳簡之女  
女五壻朱世節縣學生縣學生秉僖之子王純  
府學生温州府推官一誠之子王協貞南京刑  
部主事執禮之子支如雷縣學生三錫之子顧  
震嘉太學生咸康之子伯良卜以隆慶三年十  
月十五日奉季通之喪葬於夾潮塘有字圩之



先塋以周氏祔焉嗚呼俞氏門緒不昌久矣季  
通忽先予而死其婦賢亦既夭折死伯良孤苦  
孱弱甫有室而諸女皆髻髻線斬適人余又哀  
夕淪漂骨肉遼索生民之艱殆極於此既葬之  
三月丘墓草生時日滋遠伯良將懼名字湮滅  
悽愴興懷請余叙其行事刻石而埋諸冢側以  
示永久是為誌

仲蔚先生集卷之十四

吳郡俞允文著

墓表

故處士朱君墓表

公諱佑字思順姓朱氏崑山人年六十有九嘉  
靖十八年九月一日卒以某年月日葬于縣東  
北夫字圻中樂涇東原先人之墓域左然其墓  
位以族葬冢累累不能容故別為墓以葬君葬  
後數年其孫熙洽謀立石表於墓而以狀來請



書君之出與其德曰曾祖諱某祖諱永父諱凱  
君沉粹而敏學家頗多藏書籍然遇火君獨聚  
其遺書藉讀之至老不廢通戴氏記諸書尤精  
朱子小學以其言為師楷教授子弟平生好調  
人之急而室怙如懸罄與人必擇而後交不利  
削責人人有爭訟者每待君而解用是里中以  
長者聞而君絕不求聞於人晚歲惟喜種菊花  
開時輒召儔侶飲花下意徜徉甚自得也君娶  
吳氏賢有儀法而以營劬勤治其家年六十有

三嘉靖十三年十一月廿四日先君卒權厝墓  
側逮君葬以二十一年月日始遷祔焉生子男  
四人惟新 女一人孫男 人女 人曾

孫男 人女 人夫朱氏其先世自曾祖而下  
皆有隱行以至君之賢宜顯幽而不揚今熙洽  
於諸孫最長穎然負才彥明經能為偉文辭取  
聲將日昌其家又豈非積德之所著歟因系其  
文曰朱氏五世善損益惠悃悞德惟君君之  
嬉娛保和淳蓄幽其光燾祉芬延垂子孫以家



成簾蓑致勤獲豐殷厥土敬衍室新塋松柏鬱  
茂爛滋榮刺文表之永攸寧

仰蔚先生集卷之十五

吳郡俞允文著

碑

嘉定重建啓聖公祠碑

天子即位之九年考禮秩祀乃以孔子至于今  
數千載為天下通祀而子孫膺世享之封易代  
奉之有褒無替而於梁紂尊為聖父而神位獨  
與七十子之後輩列于廡廢禮逆祀莫此為甚  
乃詔天下自太學暨州邑並建祠為專主禮祀



隆其爵為上公曰啓聖公復配以顏無繆曾蒧  
孔鯉孟孫氏及宋程頤朱松蔡元定七人用推  
聖孝以啟教本傳之罔極嘉定吳東鄙之邑初  
嘗奉 詔建祠然僻居學宮東隅門西向側出  
處所逼窄無以展禮飭事邑侯萬君思謙至官  
克勤大節亟用靡寧諮詢稽度爰擇爽塲協位  
之制歛羸宅徙齊事命日惟夏四月三旬而成  
廟既改作大壯厥初昭祀孔嚴俎庭生敬于是  
訓導施吳教諭陳文鉉邵本學生潘士英唐欽

克陸琦唐尹等來告願刻銘以紀侯之勤惟孝  
之大者莫若以天下養以天下養宜莫若舜而  
止于其身孔子生而父死長而疑其父墓處及  
母死葬于五父之衢而始獲誨于隗人軼父之  
母孔子養不及親至於今數千載卒能顯其親  
于後世為天下通祀此其孝信有踰于舜者惟  
天子崇孝敦本而其禮加隆于古昔能探孔子  
之志惟侯研滌道基又能闡弘德意勤於大節  
俾士民知教化之所由且是役也即事有漸得



政之經誠不宜專使魯侯泮宮之事著美前載也乃作銘曰 於昭孔公天粹醇德玄立制命應期五百誕育至寶含此聖極應世承循享祀則忒天子永思百神咸秩汰逆明順率禮作則光聖元孝不顯在昔肆詔邦畿爰暨州邑惟此廟貌厥初孔窄萬侯其勤實殫厥誠卜遷于休是經是營維臺巉巉維棟欲欲乃作石門合于大高斯廟既作是告是遷崇報孔嘉神樂其歌濟濟多士克廣德心振振萬侯受天之慶龍石刻詞以永令名

吳江縣脩城碑銘代

吳江古松陵地為吳越要衝昔吳越王鏐偏據一方始城吳江以嚴保障其後張士誠復拓為之逮 國朝奄有四海久屬承平城日就傾圮徃時海賊劉通施天泰等接踵入寇民遘遘莫能自保正德癸酉吳江蕭侯九成仍行營廢址益拓為之而民獲恃以無恐然平時吏至不三四年輒易去時亦幸以無警轉相因循不復



繕葺故自正德癸酉至今四十餘年而城之傾  
圯者亦已殆半比歲倭奴肆害率取路吳江危  
偏特甚德安楊侯適蒞茲邑戮力拒守又出顯  
畫大破賊於滕墩之野賊自是不敢窺境侯尤  
以賊勢未決非城無以自衛遂白監司聚貲贏  
糧協衆命日鳩工就功始事於某年月日即以  
某月日而城成千雉翼翼樓櫓翬翬百廢具興  
大壯厥初於是邑之士大夫相與歡慰請紀其  
事於予曰昔蕭侯之役王文恪公鑿為紀其事

民至今知有蕭侯今楊侯丁離亂凋瘵之秋而  
克以賢勞自著貽我以安以有完鄆侯誠有大  
利惠於我也盍紀之俾我後世知有楊侯不亦  
善乎余惟古之才賢能與民捍患興利者往往  
其遺蹟與其所載記未嘗廢也是以莒人持陋  
不脩卒取困敗而春秋於中城武牢成周之後  
必謹書焉以垂法後世况楊侯有惠利於民若  
此而可缺於紀述乎且方今 朝廷急於用賢  
之時如侯之賢而未獲顯用屈宰一邑施小利



惠於民吾固知其不能久繫茲土也茲特書侯  
之事以告來者俾知侯之心而不以怠廢則民  
之蒙利奚止一世而已而諸君之請於是為宜  
第余之言不足嗣王公之後而張侯之賢也侯  
名某字某復為之銘曰維吳之壇爰有松陵  
襟江控湖百川所經南綰楚越北走幽并粵昔  
錢王是經是營以捍外侮於焉是城我明之興  
實偃甲兵吏狎政玩日陔日傾蠢爾荒夷穢我  
郊垆揚侯之來是艾是懲誕奮厥旅以血脩鯨  
雁千萬年惟侯之慶敢告執政有此刺銘



仲蔚先生集卷之十六

吳郡俞允文著

行狀

先妣夫人黃氏行狀

先妣夫人姓黃氏世家崑山曾祖諱公祖諱公  
父諱公母陶氏夫人家世受農父稍崛起行義  
因散其所聚千金養豪鷹獵獵田間又喜乘騎  
有直氣生夫人夫人兄弟五人最長生而通敏  
不類初先廷尉府君失初夫人方氏聞夫人乃



婚焉夫人年十八歸府君府君時為諸生先大  
父視子嚴急子弟植立庭中令體不得搖家人  
以文字通口語雖媼婢強必令喉轉不得輒鞭  
擊之語一發無留行乃可時夫人故年少然善  
於候伺於所喜即有合能空資賄以赴家之急  
故大父數稱譽之以為新婦賢然時姊妹嘆喟  
滿室夫人与之居數十年皆結援有恩及少姑  
未嫁夫人為裝遣甚設如已女夫人為繼室於  
他族能兼禮之如已族故允文有兩外家而子  
弟咸憚敬夫人無毫髮可間指為私語先是府  
君官於閩越間及遷廷尉府凡四為理官無深  
文者必以夫人為之內也嘉靖初府君喪於南  
京夫人新寡而邑多繁徭耗其家太夫人陸氏  
昏夜抱持兒啼泣夫人事太夫人唯謹嘗私語  
兒太夫人春秋高兒無以事膠夫人心夫人居  
必疏裳祭必臨哭如始喪未嘗以他游謁輿舁  
媼舍日訓督其男以檢書傳令與邑中名士交  
通躬勤饕餮以饗賓客且日給其家百數十人



然夫人以沉度實無一錢意闊達如未嘗貧也  
夫人為人懽和口無留言奩無留幣齋物以賑  
貧族依義以薦疏姻在幼敦婉孌之儀既嫁肅  
移賢之美故夫人歸府君者三十有一年而中  
外欣欣無變詞矣夫人生子三人允升允文允  
濟皆學官弟子允升娶太學生顧昂女允文娶  
故太學生梁九萬女允濟娶大理寺寺丞周鳳  
鳴女孫男一人伯靈女四人皆幼夫人以先君  
卒之明年傷憂憤成疾後數年疾動疾病二年

嘉靖十六年十一月三日終于內寢嗚呼痛哉  
惟先君之強年年四十有一而卒以及天禍夫  
人後先君之沒十有二年年五十而又奄忽以  
罹鯁疾嗚呼天其暴摧折之有如是哉嗚呼痛  
哉不肖孤允升等卜以嘉靖十八年十有二月  
七日奉夫人之柩祔於夾潮塘先君之墓嗚呼  
不肖孤生無以寧夫人之居歿無以為夫人融  
顯罪戾崇於厥躬猶復含血被肉不能即死茲  
乃輟哭輯叙夫人世系行事敢請辭于大人先



生刺置丘窆俾榮著其輝於遠遠則不惟孤之  
幸蓋先人之大幸也



仲蔚先生集卷之十七



吳郡俞允文著

頌

文德頌

并序代

嘉靖三十六年春天子命侍御史河南尚公巡  
行南方公行部必先即學宮拜孔子廟見諸生  
及試其所有以敦沮勸先是學宮與孔子之廟  
皆毀壞不治唯蘇州暨常熟華亭丹陽丹徒金  
壇為甚公惕焉弗寧深唯孔子至聖而當世不



能用退而考三皇五帝羣聖人之行事與其書  
而刪述之盡經緯參贊之能垂貞明之法式於  
後世至漢主好文始立廟祀孔子選孔子子孫  
置百石卒吏一人守廟典主禮器大宰大祝令  
皆一人侍祠而非通祀後世寢以為隘乃遂自  
大學以逮郡縣皆得立廟學宮通祀孔子以為  
萬世師令諸生誦習講說其中春秋祠饗知法  
式之所由始雖三皇五帝之隆比茲為禩今學  
與孔子廟皆毀壞不治則何以示崇褒興教基

公由是亟命有司斥其羨財儼工改為飾舊基  
新命日而成剝陰開陽晦昧昭晰物睹壯麗之  
容人知道德之尊而諸生莫不憤悱麇集各竭  
精銳而興于學思不斁孔子之法式夫公天茂  
粹質純懿博達綜覽羣書詠備九德撫柔元元  
涵滌瑕穢所向豫震而尤克先本政以弘化厲  
賢風動四方昔僖公有脩泮宮之德文翁有儒  
化之美魯人歌之漢史記之矧公斯役之大而  
民曾不知有費務力役之煩是公之于文德可



謂有加于古矣能無頌乎乃為之頌曰

明明天子誕命股肱股肱伊何厥惟尚公尚公  
其勤巡此南方朱衣繡裳有乘惟驄炳炳其猷  
靡事不綜欽懿弘聖與天比崇萬世作程通祀  
學宮惟此郟邑遭時屯蒙荆棘不治真顯其榮  
亟用詢謀詢謀僉同不日而新以報聖功自門  
俎階自庭俎堂周圖新模刊落舊章離樓業倚  
髹彤焜煌征行生敬願昭難詳奕奕新宮惟公  
是營既壯既麗長世之經百用具備嚴祀孔殷  
登降有儀萬舞充庭增耀峻德撤暢威靈苾苾  
其馨有師之尊者老嘆嗟耳目發明莘莘生徒  
不戒以興以居以處率我攸行公斯勤斯敷化  
若神登進俊彥擢拔淹淪啓闇以昭革濁以清  
狂狷屬聖靡德不振令聞令望載觀厥成昔在  
濟濟周文以寧品物咸若泰階底平俗厚風淳  
鮮不在能惟公之威允薦斯城恢我教基光我  
文德唯公之功疇是能匹顯顯惟公受天之福  
既多受福永享千祿



武功頌 并序代

東夷倭奴肆逆毒流宇內出入數郡之間其郭  
外之聚並海壖與大江最近者尤為賊衝路得  
禰最先雖王旅致討而猶鈎脅黨與阻衆犯威  
稽留天誅未即底定以勤宵旰之憂徵師餽糧  
天下騷然蓋由吏士承平守備不完故也侍御  
史河南尚公被命兼監統軍事公內建忠弼之  
謨外恢干城之略踰年而義聲與稜威俱峻闔  
廓礮落邊境清夷乃以其聚並海壖與大江最  
近者宜並為城以阨賊衝而令役于有司于是  
遂度其所宜城者以華亭之柘林上海之川沙  
嘉定之吳淞江陰之陽舍鎮江之孟河為五城  
而居之而又申令羣司明其伍候戒其兵甲險  
其走集慎其官守以備豫不虞又寧黎蒸焉夫  
莒城惡持陋不備不決辰而楚克其三都君子  
譏其不備楚囊瓦城郢而不能衛君子譏其無  
益是故居安而圖其患患至而圖其備備設而  
慎其守文王之城朔方以禦四夷也而以南仲



宣王之城東方以屏諸侯也而以仲山甫詩人  
誦之後世則之以其能完守備故也昔五城之  
民得禍最先踏地跽天寄命無所今其父子夫  
婦皆獲熙熙處其室廬而狎其田野若渴得漿  
若寒得衣內外靖安流亡歸附豈非守備之完  
使然哉事大而恩重通悅而遠肅是公之于武  
功可謂有加于古矣能無頌乎乃作頌曰

溟海之壖大江之隅虛落林聚環水而居因田  
而耕因澤而敷目化鋤耨耳絕戈爰天下安瀾

沉潛樂胥民之泮無實弘我亂婪婪東夷逞其  
雕悍嘯呼煽熾入我郊畝白骨交野凶播禍近  
惴惴姬姜號天以竄將無專謀兵不宿募營戍  
相潰羣妖周環惟此鞠訕日生月胤英英尚公  
惟良惟聰既文且武齊邁羣龍克簡帝心朝議  
惟同式是明命是經是營監我六師以董不蠶  
六師逢逢靡不率從遂成其衝謨此大功連連  
海壖細細大江臨臨新城螫賊是屏休我黎蒸  
靡有震驚忘此號竄笑語歡迎是田是畝里門



寢扃匪公之謨曷賴以寧既寧以急鮮不斯墜  
商恃孟門而國以敗梁溝公宮而民是潰惟善  
之大善在守備公實事事既嫗既响保我封疆  
以薦伊祐我儀其人南仲山甫物有繁植人無  
扎戕嗟我庶類如熙春波我公之功猶彼山河  
不竭不磨億禩靡加

保障江南頌

并序

嘉靖三十有三年春蠢茲倭夷弗諱肆雲中夏  
大江以南糜沸雲亂婪婪狡衆狂趨渾奔攻燔  
城邑剽殺將吏百姓流亡歸命無所列校緣戍  
屠潰失守者難以比數徃徃告敗上京殆靡寧  
歲皇帝為之肝食晏寢推命上將卑之提鉞乃  
大舉楚蜀之趨悍齊秦之技擊羗戎之豪酋暨  
閩禺之楫師隱隱鞬鞬厚集堅重之陳十有餘  
萬期於殄滅乃已餽餉傾於州郡天下騷然夫  
驅天下之全力摧魁折之殘醜泰山壓卵未足  
稱喻然而師之謀律損費傷威亡士無功淹移  
歲月時惟侍御史汝南周公膺英詰之上資茂



卓邁之純德謇諤著節貞亮熙朝達變知機肅  
祇誕命監戎四郡保障江南示德示威有張有  
弛申誦明誓勒部按隊簡稽精堅采拔淪滯賞  
無費留罰不踰制援籌六竒之中決勝千里之  
外謨臣武將袷服繫衣之士莫不怫帽蓬駭爭  
驚推鋒而乃陸格矛盾海蓋艤衝雷厲風驅天  
旋電激建祀姑震鳴鼉藐觀乎高岡流慮乎絕  
垠橫厲睚睨肆險奔欲敵未及發刃已先加鋌  
鏑所從不期俱殪控絃生俘聯括腐骸棄所獲

蹂淫夷窟殫巢焚星流慧掃反旆回軫以恬以  
嬉凶頑既夷宿憤既摠而公尤以亂離斯瘼饑  
饉荐臻閭閻有杼軸之憂城邑無藩籬之固乃  
紀顏劉奏蠲免田租底力辭豐損滋示儉不矜  
不伐雖休弗休帝用酬庸寵以殊典進式多士  
載觀厥成炳文武其並隆兼威德而兩懋保障  
之功未有若斯之盛者也昔漢趙充國之伐先  
零竇憲之擊匈奴皆以才技權威希亂圖功窮  
城極邊躡武於不爭之地而揚雄班固之儔猶



著之銘頌至今稱之不絕矧公義在庇民忠惟  
效主游神禮樂之場夷凶財賦之壤俾決力於  
一戰之眇致元功於累挫之餘苟非被之歌頌  
則後世將何所稱法哉某幽介末才學慚庸陋  
雖不足以軼芬先藻揚闡殊烈然不勝慙款敢  
述保障之義作頌一篇六庶萬分之一也頌曰  
芒芒圓象渾渾方儀降祚有明拓統開基肇建  
皇極參黷以釐俊民用章九有以綏其一  
周所不臣漢所未征驟山驟水輦贖航玠狼歌

鳥譚玉潤金聲十聖相禪重輝嚴明其二

既輝既明崇極斯圮蠢茲狡夷犯威干紀猛勢  
煽熾趨譚駘騃揮鋒成霜飛矢成雨其三

火烈燎原所瀾浮烟載陰載陽上賴玄顏愜愜  
士女扶服踰天野有委骸填坑塞原其四

師無專策兵交卒潰稔寇資糧挫銳銳我既  
無素彼乘其契覆師敗績毒流宇內其五

環我華城化為敵墟兮我黎蒸化為敵俘敵強  
援闊城危氣孤我之不克日月其徂其六



帝赫斯怒誕命帝臣選徒十萬是討是震顯允  
惟公允武允文監我六師帝曰汝能其七

料敵合變恢我鴻算九地匪幽重玄彌煥濟威  
能寬處仁則斷臨危引義剋期剪亂其八

我師無方有紀有綱初服齊志渴鬪狂攘懦夫  
虎奮弱子鷹揚我矛我盾靡用不臧其九

左屠右勢至於海隅維綃揭櫓連艦接艦島驚  
龍掣汨薄空虚曷悟所歷惟敵之暮其十

于海于陸胥我王旅海扶脩鯨陸斲發窳彼鯨

既窳我噉我哺舉無失策謀無遺譖其十一

惟彼卒昏亡精怖魂進不及降退不及奔仇頭

髡鬻獮眼瞋瞞悔前之為誰乞予恩其十二

曰昔狡夷弗諛弗馴邈矣太祖斤而弗宥曷不

斯懲冥頑是嬰恣命不圖以冒天刑其十三

我之既克遂旋我師我憤既摠告功以時繚恢

閭懌穢慝清夷我有元功匪公孰為其十四

公有謹言蠲我田租我有饑饉公來其蘇夙夜

罔懈勞謙日躋極溺拯顛曾是以娛其十五



我盾我矛封我蘭錡休我師人藝我禾黍更造  
夫婦肇自父子化罔不漸澤靡不侈其十六

山甫補闕方炳禦侮顯允我公曠世同矩既擷  
其根又細厥緒明睿在躬靡德不舉其十七

洋洋惠風洗洗令猷運合道行益慎厥脩寵命  
紹至對揚天休文明內止武烈外彪其十八

湛恩弘濃元功郅隆作冠百辟克始克終天心  
愉愉薦成于宗旁暢協氣以及昆蟲其十九

千祥莽莽萬福穰穰于何不臻惟公是享孰克

明賢而不斯仰垂輝後世增曜疇曩其二十

邑侯宋公榮名頌并序

邑侯宋公蒞政之三年民稱乂安治理著效下  
孚物聽上簡 帝衷寵命荐臨方膺顯授七月  
之吉奉召叱轅公德在人感被自薦里歌巷詠  
麇至蟻也以往况今事絕稱喻於是邑之耆老  
某等慕切攀轅不期咸萃乃相率咨度思述功  
德以播遐祀粵惟在昔苟有遺愛罔不廟堅勒  
宗褒獎潤色况今親當其事而有缺於愉揚者



乎輒作頌一篇詞之優游文慚炳蔚其詞曰  
於鑠休代天啓洪聖克睿克哲龍德中正光臨  
九圍萬景齋鏡乃眷黎蒸登彼髦儁其一

燁燁我公特惟鳳舉英朗外昭冲夷內美式允  
帝求畀于百里于吳之疆我公戾止其二

乃振華纓乃綰銅墨屈己弘化示民以則激揚  
清流開灑芳澤上法烹鮮下規束濕其三

義後威稜機遊智刃巧刳不設奸渠自寢宿訟  
靡留疑詞惟允教以德宣情以理準其四

經畝匡後決壅流清徵歛以期蔗菜以勤我稼  
曷蓄我賦曷登衆瘼時蠲百廢具興其五

展宥有赫敷施其德夙夜罔懈既完既實積粟  
千箱鳴弦萬室曾是徒勞茂此殊績其六

惟時殷會入覲紫庭對揚王休最于百城帝曰  
汝賢詔于阿衡肆于寵命俾升于京其七

星言遙駕于彼翔塗慶雲翼軌祥風播旌我公  
于邁載馳載驅矯矯羣龍奮于天衢其八

煌煌播紳言鋪其藻皤皤鄉耆扶奉遺老非仁



昌親非賢昌寶民有常懷非公昌表其九  
所居民而所去民思尚想前良于傳有之昔聞  
其聲今親其來申頌斯章以永令規其十

仲蔚先生集卷之十八

吳郡俞允文著

贊

高士贊

并序

古之士有高世之名者非矯也而其行詭高而  
志精堅與溷濁不苟有

凡一世莫可以安

其生者故遂冥處

一壑谷之中以逸樂

其道而

焉及其與世澁遠行

蓋高志

乃以



其賢為

加幣蒲

輪之使一

斯人愈不至矣易曰

執之用黃牛之革

說又曰肥遯無不利

其是謂乎為性之所之

枉其才違害以

全其道者亦可謂誠去就之分矣故自周衰以

逮於漢晉擇其幾是道者為之叙贊其事凡三

十六人庶乎俛仰之間或可循其跡之所至焉

若夫身殞世難雖能外其生以起名節而亦不

能無累余未敢列之此篇

榮啓期

周五人

榮公者何九十行歌庶裘帶素安蛇同波行邁

尼父泰山之阿一言遵道三樂自多居常待終

豈識其亡

林類

魏有林類年且百歲底者

不行歌拾穗齊同

死生鰥游奚悔察哉若人孰喻其意賜也空聞

宣尼爰矣

原憲



原憲竄闕乘樞蓬戶匡坐彈琴蕭然獨處友賜  
軒車過謝其所榮豈其心貧病是剖一聞其言  
終身慚悔

列禦寇

禦寇隱鄭貧有飢色子陽饋粟而又不弗食晏為  
拊心笑對以意全身遠害冷然遺跡著書八篇  
垂世作則

莊周

莊生者何蒙人名周嘗為漆園吏與梁惠王同  
時學無所不窺其要本歸於老氏著書寓言以  
詎訾孔子之徒類皆空語沈洋自恣楚威王聞  
其賢以厚幣迎之許以相位笑謂楚使者引譬  
犧牛寧游戲汗漬之中以快其志倚歟先生遂  
不為有國者所羈終身不仕

四皓

東園公  
綺里季

角里先生  
夏黃公

秦二人

四皓者何河內軹人並時齊志脩道潔身退入  
藍田以避狂秦作歌紫芝共入地肺秦滅漢興  
徵之不至邀矣遐哉垂輝百世



顏福

顏福貴士論劇齊宣言適三五英風邈然清淨  
自娛車服都捐歸真反樸形神以全

摯峻

西漢三人

摯峻伯陵清節自治與司馬遷並襟齊契獨隱  
所山備德避世遷既尊貴乃勸之仕報書而言  
屏絕名利率隱於所所人立祠世奉祀之號曰  
居士厥孫曰恂博貫邁倫學者宗之亦慕先人  
遂隱南山徵召不聞騰聲三輔矣世載芬

嚴君平

蜀嚴君平性尚沉冥賣卜成都百錢自營閑簾  
授道著書顯情見得不苟幽操彌貞李疆靡詘  
揚雄數稱九十餘終嗚呼先生

鄭樸

谷口子真脩道靜默世服其高耕於巖石名振  
京師禮聘不答揚雄法言盛稱其德刻之靈陶  
祠于馮翊

韓頌

東漢十八人



韓順子良天水成紀經行高  
清微名不起王莽之末遂  
隱南山隗囂禮聘執操彌  
堅託蔭韜光山棲泰然不  
有頌潔曷考終焉

### 申屠蟠

申屠蟠者陳留外黃九歲喪父哀毀居喪家貧為傭見竒林宗蔡邕汲重辭讓靡遑隱居精學經緯兼明見滂獨歎絕跡梁碭屢徵不至咸勸之仕笑而不應終全高志卒老於家年七十四

### 向長

向長子平河內朝歌隱居不仕信尚中和好通老易家貧無儲受饋取足而反其餘王莽司空王邑辟之連年乃至欲薦固辭讀易致歎乃悟損益建武之中嫁娶既畢勅斷家事肆志自適北海禽慶雅好既同俱游五岳不知所終

### 龐公

龐公者何南郡襄陽居峴之南未嘗入城夫妻相敬有如賓朋刺史劉表欲屈不能乃就候之因而釋耕遂携妻子鹿門是登采藥不反噫嘻



先生

矯慎

矯慎仲彥扶風茂陵少學黃老避世隱名仰慕  
松喬導引長生汝南蒼吳素甚重之遺書觀志  
不答焉闕年七十餘竟不肯娶自言死期及期  
而訃後見敦煌或云神仙同郡馬瑤亦隱干泚  
免置為事所居化遷百姓踴稱馬牧先生

法真

法真字高卿扶風郿縣人博學無常家恬靜遠  
世塵太守不能屈天子不得臣豈飲洗耳水隱  
絕不辱身友人頌其德踰玄德先生年九十有  
力以壽終中平

高鳳

高鳳南陽人少時為諸生家本業農畝誦讀何  
專精潦水已流麥持竿猶誦經教授西唐山其  
後遂有名義解鄰里鬪懷感為投兵年老志益  
勤名聲日昭聞連召恐不遠遂託絕世紛推財  
與兄子隱身漁釣羣以此終於家懷哉若伊人



戴良

戴良對鸞汝南慎陽祖遵任俠稱豪于鄉自少誕節母喜驢鳴乃學為之以娛其情母卒居喪飲酒食肉任真過禮哀至乃哭才高尚奇論多駭俗屢辟不就迺入山中優哉游哉卒以壽終五女並賢嫁不為豐能遵其訓皆有隱風

嚴子陵

嚴光子陵本會稽人與光武同學少有高名光武即位變姓隱身帝思其賢聘以玄纁三及而至舍於北軍授書君房言多激昂得書奏之帝笑其狂帝幸其所欲助為理謂士有志偃臥不起帝復引入道舊致情因共偃臥上感客星太史奏之帝曰做終不能屈耕於富春建武十七帝復特徵年八十終倚欵先生

王霸

孺仲清節絕交避新徵拜建武稱名不臣閭陽毀之託跡隱淪妻亦美志共隱終身

郭泰



命仲蔚先生集卷之十一  
太原林宗家世貧賤恥役辭母就學伯彥博覽  
兼通乃游京縣膺尹河南一見欣贊洞徹天人  
委辭祿官指鑒雅俗遜違世患潛隱勤誨懷賢  
屢歎翔超絕軌冥跡焉絆四十二終一何其短  
無愧銘詞千春彌煥

梁鴻

伯鸞幼遭亂卷席莖若翁家須尚節介博覽無  
不通學畢乃牧豕牧豕上林中鄉里慕其賢欲  
女不得從彼美孟德雅三十猶未逢一言遂契  
合共入霸陵中彈琴詠詩書耕織聊自充慕古  
頌高士五噫忤肅宗易姓稱運期適吳依伯通  
伯通方舍之閉門潛著書既疾告主人慎勿令  
喪歸塋子羸博間延陵余所希伯通為求葬冢  
近吳要離要離古烈士舉世難與比嗟嗟梁伯  
鸞清節以偕

周燮

周燮彥祖生而醜狀母欲棄之父異其相謂能  
興宗遂留以養始在髫髻而知禮讓既長益克



專精禮易非聖之書斥而不習不脩賀問隱居  
罔測下有陂田肆勤目給非所耕漁則不以食  
宗族鄉黨罕得而覲安帝延光以幣聘之遣使  
送敬終以疾辭穆武嘉迫豈曰滑泥

### 黃憲

黃憲於度年十四時潁川荀湫竦然異之與語  
移日稱曰吾師同郡戴良才高倨傲一見罔然  
若失其高陳蕃周舉至於林宗靡不嘆服汎濫  
袁閎初舉孝廉公府復徵不就而終四十八齡

號曰徵君嗚呼先生

### 徐穉

豫章徐穉家貧力穡恭儉義讓入服其德太守  
陳蕃厚禮遇焉特設一榻去則復懸屢辟徵辟  
而赴喪祭炙雞束芻不告而去苟非林宗孰喻  
其意

### 焦先

焦先者何舉世莫知唯魏受禪獨居河湄卧不  
設席袒不著衣以身親土垢汗如泥食或數日



途不由歌後為野火燒燭其廬露寢積雪袒卧  
不移人以為死就視宛如卒以壽終年百歲餘

侯瑾

敦煌侯瑾字曰子瑜少而孤貧宗人是依性既  
薦學備作為資暮還其家獲柴讀書以禮自牧  
獨處固虧州郡屢辟並以疾辭作論矯世譏刺  
當時後入山中覃思著文西河之人敬而不名  
稱為侯君猗歟先生

姜肱

伯淮名族孝友天至博兼經緯爰來多士屢辭  
命高尚其事帝命圖形託疾韜被益固本志  
遠浮海滙七十餘終熹平之世

董京

威輦越俗被髮行吟幽棲洛社穢跡躑躅塵穢絮  
自覆反卻佳縣答詩孫楚後遂隱身遺音寢處  
乃見玄真

宋纖

敦煌宋纖遠操沉默隱居酒泉門眾受業不與



世交不應州辟揚宣頌像馬岌銘辟矯矯神龍  
道炳身匿著書萬言年老弥篤厥後張祚禮聘  
敦逼遂陳本志不食而卒年八十餘謚曰玄虛

孫登

汲郡公和窟居無族偏草夏裳被髮冬覆義易  
躬精虞禁獨奏援古昭然莫知年數遵晦遁遙  
當海靡詒凌峰朗喟阮不能叩妙鑿嵇生幽憤  
乃搆漢矣神徵潛真內秀遺書蘇門玄叢莫空

陶淡

陶淡處靜性好仙術謂可祈年妙齡絕粒不事  
婚娶不營家室長於卜筮專精義易結廬湘山  
養鹿雪色親故候之移澗自匿後避州舉埤山  
之中終身不返莫知所終

陶淵明

有晉徵士曰陶淵明潯陽柴桑避世隱形當宋  
之隆以潛是名少有高趣博學能文文取旨達  
反得其真讀書大畧會意便欣環堵蕭然締結  
冬陳簞瓢屢罄慕古詠貧撫琴無絃漉酒有巾



著傳自號五柳先生性既嗜酒酒至自傾招飲  
輒醉曾不吝情刺史王宏欲屈不能命龐通之  
齋酒以迎先是延之適以道經次於潯陽日造  
淵明留錢二萬以助昏冥廬山惠遠持律最精  
強要入社攢眉而行樂天委分不顧世名初辟  
州府三命辭榮後為彭澤恥於自營即日棄官  
賦辭以明元嘉四年復以詔徵終於困窮六十  
三齡謚曰靖節嗚呼先生

循吏贊

并序

余既作高士贊竊以為士雖負高世之行而蔽  
名隱跡混齒編戶若使吏治俊峻必至慢賢後  
德亦安能肆志徜徉縱體簡傲自逸於巖石之  
下哉由是曲肱飲水而不能不勞心於御世斯  
其殆矣漢史稱循吏能令百姓乂安無歎息愁  
苦之心况高世之士而有矢志於時者乎且文  
翁任延尤恢儒崇賢章於循吏之中以終高  
士之操是知高士者非循吏無以自逸也故又  
作循吏贊



文翁 西漢

蜀地辟陋初若蠻夷文翁為守數誘進之乃選小吏受業京師數歲蜀生成就還歸又起學宮招徠子弟為除繇更以次補吏吏民榮之大化蜀地巴蜀文雅比於齊魯誰則為之實由翁始蜀人至今不絕祠祀

王成

王成者何當宣帝時為膠東相流民自歸治有異效宣帝褒之其用未及其名則垂

王霸

王霸次公淮陽夏人以豪役使遂徙安陵入錢補官能以廉稱雖習文法持法最平俗尚嚴酷寬和自名後以賢良擢守潁川宣帝嘉之寵數異焉司察陰伏衆驚神明治為第一京兆是徵再遷潁守治行益精鳳凰數集賜爵與金尋遷丞相封侯建成風采則劣長於治民漢興以來莫之與京

召信臣



召公信臣九江壽春明經高第起守零陵遂遷  
南陽務在富民躬耕勤農舍離鄉亭開通溝瀆  
復起水門廣溉田畝歲々加增仍為均水刻石  
防爭昏喪禁奢游敖抵刑盜息訟止其化大行  
吏民親愛任父是稱荊州刺史具上其能再遷  
河南增秩賜金治嘗第一少府是徵奏省冗費  
數千萬緡元始四年以老卒官詔祀百辟有益  
於民蜀以文翁九江信臣歲時奉祀貽則千春

朱邑

朱邑仲卿廬江舒人少為畱夫桐鄉有恩後舉  
賢良為司農丞北海太守治有高名入為司農  
身居列卿祿共族黨家無餘贏是時張敞貽書  
自明邑感敞言多薦時英終於神爵天子悼驚  
下詔稱揚嘉其潔清賜金邑子以奉嘗蒸初有  
遺愛桐鄉之民遂葬桐鄉立祠起墳顯々令德  
其在斯人

龔遂

龔遂少卿山陽平陽素有大節亦以明經官至



昌邑有聲後王嗣位日以驕溢尋亦見廢殊死  
群辟遂得減死以諫之力當宣帝時渤海盜起  
遂已七十歲舉能治形貌短小不副帝意帝始  
心輕終說其對曰治亂民猶治亂繩唯須緩之  
然後可行既至渤海郡以兵迎遂皆遣還遺書  
見情謂持鉏鉤悉為良民唯是盜賊乃始持兵  
由是郡中翕然而平乃復賑貸勸民樹蓄斥去  
末技賣刀買犢吏民富實止息訟獄在郡數年  
帝復遣徵以遂年老不任公卿欲以褒顯拜為

水衡唯以水衡專典上林共帳宮館宗廟取牲  
帝甚重之官職尤親卒以官壽沒有遺榮

### 衛颯

河內衛颯家貧隨師傭以自給建武二年除襄  
城令政有名跡遷守桂陽交州接境俗無禮則  
颯修庠序設婚姻禮和俗移易民居遠郡吏發  
乘船名曰傳役颯乃鑿山通道置郵役省勞息  
視事十年居官如家郡內清一光武徵還欲為  
少府會颯被疾敕須後詔載病詣闕自陳困篤



乃收印綬賜錢十萬居家以卒南陽茨充代為  
桂陽教民種殖養蠶織屨亦善其政民得利益

任延

任延長孫南陽宛人學於太學十二明經號為  
聖童以此顯名更始元年會稽都尉時年十九  
迎官以驚及到靜泊先祠延陵聘請高士董子  
嚴陵吳龍丘萇隱居高操四輔三公連辟不到  
修書致藥相望於道萇願備錄尋亦病卒延自  
臨殯不朝三日是時賢士爭往署職建武之初

上書王庭願乞骸骨光武詔徵九真太守賜馬  
雜繒九真射獵不知牛耕延作田器教之墾闢  
歲、開廣百姓充給駱越之民不知禮則各因  
淫好無適對匹延以年齒相配禮聘其後生子  
始知種姓尤多感德名子為任交守錫光化聲  
侔延領南華風始二守焉

王景

誦邨王景廣闕衆書薦能理水詔修汴渠應對  
敏給乃賜圖書滎陽以東商度地勢鑿山截澗



令相泗注明年渠成帝親循行三遷景秩以是  
知名後守廬江再修蕪廢墾闢倍多銘石刻誓  
又訓蠶織為作法制文傳廬江竟卒于位

### 秦彭

秦彭伯平扶風茂陵為山陽守以禮措刑崇儒  
敦教制定六親農月度畝差品有程所立條式  
詔並班行轉守潁川嘉瑞相仍肅宗再幸恩寵  
甚榮卒于章平允有賢名

### 王渙

王渙稚子廣漢郵人少好俠力數通剽輕晚而  
改節讀律明經為郡功曹簡賢選能舉除溫令  
境內夷清兗州刺史風威大行徵拜侍御從駕  
南巡還令洛陽平正居身發擿姦伏稱歎為神  
元興元年早就奄昏百姓追思立祠報恩羊羔  
素絲後代顯聞

### 許荆

陽羨許荆少為郡吏兄既早沒子世為嗣報讐  
殺人怨者攻世荆聞出門迎怨者跪願身代殺



怨家委去扶荆稱賢荆名益著太守王兢孝廉  
是舉遷守桂陽為設喪紀婚姻制度咸使知禮  
兄弟爭財荆自歸咎遂各感悔引罪求受唯荆  
在事十有二年父老稱歌以病上言徵拜建議  
竟卒於官桂陽立廟有風愛焉

### 孟嘗

孟嘗伯周會稽上虞三世為吏授命臨危嘗為  
戶曹操行自持上虞寡婦至孝養姑年老壽終  
以鳩見誣婦竟冤死莫察其辜當爭不行泣謝

去歸郡中連旱禱請皆違後守殷丹訪問其故  
嘗具婦冤引昔孝婦感天致旱時雨不澍丹刑  
訟者而祭婦墓天應澍雨穀稼殷庶榮舉徐令  
遷守合浦海出珠寶商販通市先時守宰採求  
無紀珠遂漸徙界於交趾至嘗到官革易前敝  
去珠復還百姓安人被徵當還吏民舉轅既不  
得進乃載民船遁處山澤身自耕田鄰縣慕德  
就家百餘當桓帝時楊喬上書前後七表不察  
區區嘗竟不用終於舊廬



劉矩

劉矩封方沛國蕭人少有高節州郡並徵叔遼未仕遂絕不應太尉朱寵太傅桓焉為辟封遼察矩孝廉稍遷雍令在縣四年能以禮讓民用化遷太尉胡廣再舉其賢為尚書令凡得四遷矩性亮直不附貴勢出相常山由失梁冀之後少悟乃補從事累遷太尉號為良輔坐免灾異尋以徵起時所辟召名儒宿德不通州郡順諫以默多見省用後以日食遂乞骸骨竟以壽卒

劉寵

劉寵祖榮東萊牟平少受父業察舉明經除東平令仁惠得民七遷其官為守會稽前政煩苛寵獨簡除犬不夜吠吏不侵漁徵為將作百姓見思五六老叟皓髮龐眉出自若耶百錢自齎寵為人選一錢受之累轉司空頻遷太尉兩免歸郡並以灾異在官廉素家無餘貲以老病終後世稱之

仇覽



仇覽季智陳留考城自少淳默里不知名縣召  
補吏選長蒲亭勸人生業科令嚴明賑恤孤寡  
督役剴輕化導母子慈孝雙成縣令王渙政尚  
嚴猛聞覽德化勉卒景行遣入太學同郡苻融  
心獨竒覽以告林宗謁覽留宿下牀致恭覽既  
學畢州郡並請皆以疾辭不就其聘雖在宴居  
必以禮整妻子有過勉冠自警喜怒不形人莫  
能測後徵方正遇疾而卒

童恢

恢作种

童恢漢宗世瑯琊人少為郡吏執法廉平太尉  
楊賜聞而辟之及賜被劾掾屬思歸恢獨詣闕  
爭賜抗詞賜既得理掾屬復來恢即不顧杖策  
而辭尋辟公府除令 賞善勸農流民徙居  
旣除虎害吏人歌之青州舉異遷守丹陽時嬰  
暴疾未至而亡弟翊漢文素有高名宰府先辟  
陽喑不行及恢被命乃始就徵除長須昌異政  
日彰生為立祠民不能忘聞舉將喪棄官言旋  
不復應辟卒於家焉



第五訪

第五訪者京兆長陵少而孤貧身自備耕以養

兄嫂暇則學文察宰新都政平化行三年鄰縣

開倉賑民一郡全活吏民豐殷順帝嘉之界無盜侵再遷護羌威信並申邊境見服竟卒官云

呂純陽贊

避哉至人納氣鴻濛含道棄俗秀景玄冲虛質

多變異世猶逢翔嬉洞庭行天以風時引長笛

龍吟大空溟々神化超然絕綜導藥延紀潛感

魯仲連贊并序

夫偉竒淋儻非常之人必非世所易有然必令

能令已重斷絕躡塵之中飛薄日月之表而非

如珠璣象齒翠羽犀布琉璃文甲生蠻夷窟澤

間丈夫賤賈所得而挾玩之也是故薰敗而不

為羞寡居而不為徒居前而令人輕居後而令

人軒辟猶猛虎藏之溪山之中搏物而食之夫

誰能制其短長哉於是作魯仲連先生贊

西戎狴狴靡國不震載圍邯鄲亦陷長平矯矯

先生是肆是愠責辟新垣復然魏軍秉節蹈海



解患圍城營梁紹晉萬國是楨約矢射書田單  
有勲偉哉玉貌猗歟先生

齊王田橫贊

余覽史記田橫與漢三事至尸鄉未嘗不哀其  
壯意氣危危然真若挾匕首當胸而人易死也  
又恠橫五百人慕義而從橫死豈非至著而莫  
為志其一人姓字何哉

赫赫齊王肇開土疆雷震倣窳龍變鷹揚爰率  
秦楚儋柴以亡肆紹厥旅時惟弟橫躡戰厥歟  
來走於梁惟漢截楚梁惟漢輔漢祚既登肆赫  
斯舉惟彼齊王爰度伊始是用卒斬義形烈士  
桓桓漢祖亦霄其淶

漢壽亭侯關公贊

惟公忠勇遭世孔棘赳赳虎烈披草騰跡協策  
贊主夙夜電擊洞關堅陣竦身刺敵效曹歸劉  
不忘舊德同拯天綱昂分漢室鴻運雖傾光靈  
允赫歷世欽祀罔不昭格神之休矣佑我邦國

孫臏



籌榮之行亦以其時徃徃刑徒卒為國師更駟  
顯画損竈曜奇齊是以強魏是以危秘哉籌榮  
讐滅名垂

金先生閒居圖贊 并序

先生嘗為烏程丞以非時解歸養恬丘園閑絕  
人事暇日乃命工繪寫閒居之圖以自娛焉予  
聞玉韞則山輝珠藏則川媚骨相既彰奚俟深  
鑿乃為贊曰

猗歟先生嶽峙川瀟托豪素以圖形儼珪組之  
在目體般般以安肆容商裔而恬漠舒玉趾于  
芳臯攬瓊藹于秀木熙熙乎瑩清真藻玄樸暢  
幽情于遠抱解塵絲乎近俗于是以延遊齡綏  
景福諒帝力之無施豈天刑之能束實仰止乎  
伊人殆云希古之高躅

陸翁閒居圖贊 并序

陸翁名 字 避世隱名秉心獨善寔池並

隴築室依林嘉樹列園芳疇匝舍舍太樸而無  
擾循四序以為歡若翁可謂抗迹區中逸情雲



外者矣猶子希臯索予贊翁之美夫以盛德之  
形容而俾缺于紀述甚未可也輒系之以詞其  
詞曰

茫茫大塊貞風浸薄粵若斯翁不彫不劉就閒  
曠而無為假丹青而有作忻眉宇之觀止仰襟  
期之遠託若夫穹宇靜謐周除爽廓脩梧掩霞  
喬松蔭嶠選擇玄圃之芝迴舞維山之鶴心有  
親于魚鳥身不煩乎耕鑿用天道以取資從時  
宜以為樂得性陋乎干乘養真擅乎一壑水綏  
景命之期不拘當世之縛嘉年式吾雖未接乎  
斯翁允已謂其高邈

貞孝讚

并序

休寧程汝義慷慨士也蚤世而殞妻汪孺人抑  
哀矢志日夜焚焚教誨兩子善宦善夫以紹家  
聲操行高潔有合典經未數歲而善夫又夭孺  
人哀慟病噎善宦身往泰山禱母年壽而孺人  
疾果有瘳比善宦忽患危疾孺人憂勞疾復轉  
劇巫醫靡驗善宦繼室陳氏年始二十惶悸不



知所為乃詎嘗所供養觀世音菩薩像泣敷精  
懇願拔姑疾既而潛剖股肉作湯以進孺人稍  
為強飲疾尋有瘳而善定亦就痊損里閭聞之  
咸共驚異以為孺人能堅苦節之貞陳氏能發  
慧根之孝貞母孝婦至性天篤是足格天而天  
祚之福也善定仲父汝玉亦以家門事行惧使  
湮泯遠乞讚詞以標女憲余觀程氏世德之盛  
流布四方綿遠百世衆餘萬指代起才指而閨  
闈之內處變能亨又有出於常行之外昭卓如  
此豈所謂行成於內而名立於後世者非邪且  
善定始以願孝抗義而來故余得周知之竊用  
嘉歎為之讚曰

穆穆貞孝實稟于天匪投于艱曷克以宣維天  
祐德宜康宜休宜膺景福曷艱是投引機喻訓  
勞耳見情進乳延年舐目還明嗟彼古列異轍  
同塗于千萬禩與之合符維貞維孝格于天慈  
天人交格家無癘疢允茲德徽庶其有赫令閭  
令望維內之則



金胤甫像贊

嗟彼髦士恂恂厥容不  
不佻以文自攻意語  
驚出理贍辭豐將翔將翔  
宜顯而融如何不淑  
以殞厥躬丹青寫真聖子  
圖中徹音往矣終古  
焉窮

仲蔚先生集卷之十九

吳郡俞允文著

銘

座右銘并序

余平居多病每念日月易耗而年且四十荒怠  
無成惧終泯泯竊自痛艾思所以檢身之方偶  
讀崔子玉座右銘喜其詞約而理至或可企而  
行之其後陳伯玉白樂天輩並皆繼作雖大抵  
不及子玉庶亦略盡矣而終非吾所自得因深



省其闕續為座右銘云

勿蹈人所嫌勿擇己所便當貴慎勿趨退而乃  
諱言臨富慎勿希居而厭其貧勿皆委諸命已  
則不能勤勿徇飄飄名反使喪其真固窮要之  
死弱操焉足敦嗜慾敗節義專貨則滅親浮言  
久乃賤多事生埃塵伏謀促天紀荒慮耗精魂  
享善難為基纖惡易成根善惡由一域共路險  
蓋門幸慎戒之哉永永令名存

口銘并序

余既為座右銘又嘗以古有歌罷挈壺玄鑑靈  
鐘曰罷並有深理足為鑒戒故復為之銘以補  
座右之未備云

歌罷

爰有歌罷其音鏗鏗不可以擊其體款款不可  
以糅基此虛舟胎乎湍撲履中斯正懷盈必覆  
顯顯君子尚象作則展彼天道有爰有食矧如  
之人悖之能吉保冲致和勞謙受益式是茂勗  
以永令德



挈壺

爰有挈壺窮神盡制揆景司刻適分昏旦參紀  
律曆物以榮衰時由代革一往一來微若呼噏  
日居月諸綿載萬億在古聖哲疾焉是惜孔亟  
朝聞周戒夕惕來短去多難得易失式是茂勗  
以永令德

玄鑑

爰有玄鑑厥象規規含此明德延光納照物無  
枉匿唯日與火反觀則忒人之能觀好惡是辟  
呈若茲鑑昭我真則妍媸互形裛榮畢集彼雖  
無知鮮不自飭鑑道若斯何有迷惑式是茂勗  
以永令德

靈鐘

爰有靈鐘豐山之崩天委異質應霜而鳴無假  
考擊惟以虛受亦以虛出清疏萬籟洪暢八極  
其來有感其去無迹既似俟時又類守默豈若  
庸音與衆齊律至弋希聲養器恒寂式是茂勗  
以永令德



龍尾石研銘

懿茲天琛出自幽穴含負太玄丁此毀缺沐之  
清源華星晝列粦粦敷文千歲不滅

井銘 并序

徐使君子與為藏書高齋其中庭深廣不踰百  
尺去庭之半累石為山山之隙穿土為井井泉  
清溢於茗飲最良凡盥漱溉滌咸于是乎取之  
子與以為是井於吾齋為有功宜刺銘以示永  
久銘曰

惟井之功利物實滋當暎而溢深緘不施清氣  
朝升踈寒夏淒神龍來蟠合耀重暉昭刻後世  
使君所開



仲蔚先生集卷之二十

吳郡俞允文著

誄

東海徐公誄

徐公諱

字

長興人也負義任俠而拳勇

好擊刺之術少孤養舅氏家舅氏有仇不能報  
公日夜袖鐵椎椎殺仇仇懼為謝過乃釋之家  
貧身自力作甚苦至與兄弟分財多所推讓以  
故人大義之晚未喜觀書大畧彈琴咏歌以自



命作詩先集卷之二十一  
娛其志又治山園藝二馴鹿嬉游其中益斥絕  
人事人亦少有知其盛壯時事者此其志真是  
賢哉公之子中行曩者以比部郎中以折減刑  
獄至吳郡乃辱往車騎款言相屬為余道之如  
是公時年八十安和逸豫誕綏寵命余因賦詩  
為壽以為比部使歸之獻今甫三年忽承委代  
遂令高義莫嗣遠識悼心嗚呼哀哉乃作誄曰  
惟徐之先偃寔誕興肇自栢翳合姓于羸肅肅  
鄰邦來歸其仁惟仁与義周當之昏于彼姑蔑  
以走彭城曰禹曰章葉散條分天降之祚多有  
聞孫爰在于公矯志貞厲依操俠烈游心材技  
所尚棄同匪曰詭異厥初不悼丁此哀瘁鞠之  
育之實惟舅氏公之戴之之死靡貳惟舅之仇  
我則云對亥椎晉鄙離扑秦帝人有之心千載  
一致潛耀蓬室底力自肆義發睦親辭豐安匱  
藹藹芳風遐迩攸彼惟此道性於何不淑曾是  
恬曠以就煩促逍遙琴書樹藝素竹眷言東臯  
延想林園候煦鋤新迎秋刈熟業謝兼求理循



止足養飼雙麋馴跡曬麓緱山御鶴鄴下牽犢  
人禽殊倫冥化偕漠皤皤鄉耆比德焉忍惟昔  
哲胤平刑惟明天子命我于吳之疆惠茂幽囹  
如熙春陽輿馬翹翹德音洋洋賁我衡闈束帛  
是將疇是拔俗以濟謙光惟時聞公既壽而康  
文亶亶賀言乃崇其慶彼居之子亦既堂堂鮮  
佯白華以莫不臧庶幾百年景福是享胡嬰寢  
疾遽爾淪喪嗚呼哀哉惟余與公曾未遘集欽  
賢懷仁有邁疇昔玃玃孤嗣增欵累悒踰日踰  
月予言莫及嗚呼哀哉天地幹運萬化相嚴夢  
生異塗趨死同城人世代門膠若糾纏其間脩  
短孰云能孰嗟乎徐公于茲永畢露泣新條風  
飄舊陌豈謂常然而不是戚嗚呼哀哉

明故刑部尚書顧公誄

嘉靖四十四年九月七日刑部尚書長興顧公  
卒嗚呼哀哉仁賢殞逝萬世同途而國失師模  
民且瞻恃寧不有遺愛遺直之嗟滋遠滋浚之  
感惟古誄德可以叙哀乃為之誄曰



昔自勾吳聿來長興爰及三世公斯挺生厥母  
夢麟龍首麇身應符啓運乃徵於神弱冠升朝  
詔使輜軒帝紀是纂聲聞九天遂佐於饒惟刑  
之理惟允惟明以息奸宄惟是屬邑狡寇震驚  
匹馬馳說授首歸誠僉曰公功禁衛是徵衛尉  
憑寵驕恣橫行公閑以法莫撓直繩出僉頌表  
以董屬羗師徒赳赳大旆煌煌于汀于漳凶醜  
劾勦雷震溫火實侵予疆時惟新建雄武光光  
公實贊之王略是張柳桂煽雷千里相望我振  
我旅神干鏘鏘方險既夷稜威彌壯進陟憲副  
分隸南昌逆藩始輯格徠叛亡夙夜在公智贍  
謀長讒口掇拾抑厭靡亢璿玉致美雖菽益彰  
累擢方伯齊變知方過矣滇荒苛慝易作乃遷  
中丞以拊孱弱議寬嚴嗣甄錄勲庸宣文教  
昭洗顛蒙資遣轉車賑給羈窮咸俾萬里歡歸  
舊垆化洽時靡四方攸同奄罹內憂承訃亟奔  
有于新典投閒杜門十有五載公望復振帝曰  
汝往再拊滇民救亂不棘事後歸仁越轉司寇



用削溪文克簡睿聰為國憲程直道見謹猜心  
害能改官南部引年見情寵命雖渥時黜青蠅  
遷延三載終以辭榮言旋言歸稅駕丘林昌祚  
弗延八十三齡倏韜休範永替芳塵嗚呼哀哉  
緬惟純德氣茂才良學綜百氏藝窮九章恥一  
不知殫思無方繼心溫讓體物弘詳潛德不居  
隱善則揚恪從王事允緝典常不忒不矜于何  
不臧惟帝穆穆思存厚終于以醜醜丘墓起封  
玄冥司節日月既窮誕啓辰龜筮龍從翼翼  
靈輻長遵壽宮嗚呼哀哉猥余薄劣叨承宴私  
燔膏宵憇命韻稱詩時加獎飾有邁等夷間嘗  
置醴扶榮相携躋躡丹磴田遲翠微雲心泉響  
林杪帆移神均遠託景曷忘疲循念疇曩有忽  
良知豈忘會莖攀挽素綏徒然負痾望慕增欵  
如何一往莫睹光儀嗚呼哀哉

故學士華公誄

并序

萬曆二年夏五月二十七日庚子明故侍讀學  
士奉直大夫華公寢疾卒于里第春秋七十有



八嗚呼哀哉公邃學懿範卓冠人倫長譽弘風  
白著海宇持懸謬賞彌積歲年未覲光儀遽淪  
晏景季子水部克纂先志仍遣訃言知音永乖  
有感偏識夫悽愴之旨以誄為先遂用誄之以  
累至德是知徐君墓樹終偃芙蓉之枝太尉帷  
沐不歆桂樹之氣其詞曰

邈矣遐胄宋之公族蟬聯條分允惟戩穀晉有  
孝子至性天薦天降之祚以衍嗣續爰居毗陵  
族弥熾興越有千祀公斯挺生純諒闔敏夷粹

淵靈含稟茂德弘劬舊聲弱齡擗藻秀拔入羣  
敦行孝弟研幾典墳麗辭合趣達意成文豐寸  
厚蓄廣記洽聞學優時至升朝入仕翱翔翰林  
超騰逸軌紛綸弘經汲湛析理靡曠不索無微  
不啓芳風颺颺讒口鏘鏘志隆位屈欲往違方  
迴跡民部出督淮糧託疾求免隱括韜光既塞  
而通乃佐共戎有此顯畫寵命是崇並召儒碩  
入侍彤宮雜難疑義以闡道宗公秉撝謙辭還  
舊秩亦既纂訓光昭懿實竭心亮采以贊王室



遂遷侍讀金幣載錫既建東宮詔諭殊俗屏斥  
賸賄傾夷震肅會置宮僚尋擬經局青蠅一穢  
終能點玉公復翻然乞覲歸還旁闢園治娛侍  
承顏親反不怡旋起朝班養隆雖敬順志為安  
閱試西京甄拔湮淪濟濟豪彥多躋顯尊帝曰  
汝賢將傳儲君人之醜正卒以訕聞清濁異源  
進退惟時公之攸好匪爵能縻允慈矯節晏容  
知幾棄圖獨善懷我秉彝乃葺家宇迺振初衣  
高謝纓紱益究辭棲剪剔蕪音以散清機機要

之妙曷盡於辭抗義尚行周亟振窮親踈加恩  
靡間初終結友恢賢能開心曾風期之昵萬里  
遙通亦既家居城府罕至言念城守狡寇橫恣  
首輸私錢堅其險備衆始奮作卒免陷潰且議  
時艱田野是經蠲徭科畝害耆利興鄉邑感德  
置祠見情居家入仕為世作程中歲好道端居  
保神精粹為徒滄滌穢氣頽齡可制還童反真  
如何不吊殲此喆人嗚呼哀哉生必有死位不  
滿德自古云然疇能不惻良璧掩耀秀木委質



行路增歎曾是為戚余以末學貧病荒沈罔或  
交頽課筆通心倏承良訃悔余素襟溘焉往矣  
莫報知音嗚呼哀哉



仲蔚先生集卷之二十一



吳郡俞允文著

休寧程善定梓

祭文

祭內兄梁貞仲文

某月某日某謹以清酌庶羞之奠致祭于故貞  
仲二兄之靈曰兄有闊懷洞無町畦衆或嘲哂  
兄能不疑兄有長才發為歌詩停綴是耻滿紙  
須臾延廣納新家鮮留儲人之有紛待兄而治



以兄之幹無適不宜晚竟齟齬計偕京師遭時  
警急顛沛莫支旅食風塵玉色就衰授教平陽  
負巖而居宵悻峒庠晝驚島夷祿既酸寒百指  
相隨日纏疾瘡若囚羈曾不幾時函問倏來  
念昔與兄重此睽攜與兄所苦終當轉佳胡遽  
以此去我長乖兄嘗自視世罕與期謂我于詞  
不以剝為於稠衆中獨異亟施我實庸鄙早落  
塗泥欲拔我貧處我幽棲兄今已矣斯言曷追  
兄之云亡奄忽經時歸骸阻亂復次河湄千里

游魂飄蕩焉依嗚呼終喪天竟何如日兄之妹  
于我而歸惟是先公與時抵巇亦既客死痛心  
未涯斯固何祥兄復嗣之人之哭死尚有等夷  
今我于兄實倍含悽死生道隔永絕音儀焚我  
哀言庶或有知嗚呼哀哉尚 享

祭朱侍郎文

嗚呼公有雄才早歲奮趾筮官行人遂遷左掖  
蹇蹇額額糾奸屏慝稜威所向靡不脅息然庭  
之內公譽有赫耳遷南京為京兆丞衆嚙信信



白壁青繩一斥不復解體家林公忠其勤惇實  
非欽江湖魏闢子牟之心惟公之忠實簡上情  
國爵屢加寵賚頻仍咸期大用以贊台衡胡命  
不融沉痾遽嬰天子悼我賜命優臻遣祭致哀  
營塋起墳輝映玄堂時以為榮公雖徂逝遺芬  
不泯矧厥哲胤克樹休聲有如公者雖死猶三  
言念其叨奉末姻預聞卜葬將迨嘉辰一旦萬  
古痛何可云敬陳茲奠以訣幽明尚 享

祭周虞林文

嗚呼虞林而至然耶子之聰明人不能加以為  
黼績非身之華與今之為又焉足誇乃獨謂古  
心之所奢古人不存其器完佳高敦周彝飭直  
其家徃徃異觀翠綠丹砂一室之內子之所安  
雜圖與画救暑徂寒子之嗜之忘事與餐衆嗜  
以目或不能堅子有真嗜膠心染肝從取其直  
千金不難子之于書劣歐與顏神入精出寸楮  
千言選擇毫穎循意所便自以伯英所未能先  
又嗜隱處庸游罕覲匪覲而選如遭屈抑意所



命何爲先生集卷之十一  
不堪奚啻有七子之所為人實迂之有不謂迂  
笑以為竒唯世所少乃始猜疑凡今之人匪勢  
則利猛獸鷲鳥所不能屈殖其田廬極心所詣  
及其久也禍亦隨至此子之迂吾以為賢子之  
死矣亦既三年復有如子吾奚憾焉興嗟于人  
人始云然嗚呼如子乃此乎止夫人之生肇自  
孩稚從壯而老形老神沮既老以沮以逮沒齒  
一何從容彼我意克世之是非殘於眉中白髮  
隨顛皆成老翁如此而死涕復奚從今子妙齡  
意願未已相視幾時奄迫濛汜假子有知豈復  
還期萬世之別決於一詞重泉九幽寧復余知  
醉子哭子惟以送悲

祭文內翰文

邈矣季子清風肅然誰其紹之先生之賢獨視  
千古篤行自專研綜典籍藉含腴以鮮蕞為文章  
相如馬遷乃與時迂亦復迂遭雖以薦聞非心  
所便臨組乍縲旋憇丘園隱跡矯時秉操弥堅  
閑心靜居心耽其玄籀篆邈隸草藁楷法至於



善画随意所宣上自王公下逮窮閭爭識宮牆  
肩摩踵駢徃徃四裔碑版摹鑄於惟先生立德  
立言遐迩景附猶海納川登享壽考九十三年  
子孫彬彬禧祉實餘資始守終德茂山洵今所  
追悼位與德愆邗失休範士失師傳胡不愬遺  
歸神下泉某忝姻末夙奉光顏心歆目眩瞻望  
靈筵申奠告哀以展薄虔尚 饗

祭張通進文

爾洪族之嬋媿爰初謀乎燕公劬清芬於累葉

揚厥聲之馮馮惟先生之啓運毓奇秀於鴻濛  
蘊內美之信備當蚤歲而奮庸遂牽絲以出牧  
應三州之大邦撫奇畫以弭寇亦恢儒而尚農  
憫人民之流亡若痼瘵之在躬司爽鳩而慎恤  
侔清譽於岱嵩忽累疏而披悃陳孝道於無窮  
既予告而歸養愛彌敦而敬隆伊厥考之眉壽  
信高朗而令終乃構廬於墓田精誠檄而上通  
巢玄燕於帷幕簡素心於帝裏被不次之殊渥  
登大僚而顯融肆出納於羣言猶虞廷之命龍



亮竭忠以奉職思日贊乎天聰丁九廟之離灾  
遽引咎以自蒙賦歸來以咲噉展五岳之幽踪  
遺秀句于巖頂走赤牘於塵中駕靡停於熾暑  
席長挂乎隆冬協風期於未覲即傾蓋而交濃  
胡冲懷之無忤必虛舟之有容故意雖絕于囂  
煩而名每薦於羣公猥承乏於閩浙幸先生之  
過從開固竭之情瀾露難挫之詞鋒矧綢繆于  
師旅表嘉頌乎微功嬰悼亡之慘毒又枉吊于  
哀宗感深仁之遠浹喜光儀之屢逢近嘉話而

非一飲湖上之青峰謂仙齡其必邁与邈邈乎  
比崇嘗綴詞以相祝匪空言而致工慨江郎之  
奄逝而速先生以自同方評信之暫踈乍遲疑  
而內訟竟承訃於莫救軫余心之不克聞哲胤  
之皆賢偉堂基之日隆且大暮之同寐奚憂歡  
之互攻然終古而永隔固弱情之所鍾聊寄言  
而遣奠遙灑泣於便風倘遺靈之未遠冀有鑒  
于哀悼尚 饗



處士張君者名冲字應和自少倅儻不肯學世  
儒循章句趨趨取困厄乃挾其貲行賈都邑間  
交驩諸豪傑取名聲久之輒復厭遠遊歸鄉里  
益治產業周貧卹匱振人之厄尤進交先生長  
者購古圖畫鼎敦雜器物珍恠與共欣賞然亦  
徃徃製為奇服抗趾巖石用自卓絕於衆以故  
州閭多稱之年六十而卒初余未嘗接顏於君  
幸托末契於君之子鳳翼翮翼而知君之行義  
出恒流若此又能使其子並以文學知名當世

豈不豪哉今二子方痛恨其父不獲登享遐考  
介膺景福欲託之文辭播芬馨於將來余友王  
元美已撰次君行事為傳因剽其旨為文吊之  
辭曰 惟瓌行之倅儻子卑俠士之甚謀懷愜  
恨之頗頷兮長鞿羈其若囚時冉冉以逮苟子  
何名譽之能脩决繩墨以自疏兮遂託志而遠  
遊遵上都以憑覽兮殷品物之混稠聊乘時以  
息財子競闐闐而周流交諸豪之翩翩兮爭赴  
諾而命傳聘浮雲以遨嬉兮依古俠以為則忽



瞻瞻而懷歸兮望舊鄉而整策悟羈旅之無成  
予循織畝以自殖構堂基其日增兮飭家行而  
不忒信中情之弘濟予亦周匱而振厄厦屋備  
施以濬邃予列珍恠而媮適尚世哲之優游兮  
乘清閒以娛集永窮年而究欲兮恣甘腴之所  
擇類向予之畢娶兮肆願志乎嶽石狎素侶以  
徜徉兮匪劬勞而遠歷承止足之誠兮庶年以  
遐逸胡稟命之不融兮遽懷和而長輯憫二子  
之訖斃兮慨殷恤而罔極抱永慕以繡綢予思  
以敬兮庶流譽於斯域

勅漢楊孫羸葬文 并序

王比部元美嘗為楊王孫贊嘉王孫生能厚自奉  
養及死而羸葬矣以矯世之厚葬者為高且嘲余  
之不知王孫余謂王孫之自厚其生既乖神聖  
菲薄飲食之儉又無至人延年却粒之術至於  
死而矯世皆非道之極也因戲為文勅之以示



元美且以自解云

煌煌神禹菲飲菲食爰在至人延年却粒王孫  
之奉甘膿自賊死而羸葬矯世奚棘以囊盛尸  
入地七尺又脫其囊使就真宅且氣所至疇物  
能鬲亡形亡聲奚化不得死而為鬼鬼既為歸  
鬼焉藉尸而久客為彼之厚葬損財無益死而  
矯世豈道之極堯之葬也可謂簡易胡既言之  
而不是或嗟嗟七孫是謂重惑吾恐祈侯將累  
其跡敢告冢人以正邪慝

仲蔚先生集卷之二十二

吳郡俞允文著

休寧程善定梓

雜著

原怪

天下之無怪也而怪之名立夫謂之怪必其不  
恒有於天下者也不恒有於天下而謂之怪吾  
固知天下之無怪也久矣既謂其不恒有於天  
下而又以為怪不以為怪必其恒有於天下



者也恒有于天下則不惟不以為恠而亦不知其為恠吾固知天下之無恠也久矣夫惟無恠是以恠夫惟恠是以無恠是恠之名也以天下無恠而有無恠者非無恠也以天下盡恠而無以天下之恠無而知天下之恠淺矣且天下之恠未必不始於不以為恠而不以為恠之始未必不謂其恠也昔者吳人之聞胡語也其始聞之則駭且笑以為恠三月始欲劾之三年而胡語者半又三年而吳人盡為胡人矣其或有不

為胡語者則反駭且笑以為恠而不知昔以為恠者今不以為恠今之恠乃昔之不恠者乎此四凶管蔡之所以名於虞周而未有聞于後世也是豈虞周之世不及夫後哉非也夫虞之世惟有四凶惟其惟有四凶也則天下必以四凶為恠周之世惟有管蔡惟其惟有管蔡也則天下必以管蔡為恠夫天下之所以恠夫四凶管蔡者非以四凶管蔡為恠也以其不恒有於天下者也不恒有於天下而謂之恠則後世之不



聞有四凶管蔡之怪者以天下盡四凶也盡管  
蔡也以天下盡四凶盡管蔡則天下必不以四  
凶管蔡者為怪矣此吳人之所以怪夫吳人而  
不以胡人為怪也吳人不以胡人為怪後世不  
以四凶管蔡為怪吾固知天下之無怪也久矣  
以天下之怪無而知天下之怪也漢矣是以天  
下之怪欲知其有也吾於其無不於其有欲求  
其無也吾於其有不於其無

漢印說

今世士大夫名印謂之圖書即漢之私印王球  
集古錄亦頗采漢印文而鄭曄又集七十餘印  
文名曰漢印式亦皆無所據吳郡吾丘子行工  
古篆法與子昂各集印文為譜當時即以為盛  
今所傳印文殊少漢法嘉靖間余至丹陽孫氏  
出所藏秦漢玉印三十餘鈕皆私印銅鑄官私  
印七十餘鈕其鈕各異有龜鈕駝鈕鼻鈕又有  
陰陽文子母印孫氏名損頗為博古秦漢魏晉  
及六朝印文類能辨之近上海顧氏已購得孫



氏印及次第購得三千餘印其陽文者約三四  
百鈕意皆六朝唐印文復縲戾不可辨識至此  
古法盡矣漢印篆多方頗用隸法最古刻手亦  
精今嗜古者雖極力摹之不能及也歎人吳考  
料好刻印遂書以與之俾知所自也

重脩大雲菴半野堂乞緣疏

伏以優鉢華開誕慈悲於玉象安羅葉變分舍  
利於金壤寶化於是西淪瓶水由之東注三千  
大千之界百萬億萬之門靡不離俗歸依隨方

供養模神貝闕光懸日月之燈寫妙珠宮影徹  
珊瑚之地真乘再啓釋經重維願鹿苑以何殊  
仰鷲峰而斯在若吳郡大雲菴之半野堂者蓋  
此都之妙域也曰廣陵之故園帶長洲之茂苑  
平臨龍腦斜抱雉城後枕崇岡前通廣陌銀梁  
飛渡八水環功德之池瓊浪虛涵雙塔峙雲仙  
之掌霞含古樹雲聚空臺自然清涼迴拔喧濁  
以斯妙域永籍閒安爾其劫代延長風烟頓撼  
松掠沓脆皆成白蠹之封獅座塵深盡掩青蓮



之相粵有上座滄浪勤事律儀專精象教以為  
絕緣者業廢依幻者法彰苟莊嚴之既隳諒禪  
慧其焉託載瞻堂宇篤志纂脩誓發一言弘薰  
衆願蔡將軍之崇基表刹敢擅當年孔內史之  
薤草開林請看今日願結去來之膝果用培廣  
大之福田薦貨如陵無煩入海投珎彌壞有類  
為山佇見五力均施龍慧刀于錦石千斤齊運  
遊智刃于栴檀轉移傾圮之危增煥丹青之飾  
牛沉讓潔雁塔慙輝庶十方法衆之郊初終茲  
了義熏一郡高賢之濟濟早勒嘉名謹疏

字義

余名文易曰君子豹變其文蔚也又漢張仲蔚  
常居窮素所處蓬蒿没人閉門養性時人莫知  
惟劉龍知之竊既慕其為人而於名義又協故  
曰用其名以為字若漢蘭相如司馬相如也蔚  
音未物二韻今讀不如未韻尉音暢為佳耳

平倭事宜狀代

謹奏為平夷賊以安地方以固邦本事臣某比



俞允恭先生集卷之二十二  
不知忌諱昧死陳奏已蒙 聖慈察臣愚忠無  
有容隱謂與今工部右侍郎臣文華所奏事理  
相同特加采納此蓋 陛下廣運之德不棄葛  
莛之言在古三五之隆殆無以過臣竊念倭本  
海中島居小夷偏隅殘醜雖雕悍狡猾冒死徼  
幸稽留天誅而惡稔禍盈殄滅可俟方今大舉  
淮齊之師發荆楚南越之勁卒及橫海樓船之  
屬衆且數十餘萬蒸氣成雲彌川蔽谷驅天下  
之全力摧偏偶之殘醜泰山壓卵未足稱喻而

淹移歲月已士無功四方轉輸傷威損費千里  
之內皆有峻防百姓顛顛處窮城之中朝不及  
夕而寇輒殺掠堦野俘培子女金帛攻城殺將  
未有去志新寇復來黨與日衆亡有寧息之時  
而統帥叅謀之臣曾不能臨敵制勝承 階下  
赫然欲誅之意上遺 聖憂哀憫元元蠲租賑  
救仍遣文華沉玉東海宣昭盛德必期殄滅以  
固邦本臣是以日夜焦惶發憤期死以圖報陞  
下之殊遇臣雖無狀屏跡草野不敢舍血被肉



泯泯轉死滿壑所謂屍未腐而名滅臣有弗願也臣聞王者之師雖云無戰然必有要其要必出於計數不達于計數而欲得意于天下是百戰而百不勝也百戰而百勝非戰之善者也况不勝乎戰而不勝勞師必久靡救必多故曰師之所處荆棘生之况盜之所處乎是知用兵而不得其要徒自毀也輒敢竭其愚忠以助涓塵謹條次平賊事宜如後

高皇帝初定天下倭寇數犯境嘗屢遣諭告曾

無寧歲至十九年乃遣信國公湯和往海上擇要害處增置衛所及城堡關寨等起遼東山東抵淮浙蘇淞閩廣數千餘里使烽堠首尾相應甲士數十餘萬戰艦大小千艘官以備倭為名守備甚密由是邊境以安今因承平兵革久寢守備廢弛以致寇敢深入有輕中國之心臣計今寇變未止兵決無期莫若及時於沿海要害處凡守禦之備壞敗者逐一繕治飭練戰士一如高皇帝時寇至必并力擊其凱勞絕其



便道毋使日久堅黨成寇之強為萬全必勝之  
策信威遠夷則自然懾懼不敢犯境况深入耶  
故曰先為不可勝以待敵之可勝斯之謂也

一

亡者千乘之國地方百里有兵三萬七千五百  
人今東南州縣小者亦非特百里而已而有江  
海險絕之阻散弱之卒每州縣不過四五百人  
且素無武備一有警急常患乏人去歲寇攻崑  
山自四月十三日至五月十九日寇始引去幾

至力屈兗威鉅城失守蓋以州縣既無武備又  
乏人揀援故也是以寇散輒轉殺掠如入無人  
之地非待召募 天子出兵不能格比兵至寇  
退而千里已蕭然矣臣孰計東南州縣宜稍益  
兵准古千乘十分之二使長有守備緩急足相  
揀援則寇亦不敢輕入縱入亦不得久留內地  
效去歲時矣

一

國家之法必計首級有無多寡行賞令兩軍既



接足不及旋目不及視若斬首俯取不惟緩敵  
挫銳而賊亦得乘間擊刺且每級重至十五六  
斤懸繫太重甚妨馳騁是以陷軍驍勇之士多  
緣首級遇害至使一軍失氣喪師敗績而首級  
終為它人所取甚非決勝之策莫若申嚴軍制  
什伍之法凡戰後計全伍首級有無多寡行賞  
或為它伍所獲即次同伍一等或斬獲雖多而  
身已遇害尤宜詳覈委實以所應得賞贍恤其  
家若各處募兵隨給同伍及親屬收領造冊庶  
軍士生有盡敵之心死有激勸之善

一

募兵者以其驍悍材技異於府衛常兵必能取  
勝故也近見諸郡召募如山東下邳處州等兵  
多有畏懦不諳戰陣臨敵恐駭屢致虧歟相次  
已迤轉資敵勢何嘗取勝有異常兵是誠設虛  
名而損實費臣未見其便也宜明勅所在募兵  
官吏務要躬親驗試果驍悍材技異常如兵法  
力卒死士之類方可遣發比送到所在行營將



吏尤須驗試詳委收用其名實如不相應即便  
放歸與原管募兵官吏一體治罪庶不至敗悞  
國計虛費資糧

一

訪得賊中諳水道及操舟善鬪者多漳州泉州  
福寧人漳州屬縣詔安有梅嶺龍巖有海滄月  
港泉州屬縣晉江同安連界有安海福寧有桐  
山皆負海阻民甚桀逆專以勾引番人殺掠為  
命梅嶺在閩中極南盡界鄰走馬溪下灣二澳

接廣東潮州走馬谿下灣有兩山障蔽無風濤  
險害賊舡每收泊於此桐山東北盡界接浙江  
昔漢時以閩中多阻嘗處其衆江淮之間而虛  
其地今漳州福寧多阻桀逆于閩中又為最即  
欲誅之不能盡誅擬合漳州添設通判官一員  
專任劄梅嶺福寧州添設同知官一員專任劄  
桐山照依海滄安邊館事例其月港安海可各  
添設一縣或謂泉州南安縣去府甚近民又稀  
少無城池自固宜以南安徙置安海南安都鄙



附近晉江同安者即割隸晉江同安海都鄙  
即割隸南安不必別立縣為省此議前已經福  
建都布按三司等官具奏誠為甚便乞即下吏  
部議處選擇賢能官員知其俗者諷諭和輯之  
天守候誠謹則民既近有所屬而威德宣行自  
消其兇悖之心矣

一

徵調如廣西湖廣等處遠兵發行常在萬里之  
外雖素踴躍兵其于離絕父母羈孤歲月怨曠

驗動不異旧情又性極貪淫所過侵害甚難節  
制煩費倍多如此久留亦易生變若必事不遺  
歸仍恐賊一旦竊發無以卒應擬合于近賊州  
縣明諭官吏簡募土兵就於各處募兵內有材  
技梟俊者使之訓練如毒弩長鎗鈎刀標牌之  
器嚴加程督一人學戰自可教成三軍三軍服  
習其氣必銳亦未必弱于客兵又不若客兵歷  
時乃至無救急之用也 以前件謹錄奏聞

臣本不得越分以干廟堂之議然實有愚忠伏



惟 聖恩特賜裁察謹奏

治水述

大理彭侯治岷山之三年考最居上 天子徵  
還京師以補臺諫之缺臺諫言官也夫言一人  
之得失莫若言國家之本政國家之本政莫重  
於財賦財賦莫重於蘇州蘇州歲運之米四百  
萬石是國家倉庾也而財賦皆出於水田岷山  
蘇州屬縣也竊為侯言之昔司馬遷云吳有三  
江五湖之利而宋趙霖又云天下之地膏腴莫

過於水田水田之利莫盛於蘇州吳越王錢氏  
有國百年唯長興一歲失稔享利甚饒比後頻  
遭旱潦屬者大水數縣滙成巨浸千斛之舟皆  
縱橫取路罕辯涯涘百姓斃踣萬狀莫能圖画  
田薄民貧國賦每至空乏不繼古今利害相懸  
若此何哉蓋蘇州地既低下而東北瀕海之地  
特高浙西六州之水皆流注太湖積水泛濫如  
貯盤盂謂之澤國禹穿三江導太湖之水乘入  
於海而水始定今三江唯松江洩水為徑後世



以太湖之水獨洩於一江其勢有所不逮故於常熟開二十四浦北達揚子又於崑山開十二浦疏松江之水東入於海民間私港又不可勝數由是高田引以灌溉低田賴以決洩至於瀕海之田雖高日懼鹹潮之害因作堰壩累水不得外流而渾潮日積諸浦漸湮法宜盡決堰壩近海置閘隨潮啓閉使有泄無入閘內港浦常得通流閘外淤沙亦近易為力若堰壩既決浦閘既脩苟非厚築圩岬一遇大水湖水隨風往

來則壞岬低田與水湯漉此築圩累岬之法尤為最要范公仲淹云脩圍浚河置閘三者如鼎足缺一不可故錢氏偏據一方專心田事蘇州有營田軍四部共七八十人又有潦清之夫是其享利之饒豈非人事之脩乎蘇公軾云浙西水旱乃人事不脩之積正此謂也今洩水要處吳淞白茆等諸浦大半湮塞閘廢圍壞水害日滋未死之民飢寒失業而部使猶相踵追徵以至田事輒以國用窘乏格沮不行是使地無可



耕之田民有失業之怨賦亦奚從而出嘗考永樂二年戶部尚書夏公元吉奉檄開浚其功最著其後正德十年又命工部侍郎李公克嗣重加濬治水害暫息時三法未備終非經久之榮為今計者誠宜朝廷不惜浩費博選幹臣推原水利相度事宜舉行三法置官精理以至盡力之吏必令越次推遷則人知沮勸建功必多朝廷無宵旰之憂而長有東南之利誠治安之業也方今三事謨謀緝熙帝載當無急於此者矣

之忠廣必能昌言之余不佞敢以是為規焉





仲蔚先生集卷之二十三

吳郡俞允文著

休寧程善定校

書啓

上王侍郎啓

伏念曠違所仰二紀於茲瞻企清光飢渴莫喻  
前同縣生顧咸和王重鼎皆傳諭深仁特賜存  
憶屬者敬純還時尤具委曲恩施不報罔知所  
裁恭惟明公碩望著於朝端清風播於宇內入



兼邦憲出總淮漕式分主憂允答民望天下豪  
偉強力之士日用翹首希冀片言不可卒獲某  
困躓沉幽為日滋久而含氣劣弱受性庸疎徒  
抱慚惶虛擲歲月行隳業弛有負夙心豈謂明  
公橫加德念辟從雲墮但覺魂搖是以仰德之  
餘寤寐難解兼多痾瘵寄命無期雲泥自乖音  
旨弥隔輒因敬純啣恩再往謹力疾牽綴五言  
古詩六十韻目之曰訓德意顯乎詞詞難盡意  
輕冒威重伏希汗流謹啓

謝大中丞銅梁張公啓

某性狹才卑年侵病迫不能遠跡流俗養真恬  
快有乖古人高蹈之度每以為愆大人含弘猥  
體逮下既以恩浹蓬戶仍加標署美名即使臨  
塵之中謬獲烟霞之獎榮踰羔雁愧溢立園辭  
讓未遑莫能自處謹因縣吏奉書通心感至增  
款良切糾結不宣

上張中丞所著詩啓

伏以中丞負高世之才統方隅之任精明勵治



聲實和長摛藻揆天深仁被物揚沉發滯卓古  
超今省時虛庸日尋痾疹矧乏丘園之美猥加  
羔雁之儀挹渥追慚係心靡所冀圖報稱實亦  
何階謹撰五言排律詩三首少當頌述又別寫  
雜體詩四十五首以備機彈儻定以一言當永  
為模範且塵困朽質誠愈於刷清源而蔭玄景  
也冒干威重弥切兢惶謹啓

荅王元美書

以者得奉手札兼貽所刺鄙文及惠贖前後重

疊雖時荷受非心所安竊自念生平多疾才復  
謏拙謬於時趣徃徃同里友生即有累歲不獲  
接面者以此世益踈之辟如鳥獸之性與人彼  
此皆少味耳故與世寢遠澹貧賤積漸使然而  
非喜為此也至於文詞朴野之極反復類古僕  
豈能遂託於古哉頃蒙所為集序於僕既不蚩  
鄙而稱引與所期待大浮本實雖私心冀於足  
下幸致非譽而遠抱慚惶豈有既耶但足下之  
文卓絕邁古知者咸謂類司馬子長今之人無



有焉是余之文將由足下不朽矣然亦寧無累  
足下知人之哲哉以此每不自安今足下才猷  
偉茂加富盛之年擢轉大僚統兵方隅遠樹旂  
常之勲使余巖石之老能聞而心醉之雖遠為  
慰所恨未緣即奉光塵消此慚惶耳聊賦七言  
古詩一篇以申翹企之情殊不足以勝足下之  
譏彈也一笑

荅陽曲王布政明輔

允文衰病日至切省疵陋短才無足取重當世  
獨明公相違數年遼隔數千里况一時勢分之  
懸絕而推誠下逮弥久益篤即以華札之微庸  
拙不能近古而遠辱嘉命損貶頻仍每用慚惕  
不遑致感某亦不敢自感以為已長惟明公清  
簡直方通明端雅專靜內厚而欲去時之僂佞  
諛佞之習姑與褊質踈櫟忤俗之倫為方外之  
交以暫遣而不必其盡賢不然則允文之課眷  
明公固非一世之知也且復張引廣為推之於  
人必不欲止於一己之知己也與善而不求脩



為德而必要終明公之大賢何謝古人某何幸  
而遭大賢之謬矐如此恨不能擔簦千里函挹  
光儀以展至欵信還聊附狀申候仰冀台慈俯  
賜矜亮言何能悉

與王建寧敬文書

蕭侍中子雲書梁武帝謂與二王比跡其名特  
冠當世而張懷瓘書斷又云隸書飛白入妙小  
篆行草章草入能梁武於書鑿覈甚精不為無  
見其書世亦罕傳今福州府學有子雲章草書  
出師頌是元時虎都魯沙仲威模刻可搨之

荅王元美

陶貞白傳緣疾動未便得書蒙示河南哀冊題  
詞甚覈宋公直以歲日叅駁謂非褚文是好博  
文過也此文諸書所載不同意其文佳喜為人  
書信意更定致多訛耳蕭子雲出師頌元虎都  
魯沙仲威摹刻福州學中嘗屬王敬文往搨竟  
不能得今聞索靖出師頌墨跡尚在文氏疑為  
蕭書須取刺本校之所鑿唐文皇及第進士咸



多肉少骨文皇論書唯主筋骨當不自悖其言也蔡米蘇黃諸帖輒為鹵莽題記懷素千文即深意求之固自險拔而乖處甚多且其性顛狂枕藉糟麪潦倒公卿之前書果止此即大人舍弘胡能斯須與之游處昔任華贈懷素詩謂其假張禮部得名是有憑藉故能傾動一時或其書不必皆佳或其少作得名之書必不止此豈其書專主峻拔它有不合更不復論未審足下以為何如

荅張中丞書

恭惟明公不遺壤室之疵賤名見舟船接觀踰涯實傾羣聽復承垂眷欲因元美園亭招侍清宴某不敢依違遇陋輒便追隨奉陪才座於時益復脫略矧以古人之禮雖長孫能廢龍丘之癖次公不棄許丞之聾無以過也不圖頭風竊發感頰攢眉偃蹇衆中有坊明公之威重竟遂辭避深村老生疾根頑固遇明公而不知自解即孔璋之檄將復奚為抑曹公之多釁而不能



不錯愕於檄詞明公之慈煦祥和使疾勢舒緩  
而難渙事固殊塗耳豈冀明公留軫重遣翰教  
副以腆贈禮隆仁至拜受慚惶仰企光儀跼蹐  
無地謹具蕪狀仍附縣差申復特希台慈俯賜  
鑒宥某無任敬悚感輯之至不宣

上郡太守范公書

昨奉干書詞兼友生繕寫所為詩賦皆鄙拙聞  
于大道竊以為持此以往雖竭情披素當益自  
折減不足以自通也不圖深仁遽浹傾注踰涯

揣分奚堪實出非望當時髦俊之士欽仰風旨  
希蔭光儀莫不聚目攢耳改視易聽以為明公  
之于允文殆古之所謂知己也夫所謂知己者  
言其本無聲援獨能擢舉眾人之中施恩不報  
之地乃為至耳今允文誠以為死灰不復然矣  
鍛翮不再奮矣而明公愍其荒沉不可變化反  
覆敦諭曲加獎誡必欲使不枉其性以盡其材  
良嗚呼明公之于允文固如此哉且明公道峻  
義方志廉行潔躬高明以持已不委順以隨人



命何處分生集卷之七  
叢名實于衆口定褒貶於一言其于人良不易  
矣而允文立談之間獨遇知于明公也如此是  
允文雖未必賢于人人而人固取信于明公不  
問其賢不賢而皆歎其知遇之不易也今允文  
亦不敢廣自張引嘗聞馬有能千里者其斃枯  
飲濁全集原野遊不出乎壇域歸必羈乎阜棧  
久與凡馬同也及夫寒風相口齒麻朝相頰子  
女厲相目衛忌相髭許鄙相胠投伐褐相胷脇  
管青相臄胸陳悲相股脚秦乐相前贊君相後  
而微表風生矣然而猶以形容勦骨也伯樂九  
方歎則忘其毛物牝牡覽其天機而已是其于  
馬至精也雖未遇夫王良造父之御不盡取其  
千里之行而天下固果信其為千里之馬矣是  
知馬雖不遇王良造父而遇伯樂九方歎則雖  
不能千里而有千里之名允文之遇知于明公  
雖不必賢于人人人固取信于明公而有冒賢  
之實斯不已幸乎夫事或可以幸于一時而不  
能持于延久今允文一辱高鑒遂將以為終身



俞何序先生集卷之七  
之幸是故幸莫大焉然允文分已委棄草野魚  
復疾弥曠其後徑無緣拜謁大府以丞挹宏  
論罄陳微悃茲承寵命荐臨而旌旆又當遠控  
南服雲霄日迫酬德無門循念始終戰慄無地  
謹撰五言排律詩四十韻庶幾榜人勞歌之遺  
伏惟不棄涓塵終賜甄錄豈勝至願

与王元美書

某頓首白元美郎中足下得去歲七月廿八日  
書兼蒙惠詩省之下念存至厚也間甚苦瘡寒

尋已復動殊馳情耳內史吳君足下未接清塵  
乃遠見延納即欲使推重于時之人而此公何  
以失鑿于僕若此豈足下必有浮實之譽念之  
真若負茫刺于背足下可為僕謝之頃自寇亂  
早曠荐加天地焦涸白骨募野萬姓惶惶靡有  
懷生之歡而僕從枯槁偃蹇其間雖欲冀善餘  
齒其可得乎若朝廷于此復無曠蕩之恩則  
弱操之子終不能甘殉溝瀆雖有漢水方城其  
無土崩魚爛哉恭惟嚴君勛實日茂寵矜弥



萬足下又以英才奉職自著美譽少吐一言必  
能弘濟艱厄不朽之烈矣在南征北伐乎萬賤  
之直不如一貴之曲况貴且直乎願足下留意  
焉不悉

答吳明卿書

某頓首白頃王叅軍還忽辱賜書且怍且愕不  
知所喻又云嘗枉舟船竟無緣瞻候光景至今  
聞之益以欽嘆僕本弱才而頗有志于古之道  
間嘗為文亦不欲飾募詞以希近觀徃徃拙樸

過之雖同志者稀所欣賞然枯槁于窮閭久矣  
元美反以為然乃稍一抽揚之私自以為過量  
不意復謀知於足下且足下体德含弘才情卓  
犖遠規屈景之清則而又身居顯重之地吐音  
抗論便足經世而乃猥辱于蓬茨之微定交千  
里之外若數接顏慤懃最故者縱風義所昵有  
遺形骸如僕弱才又豈宜荷昔李充說士甘于  
食肉由斯而言豈誠過足下哉而足下又以僕  
方之禎卿禎卿婉約有度晉宋而下咸可伯仲



若元美信斯人之儔也而後邁時或過之其他  
苟有牽率終未稱為成章以僕方之非其實矣  
僕今痿守窮城又遭歲惡夙夜焦灼繫心靡所  
而于筆札實有未遑足下又懸索之不以為陋  
雖欲申其極思已見乏源奈何聊徃雜詩數首  
以復來諭而足下亦不必盡求之於詞也惟當  
抱義閑卧以報足下之相知而已足下惟矜察  
之瞻望既遐彌勤企想

荅陸光祿書

昨蒙謬眷猥示以所著文籍私幸左右將以發  
蒙而實非淺弊者所易稱言且允文處才非時  
身自癘痼永期沒齒而日月既悠信道未篤每  
若履歲崔之絕崖臨廣野之無垠而狹中弱操  
顧盻周馳不覺汪洋忽以自失因仰希古人立  
言之旨庶幾接武往躅而才與願違日得日喪  
又無異越人之學遠射參天而發適在五步之  
內耳以此媿恨靡以自裁而左右廼謂其粗有  
知識至今以所著文就加校戡承命反側日夕



研求冀獲贖隱以資起予竊惟左右抱道含德  
遺榮杜門玄覽六經大聖之要典發其精英以  
標人文之準積有歲年今如郊祀議旁綜博引  
章明天地之體以北郊配南郊非古以正大禮  
刑法志卒反傳忠蹇傳以省刑為本持法為平  
忠賢有匪躬之節真足以昭直羸而挫頑佞歌  
詩取恬淡冥寂為高徃徃出於無心而其趣已  
至至於書序銘誌之作尤有慈雅篤厚之誠大  
抵因文寄心託理定制非如近世循膚剝剝盡  
於詞而已夫天地發育萬物迫遽有不得不然  
者豈宜淺弊者咕咕搖舌妄於稱言哉古之子  
雲在後世之相知耳今李緒瑣瑣誠奚足云謹  
少効鄙人之私造次求益辭拙意簡不備宣陳  
伏惟矜其愚而加察焉允文頓首再拜

上郡學教授向先生書

比年獲仰覲光貌兼承誨言悼其無成深加獎  
掖私心荷遽不知所云恭承先生才為世出行  
履謙冲道緼苞舍志極通濟辭紛濃而守高棲



淡泊以持神推德匿瑕陶鑿庶品於時飛文吐  
華之士談經味道之賢莫不嘔嘔喁喁稽謀問  
意其不以此時觀歡愉備末議竭心慮求所謂  
瞻仰重輿之美進退羣班之次而欲捐放於教  
外含憾而勤卑是何拙惑之甚也竊又歷方古  
之魁士若子張以鄙家而學于孔子段干木以  
大駟而學于子夏高何子石之暴也而學于墨  
翟索盧參之狡也而學于禽滑離四子者戮辱  
之人也非惟能免于戮辱皆有以顯當年而名

後世者得其師也今某固不能參跡于四子而  
亦無四子之穢德然獨含憾勤卑外違盛教之  
益內包拙惑之差豈直闢隘晦暖排摧禮俗之  
謂乎綜量致實靡所折衷以此為謀誠非得已  
是以私曲煩縕固非筆札所能盡若不假此以  
自通則雖有控款勤懇之愚拜控無路矣敢不  
陳寫以自解達某竊聞天不一時故能委命相  
高而成萬化士不一行故能遺世獨立而興事  
功其居也澗潛其動也龍變是故古之豪傑之



士能不令已失時當其得也若超踰杳冥而蹶  
高衢煌煌乎其言赫赫乎其行翱翔魏闕之上  
而名滿四海之內生則德澤被生民死則勛業  
鏤鼎彝光輝灼而耀舉世所慕希若夫藏彩韜  
光盤桓壤室不搖暴不詭隨不激昂以為清不  
矯抗以為危不冒詬以逞願而志乎德行不嚙  
意以渝檢而言範乎詩書聲溺于委巷善止于  
一軀恬愉而不矜介乎其無所於趨夷險于夷  
於分之宜泊然無所厚于世而世亦莫之知及

其精宅於載藉貽誨於來世羣鄙既遠而曠然  
獨峙此其究也是二者所由異路而同歸於純  
軌今某性能頑乏體質偏拘身無特達之節行  
無推擇之奇昧通人之遠致局曲士之熾棲於  
是二者而咸無所取則焉雖復累稔弥年耽精  
於藝術摹思於重深而識慙奇分未烹百的徒  
懷伎癢終媿前英縱或志慮開拔遣詞過人滅  
口譏彈卓為精正亦欣然便以為得然而知其  
一之得而未睹其一之失也是故智者附權達



士因時裸入而衣出者禹不能變裸人之俗錦  
衣而吹笙者墨翟不能違荆王之所欲吹籟雖  
善不如野音之適也鼓瑟雖工不如工竽之得  
也與衆殊伎者必孤而難合與時異趨者雖勞  
而無功今某既無可協之運而技有殊衆之嫌  
况復疾疾弥年精氣羸弱而欲與汗血之士賈  
勇相排虛盡日月雖使天假其年至于盛危昏  
塞皤然為遺種之老終無一成豈不深可惜哉  
且某受命非厚小兒裁六歲而兩目失明隨聲

辯人動止無據投足向路怕若避柱更步生途  
怖于履虎形性相離指畫失實是以觸目增感  
不能湏臾去心但有悲慨耳推之人理已極遂  
用殄念剪跡固守其常以俟天道之終有復也  
豈敢言非其願萬一有所希望以招穢於塵形  
哉某又竊念受教於門下之日已久不能數數  
候見以發其覆一旦欲自引去而齋志於泯泯  
以無聞是誠宜遇而不遇也許莫有悖于此者  
故既為書一通而又繕寫舊作一帙以畢所愚



儻奪覽觀而甄裁之則是鳥語蓮伯翳而綜聲  
牛鳴遙葛盧而辯音荆山之璆不離斷趾即有  
以垂洪輝而發長譽踰輪山子之駿一遇寒風  
贊君之後即有以見微表而貴其能千里也豈  
不幸甚幸甚謹伏候門下以拜教命之辱無任  
惶悚之至不宣

荅歸有光書

某頃首熙甫足下承示所叙為張烈婦事文妙  
理直能詳極其鴻烈義行讀之驚惋無已十室  
之邑必有忠信靈芝醴泉豈有涯擇哉及覽所  
為諸友生書又歎足下美志風義振於流俗而  
悲俗世之日靡也嗟乎今夫稱至德懿行於人  
雖使愚者聞之必慕而悅之而知其為賢也語  
淫溷汙濁於人雖使不肖者聞之必憤而疾之  
而知其為惡也今親見其人之賢至于殺身而  
疑之親見其人之惡至於殺人而不能憤與疾  
焉自今以往天下之為善為惡者又將何所止  
極耶則是陳縞黜於瞽奏英韶於聾者豈若數



彞倫反道敗德恟愁煩寃其利害如今日然  
而女有不易之行而士固有一定之論四海之  
內八殯之外與千百世之後其人豈盡終於齷  
瞖斃彞倫反道敗德恟愁煩寃如今日而已耶  
語曰鍾山之玉炊以鑪灰三日三夜而色澤不  
變則至德天地之精也精誠之至同乎天符古  
之瑰瑋豪傑抗行之子所以憑心積望顛顛憤  
恨懷氣於當年而能不與世劇滅者必有待於  
千百世之後千百世之後其人與我不相解達

也而獨能大揚摧之豈世真有遇不遇耶故天  
下之事始疑而終決者其決也必足以布信于  
天下始晦而終彰者其彰也必足以揆麗於千  
春今且下之義能使庶女之寃一旦如剗重淵  
揭日月以銷東南數百里之旱豈不躡與如必  
欲僕有所撰述以昭此方之人用以為榮恐薄  
德徒勤翰墨不足以恢作者之軌為衆所信傳  
示來世也茲具小札聊布所懷以附徃信

與李于麟書



僕寢跡林野無異鑿坏乃辱王青州元美數見  
相存許為知己與之分好亦已數年元美每稱  
足下之賢有耿介不拔之操奮詞綴句有德踵  
偉長之遺聲比徐汀州子與按部又出示足下  
五子詩音義清妙吟誦于口耽玩於心非復常  
言可比念不獲即与足下晤對聆其緒言以為  
歎恨頃又聞足下遠見獨慮翩然高舉盛年息  
心開廓止足之分意雖九有之廣實鮮斯儔真  
可謂風疎人倫之表情逸雲嶠之外者矣即另  
容薄游何以過之元美書來以僕與足下既生  
長同世而姓字康康苟風期所親亦奚在于數  
面耶深感斯言之達輒不量其鄙淺聊送詩二  
篇以當面覲臨書不勝縷縷

與吳給事明可書

前嘗兩奉書雖不得問懸知雅意垂篤也子與  
太守按部過辱枉賁衡闈間誦足下所貽新詩  
清白遠調冷然奏響入耳愜心足想逸情不可  
言了接後又聞此詩已附周水部處尋往索之



竟不得愴恨莫可言伏省足下英才峻節定躅  
古人自宜與時齟齬但感慨不能不于此而係  
之于此為文反復有奇邁絕俗之思蓋與世既  
遠不從蹴躡塵埃間耳足下必大獲之倘不惜  
少傳其聲令共和之未為失也子與八閩云必  
要足下晤言因上狀布悃親覲無期不勝企戀

荅王元美書

比緣微痾遂致困憊弥曠日決旬矣中得足下  
函書兼蒙厚貺番展再三省足下戀戀之意不  
覺灑然頓欲湔此痾苦耳僕前時奉書亦緣火  
氣燥發頭岑岑寫過忽便遺忘得無有相詆語  
否挽詞佳甚恐不宜大出示人也子與醜籍高  
流然非足下無以發之其能傾倒人至此豈其  
性然耶邂逅來每自念足下不去口實足下想  
亦同之足下按淄青來曾未踰羊而長譽日至  
甚善昔司馬子長叙其民俗寬緩闊迤有大國  
之風而足下又盛稱其山海勝勢多古賢士大  
夫之遺躅誠鄙人所引領第自拘迫真若置鞫



域中不能一蹴而起復何緣高視闊步跌跌取  
路千里邪特想足下寸心周馳飄飄比之懸旌  
耳明善春時已決計北游僕直須寄心假彼一  
吐也人生最耆老無百年之期僕亦非不念此  
若更役役非心所便轉復不喜意足下亦不以  
此相短故偵僕委曲使者臨當發遲還書餘病  
尚未歡痊不能悉天氣向寒願自愛乃慰遠懷  
荅吳明卿書

志道來具審動理佳豫治行廉明為世矜範且  
復貽以妙詩謬加推許灑然清響都盡常言又  
特損資相餉紆意弥隆遠而不遺刻心何已雖  
僕與足下限闊平生而遙情相懽逾於面昵東  
方之言誠非虛設於千古也但未審何時獲奉  
良談以慰傾渴元美當亦未竭情塵必不以縫  
掖之賤加於二千石也想為大噉山川伊阻是  
用痛脰書不具宣

與吳明卿

去月雖附書徃信而瞻晤眇復無期可為歎恨



所命詩序深媿淺劣不能曲討微言章闡大雅  
然尋玩既久粗能會心用述彷彿冀答來旨辟  
猶蒙褐璆琳器類殊別益復重傷其致耳昔宣  
尼不假蓋於子夏是不謬其所短也足下於僕  
將無謬乎王節推周慎好古元美實其宗門今  
接比貴郡其信往復用為書郵當無金玉其音  
以副飢渴喜復何言

與李于鱗

去冬元美還稱足下衝寒出四百里外相唁真  
凜凜有古人之壯節且損唇妙詩特以相况所  
謂渥洼之駒龍門之桐大非倫匹矣三復來美  
良以媿懷未知何緣追逐高踪臨帟不覺神為  
之馳也

又

昨見遊華山長句甚佳又聞有華山記當是奇  
文幸不惜惠示令共欣賞也聞足下下山時從  
叢棘中出衣襦盡為冑刺又述失道退之以來  
惟王安道與足下三人而已安道名履元末時



人精醫藥方嘗游此山頗為詩亡慮數千言至今猶傳寫之又善畫自為圖四十幅用馬遠夏珪墨法今臨本亦殊絕也暇時當臨一二帝奉觀以見古今人之不相遠耳

答汪中丞

伏惟足下碩學偉才既已白著中朝而旁宣義風開廓大分又能遠追中散千里之遊足使聞者稱美甚善元美兄弟方殫為足下治具以究平原十日之歡不謂旦夕乃遽揚舲而西而僕亦竟不得少觀光儀每以為恨頃元美還課辱手翰款然翕其虛襟汎如獎拔時雖榜人乘流迅邁俾高張咫尺有飛沉之異然情寄委萬絕過始圖殆非常言可擬知便還京口當暫停憩而裹疾淹遲不果輒行以副此懷聊撰古詩一篇用見傾企特冀省納以備譏彈不宣

與周大參乞除名書

承諭本縣猥以賤名應詔退自循省不覺汗流竊念朝廷初綱亟於圖治雖於淪蹟廣為甄



求以其人居必有絕俗邁倫之行出必有贊皇  
知化之略乃久自藏珍委而勿用時所歎譽咸  
謂述邦是宜特為昭宣以答天旨如允文性姿  
庸陋藝術凡蕪名廁編戶之微身嬰沉痾之疾  
杜門屏跡積有歲年庭長仲蔚之蒿座穿幼安  
之榻誠以息心沒齒靡敢外干矧今濟時賢充  
溢閭閻而獨垂情允文言之則有爽其實用之  
則無補於時如斯之人實濫清舉尤於神明之  
宰寧不有損知人之指獲譴衆多不容於口伏

惟君子相知有素曲為轉達便使除名則河東  
白豕無復貽哂今日事出至衷必冀垂省不宣

答徐子與

去歲承手翰卒卒奉復竟失候太夫人行期深  
用悚惕比辱遣書兼致腆貺念之下誠有切至  
之懷愧荷殆無以喻元美云如足下古意於濁  
世見之尤足為慰可謂知足下矣聞足下治汝  
寧能使時和穀熟剔去宿蠹吏民敬信遂大喜  
為撰循吏贊奉貽欲足下益以崇萬斯義方之



古人也且又以汝寧名郡多古賢豪之蹟尚缺  
記載輒欲相要采輯遺事將以傳之通都副在  
名山此則循吏之規規所未遑也至如某何以  
堪此惟乏下才弘學瞻雖當史事之煩必有餘  
力以膺制作之任而遠以濫推是使蒼蠅附驥  
尾而致千里也况復歆以嵩少之游豈不大快  
於私懷特乏下為恩之博而忘其力之絀薄也  
必俟暮春氣暄寒疾瘥損或當為乏下千里之  
行并展契闊信還謹布微悃諸惟順時調攝為

慰不宣

又

前在吳門奉覲顏色得拜子相之喪匆匆奉別  
雨中發舟不勝悵恨比自秋冬又苦舊疾無緣  
遣信以解契濶比得公瑕處去月書知足下又  
往拜子相於金陵蘭若中僕亦欲為誄詞以答  
子相之知至今尚不得一字而王司馬函問荐  
及忽若陰刃深入不覺至痛之切也比聞司馬  
臨刑時不俟覆請元美兄弟欲上書辯寃徐少



傳鬻指相解事後五日已出都城計當留泊臨  
淄解凍時可南下耳相知數子袖變略盡推之  
人理當復何言比元美兄弟並有書稽此隨馳  
上所須扁書并門帖子方疾發財得書去人又  
不欲停未能卒寫當亦在舊歲附往也不悉

又

承使者再至禮隆物重深自省忖過於所當且  
又盛稱彼山川之奇欲致同賞竊自謂生平鬱  
鬱有踰沉沉今乃驟發於公是雖抱疾弥年必

欲決力并奔以赴公之課知亦須令千載聞之  
以為快耳不意吾徒數公動輒困躓此誠天窮  
非特人事然也王室多違賢人矢志即雲羅天  
經所挂竟何物邪良以歎恨首夏計抵吳門必  
須一信當奉詣暫遣積意至願至願所賦隨欲  
附復恐有遺誤容俟別上使還謹勒杖布悃諸  
惟順時珍調為慰

謝王太守

頃承台慈曲降尊貺下逮蓬茨雖復懸罄之室



榮光所浹頓使忘貧因語府庭展其愷欵以答  
所天不圖江海鴻流弥增深廣愍其垢穢轉與  
滄滌益賜燕閒浮觴接侍略去威重良誨繁加  
時惟許丞正頗重聽而次公仁篤附特亮音垂迫  
闡夕罔知厭怠仍遣夜直引照明燈不知何能  
叨此汎愛念雖隕越未足酬當是以引照明燈  
不知何能叨此汎愛念雖隕越未足酬當是以  
引退信宿薰復詣謝緣狹舸搖蕩涼雨滋浥舊  
疾載嬰便亟歸還仰惟事尊罪涉踈簡眇然翹

首靡以自寧隨命詠賦圖冊諸詩已竭庸思屬  
韻成篇然蕪類百端多自憎恧不敢輒獻竊恐  
稽久負譴至深謹遣狀奉白委曲想大雅舍弘  
必蒙刊定德教所及喜復何量伏希不勝屏營  
悚感之至

荅王元美

方春暄燠體力漸平忽奉膺月書具審佳勝并  
蒙惠藥物慰荷無量去歲春時辱以枸杞葡萄  
潞紬為信以殊方異產即便分餉親舊与足下



相違五霜前後得十四書情之周渥固無踰足  
下然足下於此似有故人之累媿可言邪且又  
以僕與足下雖音問時時相聞獨未得接杯酒  
為歡今足下於青州吏民絕有名跡必得大拜  
時或來南一握手耳昨聞吳明可竟尔罷去吳  
楚違遠已無有覲會之期盧次梗初聞自淞江  
來郡中時友生嘗於扇上出僕詩次梗遂題其  
後以見薦好竟未得一面也徐子與方持父喪  
士之不遇良可歎恨于鱗高蹈獨遊斯人實難  
其儔也僕雖未與之接適心竊慕之且承來論  
因撰古詩二篇以通款曲尚俟刊定足下可發  
視之寄去也所論尊府司馬公親過強虜以當  
盛秋而復抑馘齟齬夫人之醜正言能非一世  
也應德功名日損所謂遵養時晦乃若是耶命  
寫洛神賦書殊不佳大不便於公面也隨附信  
往諸惟自愛強立脩名不具

謝徐子與

頃承誨命力殫薄伎且咀吮衆腴弥使茂實不



鮮方內舍私慚而還書累復溢於獎譽又兼貺  
醫林方書黃精珠墨絨履且竒方秘於鴻寶靈  
藥表於銅山信振衰延年食餌養體之所須也  
而絨履過於純絲非止飾足温燠抑以緻理若  
夫嫩烟紺黝凝華發采即以仲將自詡有不能  
加發書開函益用祇悚本圖會莖山園冀申言  
侍無狀舊疾未便盡除年齒漸衰適值陰景遂  
不能遠離戶庭重有慨戀必蒙原察適臨書不  
勝邑邑

答張推官

恭承嘉命臨貺蓬樞非望所圖漸幸交至輒遂  
忘其陋劣牽綴成詞蚩鄙百端點穢圖冊殊不  
足以知通人之遠致是以累日不獻其為媿悚  
何可復言且仰承明公高懷雅度所至興文緣  
物附情動無乏思回環誦玩彌見其佳即欲詣  
謝階墀緣賤恙不便舟舩謹令家弟齎狀奉伸  
微悃伏惟俯賜鑒宥不任感惕敬謹之至

與王元美



僕窮居寡俦晝日瞻聽既以自娛至宵寤益復  
媿媿神魂鬱塞惟得足下一書輒欣喜尋玩黑  
日亦以嘉足下之高義歎知我者之真能慰心  
也去月聞尊公司馬忽罹橫變闔門驚惋不知  
足下何自為懷又聞足下義烈天葬即欲詣關  
通尺牘追緹紫之往躅恐今足下之事非一女  
子所比昔文帝以一女子之言聽贖其父之死  
歲中曰除肉刑之法蓋漢之至仁主也古人之  
陳迹曷可妄追尊公功多而援薄歟淺而猜深  
其紛當未能即解也且伐巨木者不先去其柯  
條本雖僵仆遭之者必蒙傾壓之患何則木之  
巨者其柯條必繁蔽翳必廣雖有斧斤懸於空  
虛其勢未易相加也是以柯條未去誠不能盡  
絕其本恐今足下之家將復有謀其柯條者願  
足下深思之以茂遠猷會面無期北望不勝邑  
邑

答沈亮俞

所賦羅浮石硯比夜歸裝函視之光彩彫瑩如



丹霞白雲爛然滿日稍拂烟黛涵若玄霧乍披  
林頰逸出足令展竒思也昔張祐令南海得浮  
羅石筍遂自克歸今僕不踰戶庭忽蒙足下致  
此喜可言耶將贊稱為羅浮君與之游旋於竹  
素之園見足下雅懷耳先遣狀奉白方秋熾灼  
未緣過足下高齋謝也

與周維辰

嘗所奉書卒卒臨帑因事達之不復致思而遂  
辱見留昔曹君苗見陸士衡文輒云欲燒筆硯  
今自視其醜寧不內愧於心乎聊復別寫數帑  
相易更視它日不知當復勝此也

答程子行

承雅意以文字相推一有纖疑便從訂正念足  
下聰明良以為快乃辱不遺遠致佳惠山憲掇  
茗時復出之荷不可言已卜鄔氏北宅今移家  
矣弄孫之兆尚爾寂然且朱婚一旦夭折事事  
相關悽悶莫可自解垂老罹此柰何柰何鳳洲  
伯仲文贊并所寄書刻附上詩序比未緣無時



餘暇遂至遲滯杪秋定畢此逋不負也信還附  
謝諸侯面不盡

又

承垂念佳惠時及感荷無已且專意小兒遲子  
至欲禱神益省情至但自有數為之柰何所委  
序文當俟暇時具草不負詩稿須以臨行時改  
正本寄來再校鳳洲仲冬時可轉其乃即初場  
已中二場以失表下年號貼出蓋決料才也見  
當致厚意令毋舅歸便草草布謝小物將遠款

亮之

又

遠遠忽忽四霜歲月道迫胤嗣蕭條此雖有數  
時使悵然辱厚情懸念遂煩玉趾往禱靈岳兼  
蒙損貲遠致符籙若果岳能降神使小兒永藉  
冲蔭即有能羆之祥豈惟終身之感而已湯餅  
之歡必佇相過耳玆墨甘餌益損佳惠悚息悚  
息知婚嫁方殷未期面晤輒勒狀奉謝不悉

又



去歲匆匆附慰此後不得一問比審體中復為  
瘡瘍所窘憂中仍爾加厄非情所堪柰何當慎  
加調攝以答賢母存時之慈可耳道遠無能展  
私聊寄香帛見欵計不以薄為嫌也前所托物  
俾致元美兄弟時有謝帖敬美發時令道謝意  
所往物乞檢入之汪羅山兄弟曾往唁不期春  
夏過晤果不徐觀察約抄春假晤亦并為申委  
曲笑諸俟後信不備

又

比數承遺惠匆匆不得附書有言輒附語令辨  
致之想能亮也墓文已刻石搨碑人在王太理  
所至便搨寄傳文來月亦可畢業徐方伯王少  
叅二公哀詞恐不久亦當寄來諸委曲當已達  
籠禽甚馴擾可愛但其聲弱似於穴中稍怯耳  
遠物固自珍之未審何日得共聆之解濶懷也  
羅山得數面不見間與致意舊歲汪仲淹至道  
君意欲乞墓表想其司馬公亦已知之俟少暇  
為致書亦未晚方有小惡草草具狀不能悉



又

久不聞問極為懸想且知令孫失於周慎其用於邑僕幸德庇近得一孫亦兩月裏頽之年聊足自慰賢郎壯少當更蕃衍不必過慮損冲懷也誌文承論改定馬生遠竄難覓遂倩唐家勒石似勝舊刻未審以為何如徐方伯竟尔奄殂其輓詞已不可得惟王憲副久不寄來當促之耳信便草草附布濶悰不悉



仲蔚先生集卷之二十四



吳郡俞允文著

休寧程善定梓

跋

題翁氏宗譜

翁文欽嘗乞余為宗譜序而文欽自少客游不復見大宗之譜自其先學士下至郡馬六世皆不詳其諱字官爵行實比文欽歿後數年而其兄德輝持譜欲余增書之余識德輝兄弟既久



德輝歸已餘二十年老矣文欽又歿德輝再至  
余感其兄弟之友愛而皆知重其本也乃復為  
綴記其後按學士公諱沘字子平號青山唐僖  
宗時以進士拜學士後以親老婦養于家惇行  
孝弟時都官負外郎李頻言公德于朝詔徵不  
就上甚嘉之所著有青山集都尉公諱炳字光  
遠光啓二年擒黃巢有功封都尉京兆公諱應  
弼字朝佑宗淳祐中登進士授徽州績谿令歷  
官御史京兆尹翰林學士脩玉牒轉工部侍郎  
並馳又若有依仁率舞之態揆之賦贊所稱往  
往而合是以知其出於一時無疑也夫太宗弱  
冠而起義兵定天下未三十而即帝位智靡勅  
敵威懾黠夷自謂其功頗有加于三代撥亂之  
主此特令臣工侈其事以矜遠人然方諸旅葵  
之訓豈無慚德于此亦有以見貞觀之治而君  
臣之相與者如斯而已

題沈周雞雉圖後

昔五代梅行思善畫雞世遂號為梅家雞而周



此圖所畫雞雛能各極生態假令在當時亦豈  
後於行思哉此圖出於王府博家而魏子購得  
之珍於金玉携以相示余以雞特常畜一點染  
於毫端便使人嗜玩之不已其神妙真有出於  
形似之外者因留几間數日題其後而歸之而  
知尤物之能移人也

題麻姑仙壇刺

顏魯公麻姑山仙壇記有大楷碑在宋時已經  
火不存今此小楷或云非魯公書然觀其楷法  
精巖勁拔非魯公不能豈以公平生無它細書  
耶意此書執筆甚堅故能委曲盡勢學者須以  
此為法也近此碑後有兩裂文亦漫漶不鮮此  
獨完好當是前代榻本

題松雪書

余嗜松雪書不減剡野而此書爛漫信筆兼多  
竒語精佳且雜卉小幅尤得象外之趣可稱三  
絕真能使人意移而增嗜也剡楚比來書甚佳  
知其多出於此當為改觀以俟



題大叅永嘉王公所藏趙子昂書大洞經  
後

允文嘗以大洞經乃晉宋時人摺拾叅同契黃  
庭內外景諸經為之托之降神欲以取信然其  
文清旨飄飄真若有出於埃壙之表故每喜誦  
之時撰游仙十章用以寄志大叅永嘉王公遣  
示趙承旨所書此經命使題識竊謂承旨書於  
內外典為最多而此書似特整潔豈亦美其文  
邪承旨初學二王晚入北海而此書無北海法

疑其為中年筆也瓊笈金書實稱秘籍受命兢  
悚仍加歎慕固以局狹罔覲幽溪獨塵恩篇題  
以為幸耳

題海天落照圖

唐李將軍父子畫世不多有王大理元美遺示  
仇實夫所為湯氏摹昭道海天落照圖特為奇  
絕若其晴蛟蒸雲不能彌天而恠氣曛黃悲變  
初色海島瀲灩村榭晶熒叅差縷分如出幻景  
措意著色尤非平時落照可以令摹本若此不



知昭道之蹟又當何如耶昭道本已入內府經  
煨燼矣則此本宜為人間所寶輒綴書其後云  
題趙伯駒畫陶靖節歸去來辭圖趙承旨  
書詞真蹟  
昔人謂趙伯駒畫人物精神清潤觀此圖雖無  
款署知當為伯駒筆也况其詞又承旨晚年之  
書最為精絕元美大理得之張幼于既自題其  
後復俾余鑒定知其愛翫之無已也

題文待詔玄墓四游圖

玄墓者昔宋青州刺史郁泰玄墓在山中初泰  
玄為人仁恕德感鳥獸莖日有羣燕數千啣土  
冢上時人異之遂以郁名命其山其山巖巒迴  
複翠竹蒼松蒨蔚嵐霧白挹太湖又遠離城市  
有奧絕之勝余嘗至光福云有山徑可數里拉  
玄墓時雨氣昏甚不果往遂出虎山至銅阮而  
還今觀文太史所為與陸儀部畫四游小幅益  
知其勝非它山可比悔當時之不能往也為題  
四絕遙紀其勝云



題褚摹蘭亭

米元章書史云唐摹蘭亭有二其一為王文惠家褚遂良黃絹上臨本其一劉涇收唐絹臨本今此本是元章所題手筆審定真跡以為褚法之妙薛魏歐虞所不能及殆即黃絹本也大理以十三百千購得之仍詳訂其始末復以示余已無能讚歎聊補其未備云

題元人臨聖教序

唐太宗貞觀中購求羲之真書得五十紙行書二百四十帋草書二千帋令魏少師虞永興褚河南勘定真偽殆盡民間所有故此序懷仁集羲之行書刻石悉其褒集之富大小相類若出一時之書簡珠良玉無俟旁求卒能致美時褚河南亦有臨本今此書結構圓熟鮮失矩度誠可云功深力到者長興姚知道出以相示因識之

書王青州元美白蓮圖社後

遠公初從佛馱跋陀羅三藏授念佛三昧與弟



惠持高僧慧永朝賢隱士一百二十三人鑿山  
為銘誓生淨土劉遺民為之著文此特稱十八  
賢者蓋擇其最賢者入社耳然考其時同誓有  
關公則者歿後友人於東京白馬寺為公則追  
忌是夕林殿皆作金色聞空中有聲曰我關公  
則也向所祈往生極樂寶國今已果矣故耒相  
報佛氏以靈悟為最上乘就其眾中如公則最  
為靈悟友道林虞孝敬並有贊文而十八賢乃  
不稱公則何也王青州元美以蓮社圖屬書宋  
李元中所為圖記輒附記以闕其疑

題王右軍草書要領

草書要領晉右將軍王羲之家藏本其法有旁  
截類聚奇字怪字真同草異真異草同疑似變  
化加字易字五集唐天寶十一年虞世南歐陽  
詢妣思廉薛元敬蔡允恭張旭臨寫補缺張彖  
郭子儀薛收顏真卿填楷李白替楷廣德三年  
懷素重補迨宋紹興中又令蔡卞臨補米友仁  
補楷摹刻祕閣今觀其書多醜惡此又後世傳



俞仲蔚先生集卷之十四  
刻失真至此也嘉靖四十有五年六月廿七日  
觀

明處士俞仲蔚先生行狀

萬曆七年己卯八月四日崑有隱君子俞仲蔚  
卒其子伯安即以次月廿九日壬申寔於祖塋  
之昭位以君之不遇也將求志於名世者以為  
不朽之謀謂余素辱愛於君命為之狀嗚呼予  
何敢以不文辭按君姓俞氏初名允執更名允  
文仲蔚其字也世為崑山人曾祖山祖高皆隱  
德不仕父璋舉正德辛未進士授嘉興府推官  
繼丁內外艱復除湖州泉州二郡所至以平恕



稱擢南京大理寺評事鬱鬱不得志以疾卒於  
官時君年甫十二與兄允升弟允濟奉母黃夫  
人輿襯還家君孝性天至哀感行路見者為之  
酸鼻評事公故廉吏家徒四壁立而君祖妣陸  
孺人猶在堂君兄弟以藐然孤童上侍兩大人  
外持門戶內外肅然人謂俞氏有子矣君稍長  
即游心文藝然雅不好舉子業唯喜讀古文辭  
及臨摹法書作為歌詩極力模擬古人動以晉  
魏為法大曆以下弗論也間出驚人語即為人

贈善慶靈公賜紫絲網袋盛誥勅祠加以銀鐻  
仍令太常寺立像命配本府烏龍廟奉軍公諱  
省字日新宋寶祐四年登進士授饒州貴池令  
遷本府同知歷湖州司理參軍郡馬公諱鵬字  
萬里為郡馬夫自學士至郡馬凡六世今考應  
弼父諱登以子貴贈正惠昭德公立像下梅菴  
而此譜失載不知何也余并為增書之俾合大  
宗之譜而輝之後世亦皆有所考也

題職貢獅子圖後



此職貢獅子圖也唐閣立本實為之宋宣和中  
嘗秘之內府按唐史貞觀九年四月壬寅康國  
獻獅子太宗珍其遠來詔虞世南作賦編之東  
觀而張九齡等咸為之贊立本時以圖画見知  
其秦府十八學士圖凌烟閣功臣圖與春苑池  
異鳥圖當時以為絕妙余意此圖必與世南九  
齡等賦贊一時為之偶未著耳今觀其所圖獅  
猛異狀雄詭俊特真能內視犀象孩撫熊羆有  
非它獸可以至其斂尾弭耳柔馴服御與羣胡

傳誦嘗戲作馬鞍山賦人爭稱之年十七奉黃  
夫人命以易學出試郡別駕李公浙由即署左  
遷頗以才自負見君之作以神龍天馬目之君  
柳儀部之稱毛穎傳者尋薦於督學侍御章公  
衮補郡庠弟子負時有建白以春秋禮記二經  
傳習者少令督學使者擇高才生改授之君乃  
讀春秋然時業俳偶割裂之習君素厭苦之數  
欲褫衣冠焚書冊浮游塵垢之外黃夫人力禁  
之乃止邑中有吳中英先生高才博學善獎掖



後進有郭有道之風見君集有黃鶯飛過山庭  
暮欲語不語顏色苦之句大加稱賞遂忘年而  
友之奇文疑義相與辨析往往至於達曙同里  
張通叅石川先生喜吟咏廣交游雅與君善嘗  
偕謁文太史衡山出趙松雪馬圖令君題賦文  
亟加許重張公結社湖南社中有尚書南坦劉  
公箬溪顧公皆海內搢紳冠冕一見君即重其  
器度及席上賦詩又獨屈其坐人皆推以為上  
客由是諸公互為延譽人間漸知有仲蔚矣嘉

靖丁未督學使者豫章胡公植按吳君決意求  
去郡守豐城范公慶惜其才極口薦之於胡仍  
力留君就試然胡竟不知君君亦不求知也遂  
辭歸益閉戶讀書肆力古學或摸搨古書刻瑕  
則玩禽魚花卉以自娛所養益純所造益遠鮑  
之者如入芝蘭之室而飲醇醪也今廷尉鳳洲  
王公雋才早貴其學無所不闕俯視一世獨折  
節友君時有同志五人者皆官於朝以文章氣  
節相砥礪世稱為六子以擬建安諸賢一時聞



君名皆爭願與之交方伯長興徐公中行往來  
吳門必迂駕就君戀戀不忍去於是君名日起  
知君者不獨在東南一隅矣使者行部及守土  
諸公與達官貴人之道崑者往往禮君之廬寄  
以布素之意而君愈以謙虛恬靖自牧終歲不  
一至公庭有不可已者僅於舟中一報謝而已  
楚藩以脩書聘郡侯以脩志聘皆以疾辭不就  
晚節詞翰並臻妙境乞詩索書者肩摩踵接君  
一一應之不以貴賤貧富有間每揮毫構思率

以昏夜能於燭下蠅頭細書了無錯悞往往夜  
分乃罷然以此耗神損血邁一疾不起矣君貌  
古而神情清澈望之者知非庸人與人由由然  
無忤至於義有不可則毅然莫能干予嘗謂其  
和不徇人真不絕物周水部胤昌良以為然君  
性孝友痛廷評公早世事祖母及母夫人能養  
其志送終咸合於禮兄弟皆早世君撫其遺孤  
無異已出所以衛翼扶植之者甚至其薦於倫  
誼又如此嗚呼國家懸爵祿以待天下士豈不



欲得賢者而用之願今所用士率以科目重而  
應試者一失有司之程度即往往棄去不惜雖  
有長才異能無以自效於世若仲蔚者以彼其  
才而竟淪落草莽豈非以科目失之邪然使君  
取科名紆朱紫快意於一時則其詞章筆札必不  
能詣其至必傳於後如今也以此易彼其孰為  
得失耶君所著詩若干文若干並藏於家其生  
以正德八年癸酉六月十七日距其卒享年六  
十有七配梁氏子男一人即伯安娶周氏女四

人長適庠生朱懋承次適徐世昌周化成顧紹  
臯孫男一 孫女一字王宣鼎婦周婿朱皆  
先君率君少而孤長而窮有男而瞽有女而霜  
有絲而旁皆人所弗堪者而君居之晏如君子  
莫不多君之善於處窮而又以慨夫造物者之  
爽於福善之理此太史公所以致疑于天道也  
章志朴陋無文而辱君愛雅有素輒撫其行事  
之畧以備采擇伏惟名世君子矜而志之庶使  
仲蔚託不朽云



賜進士亞中大夫前貴州布政使司右叅政陞  
廣西按察司按察使疏

請致仕友人武陵顧章志撰

明故處士俞仲蔚先生墓志銘

玉峰之東踞婁水陽者為俞仲蔚先生墓而先  
生之葬也距其捐館舍二月餘矣廬以內無停  
哭也廬以外無停泣也邑內外無停歎息也既  
大歸視其紼有凝濕者蓋送客皆雪涕云而先  
生之友按察使顧君謂不佞章志最習先生軍  
為狀子最知先生宜志而銘其窆封之后不佞  
唯唯頷君之狀畧曰先生諱允文仲蔚其字先  
世崑山人婁業儒而其父評事公璋始顯重由



進士連任大郡司理以清幹聞入散署邑邑不  
得志病卒是時先生甫十三也而哀瘡踰禮又  
能工奉祖母陸與母黃養莊事兄允并而撫弟  
允濟咸得其志時人以是稱之先生雖從師受  
經生業頗好為古文辭爭讀六季以前書至十  
五而為馬鞍山賦按剔山事靡挂漏而辭雅馴  
絕不作時人語其名固籍籍矣又二載補郡諸  
生是時邑之耆俊若張納言寰吳貢士中英咸  
推先生為忘年友而歸太僕有光行稍近名能

經術先生以古文辭與之角頰目為甲乙社云  
然先生用語古試輒少利而又中更二太夫人  
變仕念益衰減遂移書學使者胡植請以諸生  
老田里固留之不得也先生家世窶薄又性嗜  
書不別治生日以產挫其配梁至緝緝洗而助  
之猶不給也先生獨夷然問日不能三食乎則  
姑二食乃至不二食乎則又姑一食得爰飯少  
藜菜佐之若梁肉矣先生益刻精於學所造五  
言古進薄建安退亦不失陶謝而其於歌行絕



句俱宏麗有景龍開元風騷賦誄頌宛然昭明  
所遴次晚節不盡爾也少工臨池久而益括之  
其小隸駸駸歐柳而上登山陰堂行藁出入褚  
河南稍繼之則米襄陽八分自謂得西嶽碑體  
以方韓蔡茂如矣先生白皙美風神秀眉目賦  
類飄鬚時時稱病病多頭風暑月恒御氈衾稍  
及冬加以貂冒客至隱几而對之焚香啜茗竟  
日談笑無凡語所酬應赤札頃刻數函無凡筆  
客去亦無報謁其最後執益高名益重神交者

徧天下諸以文請者不虛月以詩請者不虛日  
以草隸請者不虛刻往往得意去而里中子押  
習先生者謂先生虛和寡它嗜願嗜奇不食酒  
頗耐食甘間於島渚間淘一拳石市甘果袖而  
薦之亦輒獲數行以相矜重而是時請行部使  
者若吾故人徐君中行首造廬定交於是郡守  
王君道行中丞張君佳胤繼之而學使者吳君  
遵與中丞君遂旌其廬曰高士曰真逸御史邵  
君王君俱稱詔賚束帛醪米邵君移書欲得先



生文以為式而先生意澹如也楚王以志楚聘  
守李君以志吳聘羔鴈踵相接而皆力辭之獨  
泰政王君群果以三吳水利造實為成一編書  
而已崑令之賢者曰王侯用章與今程侯達右  
文而高先生行每過輒談笑移刻然欲伺先生  
色以間不得也程侯嘆曰古所謂微君真先生  
其人哉以故先生沒為禮祭復賻之至議舉而  
祀於學宮先生生以正德癸酉六月十七日卒  
以萬曆己卯八月初四日配即梁孺人太學生

九萬女子一伯安以瞽癡然有志行娶周氏女  
四婿為邑諸生朱懋承徐世昌周化成顧紹臯  
懋承早卒孫一尚多孫女一許字王宣鼎所著  
集若干卷藏於家王子乃言曰始予與左司馬  
汪伯玉遇燕中伯玉驟謂曰疇為布衣冠哉而  
余未有應也伯玉撫然有間曰是在仲蔚矣謂  
名傳者也非傳名者也嗟乎士苟束髮不能通  
一藝而剽其似以糊口於四方固無論也即其  
著者搔觚翰摠藻麗下上今古而割榮自樹然



得毋遊大人乎哉當士之始為業也實者九之名者一之及其就也而億矣名者九之實者一之夫以仲蔚之室室蓬戶褐衣蔬食不厭以托於著述也夫豈為刺促以希一旦名名就而實不棄志行不少削乃真仲蔚哉夫安得不布衣冠也予與之與仲蔚通也以不佞乃其相善殆甚矣仲蔚於今詩不甚推于鱗而其於古也行不滿郭有道書不滿懷素識者疑之雖然是不為侏儻吊詭者哉故宜銘

銘曰葬而卜得繇吉曰遯之賁是為霧豹文明以止於戲其文苑而逸民者邪有晏靖節其人者邪

嘉議大夫南京太理寺卿友人王世貞撰



俞徵君仲蔚元妃梁碩人墓誌銘

崑山有隱君子曰俞先生仲蔚而安俞先生隱者曰碩人梁俞先生約而善病交於世懋兄弟最深也世懋每過先生一室中壁圖史羅奇石香草語鳥籠映其間翛然忘貧也已稍徙而樓居則益辦而內閨不聞人聲間具而飾客醕糲則無弗潔也無弗旨也乃知碩人有以佐先生隱矣碩人後先生二載卒而子伯安扶服叩余泣且請曰孤之先君子之亡子之兄實銘之母



歿而不敢重以請也則維是吾子之交塙也敢以吾母之銘請世懋瞿然避席曰子之先君子今之老萊黔婁也而母老萊黔婁之婦也柰何令天下之美必吾兄弟筆也伯安則益泣而拜曰子毋重辭辭之是棄其孤盲而忘先君子之交也世懋乃謝唯唯而伯安始言狀曰維梁氏吾崑山之著姓也世以文學顯至九範公而貢於鄉也實生吾母七歲而許字先君子十九歲而始歸也蓋吾母歸而王父大理公已歿吾母

以弗逮事為恨則益莊事王母黃也大理公歿而家益落吾母拮据中夕以佐先君子匱食貧而甘於學也先君子為諸生文大有聲轍棄之去力為古文辭吾母不謂非也先君子足不踰閩而晚節名益重履滿戶外郡邑大夫禮重踰搢紳卒不降志以歿則吾母之為助多也又曰凡吾母之孝敬慈懿甚備女德不出外不可更僕道也其約而能裕隱而能安吾子悉之獨數失子五乳得不肖孤而三歲病盲百計活之



以僅有俞氏如綫之寄則終其身所為戚也先  
君子歿而見孤之有子子生四年而不祿吾母  
所為重戚也溯吾母之生自正德八年九月十  
一日卒于萬曆之九年七月十九日子女婚娶  
具先君子誌中初誌孫孫女各一今為女孫二  
也世懋之聞於伯安者如此稍次而為之言曰  
賢哉梁也非夫人孰與而康俞先生以偕隱也  
碩人年六十有八不為不壽伯安即旨而甚才  
不為無子世比于老萊黔婁之婦是足銘也其  
辭曰夾潮而墟隱士歲兮不祿不爵道文明兮  
不遜不闢澤彌長兮碩人祔之永有慶兮伯鸞  
之冢偕孟光兮馬鞍崔嵬水湯々兮

前進士陝西提學按察司副使瑯琊王世懋撰



俞仲蔚先生集序

仲蔚俞先生卒之三年而其友歛  
郡程于行氏為捐橐行其集而廷  
尉王先生序之廷尉名文章大家  
而習俞先生其所揚扃文義及稱  
引俞先生隱德至詳覈矣世以謂  
俞先生附青雲而益顯意若推功  
廷尉以為其推轂之力居多要之



廷尉公初以詩定交俞先生而又  
生平好揚人善其推轂于諸公間  
固當假令廷尉公阿私俞先生以  
為名高無論非廷尉公指即俞先  
生弗屑也今俞先生言及當世布  
衣之業具在可攷鏡已蓋明興詞  
人之業蠶起漂涌然大氏出於搢  
紳之徒而布衣窮巷之士徃々十

不得一此無異故士方窮時咀藜  
菹褐不厭死而已者曾幾何人是  
故飢寒憔悴頽首而從干謁其於  
詞特椎剽希合以自附于風騷之  
致以成其游道而其著者僅亦馮  
負小材陵轢損挫爭為名高以鯖  
五侯而已此於不朽之業奚當焉  
而耳觀者猶傳之然而士不虛得



俞允彥先生集卷之八 後序  
名不虛附當其身或勢激相重以  
夸詡得聲而百年之後形景銷滅  
同腐草木計無復之矣延俞先生  
跡不能一塵之外游不能千里之  
外蓬蒿自擁婆娑乎圖史即達官  
貴人郡國守相傳響而求先生先  
生聊一應之意泊如也豈與夫儼  
巧機辨趨時混俗遊大人以成名

者同乎哉然俞先生願以是得顯  
精覃思成一家言語不必規時好  
聲不必諧里耳若詭若匿以自致  
于不朽之域驟而讀其集泓渟奧  
衍蒼然其色非今世人也其素所  
蓄積豈偶然也哉昔永升論聖俞  
之詩以為窮而後工聖俞窮矣然  
嘗仕于朝至七品官有祿秩以贍



其妻子方諸永州窮矣以視俞先生不猶泰乎俞先生以窮故工以固窮故比老而其窮不衰而其工亦日以益甚有以哉廷尉公盛稱俞先生之文詞而推本其隱德夫者也其褻然為當世布衣之傑復何疑哉俞先生有子伯安以瞽廢

然能亟圖其親不朽而屬余嗣廷尉公言諸末簡余縱有所論述亦安能出廷尉公意表而念當俞先生時與家大夫最厚善惟紹芳亦得以通家子數就先生先生折行而進之不可以謂不知先生於是卒申廷尉公之指為序其所以俾閭巷之士欲砥行立名者庶有與



馬

萬曆癸未夏六月丙辰武陵顧紹  
芳序

俞先生集後語

俞仲蔚先生以詞賦起嘉隆間海  
內學士人人慕說仲蔚矣噫嘻仲  
蔚生有季布之聲瑯琊公為之曹  
丘沒有夷齊之名瑯琊公為之仲尼  
仲蔚集行矣為漢為魏晉為唐名  
家可手而鏡也厥嗣則又以後語相



屬文柱奚言哉蓋里之誦仲蔚者  
三迤其家常辟立窶矣乃言若是  
斐豐也不可謂不富身無寸綬之懸  
阨矣監司守令軒車造門不可謂  
不達一子痼於疾廢矣雅克孝於  
家澤於行誼直指使者觀風而表  
其閭不可謂後之人不賢彼信我誦  
彼晦我昭古之君子皆然何獨憾于  
今文柱於俞氏矣世為通好而仲蔚  
則父友不敏不謂相習敬書所見以  
補序誌之遺如此吳郡張文柱



刻俞仲蔚先生集後序

余自丁年志慕古昔足跡所至訪  
謁鴻生其行誼之高蓋未有俞先  
生者乃息游崑山以禽鳥納交焉  
先生一見驩若平生久之遂成莫  
逆先生甘貧學古託疾離俗高卧  
一榻不競於世吟詠自適積有篇  
章余取其稿屬友人汪禹又欲選



而刻之既見王先生元美已為選  
刻此念遂心萬曆庚辰先生病且  
死憾未與余永訣訃至余哭于予  
家復走哭于墓歎以善壤遷其窆  
子景平以先生命不欲改也而  
郡丞劉公欲全梓其詩文適去任  
弗克余曰此先生之靈俾余得償  
夙心乃收其全稿歸校梓于西野

書屋集凡廿四卷王先生復序于  
首其行狀志銘傳表咸附集後先  
生人品之高詩文之粹則載在諸  
公文中余何敢贅第述其生平之  
與余交者如此  
萬曆壬午春友人程善定書

